

De canonicis mediis

cap. V.

Y. IV. I



(Ad Vnum fratrem  
Petri Almyrij De  
Vincis filij Conatus  
S. M. & Reg. Minervae  
De vrb.





MANVALE  
THOMISTARVM

SEV  
BREVIS THEOLOGIÆ  
CVRSVS,

In gratiam, & commodum  
studentium editus,

AB ALM. REV. PATRE  
F. IO: BAPTISTA GONET

*Riterrensi, Ordinis FF. Prædicatorum,  
Prouinciæ Tolosanæ, strictioris  
Observantiæ, in Accademia  
Burdigalensi Antecessori.*

TOMVS PRIMVS


*Admodum Reuerendo Patri*

F. DOMINICO  
MARIÆ  
SANTINO  
AB ÆXIO,

Ordinis Prædicatorum Sac: Theol: Magistro,  
ac Almi Conuentus S. Dominici  
de Bononia Priori.


BONONIÆ, M DC. LXXXI.

Typis Iosephi Longi. Superiorum Permissu.





ADMODVM  
REVERENDE  
PATER.



ANVALE  
THOMISTA  
RVM, seu bre-

vis Theologia cursus in  
lucem è typis renascitur,  
Admodum Reverende Pa-

ter, & imprudens peragrare pertimescit, nisi prudentia ab auitis tuis Serpentibus prius instruat; Iungitur ergo illis, & si Serpens in girum reuolutus figura est Æternitatis; proximus hiscè Serpentibus nunquam mortem expauescet. Et quò unquam carius poterat cogitare per-  
fugium? Ad quem inter homines te digniorem valebat recurrere, qui tam suavi humanitatis imperio animas benignissimè regis, ut Dominici Canis  
nun-

nunquam magè prouidum,  
magè benignum pastorem  
huic gregi cognouisse pro-  
fiteatur? Porro ad quem-  
te digniorem, qui eloquen-  
tiam Latini Oratoris annu-  
latus Euangelica vi cor-  
da, & animas deuincere  
soles, & æterni Numinis  
suauis iugo donare? Si an-  
tiquitus solebant palmæ  
incorruptæ legis symbo-  
lum, Idumæis arreptæ re-  
gionibus, legum professo-  
ribus tradi, meliori ego  
pactò opusculum hoc tibi  
dicare decreui, ut illud

a 3 quod

quod Theologica facultati  
in sinu sedem aperiens ,  
sublimissimo debetur Theo-  
logie Professori : Hylari  
(precor te) igitur vultu  
hoc munusculum accipe ,  
& in illo Theologicis ca-  
racteribus iunctum lege  
mei cordis obsequium ; pa-  
tiaris , ut per mundum  
eruditum peruolitans , qui  
procellosissimi Oceani ad  
instar mille mordacitatum  
tegit fluctus , innumeras  
detractionum celat tempe-  
states , Cynosuram habeat  
tuum lucidissimum Sydus ;  
Sy-

Sydus illud, quod Chri-  
stiano Mundo Euangeli-  
cæ Veritatis produciens lu-  
men inter fulgorem Casto-  
ris, & nitorem Pollucis  
reponi meretur. Vale Ad-  
modum Reuerende Pater  
Vale, dùm interim præca-  
bor Cælum ut tuæ vitæ Ne-  
storeos concedat dies ani-  
marum beneficio, Sapien-  
tiæ decore, & totius ferè  
Orbis utilitate.

Adm. Reuerendæ Paternitatis Tuæ

Obsequentiss. & humilimus Seruus

Natâlis Doreguzzius.

# APPROBATIO

*Facultatis Theol. Academiæ Burdigalensis.*

**N**OS infraſcripti Cancellarius , Doctores Theologi , ac Profefſores Academiæ Burdigalensis , librum cui titulus eſt, **MANVALE THOMISTARVM** , editum à R. P. Ioanne Baptiſta Gonet Bitterenſi , Ordinis Prædicatorum , eiufdem Academiæ Profefſore & Antecefſore ; diligenter euoluimus , & nihil prorsus in eo , à fide orthodoxa , moribusque Chriſtianis auerſum diſſonumque continere reperimus , quin imò tanquam genuinum fœtum , ingenio Auſtoris ſui , ſemper ſibi ſimilis , ſibiſque conſtantis ac firmiſſimi , in exponendis propugnandiſque Sacratiffimæ & Angelicæ doctriinæ difficultatibus , digniſſimum , quantociùs prælo mandandum cenſuimus . Datum Burdigalæ diæ 16. Menſis Maij anni 1680.

*Ioannes Fontenel Cancellarius.*

*Franciſcus Arnaldus Auguſt.*

*Angelus Iatrie Carmelita .*

*Petrus Lahaye Doctior Theologus .*

---

# APPROBATIO

**I**NGENTEM Theologiæ Thomiſticæ Clypeum aduerſus nouos eius impugnatores ediderat R. P. Gonet , ſed non eos eſſe , inter



ter disputationum expertus certamina , qui periculosos ictus , vel tela admodum formidanda contorquerent , Clypeum contraxit , & ingentis Clypei loco , à se nuper editi , Clypeolum nunc eumque breuissimum aduersus eosdem impugnatores effingit . Verùm nihil ei quidquam breuitate detrahitur , quin potius eius virtus augetur , eò scilicet fortior quò magis inter se sententiarum pondera & rerum argumenta cohærent , nec longioribus dissident spatijs , sed propioribus intervallis nectuntur , ita vt cum Tertulliano dicere liceat , *quantum constringitur verbis , tantum diffunditur sensibus* . Faceffat ergo veterum præmia , *boni libri , malum semper Compendium* , sine dispendio enim est istud Compendium , cum breuitate perspicuum , cum subtilitate solidum , authoris sui fama dignissimum ; & ita numeris omnibus absolutum , vt nihil habere Compendij præter titulum videatur . Sic censeo Biterris die 19. Decemb. 1679 .

*Julianus Iosephus Gourgas , Sacrae Theologiae & iuris Canonici Doctor Parisiensis .*

---

# L I C E N T I A

*Reuerendissimi Patris Generalis .*

**N**OS F. ANTONIVS DE MONROY,  
Sacrae Theologiae Professor , ac totius  
Ordinis Fratrum Prædicatorum humilis Magister

gister Generalis, & seruus: Salutem.

TENORE PRÆSENTIVM, nostrique  
Officij authoritate, licentiam facimus &  
facultatem tibi Reuerendo Patri Fratri Io-  
anni Baptistæ Gonet Biterrensi, Ordinis  
Fratrum Prædicatorum, Prouinciæ Tolo-  
sanæ Ex Prouinciali, ac in Academia Bur-  
digalensi Antecessori, typis mandandi MA-  
NVAIE THOMISTARVM, dummodo  
tale opus fuerit approbatum à tribus Theo-  
logiæ Professoribus, per Reuerendum ad-  
modum P. Prouincialem Prouinciæ Tolo-  
sanæ designandis, seruatisque alijs de iure  
seruandis. In nomine Patris & Filij & Spi-  
ritus Sancti Amen. In quorum fidem, &c.  
Datum Romæ die 31. Iulij 1677.

*Fr. Antonius de Monroy Magister Ordinis.  
Registrata folio 2.*

*Fr. Antonius Cloche Magister & Soc.*

---

# COMMISSIO.

*R. A. P. Prouincialis.*

NOS FR. ANTONIVS MASSOVLIE  
Prouinciæ Tolosanæ, Ordinis Fra-  
trum Prædicatorum Prior Prouincialis &  
seruus, Tenore præsentium Reuerendos  
Patres Ioannem Leonardum Geay, Prio-  
rem Biterrensem, Ludouicum Bancel, &  
Hieronymum de Graife, Sacræ Theologiæ  
Professores, designamus & instituimus cen-  
fores

fores libri cui titulus est MANUALE THOMISTARVM, quem R. P. Ioannes Baptista Gonet, olim in Vniuersitate Burdigalensi Professor publicus, in lucem editurus est. Datum Valentia die 29. Octobris anni 1679. In quorum fidem his officijs nostri sigillo munitis propria manu superscripsimus.

*Fr. Antoninus Massoulie Provincialis qui  
supra. Registrata folio 2.*

*Fr. Ioannes Lapeire Socius.*

---

# APPROBATIO.

*R. P. Leonardi Geay, Sacrae Theologiae Profes-  
soris, & Conuentus Biterrensis Prioris.*

**A** DEO emicuit Theologiae Thomisticae Clypeus, vt omnes Ecclesiae montes insolito eius fulgore resplendeant. Verum sicut sol primo suo ortu montium cacumina perlustrans, in suo progressu vallium humilitatem lucis suae radijs perfundere non dedignatur: sic Author Clypei post illuminationis suo solari Clypeo sublimiorum Doctorum mentes, nunc suo Manuali Theologico ad infimorum quorumcumque Scholasticorum illuminationem properat. Ad hoc siquidem Manuale cuncta Theologiae Scholasticae arcana, veluti ad massalem summam reducta, cernuntur: sed eo ordine, tantaque soliditate, breuitate, ac perspicuitate; vt non immerito de Discipuli Manuali proferre liceat

liceat quod de Magistri Summa decantatur :  
*Stylus brevis, grata facundia, celsa, clara,  
firma sententia*. Prodeat igitur in lucem  
hocce Manuale Theologicum : prodeat ad  
Magistorum leuamen, prodeat ad Di-  
scipulorum solatium, prodeat ad commo-  
diorem omnium studiosorum vsum. Omni-  
um manibus terratur hoc Manuale Theolo-  
gicum, sicut omnes Sacri Doctores, vnus  
S. Thomæ ore locuti sunt ; ita nunc quoque  
in hoc Manuali, omnes Sacræ Theologiæ  
Professores, vnus sapientissimi D. Thomæ  
Discipuli ore, Summæ Theologiæ con-  
clusiones explicant in Scholis. Hæc sunt  
vota mea, hic sensus, hoc suffragium, quod  
libenter huic Manuali appono. Datum Bi-  
terris die 20. Nouembris anni 1679.

*Fr. Ioannes Leonardus Geay, Sacræ Theo-  
logiæ Professor, nec non Conuentus Biterrensis  
Ordinis FF. Prædicatorum humilis Prior.*

---

## APPROBATIO,

*R. P. Bancel, Ordinis Prædicatorum, Docto-  
ris aggregati & Professoris perpetui Sacræ  
Theolog. in Schola S. Thomæ in Vniuersita-  
te, examinatis pro diæcesi, & tota legatio-  
ne Auenionensi, nec non Definitoris genera-  
lis Prouinciæ Tolosanae eiusdem Ordinis.*

**O**pera Reuerendi Admodum Patris no-  
stri Gonet, Doctores vbique celebra-  
rimi, semper admiratus sum. Tanta enim  
cla-

claritate vniuersam Theologiam in lucem edidit, vt eam radijs solis scripsisse videatur. Tantaque solitudine ac industria in ea collegit selectiora SS. Patrum testimonia, & solidiora ac subtiliora Doctorum argumenta, quæ in aliorum libris sunt dispersa, vt iure optimo dici possit, qui scit Gonetum, scit totum. Hoc vnum super esse poterat exoptandum, vt ipsemet Author opera sua in compendium redigeret, pro maiori omnium studiosorum commodo. Quod feliciter præstitit in hoc suo Manuali: in quo non dubito nihil reperiri fidei bonisue moribus contrarium, cum non sit nisi ipsa doctrina sui Clypei Thomisticæ Theologiæ. Prodeat ergo in publicum istud opus, numeris omnibus absolutissimum, vt omnes illud possint:

*Nocturna versare manu, versare diurna.*

*Auenioni die sexta Decembris anno 1679.*

*Fr. Lodovicus Bancel, Ordinis Predicatorum.*

---

## APPROBATIO,

*R. P. Hieronymi de Grasse, Sacræ Theologiæ Professoris, & Vicarij Generalis Sancti Officij Auenioni.*

**C**lypeus Theologiæ Thomisticæ, quinque voluminibus comprehensus, ab annis aliquot in lucem editus est à Reuerendo

do admodum Patre Ioanne Baptista Gonet,  
 summo totius rei Theologicæ bono. Quod  
 eximium opus, vnde quaque sanctæ fidei con-  
 sonum, profunda, solidaque doctrina spe-  
 ctabile, sparsisque vbertim Patrum Sancto-  
 rum floribus amænum; non modò priuatim  
 Professores omnes Sacri, verùm etiam cele-  
 berrimæ totius Europæ Sacræ Accademiæ,  
 studiosè complexæ sunt & veneratæ. Ma-  
 nuale Theologicum istud, eiusdem Autho-  
 ris opera cūsum est. De quo censendo (iussit  
 R. admodum P. Antonini Massouliè, Pro-  
 vincialis Prouinciæ Tolosanæ FF. Prædica-  
 torum) nihil aliud dixerim, quam Clypei  
 Theologici Manuale istud Theologicum, ve-  
 ram & germanam Epitomen esse: in qua  
 doctrinæ puritas, per omnia Sanctæ Sedis  
 Apostolicæ fidei & oraculis bene congrua;  
 sententiarum delectus, & elegantia, SS. Pa-  
 trum flores, quæ in Clypeo Theologico mi-  
 cant vndique fusiùs, in Manuali strictiùs quĩ-  
 dem & pressius, verùm etiam pretiosiùs mi-  
 rari licet. Ita censeo Auenioni die 3. De-  
 cembri 1679.

*Fr. Hieronymus de Grasse, Sacra Theolo-  
 giæ Professor, & Vicarius Generalis Sancti  
 Officii Auenioni.*

---

## ELOGIVM.

**I**NNVMERIS laudibus cūmulent GONE-  
 TVM Europæ Viri doctissimi, prædicent  
 Hispa-

Hispani altitudinem, Itali amœnitatem, mirerentur Germani laborem, perspicuitatem Galli, cæteri denique varias eius ingenij dotēs varijs efferant encomijs, quantum ad me attinet, & quantum Sobrino licebit, modestiam eius, atque pudorem extollam. Virtus hæc quò inter doctiores rarior, eò in hoc doctissimo viro laudabilior, in quo est maxima. Hoc præcipuo animi ornamento, & alijs ingenij opibus, Angelico Thomæ simillimus est; non ergo illepidè dicetur GONETVS, Magni SPES ALTERA Ordinis Prædicatorum, non illi sufficit perspicuitate sua mirifica citra solem omnium illuxisse mentibus, efficit hac Epitome vt studiosi breui tempore omnes Theologi fiant. Parce Reuerende admodum Pater, nimia perspicuitate insignis es, nimiumque laboras ad scribendam laconicè Theologiam, dilucido tuo sermone, abscondita huius scientiæ arcana cunctis patefecisti, hac tua sermonis breuitate, quasi vno intuitu cunctis aperis, facilis eras, eris faciliior, denique in omnium manibus versabitur tuum Manuale. Sed perge quæso R. Pater scientia Dei nunquam nimium, & citius, innotescere potest. Salue ergo lax noua Theologiæ Thomisticæ, salue Thomæ Aui Nostri, humillime Dominici Fili, eiusque virtutis ditissime Hæres, Nouatorum Oppugnator inuictè, Ordinis columen, patriæ decus, gentis tuæ honos, & gloria Christiani orbis.

*Carolus Lepul Iuris vtriusq; Doctor, nec non  
Consiliarius Regius, tributorumq; annuorum  
Censor.*

Vidit

Vid. D. Fulgentius Orighetus Cler. Reg.  
S. Pauli , & in Metropol. Bonon. Ec-  
cles. Pœnitentiarius pro Eminentiss. ac  
Reuerendiss. D. D. Hieronymo Bon-  
compagno, Archiep. Bonon. & Prin-  
cipe .



*Imprimatur*

Fr. Thomas Raineri de Forliuio Vicarius  
Generalis S. Officij Bononiæ .



# INDEX

## TOMI PRIMI.

- Q**uestio Præmialis de natura & dotibus  
Theologiæ. pag. 1
- CAPVT I.** De natura Theologiæ. *ibid.*
- CAP. II.** Præcipuæ Theologiæ dotes breuiter exponuntur. pag. 14
- TRACT. I.** De existentia ; & natura Dei,  
ac præcipuis eius attributis. pag. 18
- CAPVT I.** De existentia Dei. *ibid.*
- §. I. *An Deum esse sit per se notum ?* *ibid.*
- §. II. *Expugnatur Atheismus & quinque  
rationibus D. Thomæ existentia Dei demon-  
stratur.* pag. 22
- CAP. II.** De unitate Dei. pag. 32
- CAP. III.** De constitutiuo naturæ diuinæ.  
pag. 34.
- CAP. IV.** De attributis diuinis in commu-  
ni. pag. 43
- §. I. *Quo genere distinctionis distinguan-  
tur attributa diuina ab essentia , & in-  
ter se ?* pag. 44
- §. II. *Præcipuæ obiectiones soluantur.* pag. 50
- CAP. V.** De simplicitate Dei. pag. 55
- CAP. VI.** De perfectione Dei. pag. 58
- CAP. VII.** De bonitate Dei. pag. 61
- CAP. VIII.** De infinitate Dei. pag. 63
- CAP. IX.** De immensitate Dei. pag. 65
- CAP. X.** De immutabilitate Dei. pag. 72
- CAP. XI.** De Æternitate Dei. pag. 74
- TRACTAT. II.** De visione Dei. pag. 76
- CAP. I.** De impossibilitate visionis beatificæ  
per

per vires naturæ, & possibilitate eius per  
auxilium gratiæ. pag. 7

CAP. II. De specie ad visionem beatificam.  
pag. 94

CAP. III. De necessitate luminis gloriæ ad  
videndum Deum. pag. 106

CAP. IV. De inæqualitate visionis beatæ.  
pag. 128

CAP. V. De obiecto visionis beatificæ. p. 128

CAP. VI. De Mensura visionis beatificæ.  
pag. 141

TRACT. III. De scientia Dei. pag. 131

CAP. I. De obiecto formali tam motiuo,  
quam terminatiuo intellectus diuini. *ibid.*

CAP. II. De scientia Dei respectu possibi-  
lium, quæ simplicis intelligentiæ appel-  
latur. pag. 139

CAP. III. De causalitate scientiæ Dei res-  
pectu creaturarum. pag. 145

*Corrolaria notatu digna.* pag. 156

CAP. IV. De scientia futurorum contingen-  
tium. pag. 161

§. I. *Reffelluntur & omnes sententiæ.* pag. 163

§. II. *Vera sententia statuitur.* pag. 181

§. III. *Aliud medium in quo Deus futura  
contingentia cognoscit, eorum nimirum præ-  
sentia in eternitate.* pag. 190

Cap. V. De scientia media. pag. 207

§. I. *Impugnatur scientia media ex doctrina  
S. Augustini & S. Thomæ.* pag. 211

*Quid de D. Thoma?* pag. 216

§. II. *Confutatur scientia media ratione fun-  
damentali, & a priori, desumpta ex de-  
finitione.* pag. 220

§. III. *Alia ratio fundamentalis.* pag. 225

§. IV.

§. IV. *Alia impugnatio scientiæ mediæ petita ex principijs aduersariorum.* pag. 231

§. V. *Præcipuæ obiectiones solvuntur.* pag. 235

§. VI. *Solvuntur argumenta quæ fieri solent contra decreta conditionata, quæ admittuntur à Thomistis.* pag. 241

TRACT. IV. *De voluntate Dei.* pag. 249

CAP. I. *De obiecto formali motiui & terminatiui voluntatis diuinæ.* *ibid.*

CAP. II. *De libertate voluntatis Dei, eiusque cum diuina immutabilitate concordia.* pag. 254

CAP. III. *De voluntate Dei antecedente, qui vult omnes homines saluos fieri.* pag. 267

§. I. *Quatuor primæ difficultates breuiter resolvuntur.* *ibid.*

§. II. *Resolvitur quinta difficultas, an scilicet Christus pro omnibus passus & mortuus sit.* pag. 281

§. III. *Ultima difficultas resolvitur.* pag. 287

CAP. IV. *De efficacia voluntatis diuinæ.* p. 291

§. I. *Decreta diuinæ voluntatis circa actus nostros liberos sunt ex se efficacia & prædeterminantia voluntatem.* *ibid.*

§. II. *Solvuntur obiectiones.* pag. 303

§. III. *Deus physicè prædeterminat voluntatem ad suos actus liberos eliciendos.* pag. 307

§. IV. *Prædeterminatio physica est de mente Diui Thomæ.* pag. 314

§. V. *Solvuntur obiectiones.* pag. 318

§. VI. *Concordia libertatis creatæ cum decreto prædeterminante, & physica prædeterminatione.* pag. 322

§. VII. *Aliud difficile argumentum soluitur.* pag. 334.

§. VIII.

§. VIII. Concordia sanctitatis diuinæ cum decreto prædeterminante & physica prædeterminatione ad materiale peccati. pag. 344

§. IX. Soluuntur obiectiones. pag. 357

§. X. Calvinismi depulsio. pag. 366

§. XI. Decretum efficax, & concursus Dei præuius ac prædeterminans, pro utroque statu naturæ lapsæ & innocentis, admitti debet. pag. 376

CAP. V. De amore Dei & alijs affectibus ac attributis voluntatis diuinæ. pag. 387

§. I. In Deo est formaliter amor, tam suæ bonitatis quam creaturarum existentium & futurarum, sed non mere possibilem, ibid.

§. II. In Deo est formaliter gaudium seu delectatio, non tamen desiderium, nec odium, nec ira. pag. 391

§. III. In Deo est summa & perfecta iustitia, non commutativa, sed distributiva. pag. 394

§. IV. In Deo est misericordia, quantum ad effectum subueniendi alienæ miseriæ, non vero quantum ad compassionem & tristitiam de malo alterius. pag. 402.

TRACT. V. De prouidentia, predestinatione & reprobatione. pag. 405

CAP. I. De prouidentia Dei. ibid.

§. I. Est in Deo perfectissima prouidentia quæ ad omnia se extendit. pag. 406

§. II. Soluuntur obiectiones. pag. 410

§. III. Prouidentia non consistit formaliter in actu voluntatis, sed intellectus, nimirum in actu imperij supponente electionem mediorum. pag. 413

§. IV. Corollaria notatu digna. pag. 416

§. V. Licet de ratione prouidentie generalis sit

*fit ordinatio creaturæ in finem, non tamen  
asscuctio finis ad quem illa ordinatur, sed  
dumtaxat finis ultimi, qui ab ipso prouidere  
intenditur.* pag. 417

Cap. II. De prædestinatione. pag. 423

§. I. Præter generalem Dei prouidentiam quæ  
omnes homines sufficienter ordinat ad sa-  
lutem, datur prædestinatio seu prouidentia  
aliqua specialis, quæ aliquos efficaciter or-  
dinat & transmittit ad æternam beatitu-  
dinem. ibidem.

§. II. Prædestinatio non consistit formaliter  
in actu voluntatis sed intellectus, nimirum  
in iudicio practico subsequente electionem,  
quod imperium appellatur. pag. 428

§. III. Soluuntur obiectiones. pag. 431

§. IV. Prædestinatio non est pars subiectiua,  
sed obiectiua diuinæ prouidentie. pag. 434

§. V. Electio prædestinatorum ad gloriam non  
habet aliam causam motiuam quam diui-  
nam bonitatem; non verò merita præuisa,  
quæ sunt potius effectus quàm motuum  
prædestinationis. pag. 437

§. VI. Triplici ratione Theologica eadem ve-  
ritas suadetur. pag. 444

§. VII. Præcipuæ obiectiones solvuntur.  
pag. 450.

§. VIII. Præcipui prædestinationis effectus.  
pag. 457.

Cap. III. De reprobatione. pag. 471

§. I. Reprobatio prout dicit exclusionem a glo-  
ria tanquam beneficio indebito non habet pro  
motiuo præuisa demerita, seu peccata actua-  
lia; bene tamen prout includit voluntatem  
puniendi, & infligendi pœnam. pag. 474

§. II.

- §. II. *Soluuntur obiectiones.* pag. 478
- §. III. *Peccatum Originale, ut est infectio naturæ, est causa motiua reprobationis hominum, non verò ut est infectio personæ.* pag. 482.
- §. IV. *Exponuntur & conciliantur quedam testimonia D. Thomæ, quæ pugnare videntur contra nostram sententiam.* pag. 493
- §. V. *Præcipui reprobationis effectus.* pag. 496
- §. VI. *Non conferuntur omnibus reprobis auxilia seu media ad salutem sufficientia, bene tamen omnibus iustis, quando instat obligatio alicuius præcepti.* pag. 501
- §. VII. *Soluuntur obiectiones.* pag. 507

# PRIMA PARS

## MANVALIS

### THOMISTARVM,

De Deo vno, & Trino, ac Creatore  
Angelorum, & hominum.

#### P R Æ F A T I O.




*S*apienter dictum est à Seneca, non multis opus esse, sed efficacibus, & præcepta seminis modo spargenda esse, quod quamuis sit exiguum, cum occupauit idoneum locum, vires suas explicat, & ex minimo in maximos fructus diffunditur. Quare operæ prætiū erit forsitan non exiguum, si quæ in Clypeo Theologiæ Thomisticæ à nobis tradita sunt, sed fusius quam tyronibus in scholis vsui esse possint, commodè compendio redigantur, & utiliora à minùs vtilibus secernantur.

Porrò in hoc opere eidem methodo, & ordini inhærebimus, quem Diuus Thomas in Summa Theologica obseruauit; angelicus enim ordo est, quo Angelorum motus est æmulatus; & quo Angelici Doctōris nomen sibi promeruit. Triplici (inquit Arco-pagita) Angeli mouentur motu, circulari, recto, obliquo. Circulari quidem, dum circa Deum, vt creaturarum omnium cen-

trum,

trum, continua, & interminabili cognitione voluuntur, & veluti choræam agunt. Recto, dum inferiora cognoscunt, omnia recta linea pertranseunt. Obliquo, qui ex utroque mixtus est, dum & cognitionem Dei, & creaturarum cognitionem coniungunt. Hi cælestium, ac beatorum mentium motus; hic motus Doctoris Angelici, quo in illo opere aureo, quod Summa Theologica nuncupatur, progressus est. Nam in primis prima parte totus in diuinis est, & circa diuinum illud centrum motu voluitur circulari, dum de Deo, Attributis, & Personis Diuinis disputat. Deinde ad inferiora motu mouetur recto, dum de Deo ut rerum efficiente, deque intellectualis creaturæ fine differit. Ac tertia demum parte, Deum homini vnicens, & cognitionem vtriusque coniungens, motu mouetur obliquo. Eundem ergo in hoc Thomistarum Manuali ordinem obseruantes, in prima illius parte, de Deo ut vno, & Trino, & Angelorum, ac hominum creatore agemus. In secunda de Deo ut vltimo fine, & medijs ad illum conducentibus. Tertia demum erit de Deo incarnato, & Sacramentorum institutore. Sed ne insalutato hospite, eius abdita ingredi, ac rimari accusemur, priusquam de illis differamus, aliqua de natura, & qualitatibus Theologiæ, breuiter hic esse præmittenda censuimus.





# QVÆSTIO

PROOEMIALIS.

## DE NATVRA, ET DOTIBVS Theologiæ.

---

### CAPVT I.

*De natura Theologiæ.*



IC O primo, quamuis Theologia, vt est in nobis viatoribus careat, euidencia actuali suorum principiorum, nimirum articulorum fidei, quos solum per fidem, & reuelationem obscuram cognoscit, est tamen verè, &

substantialiter scientia. Tum quia est habitus attingens infallibiliter verum per discursum: habitus autem attingens infallibiliter verum per discursum, non potest pertinere ad aliam ex quinque virtutibus intellectualibus ab Ari-

stotele assignatis, quam ad scientiam, vel sapientiam: non autem potest esse habitus primorum principiorum, cum ille attingat verum immediate, & sine discursu; neque prudentia, vel ars, quæ versantur solum circa agibilia, & factibilia. Tum etiam, quia sufficit ad rationem scientiæ, ut per ipsam intellectus firmiter adhæreat vero; nam cum veritas sit finis omnium scientiarum, tunc scientia censenda est habere suam essentialem perfectionem, quando per illam verum infallibiliter assequitur, eique firmiter adhæret; imò ideo solum evidentia exigitur ad perfectionem scientiæ, quia per eam iuuatur intellectus, ut facilius, & citius verum attingat, & certiolem ac immobiliorem habeat veritatis assensum. Vnde si absque evidentia haberi possit talis certitudo, sine illa etiam obtinebitur vera, & essentialis ratio scientiæ. Cum ergo Theologia nostra sit cognitio certa, & discurrat circa res diuinas cum maiori certitudine, & firmitate, quam vlla scientia naturalis circa suum obiectum, quia reducit suas conclusiones ad principia reuelata, omnem naturalem certitudinem excedentia, est æquivalenter evidens; & licet careat evidentia formali, quam Philosophus ad scientias naturales videtur requirere, habet tamen evidentiam virtuale, sitam in certitudine, quâ omnes alias scientias superat, & radicalem seu aptitudinalem, quia postulat coniungi cum lumine gloriæ, & scientia beata, cui subalternari postea dicemus.

Dices, non datur scientia de singularibus, & contingentibus; Sed Theologia agit de sin-

singularibus, v. g. de Christo, de Beata Virgine, de Antichristo, & similibus; & de contingentibus, puta de peccatis, & actibus humanis: Ergo non est scientia.

Respondeo, quod licet scientiæ naturales non possint versari circa singularia, & contingentia, bene tamen Theologia; quia scientiæ naturales dependent à lumine primorum principiorum, quæ versantur tantum circa vniuersalia, & necessaria, Theologia verò dependet à lumine supernaturali fidei, & diuinæ reuelationis, quæ ad singularia, & contingentia se extendunt. Alias obiectiones vide in Clypeo Theologiæ Thomisticæ.

Dico secundò, Theologia nostra subalternatur scientiæ Dei, & Beatorum. Ita D. Thomas hic. art. 2. in corp. ubi sic discurret: *Duplex est scientiarum genus, quædam enim sunt, quæ procedunt ex lumine naturali intellectus, vt Arithmetica, Geometria, & huiusmodi. quædam vero sunt, quæ procedunt, ex principijs notis lumine superioris scientiæ, sicut Perspectiua recedit ex principijs notificatis per Geometriam, & Musica ex principijs per Arithmeticam notis; & hoc modo sacra doctrina est scientia, quia procedit ex principijs notis lumine superioris scientiæ, quæ scilicet est scientia Dei, & Beatorum.* Quibus verbis apertè docet, Theologiam nostram subalternari scientiæ Dei, & Beatorum, sicut Perspectiua subalternatur Geometriæ, & Musica Arithmeticæ.

Ratio etiam id suadet, vt enim à aliqua scientia dicatur subalternari alteri, requiritur & sufficit, quod ab ea dependeat quantum ad euidentiā suorum principiorum, & addat

obiecto subalternantis aliquam differentiam accidentalem ; sic Musica subalternatur Arithmetica , quia eius principia per eam manifestantur , & supra numerum , qui est obiectum istius , addit differentiam harmonici , seu sonori : Atqui similiter principia Theologiæ nostræ , quæ sunt articuli fidei , manifestantur per scientiam Dei , & Beatorum , illaque addit supra obiectum istius differentiam accidentalem nempe reuelationem virtuales accidentale est enim Deo cognoscibili , quod cognoscatur per lumen gloriæ , vel per lumen fidei : Ergo Theologia nostra propriè scientiæ Dei , & Beatorum subalternatur . Ex quo

Colligitur primò , quod licet Theologia , prout est in nobis viatoribus , sit verè & substantialiter scientia , vt conclusione præcedenti ostensum est , non est tamen perfecta scientia , seu non habet statum , & perfectum connaturalem ; sicut puer , licet sit substantialiter homo , non est tamen homo perfectus , ob defectum vsus rationis , & libertatis . Vt enim scientia subalternata habeat statum perfectum , & connaturalem , debet esse coniuncta cum subalternante , & ab illa habere euentiam actuale suorum principiorum . Vnde D. Thomas qu. 14. de verit. art. 9. ait quod *omnis scientia in visione rei presentis perficitur* . Atqui Theologia , prout est in nobis viatoribus , non est coniuncta cum scientia beata , cui subalternatur , vnde ab ea non accipit euentiam suorum principiorum , sed per accidens dependet à fide , gerente vices luminis gloriæ : Ergo non est in statu perfecto , & sibi connaturali .

Colligitur secundò, Theologiam nostram remanere in patria; tum quia omnis scientia subalternata petit naturaliter coniungi suæ subalternanti, ut ab ea perficiatur, atque illi manifestentur principia quæ credit. Tum etiam, quia Theologia nostra non est essentialiter obscura, sicut fides, sed per accidens, ratione status quem habet in nobis viatoribus, in quo regulatur per fidem, & cognitionem obscuram. Vnde transit de obscura in euidensem, quando homo mutat statum viatoris in statum comprehensoris. Sicut adueniente visione beata, charitas viæ non excidit, iuxta Apostolum, sed transit à libera in necessariam, quia libertas non est de eius essentia, sed modus quidam accidentalis, conueniens ei per accidens, & ratione status viæ.

Confirmatur: Dona sapientiæ, & scientiæ, licet prout sunt in nobis viatoribus, dependant à fide, & per illam regulentur, nihilominus remanent in patria, ut docet S. Thomas 1. 2. q. 68. art. 6. Quidni ergo pariter Theologia nostra poterit remanere in patria, quamuis hic per accidens pendeat à fide, & cognitione obscura? Vnde tritum est illud Hieronymi in Epistola ad Paulum: *Discamus in terris talem scientiam, quæ nobiscum perseueret in cælis*. Cum ergo Apostolus ait 1. ad Corinth. 13. quod in cœlo *linguæ cessabunt, & scientia defructur*, hoc non debet intelligi de destructione quantum ad substantiam, sed solum quantum ad modum obscuritatis & inevidentiæ quem nunc habet; vel quantum ad modum operandi imperfectum, scilicet per conuersionem ad phantasmata, & species à re-

bus acceptas, qui nunc ei conuenit; vterque enim hic modus cognoscendi in patria destruetur, quia, vt docet D. Thomas super hunc locum Apostoli, conuersio ad phantasmata tunc non erit de necessitate, sed ex electione.

Dico tertio, obiectum formale *quod* Theologiæ esse Deum, rationem verò formalem *sub qua*, esse reuelationem virtuales, & mediatam.

Prima pars probatur ratione D. Thomæ hic art. 6. Illud dicitur obiectum formale *quod* alicuius scientiæ, quod ab ea principaliter quæritur, & ad quod reducuntur cætera omnia quæ in illa tractantur: Sed cognitio Dei per se primò quæritur in Theologia, cùm illa, vt nomen ipsum sonat, sit consideratio vel sermo de Deo, rebusquediuinis. Item quæcumque in ea tractantur, aut sunt ipsemet Deus, aut ad ipsum reducuntur, vt proprietates ad essentiam, sicut attributa; vel vt effectus ad causam, sicut creaturæ; vel vt media ad finem, sicut actus humani, virtutes, leges, gratia, incarnatio, & sacramenta: Ergo Deus est obiectum formale *quod* Theologiæ.

Confirmatur ex eodem S. Doctore ibidem: Idem est obiectum principiorum, & totius scientiæ, cùm tota scientia continetur in principijs: Sed Deus est obiectum principiorum Theologiæ, nempe articulorum fidei, cùm enim fides sit virtus Theologica, Deum vt proprium obiectum respicit, vt dicemus in Tractatu de fide: Ergo Deus est obiectum Theologiæ, non quatenus saluator, vt vult Durandus, nec quatenus glorificator, vt Gregorius, sed secundum se, vt S. Thomas loco

citato, & alij communissimè docent, multa enim tractantur in Theologia, quæ quidem Deo secundum se conueniunt, modo supra explicato, non tamen præcisè vt saluatori, vel glorificatori.

Quod verò ratio formalis *sub qua* Theologiæ sit reuelatio virtualis & mediata, ex eo constat, quod Theologia est habitus distinctus à fide, & metaphysica, alijsque scientijs naturalibus, & quasi medius inter illas: Atqui non posset ab illis distingui, nec inter eas mediare, nisi haberet ratione formali *sub qua* reuelationem virtuales & mediatam; si enim eius ratio formalis *sub qua* esset reuelatio formalis & immediata, conueniret cum fide, quæ nititur diuinæ reuelationi immediatæ; si autem non dependeret à reuelatione virtuali, & procederet ex principijs solo lumine naturali notis, non distingueretur à scientijs naturalibus, præsertim à metaphysica, quæ Deum considerat vt cognoscibilem ex creaturis, & lumine naturali intellectus humani: Ergo ratio formalis *sub qua* Theologiæ est reuelatio virtualis & mediata. Quod vt melius percipiatur.

Obseruandum est, aliquid posse dici reuelatum duobus modis: Primò formaliter & immediatè, sicut reuelatum est, Deum esse trinum, Verbum esse incarnatum. Secundo virtualiter & mediatè, quando scilicet in re immediatè reuelata, alia virtualiter continetur, vel tanquam effectus in causa, vel vt proprietas in essentia, quæ per discursum deducitur: quo pacto in ista propositione. *Christus est homo, hæc, Christus est risibilis*: virtualiter & mediata.



te censetur reuelata ; & hanc reuelationem virtuales & mediatam, dicimus esse rationem formalem sub qua Theologia.

Ex quo colligitur primò, in hæreticis non esse veram Theologiam ; quia cum in illis non sit fides, non est reuelatio formalis, nec virtualis ; vnde eorum Theologia est solum fides humana, vel opinio, quæ assentiuntur aliquibus veritatibus Theologicis, ex proprio iudicio, aut propriæ voluntatis electione, non verò ex motu diuinæ reuelationis, alioquin omnibus veritatibus reuelatis præberent assensum.

Colligitur secundò, Theologiam non componi ex pluribus habitibus partialibus, sed esse vnum simplicem habitum, ad omnes Theologicas conclusiones se extendentem. Ita D. Thomas hic art. 3. ubi hanc rationem fundamentalem insinuat : *Habitus non distinguuntur, nec multiplicantur, nisi penes distinctionem obiectorum formalium, & penes diuersam rationem sub qua illa attingunt, vt est communis doctrina Philosophorum* : Atqui Theologia habet vnicum specie obiectum formale quod, nempe Deum, sub ratione Deitatis, & vnicam specie rationem formalem sub qua, videlicet reuelationem virtuales & mediatam, sub qua attingit omnia obiecta partialia quæ considerat : Ergo est vnus simplex habitus, se extendens ad omnes conclusiones contentas intra sphæram sui obiecti ; sicut fides se extendit ad omnia credibilia, charitas ad omnia diligibilia, prudentia ad omnia agibilia, & visus ad omnia visibilia. Licet ergo in Theologia dentur plures demonstratio-

nes



nes diuersæ circa diuersa objecta partialia, quia tamen omnes pertinent ad idem obiectum formale; non ad diuersum, quælibet non producit suum habitum partialem, sed prima tantum habitum Theologiæ generat, secunda verò illum solùm extendit ad diuersam conclusionem, & sic de cæteris; sicut anima extenditur ad informandas diuersas partes materiæ, non additione sui, sed incremento materiæ cui applicatur, vel sicut relatio prædicamentalis fertur ad plures terminos materiales, inuariata manens; Ex quo soluitur præcipuum aduersæ sententiæ fundamentum.

Dico quartò, Theologiam esse habitum entitatiuè naturalem.

Probaturs duplici ratione: Prima est, nullus habitus entitatiuè supernaturalis, nostris actibus acquiritur, sed à Deo immediatè infunditur, vt constat inductione; nam virtutes Theologicæ, & morales supernaturales, atque dona Spiritus Sancti; non acquiruntur nostris actibus, sed à Deo immediatè infunduntur; Atqui Theologia non est habitus infusus, sed acquisitus studio, & labore humano, vt experientia constat, docetque expressè D. Thomas 2. 2. quæst. 54. art. 1. ad 2. vbi ponit hoc discrimen inter sapientiam, quæ est donum Spiritus Sancti, & Theologiam, quæ etiam, vt infra dicemus, habet rationem Sapientiæ, quod illa habetur per infusionem, & desursum est descendens à Patre luminum, ista verò studio humano acquiritur: Ergo Theologia nō est habitus entitatiuè supernaturalis, sed naturalis.

Nec valet quod dicunt quidam Recentiores, hoc esse proprium, & speciale Theologiæ;

quod sit entitatiuè supernaturalis, & tamen nostris actibus acquiratur; Tum quia Theologia supponit fidem, à qua potest causari tanquam ab habitu primorum principiorum: Tum etiam, quia hoc inter virtutes infusas & Theologiam intercedit discrimen, quod virtutes infusæ sunt proprietates gratiæ, à qua dimanant, subindeque postulant fieri per eandem actionem qua producit gratia, non verò Theologia, cum illa non habeatur ab omnibus iustis. Non valet, inquam, hæc responsio: Si enim ex hoc quod Theologia præsupponat fidem, posset inferri, quod ipsa, etsi entitatiuè supernaturalis, tamen actibus nostris acquiri possit, eadem ratione dici posset, omnes virtutes morales per se infusas, esse actibus nostris acquisibiles; illæ enim præsupponunt charitatem, per quam voluntas adhæret fini ultimo, qui se habet in operabilibus respectu electionis mediorum, sicut prima principia in speculabilibus respectu conclusionum. Ex eadem etiam responsione sequeretur, quod prudentia infusa esset actibus nostris acquisibilis, cum illa pariter supponat fidem, in qua virtualiter & tanquam in semine continetur. Non valet etiam quod additur, nam fides & spes infunduntur à Deo, & tamen non sunt proprietates à gratia inseparabiles, cum reperiantur in peccatoribus: Ergo ex eo quod Theologia non sit proprietas gratiæ, non rectè inferitur, illam, etsi entitatiuè supernaturalis sit, non infundi à Deo, sed actibus nostris acquiri.

Secunda ratio fundamentalis nostræ conclusionis potest sic breuiter proponi: Scientiæ non desumunt suam specificationem ab obiecto  
for-

formali quod, nisi prout substat rationi formali *sub qua*; vnde si ratio *sub qua* alicuius scientiæ sit naturalis, illa nequit esse entitatiuè supernaturalis: Sed ratio formalis *sub qua* Theologiæ, est entitatiuè naturalis. Ergo & ipse habitus Theologiæ. Maior constat ex communi doctrina Philosophorum, Minor verò sic ostenditur. Ratio formalis *sub qua* Theologiæ, illam distinguens à fide, & scientijs purè humanis & naturalibus, est reuelatio virtualis, vt præcedenti conclusione ostendimus: Atqui reuelatio virtualis (cùm includat discursum intellectus humani, & versetur circa principia reuelata, non præcisè & formaliter vt reuelata sunt, sed vt subsunt lumini & solertiæ naturali intellectus humani, & pro ut ex ipsis, mediante discursu, possunt elici aliquæ veritates non reuelatæ) intrinsecè & entitatiuè naturalis est, & supernaturalis solùm extrinsecè & præsuppositiuè, inquantum præsupponit principia fidei formaliter reuelata: Ergo & ratio formalis *sub qua* Theologiæ. Vnde falsum est quod dicunt aliqui Recentiores, discursum non pertinere ad rationem *sub qua* Theologiæ, sed esse puram conditionem applicantem principia reuelata, sicut ignis per approximationem applicatur combustibili. Illud enim pertinet ad specificatum, & rationem formalem *sub qua* alicuius habitus, quod ipsum essentialiter distinguit ab alijs: Sed per discursum Theologia distinguitur essentialiter à fide, quæ est discursiva, sed immediatè credit veritates sibi à Deo reuelatas: Ergo discursus pertinet ad rationem formalem *sub qua* Theologiæ.

Obijcies primò : specificatio scientiarum sumitur à principijs , vt docent Philosophi : Sed principia Theologiae sunt supernaturalia , sunt enim ipsi articuli fidei diuinæ : Ergo & ipsa Theologia supernaturalis est .

Respondeo , concessa Maiori , distinguendo Minorem : principia Theologiae sunt supernaturalia , formaliter & reduplicatiuè , concedo . Articuli enim fidei , qui sunt principia Theologiae , non ingrediuntur demonstrationem Theologicam , nisi prout subsunt lumini naturali & discursus intellectus humani , quo mediante illuminant conclusiones Theologicas , quæ in ipsis virtualiter continentur . Vnde articuli fidei duobus modis considerari possunt , primò quatenus sunt absolutè veri , & prout dicunt ordinem ad primam veritatem reuelantem , & sic sunt formaliter reuelati , & pertinent ad habitum fidei , secundò vt dicunt habitudinem ad conclusiones & veritates non reuelatas , quæ ex ipsis inferri possunt per discursum intellectus humani & sub hac ratione non sunt formaliter , sed tantùm virtualiter reuelati , & spectant ad habitum Theologiae , qui proinde non est formaliter & entitatiuè supernaturalis , sed radicaliter tantùm , quatenus præsупponit principia fidei , in quibus tanquam in semine vel radice continentur , sicut scientiæ naturaliter continentur in habitu primorum principiorum . Et in hoc sensu D. Thomas hic art. 1. appellat Theologiam , scientiam reuelatam , & diuinitus inspiratam .

Obijcies secundò : Certitudo Theologiae , quæ est prædicatum eius essentialè , supernaturalis est , superat enim certitudinem omnium  
scien-

scientiarum naturalium, vt capite sequenti dicemus : Ergo & ipse habitus Theologiæ .

Confirmatur: Theologia, vt ibidem ostendimus, est eminenter speculatiua, & practica: Sed practicum speculatiuum, cum fiat differentia opposita, non possunt adunari & eminenter formaliter contineri, nisi in scientia & habitu supernaturali: Ergo Theologia est habitus entitatiuè supernaturalis.

Ad obiectionem respondeo negando Antecedens, sicut enim Theologia mediat inter fidem & scientias naturales, ita, & eius certitudo; quare illa neque est purè naturalis, sicut certitudo scientiarum naturalium, neque formaliter supernaturalis, sicut certitudo fidei, sed virtualiter duntaxat, cum ratio formalis *sub qua* vnde sumitur, non sit reuelatio formalis, & immediata, sed virtualis tantum, & mediata; vnde talis certitudo est quidem inferior certitudine fidei, sed superior ad certitudinem omnium scientiarum naturalium.

Ad confirmationem dico, speculatiuum & practicum posse adunari & eminenter formaliter contineri, non solum in scientia supernaturali entitatiuè, sed etiam in scientia radicaliter solum supernaturali; quia illa radicaliter & virtualiter continetur in fide, quæ est eminenter speculatiua & practica, & respicit obiectum infinitum, nempe Deum, qui cum sit prima veritas, & vltimus finis, est simul regula speculationis & praxis. De quo fusius capite sequenti.

## CAPVT II.

*Præcipuæ Theologiæ dotes breviter  
exponuntur.*

**D**Ico primò, Theologia est certior omni habitu, & scientia naturali: Nititur enim medio firmitiori, nempe lumini diuinæ reuelationis, quæ certior est, magisque infallibilis, quam media quibus scientiæ naturales inniuntur. Vnde Augustinus 7. confess. cap. 2. *Facilius dubitarem vivere me (quæ tamen est veritas omnium naturalium notissima & maximè sensibilis) quam esse vera quæ audiui.*

Confirmatur: Assensus primorum principiorum, & veritatum naturalium, est à natura nos mouente ad illam; assensus autem fidei, cui Theologia innititur, est à motione & impulsu Spiritus Sancti, excitantis piam affectionem ad credendum, vt docetur in Tractatu de fide: Sed Spiritus Sanctus mouens nos ad credendum & assentiendum veritatibus reuelatis, est causa firmitior & infallibilior, quam natura mouens nos ad assensum primorum principiorum, & veritatum naturalium: Ergo Theologia habet maiorem & firmiorem causam suæ certitudinis, quam habitus & scientiæ naturales.

Nec obest quod Theologus interdum patitur nonnullos dubitationis motus, tum circa principia fidei, tum circa conclusiones ex ijs illatas, quos non experitur habens scientiam naturalem, cuius intellectus quietè adhæret veritati. Nam illi titubantis animi motus, non

ex debilitate motui cui Theologia innititur, proficiscuntur, sed ex infirmitate intellectus humani, qui solet esse inquietus, donec clarè veritatem intueatur. Vnde D. Thomas cùm hic art. 5. primo loco sibi obiecisset, quod *aliae scientiæ, de quarum principijs dubitari non potest, videntur esse certiores sacra doctrinà, cuius principia, scilicet articuli fidei, dubitationem recipiunt*, sic respondet: *Ad primum dicendum quod nihil prohibet id quod est certius secundum naturam, esse quoad nos minus certum, propter debilitatem intellectus nostri. Vnde dubitatio quæ accidit in aliquibus circa articulos fidei, non est propter incertitudinem rei, sed propter debilitatem intellectus humani.*

Dico secundo, Theologia est formaliter simul & eminenter speculatiua & practica. Illa enim habet pro obiecto formali quod, Deum sub ratione Deitatis; pro ratione verò formali sub qua, reuelationem virtuales, vt capite præcedenti ostendimus: Sed ex utroque capite habet quod sit simul speculatiua & practica: Ergo est habitus eminenter speculatiuus & practicus. Minor probatur, cùm Deus sub ratione Deitatis sit prima veritas, & vltimus finis, est etiam prima regula speculationis & praxis, primumque speculabile & operabile; operabile, inquam, non physicè, sed moraliter, quatenus actibus nostris meritorijs, in ratione vltimi finis consequibilis est. Item reuelatio virtualis supponit fidem, quæ est eminenter formaliter speculatiua & practica, cùm non solum inhæreat & innitatur primæ veritati reuelanti, sed etiam ad operationem & dilectionem se extendat, iuxta illud ad Galat. 5, *Fides per dilectionem*



operatur. Vnde nihil ita cer hominis ad Deum  
amorem inflamat, sicut Theologia, vt ait Ab-  
bas Antiochus orat. 128. Quæ verba eius in-  
terpres expendens, hæc addit in margine: *Theo-  
logia Theophiliam ingenerat.*


Confirmatur: Metaphysica est speculatiua,  
quia agit de Deo, vt primo principio; Mora-  
lis verò practica, quia tractat de vltimo fine,  
& medijs ad illum conducentibus: Ergo cum  
Theologia vtrumque præstet, & Deum in ra-  
tione primi principij ac vltimi finis contem-  
pletur, agatque de medijs ad illum conducen-  
tibus, simul erit speculatiua & practica. Ad-  
do quod Theologia, vt docet D. Thomas his  
art. 3. ad 2. est veluti quædam impressio &  
participatio diuinæ scientiæ, quæ est eminenter  
speculatiua & practica, & quæ non solum  
directiue, sed etiam effectiue concurret ad  
productionem rerum, vt tract. 3. ostendimus.


Ex his intelliges, quod licet speculatiuum  
& practicum sint differentię visuæ scientia-  
rum naturalium, non tamen scientiæ vt sic,  
prout est genus supremum ad Theologiam &  
scientias naturales: vnde licet nulli scientiæ  
naturali competere possint, bene tamen Theo-  
logiæ, quæ est ordinis, superioris, & medium  
tenet locum inter fidem & scientias purè na-  
turales, vt capite præcedenti declarauimus:  
quæ autem sunt dispersa in inferioribus, pos-  
sunt adunari in superioribus; sicut visum &  
auditiuum in sensu communi, & vegetatiuum,  
sensitiuum, ac intellectiuium in anima rationa-  
li. Per quod conuellit præcipuum aduersæ  
sententiæ fundamentum.

Dico tertio, Theologiam nostram verè &  
pro-



proprie esse sapientiam. Sapientia enim est cognitio rerum per causas altissimas, unde in genere ædificij artifex qui disponit formam domus, dicitur sapiens & architector, respectu inferiorum artificum, qui dolant ligna, vel parant lapides; & in ordine morali vir prudens qui ordinat suos actus in ultimum finem, vocatur sapiens. Atqui Theologia iudicat de rebus per altissimam omnium causarum, nempe Deum, & per altissimas rationes, scilicet per articulos fidei: Ergo est verè & proprie sapientia. Unde sicut sapientia iudicat de omnibus, iuxta illud Apostoli 1. ad Corinth. 2. *Spiritualis homo iudicat omnia*, ita & Theologia, quæ non solum infert conclusiones ex principiis & articulis fidei, quod proprium est scientiæ, sed etiam iudicat de principiis & conclusionibus aliarum scientiarum, & quidquid in alijs scientijs inuenitur veritati huius scientiæ repugnans, totum ab ea condemnatur ut falsum, ut ait S. Doctor hic art. 6. ad 2. Quare Theologia est veluti lydius lapis, ex cuius contactu verum à falso, purum ab impuro, & sincera doctrina à vitiata & adulterata discernitur. Alias Theologiæ dotes & prærogativas vide in Clypeo Theologiæ Thomisticæ disput. procemiali art. 12.






# TRACTATUS I.

*De existentia, unitate, & natura Dei, ac  
præcipue eius attributis.*

¶ **C**um existentia & unitas Dei sit ba-  
sis & fundamentum omnium, quæ  
in Theologia pertractantur, prius-  
quam de natura Dei, eiusque at-  
tributis disseramus, & alias quæ-  
stiones, & difficultates Theologicas aggredia-  
mur, de existentia Dei, eiusque unitate agen-  
dum est.



## CAPVT. I.

*De existentia Dei.*

### §. I.

*An Deum esse sit per se notum?*

**D**ico primò, hæc propositio *Dens existit*,  
est per se nota secundum se. Probatur  
ratione D. Thomæ hic qu. 2. art. 1. Illa pro-  
positi-

positio dicitur per se nota secundum se, cuius prædicatum est de essentia & intrinseca ratione subiecti; cum enim nihil sit prius essentia & quidditate rei, non potest talis propositio demonstrari vel notificari per aliquid prius: Sed existentia est de essentia & intrinseca ratione Dei, Deus enim est suum esse, ut probat idem S. Doctor qu. 3. sequenti art. 4. Ergo hæc propositio *Deus existit*, est per se nota secundum se.

Dices, hæc propositio *Deus est trinus*, non est per se nota secundum se, cum à nullo intellectu creato possit proprijs viribus cognosci, & tamen Trinitas Personarum non minus est de essentia & intrinseca ratione Dei, quam existentia: Ergo licet existentia sit de quidditate & intrinseca ratione Dei, non sequitur hanc propositionem, *Deus existit*, esse per se notam secundum se.

Respondeo negando Antecedens cum Banne, & alijs Thomistis, docentibus, Deum esse Trinum, esse per se notum secundum se. Nec obstat quod ab intellectu creato non possit proprijs viribus cognosci, hoc enim solum probat non esse per se notum nobis, non autem non esse secundum se per se notum. Addo quod, licet Trinitas Personarum non sit immediate cognoscibilis ab intellectu creato, viribus propriæ naturæ, potest tamen immediate cognosci ab illo, per lumen gloriæ elcuato sicque de facto cognoscitur à Beatis; quod sufficit ad rationem propositionis per se notæ secundum se, ut de hac propositione *Deus est* docet D. Thomas qu. 10. de verit. art. 3. in corp.

Dico secundò, hæc propositio *Deus existit*, non est per se nota quoad nos.

Probatur: Illa propositio dicitur per se nota quoad nos, quæ à nobis cognoscitur immediatè, sine discursu, & ex sola apprehensione terminorum, vt constat in primis principijs: Sed hæc propositio, *Deus existit*, non cognoscitur à nobis immediatè, sine discursu, & ex sola apprehensione terminorum: nam significatum huius termini *Deus*, nobis per se notum non est, cum in statu viæ non cognoscamus ipsum quidditatiuè: Ergo hæc propositio non est per se nota quoad nos, sed indiget demonstrari per ea quæ sunt nobis magis nota, scilicet per creaturas, & per motus rerum sensibilibum, & corporalium.


Nec obstat quod plures ex SS. Patribus doceant cognitionem Dei esse nobis naturaliter insitam, ingenitam, implantatam, & vt loquitur Damascenus lib. 1. de fide cap. 1. *inseminatam*: Nam aliqui loquuntur de Deo sub aliqua ratione communi & confusa, scilicet sub ratione beatitudinis in communi; cum enim homines naturaliter desiderent esse beati, naturaliter cognoscunt esse aliquam beatitudinem. Alij verò solum volunt, Deum esse naturaliter nobis notum (vt obseruat D. Thomas 1. contra Gent. cap. 2.) propter consuetudinem quâ homines ab incunabilis soliti sunt nomen Dei audire & inuocare; consuetudo enim, præcipuè quæ est à principio, vim naturæ obtinet, & ea quibus à pueritia animus imbuitur, ita firmiter tenentur, ac si essent naturaliter nota.

Obijcies primò: huic propositioni *Deus est*,  
*assen-*

assentimur sine discursu, & ex sola apprehensione terminorum: Ergo est per se nota quoad nos. Consequentia patet, Antecedens probatur. Hoc nomine *Deus* intelligitur apud omnes ens quo nihil maius aut melius excogitari potest: Sed sine discursu, & ex sola terminorum apprehensione, constat existere ens quo nihil maius aut melius excogitari potest; quia si non existeret, non esset melius omnibus quæ cogitari possunt, multò enim melius esset sine dubio, si actu necessariò existeret: Ergo sine discursu, & ex sola terminorum apprehensione, constat Deum existere.

Respondeo cum D. Thoma hic art. 1. ad 2. & 1. contra Gent. cap. 11. quod licet Deus sit id quo nihil maius aut melius cogitari potest, hoc tamen non est per se notum omnibus; nam quidam dixerunt Deum esse corpus, ut Antropomorphitæ, Deo membra humana assignantes, & tamen corpus non est id quo nihil melius cogitari potest. Imò qui negant Deum existere, necessariò concipiunt esse aliquid maius & præstantius Deo, cum ens melius sit non ente. Addit S. Doctor, dato etiam quod quilibet intelligat hoc nomine *Deus* id quo nihil melius excogitari potest, ex hoc non sequi, id quod significatur per hoc nomen, esse in rerum natura, sed in apprehensione intellectus tantum. Vel ut alij loquuntur, hinc solum sequitur, tale nomen importare existentiam in actu signato, non tamen in actu exercito, sed hoc relinquere demonstrandum per discursum.

Obijcies secundò: Hæc propositio, *Deus est solendus*, est omnibus per se nota, & communis



nis omnium conceptio, est enim primum principium sindereſis: Ergo cū talis propositio includat hanc, *Deus existit*, nam quod non existit, coli non potest, hæc propositio *Deus existit*, est etiam omnibus per se nota.

Respondeo, concessio Antecedente, negando consequentiam; licet enim cognitio practica supponat speculatiuam, non tamen necesse est quod si cognitio practica sit immediata, etiam speculatiua in ea inclusa sit talis. Hoc enim principium, *parentes sunt colendi*, est immediatum, licet non cognoscamus immediatè, quinam sint parentes nostri, sed per discursum, vel relationem aliorum. Ita pariter, quamuis non cognoscamus immediatè dari Deum, sed per discursum, vel per inspectum creaturarum, nihilominus hæc propositio, *Deus est colendus*, est immediata, & primum principium sindereſis.

## §. II.

*Expugnatur atheismus, & quinque rationibus D. Thomæ, existentia Dei demonstratur.*

**S**icut olim Dauid ad prosternendum Goliath, elegit sibi quinque limpidissimos lapides de torrente, & misit eos in peram pastoralem, ut dicitur 1. Regum 17. Ita S. Doctor. hic art. 3. adducit quinque egregias rationes, ad demonstrandam Dei existentiam, quibus veluti quinque lapidibus frons atheismi feritur. Prima demonstrat admittendum esse vnum primum motorem, omnino immobilem. Secunda dari vnum primum efficiens, quod sit cau-

causa aliorum. Tertia aliquod ens necessarium, à quo omnia contingentia esse participant. Quarta aliquod ens summè perfectum, ex cuius accessu vel recessu, imitatione vel defectu, mensuretur aliorum perfectio. Quinta demum vnum supremum prouisorum & gubernatorem, qui creaturas omnes gubernet & dirigat ad suos fines.

Vt autem duæ primæ rationes clariùs percipiantur, & firmiùs stabiliantur, tria breuiter hic permittenda sunt. Primò supponendum est, primum motorem omnino immobilem, Deum esse. Nomine enim Dei intelligimus id quo nihil maius aut meliùs excogitari potest. Sed primus motor omnino immobilis est talis: Ergo est Deus. Minor probatur: Primus motor omnino immobilis, debet esse actus purus, quia debet carere omni potentialitate; in quantum enim aliquid est mobile, in quantum est in potentia; vnde illud quod nullo modo est mobile, nullo modo est in potentia, sed actus purus: Atqui illud quod est actus purus, carens omni potentialitate, omnem perfectionem imaginabilem habere debet, quia si aliqua perfectio illi deesset, esset in potentia ad illam: Ergo primus motor omnino immobilis, est id quo nihil maius aut meliùs excogitari potest.

Secundò supponendum est, in serie mouentium & agentium, vnum posse esse alteri subordinatum dupliciter, nempe per accidens, & per se: tunc subordinatur alteri per accidens, quando ab eo accipit esse, sed non debet expectare eius applicationem vel influxum vt agat; Sic filius subordinatur patri, à quo quidem



dem accepit esse, sed non indiget eius applicatione, vel influxu, quotiescumque agit: Tunc verò subordinatur per se, quando nequit agere, nisi moneatur & applicetur ad agendum ab alio agente cui subijcitur: Sic instrumentum per se subordinatur artifice, quia, non nisi illo mouente & applicante, mouetur & agit.

Tertiò supponendum est, quod licet possit admitti processus in infinitum in causis & mouentibus, per accidens subordinatis, non tamen in per se subordinatis, vt docet D. Tho. infra quæst. 46. art. 2. ad 7. his verbis: *In causis efficientibus impossibile est procedere in infinitum per se, sed per accidens in infinitum procedere in causis agentibus nõ reputatur impossibile. Vnde non est impossibile quod homo generetur ab homine in infinitum: esset autem impossibile, si generatio huius hominis dependeret ab homine, & à corpore elementari, & à sole, & sic in infinitum.* Ratio etiam id suadet: cum enim in mouentibus per se subordinatis, vltimum mouens non moueat, nisi motum & applicatum à priori, & istud ab alio, & sic deinceps: si in illis daretur processus in infinitum, nullus posset dari motus vel actio in rebus inferioribus, nisi simul infiniti influxus & motiones causarum & mouentium superiorum concurrerent; vnde cum infinitum non sit pertransibile, nullus vnquam daretur motus vel actio in causis inferioribus. Potest hoc declarari & illustrari exemplo horologii, in quo si essent infinitæ rotæ, & quælibet dependeret in suo motu ab alia superiori, nec posset mouere, nisi dependenter ab illa prius mouen-



te, nulla esset quæ posset ultimò mouere, & pulsare horas; quia nunquam posset deueniri ad primam quæ cæteras omnes moueret, cum infinita illa multitudo rotarum nunquam esset pertransibilis. His præmissis.

Prima ratio D. Thomæ sic potest breuiter proponi: Datur vnus primus motor omnino immobilis: Sed ille est Deus: Ergo datur Deus. Minor constat ex prima suppositione, Maior verò sic ostenditur. Omne quod mouetur, ab alio mouetur: Sed non potest in mouentibus & motis per se subordinatis dari processus in infinitum, vt in 3. suppositione ostendimus: Ergo necessariò sistendum est in principio mouente & immobili. Maior probatur: quod mouet est in actu, vnumquodque enim agit in quantum est in actu; quod mouetur est in potentia, vnde motus 3. physic. definitur *actus entis in potentia prout in potentia*: Sed idem secundum idem non potest esse in actu & in potentia respectu eiusdem formæ, cum esse in actu dicat possessionem formæ, esse autem in potentia illius carentiam: Ergo idem secundum quod idem, non potest esse mouens & motum, & per consequens quidquid mouetur ab alio mouetur.

Secunda ratio D. Thomæ sic formatur: Omne quod fit & causatur, ab alio causatur vel fit, ita vt nihil possit seipsum efficere vel causare, quia sic esset antequam esset: vt enim aliquid efficiat, debet habere esse, quia quod nihil est, nihil operatur; vt autem efficiatur, debet non esse, quod enim est non fit, sed factum est: Sed plura sunt in hoc vniuerso effecta: Ergo efficiuntur & causantur ab alio. Vnde

cum in causis efficientibus per se subordinatis, non possit dari processus in infinitum, ut supra ostensum est, deueniendum est necessarîo ad aliquam primam, quæ à nullo possit causari, ac proinde quæ sit ens à se, & independens, quod dicimus Deum.

Tertia ratio est: Datur aliquod ens necessarium, à quo omnia contingentia esse participant: Sed tale ens est Deus, ut patet: Ergo datur Deus. Maior probatur: Si non daretur aliquod ens necessarium, sed omnia essent contingentia, & possibilia esse & non esse, nullum plane ens de facto daretur à parte rei: Sed hoc est contra sensum & manifestam experientiam: Ergo &c. Sequela Maioris probatur: Illa quæ ex sua ratione dicunt solum possibilitatem ad aliquid, non possunt reduci ad actum, nisi per aliquam causam quæ ipsum contineat; sicut quia aer est in potentia ad lucem, & aqua ad calorem, ille non potest illuminari nisi à corpore lucido, nec ista calefieri nisi à calido: Ergo si omnia essent contingentia & possibilia esse & non esse, & nullum daretur ens necessarium à quo omne esse promaneat, nullum plane ens de facto daretur à parte rei.

Nec valet si dicas, quod licet quodlibet ens contingens indigeat esse ab alio quod ipsum reducat de possibilitate ad actum existendi, non tamen tota illorum collectio; cum sit infinita, & cum in infinita multitudine non valeat illatio à singulis ad omnia; positis enim infinitis v. g. cœlorum circulationibus in futurum, post quamcumque foret alia, non post omnes & positis infinitis generationibus ab æter-

æterno, ante quamcunque foret alia, non ante omnem. Non valet inquam hæc responsio, quæ est præcipuum effugium Athæorum: quamvis enim in multitudine infinita, non valeat consequentia à singulis ad totum, in prædicatis sumptis à quantitate continua vel discreta, ut constat in exemplis adductis, secus tamen in omnibus alijs præsertim, si illa sint quidditativa & essentialia; quia enim singuli homines v. g. sunt rationales & risibiles, verum est dicere totam illorum multitudinem & collectionem esse similiter rationalem & risibilem: At impotentia essendi à seipso, seu indigentia recipiendi esse ab alio, in re contingenti, non est prædicatum quantitatis continuæ vel discretæ, sed essentialiale, conueniens illi absolutè, & ex limitatione & imperfectione suæ essentia, quæ non est illi sufficiens fundamentum essendi: Ergo illa conuenire debet, non solum singulis contingentibus distributiue sumptis, sed etiam toti eorum collectioni, & bona esse illatio, quodlibet contingens sigillatim & in particulari indiget recipere esse ab alio: Ergo & tota illorum collectio.

Quarta ratio: Admittendum est aliquod ens summè perfectum. Sed illud est Deus: Ergo datur Deus. Minor constat, ut enim sæpe diximus, nomine Dei intelligimus ens, quo nihil perfectius aut melius excogitari potest. Maior verò sic ostenditur. Videmus in hoc mundo aliqua entia esse magis vel minùs bona vel perfecta alijs, unde cum magis vel minùs dicantur de diuersis secundum quod appropinquant ad aliquid quod est maximè tale, sicut

magis calidum est illud quod appropinquat maximè calido, debet dari in rerum natura aliquod ens summè bonum & perfectum, quod sit causa & mensura bonitatis & perfectionis aliorum. Nam primum in vnoquoque genere est causa coeterorum, vel efficiens quæ bonitatem rebus effundat & distribuat, vel exemplaris, ex cuius accessu vel recessu imitatione vel defectione, mensuretur aliorum perfectio.

Quinta ratio D. Thomæ sumitur ex gubernatione rerum, & ex necessitate vnius summi prouisoris & gubernatoris, qui singulas creaturas in suos fines ordinet ac dirigat. Videmus enim ea quæ cognitione carent, operari propter finem, quia semper aut frequentius eodem modo operantur, & fines suos per debita media consecuntur; vnde cum ea quæ cognitione carent, non possint finem intendere quem non cognoscunt, nisi à causa cognoscente dirigantur, sicut sagitta non potest scopum attingere, nisi dirigatur à sagittarte, euidentius est in hoc mundo dari sapientissimum quemdam gubernatorem, & supremam aliquam intelligentiam, in suos fines omnia dirigentem, quam Deum appellamus. Hanc rationem fusè prosecuti sumus in Clypeo Theologiæ Thomisticæ disp. 1. art. 2. & in digressionem illi subiuncta, in qua existentiam Dei, ex magno & paruo mundo, id est ex artificiosa mundi structura, & mirabili hominis compositione, septem rationibus demonstrauimus.

Quæres, an possit dari ignorantia inuincibilis, seu inculpabilis de existentia Dei?

Respondeo negativè, contra Molinam opposi-

positum sentientem: nam ad Roman. 1. illi qui ignorant Deum, dicuntur inexcusabiles, quod non posset dici, si inuincibiliter illum ignorarent; ignorantia enim inuincibilis excusat à peccato, ut in tractatu de peccatis ostendemus. Sancti etiam Patres passim docendam veritatem: Damascenus enim lib. 7<sup>o</sup> orthodoxæ fidei cap. 1. *Notitia* (inquit) *Dei omnibus à natura est insita, neque id aliquis ratione utens ignorare potest.* Gregorius magnus lib. 17. moral. cap. 3. explicans illud Iob: *Omnes homines vident eum*, subdit: *Omnis homo, eo ipso quod rationalis est conditus, debet ex ratione colligere, eum qui se condidit Deum esse.* Augustinus in Psal. 74. pulchrè addit: *Deus ubique secretus est, ubique publicus, quem nulli licet ut est cognoscere, & quem nemo permittitur ignorare.* Minutius Felix in Octauio: *Parentem omnium* (inquit) *non minoris sceleris est ignorare, quam ledere.* Et D. Cyprianus lib. de unitate idolorum: *Hæc est summa delicti nolle agnoscere quem ignorare non possis.* Hieronymus epist. 3. ad Nepotianum: *Persæ, Gothi, Aegyptus, Turcæ ipsum agnoscunt: Bessorum feritas, & pellitorum turba populorum, stridorem suum in dulce nomen eius fregerunt melos, & totius mundi una vox, Deus est.* Demum Tertullianus lib. 1. aduersus Marcionem vocat notitiam Dei, *primam animæ rationalis dosem*, & in libro de testimonio animæ, recursum quem in repentinis habemus ad Deum, ait esse *testimonium animæ naturaliter Christianæ.*

Hoc etiam Philosophos Gentiles non latuit, quorum varijs omissis testimonijs, placet so-

lūm Plutarchi verba exscribere : Peregrinantibus multas contingit occurrere absque manibus vrbes , absque studijs litterarum , absque Regibus . absque auri & argenti usu , quibus ignota prorsus theatra , & gymnastica omnes exercitationes ; quin etiam quibus nullae sint domus , sed tuguria dumtaxat & matalia : nunquam autem extat vrbs aut oppidum , quibus nullus sit Deus , nulla iuramenta , nulla rances , nulla sacrificia ad bona curanda , & mala impendentia praeuertenda . Talem urbem nemo unquam vidit , nec verò videre potuit , posuissetque sine sole quam religione urbem quis contempsit .

Ratio etiam suffragatur : Primò quia praecepta legis naturae non possunt inuincibiliter ignorari , vt ostendamus in tractatu de legibus : Ergo nec Deus , cum ille sit author & finis talium praeceptorum . Secundò , si homo inculpabiliter posset ignorare verum Deum , posset etiam inculpabiliter adorare Deum falsum ; & ita posset ex ignorantia inuincibili excusari à peccato idololatriae , quod est absurdissimum . Tertiò , si homo inuincibiliter ignoraret Deum , nullum eius peccatum esset mortale : Sed hoc absurdum est : Ergo & illud . Probat sequela , ratio enim & malitia peccati mortalis , petitur ex iniuria Dei : Deus autem non potest iniuria affici , nisi cognoscatur : Ergo si homo inuincibiliter & inculpabiliter ignoraret Deum , nunquam peccaret mortaliter .

Dices cum Molina : Cognitio Dei non est nobis immediatè à natura insita , sicut notitia primorum principiorum , vt supra ostensum est ,

est, sed habetur solum per rationem & discursum: Ergo cum sint aliqui homines, ita hebetes, inculti, & veluti plumbei, ut incapaces sint demonstrationis & discursus (quales sunt insylvis, & terris, aut montibus incognitis nutriti) in illis saltem dari potest ignorantia inuincibilis & inculpabilis de existentia Dei.

Respondeo, concessio Antecedente, negando consequentiam; ut enim supra annotauimus, ad tollendam ignorantiam inuincibilem, non est necessaria cognitio euidens & demonstratiua, sed sufficit probabilis & coniecturalis, vel quæ habetur per relationem, aut instructionem aliorum; quare cum in nullo, quantumuis stupido, ita extincti sint omnes rationis radij, ut perspecto hoc vniuerso, ita perfectè disposito, non incidat illi aliqua cogitatio & cognitio probabilis, illi præesse supremum aliquem moderatorem & gubernatorem, cui sit parendum, sequendo bonum honestum & dictamen rationis, tenetur inquirere, quis sit ille, & qua ratione colendus. Quod si id spernat, non habebit ignorantiam inuincibilem & inculpabilem de existentia Dei, sed vincibilem & culpabilem. Vnde licet possint dari infideles negatiuè (id est inculpabiliter ignorantes mysteria nostræ fidei) ut docet D. Thomas 2. 2. qu. 10. art. 1. non tamen Athei negatiuè, id est qui inuincibiliter & inculpabiliter Dei existentiam ignorent, nam ut dicitur sapient. 9. *A magnitudine speciei & creatura poterat cognoscibiliter creator eorum videri.* Et ut habetur ad Roman. 1. *Inuisibilia Dei per ea quæ facta sunt, intellecta conspiciuntur &c.*



## CAPVT II:

## De unitate Dei.

**E**iusdem sacrilegij est, Deum negare, & plures inuehere; vnde post debellatum atheismum, politeismus confutandus est, & pluralitas Deorum demonstranda impossibilis, contra Gentiles & paganos, quorum tanta fuit cæcitas & dementia, vt triginta Deorum millia adinserit Hesiodus, teste Eusebio lib. 5. præparat Euang. cap. 15. Imò ( vt lepidè illis obijcit Tertullianus in Apolo. cap. 5. ) ad hominum arbitria diuinitas concederetur aut negaretur: *Apud vos ( inquit ) de humano arbitratu diuinitas pensatur: nisi homini Deus placuerit, Deus non erit: homo iam Deo propitijs esse debet.*

Ad confutandum hunc errorem vndecim rationes in Clypeo nostro adduximus, nunc breuitati studentes, tres tantùm hic exponemus. Prima est: Deus est id quo nihil melius excogitari potest: Ergo est vnus. Probat consequentia, quia melior est illa natura, in quo plenitudo essendi ita eminenter & unitè continetur, vt extra illam nihil sit, nisi ab illa deriuatum & participatum, quam illa extra quam reperitur aliquid omnino independens & imparticipatum.

Secunda affinis est præcedenti, & potest sic proponi: Nomine Dei intelligimus ens summè & infinitè perfectum: Sed repugnat tale ens multiplicari: Ergo & dari pluralitatem Deorum. Maior patet, Minor probatur. Si




darentur duæ entia summè & infinitè perfectæ , vel illud per quod inter se differrent , esset aliqua perfectio vel imperfectio ? Non secundum , cùm repugnet dari vel concipi aliquam imperfectionem vel defectum in ente summè & infinitè perfecto . Nec primum , cùm tale ens contineat omnem perfectionem imaginabilem , subindeque nulla perfectio possit illi deesse .

Tertia ratio est : Deus est supremus mundi rector & gubernator : Ergo vnus . Probatur consequentia , vt enim docet D. Thomas infra qu. 11. art. 3. quæ diuersa sunt & diuisa , in vnum ordinem non conueniunt , nisi ab vno aliquo dirigantur & ordinentur , multa enim meliùs reducuntur in ordinem per vnum , quam per plura . Ex quo Aristoteles in politicis infert , ex omnibus regendi formis perfectissimam esse monarchiam , seu regimen vnius ; & 12. Metaph. hanc Homeri sententiam celebrat , *Non est bonum multisudo principatumum , vnus verò princeps* ; & hinc de humano ad diuinum principatum conscendens , concludit necessariam esse vnitatem Principis diuini , sicut & terreni , & subdit quòd sicut bonum familiæ & exercitus , vnum ducem & patrem familias exigit , ita etiam bonum vniuersi vnum rectorem . Eodem modo Hieronymus , cum Rustico suo differens , discurret : *In apibus ( inquit ) vnus est princeps , grues omnes sequuntur , vnā ordine litterario . Imperator vnus , vnus prouinciæ suæ iudex , in navi gubernator vnus , & in mundana fabrica vnus opifex & vnus moderatur .*

His rationibus addi potest naturalis institutio

Stus hominum, qui etiam in medijs gentilitatis erroribus, communi sermone Deum unicum semper agnouerunt. Nam ut ait Lactantius lib. 2. instit. cap. 1. *Cum iurant, & cum gratias agunt, non Deos multos, sed Deum nominant; adeo ipsa veritas, cogente natura, etiam ab initio peccatoribus erumpit.*



### C A P V T III.

#### *De constitutio naturæ diuinæ.*

**N**ON est hic quæstio de reali & physica constitutione diuinæ naturæ, hoc est de constitutione Dei secundum quod est in se realiter, sic enim omnes Dei formalitates, siue absolutæ, siue relatiuæ, ipsum realiter constituunt. Quod pater, nam constitutio sic sumpta est per realem identitatem: sed omnes formalitates, siue absolutæ, siue relatiuæ, Deo formaliter conuenientes, sunt idem realiter cum illo: Ergo omnes illum realiter & physice constituunt. Hic ergo solum agimus de constitutio metaphysico naturæ diuinæ, prout à nobis viatoribus imperfectè in hoc statu concipitur ad modum naturæ creatæ, in qua semper reperitur aliqua perfectio vel prædicatum, quod primò in illa concipitur, tanquam fons & origo cæterorum, ut in homine rationalitas. Vnde in præsentì inquirimus, quid primò in Deo intelligatur, cum fundamento in re, quod se habeat tanquam radix & fons cæterorum, præsertim diuinorum attributo-  
rum

rum & operationum ? Vnde illi non videntur punctum huius celeberrimæ & grauissimæ difficultatis attingere , qui dicunt naturam diuinam constitui collectione attributorum : licet enim illa physicè & realiter constituat naturam diuinam , non tamen formaliter & metaphysicè ; cum primò in illa non concipiatur attributorum collectio , sed aliqua vna formalitas & perfectio , quæ sit radix aliarum . Hac ergo prætermisâ sententiâ , tres aliæ celebres & valde probabiles referri solent , quarum prima docet naturam diuinam metaphysicè constitui per rationem entis à se & per essentiam . Secunda , per rationem substantiæ immaterialis & intellectualis radicaliter . Tertia , actuali Dei intellectiōe , & ista communior est in schola Thomistarum , & videtur probabilior . Vnde .

Dico primò , naturam Dei non constitui metaphysicè per rationem entis à se & per essentiam .

Probatur primò ex D. Thoma infra qu. 13. art. 11. ad 1. vbi docet hoc nomen *Deus* , quoad rem significatam , esse magis proprium Dei , quam nomen *qui est* . Sed hoc esset falsum , si natura Dei constitueretur per rationem entis à se & per essentiam , nam hoc nomen *qui est* , vel hoc nomen *ens per essentiam* , esset nomen naturæ & essentia Dei : Ergo iuxta D. Thomam Dei natura non constituitur per rationem entis à se & per essentiam . Vnde Caietanus ibidem doctrinam eius explicans ait , ideo hoc nomen *Deus* , quod rem significatam , esse magis proprium Dei , quam nomen *qui est* , quia *Deus* importat naturam Dei quasi secundum v-

simam differentiam specificam, secus autem nomen qui est.

Probatur secundò ratione fundamentali: Ratio entis à se, increati, & per essentiam, transcendit omnem formalitatem vel perfectionem diuinam; inuenitur enim in attributis, & relationibus, & in omni eo quod diuinum est, sicut ratio entis creati & per participationem includitur in omni quod creatum est: Sed prædicata transcendentia omnem formalitatem vel perfectionem diuinam, non possunt Dei naturam constituere, prout in præsentì loquimur de illius constitutione: Ergo nec ratio entis à se & per essentiam. Maior patet. Minor verò sic ostenditur. In præsentì non loquimur de constitutione diuinæ naturæ, sub ea ratione & conceptu quo distinguitur à creaturis, sed sub ea ratione quâ ab attributis, alijsque diuinis formalitatibus distinguitur: At prædicata transcendentia omnem formalitatem & perfectionem diuinam, licet Deum à creaturis distinguant, non tamen distinguunt naturam ab attributis, & alijs diuinis formalitatibus, cum in illis natura, & attributa, aliæque diuinæ formalitates conueniant: Ergo nequeunt constituere Dei naturam, sub ea ratione quâ ab attributis virtualiter distinguitur.

Probatur tertio conclusio: Natura diuina constituitur per gradum intelligendi: Ergo non constituitur per rationem entis à se & per essentiam, pertinentem ad gradum essendi. Consequentia patet, Antecedens probatur primò: Gradus intelligendi est perfectior gradibus viuendi, & essendi, vt docet D. Thomas

intra quæst. 93. art. 2. Sed natura diuina constituitur per gradum omnium perfectissimum: Ergo constituitur per gradum intelligendi. Secundo probatur idem Antecedens ex alia doctrina, quam ibidem tradit S. Doctor, ubi docet solas creaturas intellectuales esse factas ad imaginem Dei, in illisque solis rationem imaginis Dei imperfectè reperiri, eò quod solum creaturæ intellectuales imitentur Deum, illique assimilentur in intellectualitate, quæ est quasi vltima differentia Dei. Eandem doctrinam habet Caietanus ibidem, docet enim solas creaturas intellectuales assimilari Deo in quasi vltima differentia, quia illæ solum assimilantur Deo in quantum intellectiuo: Ergo censetur naturam diuinam constitui per gradum intelligendi, non verò per rationem entis à se & per essentiam.

Confirmatur: Si ratio entis à se constituerit naturam diuinam vt vltima differentia, non solum intellectuales creaturæ essent ad imaginem Dei, sed hoc alijs creaturis, imò omnibus conueniret, quandoquidem omnes in gradu essendi sunt similes Deo: Sed hoc est contra S. Thomam citatum: Ergo & illud.

Dices, omnes creaturas non esse ad imaginem Dei, quia licet cum eo conueniant in gradu essendi, non tamen in modo essendi à se. Sed contra: Quia intellectualitas per essentiam & à se constituit Deum vt vltima differentia, creatura intellectualis dicitur ad imaginem Dei, eò quod, illi assimilatur in ratione intellectualis, quamuis illi non sit siuilitis in eo quod est in intellectualis à se: Ergo si ratio entis per essentiam, Deum vt vltima diffe-

rentia constituat, creaturae non intellectuales, Deo similes in ratione entis, erunt ad imaginem Dei, quamvis illi non sint similes in ratione entis à se.

Dico secundò, natura diuina non constituitur per radicem aut vim proximam intelligendi, sed per ipsummet intelligere.

Duplex est ratio, fundamentalis huius assertionis: Prima quæ sumitur ex summa puritate & actualitate diuinæ naturæ, potest sic breuiter proponi. Natura diuina, cum sit actus purissimus, & omnis potentialitatis expers, constitui debet modo purissimo & actualissimo, subindeque per id quod intra gradum intellectuum maiorem exprimit actualitatem: Sed intelligere est id quod intra gradum intellectuum maiorem exprimit actualitatem, imò est vltima eius actualitas, & se habet in ordine intellectiuo, sicut existentia in ordine entitatio, vt docet D. Thomas 1. contra Gent. cap. 45. ratione 2. vbi ait. quod *intelligere comparatur ad intellectum, sicut esse ad essentiam*: Ergo natura diuina constituitur per ipsum intelligere, non verò per intellectualitatem radicalem, quæ est quasi potentialis ad actum intelligendum, aut per vim intelligendi, quæ concipitur per modum actus primi, non verò per modum vltimæ actualitatis.

Secunda ratio quæ sumitur ex Tractatu de Trinit. sic formatur: Per illud constituitur formaliter natura diuina, quod secunda Persona Trinitatis, ex vi suæ processione, recipit: At qui recipit ipsum intelligere: Ergo illud est naturæ diuinæ constitutiuum, Maior patet,

tet, quia secunda Persona Trinitatis, per id quod recipit à Patre, ex vi suæ processions, constituitur filius, vt in eodem Tractatu docent Theologi: non potest autem constitui filius, nisi per communicationem naturæ. Minor verò probatur: Secunda Persona Trinitatis procedit per modum verbi: Sed esse verbi, cùm sit terminum intellectiōis, nihil aliud est quam intelligi, seu existere per ipsum intelligere: Ergo secunda Persona Trinitatis, ex vi suæ processions, excipit ipsum intelligere.

Obijcies primò contra primam conclusionem: Sicut solus Deus seipsum perfectè cognoscit, ita & essentiam suam explicare solus potest: Sed Deus interrogatus à Moyse quidnam esset, ait Exod. 3. suum veluti declarans constitutum, *Ego sum qui sum*, eique iniungit vt dicat Pharaoni: *Qui est misit me ad vos*. Ergo ratio entis à se & per essentiam, est constitutum diuinæ naturæ.

Confirmatur: Nomen proprium alicuius est quod significat ultimam differentiam, quā ab alijs distinguitur: Sed hoc nomen *Qui est*, est proprium Dei, vt docet D. Thomas intra quæst. 13. art. 11. & eleganter declarat Hieronymus lib. 14. de Trinit. prædicta verba Exodi exponens: *Miratus sum plane* (inquit) *tam absolutam de Deo significationem, nihil enim Deo magis proprium quam esse intelligitur*: Ergo tale nomen exprimit ultimam differentiam quā Deus ab alijs distinguitur.

Ad obiectionem respondeo, Deum verbis illis Exodi solū voluisse declarare id per quod præcipuè à creaturis distinguitur, quod est



est ratio entis à se & per essentiam , non verò id per quod eius essentia differt ab attributis , & est illorum radix & origo , in quo præcipue consistit conceptus naturæ , vt natura est , quæ à Philosophis definitur *principium motus & quietis eius in quo est* . Vnde

Ad confirmationem distinguo Maiorem: nomen proprium alicuius adæquatè , est quod significat vltimam differentiam , concedo Maiorem : proprium inadæquatè , nego Maiorem , & sub eadem distinctione Minoris , nego Consequentiam . Nam illud nomen est proprium adæquatè , per cuius significatum res differt ab omnibus alijs . Illud verò per cuius significationem res differt ab aliquibus , non tamen ab omnibus , est proprium solum inadæquatè : Deus autem , etsi per rationem entis à se , differat à creaturis , non tamen per illam differt illius essentia ab attributis & relationibus , quia omnibus illis essentialiter conuenit . Vnde licet hoc nomen *qui est* , sit proprium Deo proprietatè adæquata . Et in hoc sensu intelligendi sunt Hilarius & D. Thomas , quia loquuntur de Deo , vt à creaturis distinguitur , non verò de natura Dei , vt differt à relationibus & attributis .

Ex his solum manet aliud argumentum Aduersariorum , quod sic proponunt : Illa est ratio constitutiva alicuius , quæ primò in illo concipitur , & per quam distinguitur ab alijs , cum idem sit constitutum & distinctum : Atqui ratio entis à se & per essentiam , primò concipitur in Deo , & est id per quod primò distinguitur ab omnibus alijs : Ergo est constitutiva diuinæ naturæ . Respondetur enim  
pri-



primò, non sufficere ad rationem constitutivam ; quod sit prius , vel quod primò in re concipiatur , si se habeat per modum transcendentis , vel prædicati communis ; alioquin ratio entis , vel gradus substantiæ , viventis , vel ratio corporis , quæ prius in homine concipiuntur quam rationale , ipsum constituerent : Ratio verò entis à se & per essentiam , se habet in Deo per modum transcendentis increati , cum includatur in essentia , attributis , & relationibus , & in omnibus divinis formalitatibus . Vnde Respondetur secundò , data Maiori , negando Minorem , quantum ad secundam partem ; licet enim ratio entis à se & increati , Deum à creaturis distinguat , non tamen essentiam eius ab attributis , & relationibus , cum sit prædicatum illis commune , eaque transcendens .

Obijcies insuper contra secundam conclusionem : Intelligere est essentialiter operatio , imò est omnium operationum perfectissima , quæ vivit natura intellectualis : Sed natura divina constitui nequit per operationem , cum illa petat à principio egredi , subindeque illud constitutum supponat : Ergo natura divina non potest constitui per intelligere .


Huic difficillimæ obiectioni dupliciter respondent defensores nostræ sententiæ . In primis enim doctissimi Patres Salmanticenses in Tractatu de scientia Dei disp. 4. dubio 2. dicunt quod licet operatio creata & finita , cum imperfectionibus involuta , petat à principio egredi , illudque constitutum supponat , non tamen operatio increata & infinita , & quæ habet rationem operationis formaliter eminaenter ; quia illa sibi identificat , absque distin-

ctio-

atione virtuali, quidquid ad primam lineam intellectualem spectat, subindeque ipsum principium intelligens, à quo proinde non potest cum fundamento in re concipi ut egrediens.

Secundò respondet Gonzales disput. 36. conclus. 3. & 4. intelligere Dei considerari posse dupliciter, scilicet per modum actionis, & sub conceptu actualitatis subsistentis; & licet sub prima consideratione non possit Dei naturam constituere, bene tamen sub altera. Quam solutionem & doctrinam explicat & probat hoc exemplo & discursu: Quamvis relationi diuinæ repugnet constituere personam sub conceptu explicito *ad*, non tamen sub conceptu *in*, & formæ hypostaticæ pertinente ad lineam relationis, ut communiter docent Thomistæ in Tractatu de Trinitate: Ergo pariter, etsi intellectiōi diuinæ repugnet constituere naturam Dei, sub conceptu expresso *ab*, & ut concipitur ad modum actionis, poterit tamen illam constituere, sub conceptu actualitatis subsistentis. Probatur consequentia: Non minus est de conceptu relationis supponere fundamentum & personam vel subiectum, quam de ratione actionis præsupponere principium: Ergo si diuina relatio, quia subsistens est, quamvis personam supponat sub conceptu explicito *ad*, illam constituit sub conceptu *in*, aut formæ hypostaticæ, pariter intellectio diuina, quia subsistens est, præsupponet quidem sub conceptu explicito *ab* & egressionis, naturam constitutam, non tamen sub omni conceptu, sed constituet naturam sub conceptu actualitatis & gradus.

Ex dictis intelliges, quomodo gratia habitualis sit participatio formalis diuinæ naturæ; licet enim non participet intelligere Dei, ut habet rationem operationis & actualitatis, sed sub hoc conceptu & formalitate participetur à visione beatifica; illud tamen participat, ut est eminenti quodam modo radix diuinarum operationum & attributorum, sub quo conceptu habet formaliter rationem naturæ, ut constat ex supra dictis. Gratia enim sanctificans est radix cognitionis & amoris Dei, & ab illa emanant, veluti proprietates ab essentia, virtutes Theologicæ & infusæ, quæ sunt participationes diuinorum attributorum.



## CAPUT IV.

*De attributis diuinis in communi.*

**A**tributum est perfectio absoluta, & necessaria, formaliter in Deo existens, & essentia iam constitutæ superueniens. In qua definitione per duas primas particulas à ratione attributi excluduntur actus liberi, & proprietates relatiuæ, per tertiam verò perfectiones secundum quid creaturarum, quæ non sunt formaliter sed tantum eminenter in Deo. Demum per vltima verba declaratur attributa ad constitutum diuinæ naturæ non pertinere, sed esse veluti eius affectiones & proprietates, eam veluti modificantes, & ad aliam lineam trahentes. Illa vocantur ab Hebræis *Sephiroth*, id est quasi Saphiri, teste Rabbi Moyse in com-

Commentarijs suis primi libri *Iesae*, quia illis veluti Saphiris, & gemmis ac lapidibus pretiosis, mirum in modum exornatur & decoratur diuina natura & substantia, quamuis nullam prorsus cum ea faciant compositionem, ut constabit ex dicendis §. sequenti.

### §. I.

*Quo genere distinctionis distinguantur attributa diuina ab essentia & inter se?*

**S**COTUS & eius Discipuli admittunt inter attributa diuina & essentiam distinctionem quandam formalem actualem, quam ex natura rei appellant, & volunt eam præcedere omnem operationem intellectus, ut clarè seipsum explicat Doctor subtilis in 1. dist. 8. qu. 4. ubi ait quod talis distinctio est præcedens intellectum omni modo. Nominales verò in alio extremo positi, asserunt attributa diuina, tum inter se, tum ab essentia, sola ratione ratiocinante distingui, vel solum connotatione quadam ad res creatas; ita ut eadem entitas increata Dei, ut connotat effectus à se productos, dicatur omnipotentia, sapientia, verò vel scientia, ut connotat res sibi obiectiue præsentis & à se cognita. Demum alij Theologi communiter docent, attributa distingui ab essentia & inter se, distinctione rationis ratiocinatae, & cum fundamento in re; sed aliqui volunt talem distinctionem se habere per modum excludentis & exclusi, sicut genus distinguitur à differentia; alij verò existimant, illam esse solum per modum expliciti & impli-

citi, sicut ens distinguitur à suis proprietatibus.

Dico primò , attributa diuina non distinguuntur inter se , nec ab essentia diuina , distinctione formali , seu ex natura rei , quam ponunt Scotus & eius Discipuli .

Probatur primò : Quæ ex natura rei & formaliter realiter distinguuntur ab aliquo , non debent absolutè prædicari de illo , sed potiùs absolutè negari : vnde in sentètia distinguente relationem à fundamento , distinctione reali formali istæ propositiones falsæ absolutè censentur , *a bedo est similitudo , generatio est paternitas* : Sed iuxta Sanctos Patres attributa diuina , non solum in concreto , sed etiam in abstracto , prædicantur de essentia : Ergo ab illa non distinguuntur distinctione reali formali , seu ex natura rei , Maior est certa , Minor verò constat ex SS. Patribus asserentibus quod Deus nò solum est bonus , sed est ipsa bonitas , non solum est sapiens , sed etiam ipsa sapientia , vt declarat D. Bernard. serm. 80. in Cantica , & lib. 5. de consider. Vnde in Concilio Rhemeniensi requisitus vt eius propositiones scriberentur : *Scribatur ( inquit ) stylo ferreo , & ungue adamantino , & sculpatur in silice , quod diuina essentia , forma , natura , deitas , bonitas , sapientia , virtus , potentia , magnitudo , verò est Deus .*

Probatur secundò conclusio : Attributa diuina non minori identitate gaudent cum essentia & natura diuina , quam relationes : Sed istæ non distinguuntur distinctione reali formali ab essentia : Ergo nec illa . Maior patet . Minor verò demonstrari solet in Tractatu de Trinitate , & colligitur manifestè ex Florenti

no fess. 15. & 18. 19. & 24. vbi dicitur quod *relatio est eadem re' cum natura solum v'ò secundum modum intellectiōis nostræ differt.* Item quod *non re, sed sola ratione, paternæ hypostasis à substantia seiungitur.* Quæ verba d' distinctionem Scoticam manifestè excludunt, cum illa, iuxta Scotum supra citatum sit, *precedens intellectum omni modo.*

Probatur tertio: Deus ex Lateranensi cap. *Firmiter*, est substantia omnium simplex: Sed non esset talis, si eius attributa distinguerentur ab essentia, distinctione reali formali: Ergo &c. Minor probatur: Sicut enim si esset distinctio entitatiua inter essentiam diuinam & eius attributa, resultaret ex illis compositio realis entitatiua: ita si distinguantur distinctione reali formali, realis formalis compositio ex illis resultabit.

Confirmatur & magis illustratur hæc ratio: compositio est distinctorum vnio: Ergo sicut vnio distinctorum distinctione reali entitatiua, est compositio entitatiua realis, ita vnio distinctorum distinctione reali formali, est compositio realis formalis.

Respondent Scotistæ, non sufficere ad compositionem quod extrema inter se distinguantur, sed insuper requiri quod inter se comparentur per modum actus & potentiæ, quod non contingit in proposito. Sed (præterquam quod hoc videtur omnino voluntarium, cum definitio compositionis solum dicat, quod illa sit *vnio distinctorum*, & cum aliqua sint composita, in quibus extrema non se habent per modum actus & potentiæ, vt patet in composito ex partibus integralibus) hoc ipso quod  
di-

diuina essentia ponitur vt realiter formaliter ab attributis distincta, hoc ipso ponitur vt ab illis formaliter actuabilis & perfectibilis: Ergo hoc ipso ad illa comparatur vt potentia ad actum, & perfectibile ad perfectum: vnde quamuis hæc comparatio ad veram compositionem esset necessaria, hæc tamen non obstar, quia esset compositio in Deo, si eius natura realiter formaliter ab eius attributis distingueretur.

Probatür quartò: Sicut Deus est summè simplex, ita & summè vnus, & vt loquitur D. Bernardus, *vnissimus*: Sed non erit summè vnus, si eius essentia distinguatur formaliter ex natura rei, & ante omnem operationem intellectus, à suis attributis: Ergo &c. Maior patet, Minor verò sic ostenditur. Non minùs summæ vnitati repugnat quælibet distinctio realis, quam summæ simplicitati quælibet compositio realis: Sed si esset in Deo aliqua compositio realis ex essentia & attributis, quantumuis parua, Deus non esset summè simplex; nam vt ait D. Bernardus lib. 5. de consider. *Tum non est simplex quod vel vni fuerit obnoxio in formæ, quam nec virgo vel vni cognita viro.* Ergo similiter, si sit aliqua distinctio realis, quantumuis parua, inter essentiam & attributa, Deus non erit summè vnus.

Deinum suaderi potest conclusio, ex eo quod ratio formalis diuinæ essentiæ, non minùs est simpliciter infinita, quam eius entitas: Sed entitas diuinæ essentiæ, ratione suæ infinitatis; petit non distingui actu ante operationem intellectus ab entitate attributi: Ergo etiam ratio formalis naturæ Dei, ratione suæ infinitatis,



tis, postulat non distingui, seclusa operatione intellectus, à ratione formali attributi.

Dico secundò, attributa diuina distinguuntur inter se & ab essentia, distinctione rationis ratiocinatae.

Probatur primò: Distinctio rationis ratiocinatae est illa quæ habet fundamentum in re: Sed talis est distinctio inter essentiam & diuina attributa, & inter attributa inter se: Ergo illa est rationis ratiocinatae. Maior constat. Minor probatur. Virtualis multiplicitas rei est sufficiens fundamentum intellectui, ad ipsam distinguendam virtualiter; Sed diuina essentia & eius attributa, licet sint formaliter à parte rei vna res, tamen res illa est virtualiter multiplex, utpote æquiualens pluribus perfectionibus creatis realiter distinctis, etiam ex suo genere seu ratione formali; æquiualeat enim absoluto & respectiuo, communicabili & incommunicabili, principiis intelligendi & volendi, puniendi & miserendi: Ergo &c. Dixi æquiualeere pluribus ex genere suo distinctis in rebus creatis, quia ad fundandam distinctionem virtualem in perfectionibus diuinis, non sufficit quod æquiualeant perfectionibus creatis realiter distinctis, si illæ non pertineant ad diuersa genera, vel, ut aliqui loquuntur, ad diuersas lineas: scientia enim diuina ad vnicum attributum virtualiter indistinctum, & tamen æquiualeat omnibus scientiis creatis realiter inter se distinctis. Similiter intelligere Dei æquiualeat virtuti radicali & proximæ intelligendi, speciei impressæ, & operationi intellectuali, & tamen non distinguitur virtualiter ab illis formalitatibus, quia



nimirum illæ pertinent ad eandem lineam intellectualem .

Probat̃ur secundò : Nomina attributorum & essentia diuinæ , non sunt sinonima , sicut ista, *Marcus, Tullius, Cicero*, sed sunt diuersæ rationis : Ergo licet omnia eandem perfectionem, entitatem , & formalitatem significant , non tamen illam significant sub eadem omninò ratione , & consequenter conceptibus , his nominibus expressis, correspondent in Deo diuersæ rationes obiectiuæ : At huius diuersitatis ratio non sumitur solum ex nostro intellectu , sed fundatur partim in eminentia perfectionis diuinæ , partim in debilitate & imperfectione nostri intellectus, non valentis illam vno conceptu concipere , nec consequenter vno nomine nominare , vt egregiè declarat D. Thomas in 1. dist. 2. qu. 1. art. 3. his verbis : *Pluralitas istorum nominum non tantum est ex parte intellectus nostri formantis diuersas conceptiones de Deo , quæ dicuntur diuersæ rationes, sed etiam ex parte ipsius Dei , in quantum scilicet est aliquid in Deo correspondens omnibus istis conceptionibus, scilicet plena & omnimoda ipsius perfectio* : Ergo distinctio attributorum inter se , & ab essentia , non est rationis ratio- cinantis , sed rationis ratiocinatæ .

Dico tertio, distinctio rationis ratiocinatæ , quæ est inter attributa & essentiam , vel inter attributa inter se , non est per modum excludentis & exclusi , sed solum per modum expliciti & impliciti .

Probat̃ur ratione fundamentali: Essentia diuina non potest concipi cum fundamento in re, nisi vt includens, saltem implicite , attributa ,

nec vnum attributum, nisi vt includens implicitè alia : Ergo inter essentiam & attributa, vel inter ipsa attributa, non potest dari cum fundamento in re distinctio rationis per modum excludentis & exclusi, sed solum per modum expliciti & impliciti : Consequentia patet, Antecedens probatur. Non potest essentia Dei, vel eius attributum concipi, saltem cum fundamento in re, nisi vt actus purus, & simpliciter siue in genere entis infinitus : Ergo cum de ratione actus puri sit quod non possit concipi vt perfectibilis per additionem alterius, & in potentia ad illud ; & de ratione infiniti simpliciter, siue in genere entis, quod in se formaliter includat omnem rationem entis, quæ non inuoluit limitationem & imperfectionem, infinito enim nihil potest addi in illo genere in quo est infinitum : manifestum est, essentiam diuinam non posse concipi cum fundamento in re, nisi vt includentem, saltem implicitè, omnem perfectionem & entitatem attributi, nec vnum attributum, nisi vt includens, implicitè perfectionem, & entitatem essentia, omniumque aliorum attributorum.

## §. II.

### *Præcipue obiectiones solvuntur.*

**O**bjicies primò contra primam conclusionem : Cum definitio explicet naturam rei, quæ definitione differunt, ex natura rei distingui debent : Sed natura Dei, & attributa, ipsaque attributa inter se, definitione dif-  
fe-

ferunt, natura enim definitur id, quo Deus est radicale suarum operationum & attributorum principium, intellectus id quo Deus intelligit, voluntas id quo Deus amat, & sic de alijs attributis, quæ definitiones sunt distinctæ: Ergo natura Dei & attributa, ipsaque attributa inter se, ex natura rei distinguuntur.

Respondeo distinguendo Maiorem: Quæ differunt definitione, data de re prout est in se, ex natura rei distinguuntur, concedo Maiorem. Data de re non prout est in se, sed prout à nobis concipitur, nego Maiorem, & sub eadem distinctione Minoris, nego consequentiam. Natura ergo diuina & attributa dupliciter definiri possunt, scilicet definitione data de illis prout sunt in se, qualiter solùm definiri possunt à Deo, vel ad summum ab intellectu beati; vel definitione data de illis, non prout sunt in se, sed prout à nobis viatoribus, imperfectè & per alienas species concipiuntur. Si primo modo definirentur, non haberent diuersas definitiones, sed vnā; secundo autem modo diuersis definiuntur definitionibus; ex quo tamen non sequitur illa distinguere ante intellectus nostri considerationem, distinctione reali formali, seu ex natura rei, quia cum definitio à nobis detur de illis, non prout in se sunt, sed prout à nobis concipiuntur, sufficit illa ratio nostra distinguere, vt diuersis gaudeant definitionibus.

Obijeies secundò: Illa distinguuntur actu ante operationem intellectus, saltem formaliter & ex natura rei, de quibus contradictoria verificantur actu, ante operationem intellectus: Sed de intellectu diuino, & diuina vo-

luntate, ante operationem intellectus, verificantur propositiones contradictoriæ, puta quod intellectus est principium generationis Verbi, voluntas non est principium generationis Verbi: Ergo distinguuntur actu ante operationem intellectus, distinctione saltem formali & ex natura rei, qualem Scotus & eius Discipuli admittunt.

Respondeo negando Maiorem, ut enim contradictoria verificentur actu de aliquibus, ante operationem intellectus, sufficit quod distinguantur virtualiter inter se; quia sicut calor virtualis in sole, potest id totum præstare, seclusis imperfectionibus, quod calor formalis præstat in igne: ita distinctio virtualis id omne præstare potest quod facit distinctio actualis. Illa enim fundatur in eminentia rei virtualiter multiplicis, & æquivalentis perfectionibus diuersis; vnde sicut anima rationalis; quia est eminenter vegetatiua, sensitua, & intellectiua, æque bene gradum vegetatiuum, sensituum, & rationalem confert, ac præstarent tres animæ realiter distinctæ, quibus illa æquipollet. Ita distinctio virtualis tam bene potest fundare prædicata contradictoria, quam distinctio formalis & ex natura rei, quam Scotus admittit inter diuina attributa.

Obijcies tertio contra secundam conclusionem: Non datur in Deo compositio rationis cum fundamento in re: Ergo nec distinctio rationis. Antecedens constabit ex dicendis capite sequenti. Consequentia verò probatur: Non minus opponi videtur distinctio etiam rationis summæ Dei unitati, quam com-

positio rationis summæ eius simplicitati : Ergo si non possit dari in Deo compositio rationis cum fundamento in re , non poterit etiam inter diuina attributa reperiri distinctio rationis habens fundamentum in re , quæ rationis ratiocinatæ appellari solet .

Respondeo , concessio Antecedente , negando consequentiam & paritatem . Tum quia compositio rationis fundatur in potentialitate obiecti , in quo debent esse duæ formalitates seu conceptus obiectiui , quorum vnus se habeat ad alterum , vt potentia ad actum , & perfectibile ad perfectiuum : distinctio verò rationis inter diuina attributa fundatur in summa perfectione & eminentia entitatis increatæ Dei , æquivalentis pluribus perfectionibus creatis , quæ sunt dispersæ in rebus inferioribus , vt antea declarauimus . Tum etiam , quia compositio rationis debet esse ex pluribus conceptibus se mutuò excludentibus , cùm de ratione partis metaphysicæ sit à suo conceptu aliam partem excludere , vt constat in compositione ex genere & differentia : distinctio verò rationis quæ est inter essentiam diuinam & attributa , vel inter ipsa attributa , hanc mutuam conceptuum exclusionem non requirit , sed ad illam sufficit , quod vnum non includatur explicitè in alio . Idem contingit in ente & eius proprietatibus , quæ virtualiter & ratione ratiocinata inter se differunt , quamuis sese mutuò includant , & non possit inter illa dari perfecta præcisio .

Ex dictis colligitur , distinctionem rationis attributorum ab essentia , non fieri ab intellectu Dei & beatorum , videntium Deum vt est

in se. Hæc enim distinctio fundatur partim in eminentia diuinæ entitatis, virtualiter multiplicis, partim in limitatione nostri intellectus, vno actu non valentis adæquate totam diuinæ essentia perfectionem, & in medio quo Deum cognoscimus per analogiam ad creaturas, & species ab illis acceptas; licet autem Deus cognoscat distinctionem suorum attributorum, virtualem in re, & formalem in nostro intellectu, ea tamen ratione non distinguit, cum vno actu simplicissimo omnia comprehendat vt sunt in se per modum vnius perfectionis simplicis, omnimodè indiuisibilis: Similiter beati, vnico & indiuisibili conceptu, Deum vt est in se intuentur, quia illum cognoscunt vnica & simplicissima specie, nimirum essentia diuina, gerente vices speciei tam expressæ quam impressæ in visione beatifica: Ergo nec Deus, nec beati intra verbum formam distinctionem rationis essentia diuinæ ab attributis, vel attributorum inter se. Hanc rationem egregie & eleganter expendit D. Bernardus lib. 5. de considerat. vbi sic discurret: *Nobis, quia non possumus cum Dei simplicitate contendere, dum contendimus apprehendere vnum, occurrit quasi quadruplicatum, facit hoc speculum & enigma; cum autem videbimus facie ad faciem, videbimus eum sicuti est. Nec enim iam tunc fragilis acies mentis nostræ, quantumlibet vehementer intendens, aliquatenus resiliat, desiliatue in suam pluralitatem; colliget se magis, adnabit, conformabitque vnitati illius, vel potius unitati illi, vt non vni facies respondeat faciei. Dixi beatos non formare intra verbum distinctionem rationis essen-*

essentiaē diuinæ attributis , vel attributorum .  
inter se , quia valde probabile est , illos talem  
distinctionem extra verbum posse efficere ,  
cū non vna sed multiplex possit esse cognitio  
beatorum extra verbum .



## CAPVT V.

*De simplicitate Dei .*

**D**Eum esse substantiam omnino simplicem ,  
omnisque prorsus compositionis exper-  
tem , non solum fides docet , & Concilium La-  
teranense capite præcedenti relatum , expressè  
definit , sed etiam ratio manifestè demonstrat .  
Vt enim discurret S. Thomas I. contra Gent.  
cap. 28. *In quolibet genere tanto aliquid est  
nobilius , quanto simplicius , sicut in genere ca-  
lidi , ignis qui non habet aliquam permixtio-  
nem frigidi : quod igitur est in fine nobilitatis  
omnium entium , oportet esse in fine simplicitatis :*  
*hoc autem quod est in fine nobilitatis omnium  
entium , dicimus Deum : nulla igitur compositio  
ei accidere potest .*

Item Deus est actus purissimus , & omnis  
potentialitatis expertus : Sed omnis compositio  
importat aliquam potentialitatem : Ergo in  
Deo nulla est compositio . Minor probatur :  
Omnis compositio vel est physica , videlicet  
aut ex materia & forma , aut ex subiecto & ac-  
cidente ; vel metaphysica , nimirum aut ex es-  
sentia & existentia , aut ex supposito & natu-  
ra ; vel logica , quæ fit ex genere & differen-




tia : nulla autem est ex illis compositionibus , quæ non dicat potentialitatem ; materia enim est potentia ad formam substantialem , & subiectum ad formam accidentalem cum qua componit : item essentia componens cum existentia , debet distingui ab ea per modum excludentis & exclusi , & consequenter esse in potentia ad ipsam ; quod etiam verificari debet de natura componente cum subsistentia , siue cum supposito . Denique compositio ex genere & differentia , licet sit tantum per rationem , debet tamen habere fundamentum ex parte rei cognitæ : fundamentum autem gradus generici est potentialitas in natura quæ denominatur genus : Ergo omnis compositio importat aliquam potentialitatem .

Tertiò , quidquid ex pluribus componitur , ex imperfectis conflatur , ut ait Damascenus lib. 1. fidei orthodoxæ : Sed in Deo nihil potest esse imperfectum : Ergo nec compositum . Quam rationem eleganter expressit Hilarius lib. 7. de Trinit. his verbis : *Neque compositis atque inanimis , Deus qui vita est subsistit ; neque qui virtus est , ex infirmioribus ; neque qui lux est , obscuris coarctatur ; neque qui spiritus est , ex disparibus formabilis est : totum quod in eo est , unum est .*

Huic diuinæ & summæ simplicitati non obest mysterium Trinitatis , quamvis fides in eo agnoscat tres personas realiter distinctas , & in eadem essentia intimè coniunctas : neque mysterium Incarnationis , in qua persona Christi est composita ex personalitate Verbi & humanitate . Nam ut rectè annotavit D. Thomas in 1. dist. 8. quest. 1. art. 1. ad 4. ut tres Di-



Diuina Personæ efficerent compositionem cum essentia, deberetur vniri inter se, sub ea ratione quâ distinguuntur, vel distingui sub ea ratione quâ vniuntur, cum compositio sit distinctorum vnio: Sed Personæ Diuinæ, sub ea ratione quâ distinguuntur, non vniuntur; distinguuntur enim per relationes, quæ non vniuntur, sed opponuntur; vniuntur verò in essentia à qua nullatenus distinguuntur. In mysterio verò Incarnationis Verbum Diuinum non venit in compositionem per modum partis materialis, vel formæ informantis & inherētis (hoc enim summam imperfectionem inuolueret) sed per modum termini completis, actuantis, & perficientis humanitatem, quod puram dicit in illo perfectionem. Sed de his fusiùs in Tractatibus de Trinitate & de Incarnatione.



## CAPVT VI.

## De perfectione Dei.

**D**. Thomas hic quæst. 4. art. 2. duplici ratione probat rerum omnium perfectiones esse in Deo, subindeque illum esse summè & infinitè perfectum. Prima est: Quidquid perfectionis est in effectu, debet inueniri in causa efficiente, vel secundùm eandem rationem, si sit agens vniocum, vel eminentiori, si sit agens æquinocum: Sed Deus est prima causa effectiua rerum: oportet ergo rerum omnium perfectiones in eo præexistere, subinde-

que illum esse summè & infinitè perfectum : quamvis enim perfectiones creaturarum , quæ actu sunt , vel erunt , aut fuerunt , finitæ sint , & in aliquo determinato numero ; creaturæ tamen possibiles , quæ latent in omnipotentia diuina , earumque perfectiones , infinitæ sunt , saltem in potentia , & syncategorematicè , vt loquuntur Philosophi ; Deus enim , qualibet producta , potest aliam perfectiorem & perfectiorem in infinitum producere .

Secunda ratio D. Thomæ sic potest breuiter proponi : Deus est ipsum esse per se subsistens & per essentiam , subindeque omnem essendi plenitudinem in se continens : Vnde Exodi 3. Moyse dicebat , *Ego sum qui sum* , & à Nazianzeno *παραγος ὄντας* appellatur : Ergo rerum omnium perfectiones in se continet . Consequentiā probatur : omnis enim perfectio petitur penes aliquod esse , iustitia enim dat esse iustum , potentia esse potentem , sapientia esse sapientem : Ergo ubi erit tota plenitudo essendi , & totius esse latitudo , ibi erit omnis perfectio . Hanc rationem insinuat D. Bernardus lib. 5. de considerat. cap. 6. his verbis : *Si bonum , si magnum , si beatum , si sapientem , vel quidquid tale de Deo dixeris ; in hoc verbo instauratur , quod est , est . Nempe hoc est ei esse quod hæc omnia esse . Si & centum talia addas , non recessisti ab esse , si ea dixeris , nihil addidisti : si non dixeris , nihil minuisisti .*

Confirmatur : Quod est infinitum in aliquo genere , omnes illius perfectiones continet : v. g. si daretur calor infinitus , omnem perfectionem caloris contineret ; si poneretur linea infinita , omnem longitudinem occuparet : Sed  
esse

esse per se subsistens & irreceptum, est simpliciter & in genere, entis infinitum, vt ostendemus infra, cum agemus de infinitate Dei : Ergo illud omnes omnium entium perfectiones in se continet . Vnde dicitur Psalm. 49. *Pulchritudo agri mecum est* . Quæ verba expendens Augustinus ibidem, subdit : *Quid enim cum illo non est ? Cum illo ager, cum illo species terre, cum illo species cæli, cum illo omnia volatilia, quia ipse omnia* .

Duo tamén breuiter hic obseruanda sunt : Primum est, duo esse genera perfectionum in rebus creatis ; quædam dicuntur *simpliciter simplices*, & illæ sunt quæ in suo conceptu totum nulli, nullam includunt imperfectionem . Vel vt ait Anselmus in Monol. cap. 14. *Quæ sunt meliores ipse quam non ipse*, id est quas melius est habere, quam ipsis carere . Huius generis est sapientia, vita, intellectio &c. Aliæ appellantur perfectiones *secundum quid*, & illæ sunt, quæ in suo conceptu ita includunt imperfectionem aliquam, vt ab ea separari numquam possint ; vnde absolutè non est melius omni enti eas habere, quam illis carere, vt moueri, ratiocinari &c. Primi generis perfectiones continentur in Deo formaliter, Deus enim est formaliter intelligens, sapiens, iustus, misericors ; aliæ verò solùm eminenter, & seclusis imperfectionibus quas habent in creaturis . Vnde Dionysius cap. 13. de diuin. nomin. docet omnia de Deo affirmari quodammodo & negari, illumque vocat *πάντων δέσιν, καὶ πάντων ἀπαίρεσιν*, id est omnium positionem, & omnium ablationem ; quia eminenter ponit omnia, tanquam omnia continens ; & formaliter

liter omnia aufert, quia à se excludit omnem rationem formalem creatam & limitatam.

Secundò obseruandum est, perfectiones omnes creaturarum, multò perfectiori & eminentiori modo in Deo contineri, quam animalia & plantæ in virtute Solis, & aliorum corporum cœlestium: nam Sol & corpora cœlestia, non attingunt per se primò in rebus inferioribus, nisi rationem viuientis aut corporis corruptibilis, quæ cum sit potentialis & generica, non includitur in vltimis illarum differentijs, & sic non continent res inferiores, nisi continentia quadam eminentiali imperfecta, & se extendente solùm ad rationes communes & genericas: Deus autem sua causalitate & omnipotentia, per se primò attingit in rebus creatis, rationem entis producibilis, quæ per se primò correspondet vniuersalissimæ causæ; vnde cum ratio illa sit transcendens, & includatur in omnibus modis & differentijs creaturarum, Deus illarum perfectiones continet, modo quodam eminentiali perfectissimo; & se extendente non solùm ad rationes communes & genericas, sicut continentia eminentialis Solis, sed etiam ad rationes átomas & indiuiduales, vt docet D. Thom. infra qu. 14. art. 6. vbi sic ait: *Omnia in Deo præexistunt, non solum quantum ad id quod commune est omnibus, sed etiam quantum ad ea secundum quæ res distinguuntur.*

Ex quo intelliges, quod sicut tempus additum æternitati, non auget nec extendit durationem ipsius, quia omnes durationes illi inferiores, in ea eminentissimo modo continentur: ita Deus & creaturæ, non sunt aliquid per-

perfectius, etiam extensivè, quam solus Deus ; quia similiter tota perfectio creaturarum, etiam numerica, in Deo perfectissimè continetur.

Confirmatur : Omnis creatura, quantumvis perfecta, nihil addit supra divinam perfectionem, præter dependentiam, limitationem, & imperfectionem : Sed ex additione dependentiæ, limitationis & imperfectionis, nequit augeri vel extendi divina perfectio : Ergo creaturæ additæ Deo, non possunt facere aliquid maius aut perfectius, etiam extensivè ; sicut punctum additum lineæ, & instans æternitati, non faciunt quid maius, nec earum longitudinem, vel durationem augent, vel extendunt. Vnde Augustinus tract. 11. in Ioan. Si fueris sine Deo, minor eris ; si fueris cum Deo, maior Deus non eris : non ex te ille maior, sed in sine illo minor.



## C A P V T VII.


### De bonitate Dei.

**Q**UADRUPLEX distingui potest genus bonitatis : Prima dicitur absoluta & fundamentalis, & consistit in integritate & perfectione rei, habentis omnia sibi debita ; sic aqua dicitur absolutè bona, quando habet omnia accidentia, omnesque qualitates sibi debitas : v. g. colorem, saporem, frigiditatem &c. Secunda vocatur respectiva, seu transcendentalis, & consistit formaliter in convenientia cum volun-

litate, ex qua oritur appetibilitas per modum passionis, vt docetur in Metaphysica. Tertia appellatur moralis, & consistit in rectitudine morum, subindeque coincidit cum sanctitate. Quarta denum dici potest bonitas beneficentiae seu diffusionis, per quam aliquis largitione donorum & bonorum, se in alios diffundit; bonum, n. est sui diffusiuum, vt docet Dionysius cap. 4. de diuin. nomin. Vt ergo clarè demonstretur, Deum esse perfectè & omnibus modis bonum, probandum est, quatuor illa bonitatis genera illi conuenire.

Primum in Deo reperiri manifestum est, cum ille sit summè & infinitè perfectus, habeatque omnes perfectiones & omnia attributa suae naturae debitae, vt constat ex supra dictis. De secunda, non minùs euidentis est, cum Deus habeat perfectionem sibi maximè conuenientem, & conueniens sit omnibus creaturis, vt causa illarum efficiens, exemplaris, & finalis, & aliquibus specialiter; nam iustis conueniens est, vt amicus; beatis, vt fruibilis; studiosis, vt causa exemplaris omnis iustitiae & sanctitatis; poenitentibus, vt author remissionis & gratiae, iuxta illud Thren. 3. *Bonus est Dominus sperantibus in eum, anima quærenti illam.* Bonitas etiam moralis illi conuenit, cum in eo sit perfectio morum, sine villo defectu & imperfectione, vt demonstrat D. Thomas in opusculo de moribus diuinis, & cum sit *diffusus in omnibus vñs suis, & sanctus in omnibus operibus suis*, vt dicitur Psalm. 144. Denum illi non deest bonitas diffusionis & beneficentiae, nam ita plenus est & superplenus omnibus bonis, vt veluti fons inexhaustus, perpe-

ita & incessabili largitione donorum, in omnes creaturas exuberet, iuxta illud Psalm. 103. *Aperierte te manum tuam, omnia implebuntur bonitate.* Vnde Dionysius lib. de divin. nomin. cap. 4. *Ut sol eo ipso quod est, omnia illustrat quæ lumen suo modo capere possunt, sic ipsum bonum per se totius bonitatis radios emittit.* Hæc diuina profusio apparet tum in emanationibus internis, tum in productionibus externis, in quadruplici ordine naturæ, gratiæ, gloriæ, & vñionis hypostaticæ, quæ est perfectissima omnium communicationum Dei ad exteriora, ut in Tractatu de Incarnatione cap. 1. §. 2. ostendemus.



## CAPVT VIII.

## De infinitate Dei.

**D**Eum esse simpliciter & in genere entis infinitum, probari potest duplici ratione à priori, & tertia à posteriori. Prima ratio à priori est: Esse Dei est per se subsistens irreceptum: Ergo est infinitum simpliciter. Antecedens est certum, cum enim esse Dei, ne virtualiter quidem distinguatur ab eius essentia, non potest in ea recipi. Consequentia verò probatur: Illud est simpliciter infinitum quod caret omni termino, omni que limitatio: Sed esse per se subsistens & irreceptum, omni termino & limitatio caret: Ergo est infinitum simpliciter. Maior patet, Minor probatur. Duplex tantum potest, dari limitatiuum,



uum, vnum materiale, nempe subiectum recipiens; formam alterum formale, differentia scilicet contrahens genus, vel forma potentia-  
litatem materiæ ad certam speciem determinans: Sed esse per se subsistens & irreceptum, utroque limitatio caret: Ergo est omnino illimitatum. Minor quoad primam partem constat, cum enim esse per se subsistens, non sit receptum in aliquo subiecto, neque habere limitatum materiale. Quantum verò ad secundum probatur ex eo quod, cum esse sit vltima actualitas rei, non potest actuali per aliam vltiorem, nec proinde vllum habere limitatum formale. Vnde si sit irreceptum, & careat limitatio materiali, erit omnino illimitatum.


Secunda ratio à priori petitur ex eo quod Deus est ens à se, & independens ab omni causa efficiente; sicut enim omnis actus & perfectio formaliter & intrinsecè limitatur ex subiecto in quo recipitur, ita efficienter & intrinsecè limitatur & finitur à causa illum producente: Sed enti à se nulla est causa: Ergo nec vlla perfectionis limitatio.

Tertia ratio à posteriori sumitur ex creatione, illa enim postulat virtutem infinitam in causa creante; si enim tantò maior requiratur virtus in agente, quantò minor est potentia in subiecto, ad effectum & educationem formæ, ubi nulla omnino erit potentia, necessaria, erit virtus infinita: cum ergo creatio sit productio vel ex nihilo, & ex nulla potentia præsupposita, requirit in creante virtutem & potentiam infinitam.

Ex dictis in prima & secunda ratione colligi-



gitur, nullam posse dari creaturam infinitam secundum essentiam, cum omnis creatura habeat esse receptum in alio, & ab alio: Ex quo ulterius sequitur, nullam pariter possibilem esse creaturam, quæ sit infinita secundum accidentia: accidens enim infinitum exposcit subiectum infinitæ capacitatis, cum debeat semper esse proportio inter actum & potentiam receptivam, & inter perfectiorem & perfectibilem: Ergo si nulla possit dari substantia infinita, & quæ habeat infinitam capacitatem, nullum etiam possibile erit accidens infinitum.

**C A P V T IX.***De immensitate Dei.*

**D**Eum esse ubique, & intimè ac substantialiter præsentem omnibus creaturis, probat D. Thomas hic qu. 8. art. 1. ex eius operatione in omnes res productas: Deus enim operatur in omnibus rebus, inquantum vel illas producit, vel conservat, vel movet: Ergo Deus est intimè ac substantialiter præsens omnibus rebus. Probatur consequentia ex eo quod omne agens debet coniungi cum passivo, vel per se, vel per suam virtutem; virtus autem Dei est ipsa substantia Dei, cum in illo non sint accidentia: Ergo ipsa Dei substantia est immediate coniuncta & illapsa rebus omnibus. Eodem discursu utuntur Scriptura & SS. Patres, dicebat enim Apostolus Atheniensibus Act.

17. Non longè est ab unoquoque nostrum, & rationem statim assignat: in ipso enim vivimus, movemur, & sumus. Et Anselmus in Monol. Quoniam (inquit) nihil sine Deo potest esse aut conservari dicere cœgimur, Deum ubique & semper esse. Item Hugo Victorinus lib. 7. erudit. Theol. c. 19. Cum divinæ virtutis effectus nusquam deesse cernamus, cur eandem Dei virtutem, omnibus inesse rebus dubitamus? Si autem Dei virtus ubique est, cum alia non sit Dei virtus quam Deus, constat quod Deus nusquam deest.

Dices, Deus potest agere, per virtutem aliquam à se diffusam, atque adeo sibi extrinsecam, & realiter à se distinctam: Ergo falsum est quod virtus Dei sit ipsa substantia Dei. Sed contra: Est Deus possit agere, & aliquos effectus in rebus producere, per virtutem aliquam à se diffusam, repugnat tamen quod causet & conservet esse in rebus, nisi per virtutem intraneam, sibi realiter identificatam: e quoniam omnis virtus à Deo diffusa, est finita, utpote ab illo causata, & in aliquo subiecto finito recepta: virtus autem creativa & conservativa rerum, cum sit productiva totius entis creabilis, est infinita, subindeque cum Dei substantia realiter identificata.

Ex quo intelliges notabile discrimen quod reperitur inter contactum virtutis divinæ & angelicæ: contactus enim virtutis divinæ est intimus & illapsus in rebus, quatenus in illis producit & conservat esse, quod in eis maxime intimum est. Unde D. Thomas in 1. dist. 8. qu. 1. art. 5. ad 3. In essentia non intrat nisi ille qui dat esse, scilicet Deus creator.

Con-

Contactus autem virtutis angelicæ, cum non sit productiuus & conseruatiuus existentie, sed eam præsupponat in subiectis circa quæ operatur, non est intimus & illapsiuus, sed extrinsecus & superadditus, nec est intra terminos essentie, sed solum intra terminos loci & quantitatis.

Intelliges etiam ex dictis, rationem D. Thomæ non esse à posteriori, sed à priori, quia ratio formalis, per quam Deus est actu præsens & existens in rebus, est eius operatio virtualiter transiens, quæ producit vel conseruat, esse in illis, vel eas mouet & applicat ad agendum. Vnde idem S. Doctor 3. contra Gent., cap. 68. sic ait: *Omne quod est in loco, aliquo modo contingit ipsam, res enim corporea est in aliquo sicut in loco, secundum contactum quantitatis dimensue; res autem in corporea in aliquo esse dicitur, secundum contactum virtutis.* Hic verò contactus non fit nisi per applicationem virtutis, seu actionem virtualiter transientem: Ergo per illam Deus est præsens & existens in rebus. Vnde Gregorius magnus, homil. 8. in Ezechiel. *Vbiq; Deus & vbiq; totus, quia omnia tangit, licet non equaliter tangat. Quædam enim tangit, ut sint, nec tamen ut uiuant & sentiant, sicut cuncta insensibilia. Quædam tangit, ut sint, uiuant, & sentiant, non tamen ut discernant, sicut sunt bruta animalia. Quædam tangit ut sint, uiuant, sentiant, & discernant, sicut est humana & angelica natura.*

Confirmatur: Essentia Dei est absoluta & independens ab omni creatura, proindeq; non est in illa, nisi quatenus facit eam pendere à se,

se, quod utique præstat per suam actionem, quâ res omnes vel producit, vel conseruat, vel mouet: Ergo talis actio est ratio formalis per quam est actu præsens & existens in rebus. Vnde illa prout est formaliter ratio agendi, pertinet ad omnipotentiam, prout verò est ratio attingendi creaturas & illabendi in eas, constituit attributum immensitatis.

Confirmatur amplius: Deus non est in rebus, vt contentus ab illis, sed potius vt eas continens; vnde Dionysius de diuin. nomin. cap. 10. *Ipse est sedes qua omnia continet, & completitur, & firmat, & fundat, & contingit &c.* Sed Deus non continet res, nisi ratione suæ virtutis & operationis, quâ eas producit vel conseruat in esse, iuxta illud Apostoli ad Hebræos 1. *Portans omnia verbo virtutis suæ.* Ergo non est in rebus, nisi ratione suæ operationis, quâ illas producit, vel conseruat in esse.

Dices primò, si hoc esset verum, sequeretur attributum immensitatis non conuenire Deo necessario, & ab æterno, sed liberè & in tempore; cùm talis operatio sit Deo libera, & ei conueniat solum in tempore.

Sed negatur sequela, attributum enim immensitatis non consistit in actuali præsentia Dei in rebus, sed in aptitudine & potentia quam habet ad existendum in illis, seu in vi repletiua omnis loci existentis aut possibilis: vnde cùm talis vis & aptitudo, necessariò & ab æterno Deo conueniat, attributum immensitatis necessarium est, & æternum, quamuis actualis præsentia Dei in rebus, libera & temporanea sit.

Dices secundò , priùs intelligitur aliquid esse in loco , quam ibi operari , nam sicut operari sequitur esse , ita operari in loco sequitur esse in loco : Ergo Deus non est formaliter præsens loco per suam operationem .

Respondeo quod sicut in corporalibus , licet prior sit substantia quantitate , & vbi , tamen substantia corporea non est priùs in loco , quam sit in ea quantitas , vel vbi , quia non est in loco nisi per quantitatem . Ita similiter in entibus spiritualibus , licet in eis priùs concipiatur esse absolute quam operatio , non tamen esse in loco , quia in eo non sunt , nisi per operationem , vt egregie ac erudite declarat Caietanus infra qu. 52. artic. 1. cuius doctrinam exponemus in Tract. de Angelis cap. 5. §. 2.

Ex dictis etiam colligitur contra Recentiores aliud corollarium notatu dignum , nempe Deum reuera non existere positivè & actu in spatijs quæ imaginantur esse extra cœlos , & quæ à Philosophis *spatia imaginaria* appellantur . Deus enim , vt iam ostendimus , non est actu in rebus , nisi per suam operationem virtualiter transeuntem : Sed in spatijs imaginarijs nihil reuera operatur , cum ibi nulla sit creatura , nec ullus effectus à Deo productus : Ergo in illis non existit positivè & actu , sed negativè tantùm & in potentia , quatenus diuina substantia non limitatur nec coarctatur intra ambitum vniuersi , & est potens ad novos mundos condendos in illis spatijs quæ imaginamur esse supra cœlos ; & hoc solùm intendunt SS. Patres , quando dicunt Deum esse supra cœlos , & extra mundum , & illum extra hoc vniuersum diffundi , vt constat ex Augusti-

no lib. 7. Confess. cap. 1. expressè docente, falsam esse hanc imaginationem, quâ Deus per infinita spatia cogitatur. Itaque Deus eo plane modo est extra mundum, quæ erat in hoc mundo antequam creatur: ille verò ante orbem conditum spatia vacua mundo correspondentia non inhabitabat, sed erat solùm in seipso, sibi que erat locus, templum, & omnia, vt loquitur Tertull. contra Praxeam cap. 5. & Minutius Felix in Octau. Vnde D. Bernardus lib. 5. de considerat. sic habet: *Vbi erat Deus antequam fieret mundus? ubi nunc est. Non est quod quæras ultra ubi erat: præter ipsum nihil erat, ergo in seipso erat.* Ergo similiter in spatijs imaginarijs Deus actu non est. *Stultum enim est (inquit D. Bonaventura in 1. dist. 37. q. 2. art. 3.) dicere Deum esse in eo quod nihil est.*

Dices ex nostra doctrina sequi tria inconuenientia & absurda: Primum est, quod Deus possit moueri; quia producendo corpus extra cœlos, inciperet esse ubi antea non erat, scilicet extra cœlos. Secundum, quod Dei substantia posset à se diuidi & quasi discontinuari, quia si Deus destrueret omnes creaturas quæ sunt mediæ inter cœlũ & terram, non existeret actu in medio illo corpore quod supponeretur vacuum: vnde sicut diuiderentur inter se in illa hypothese duo extrema, scilicet cœlum & terra, ita diuiderentur Dei substantia in duas partes, quarum vna esset in cœlo & altera in terra. Tertium denique inconueniens est, quod Deus posset per accidens saltem moueri, quia moueri per accidens est moueri ad motum alterius, sicut nauta ad motum nauis: Deus

autem in nostra doctrina posset moueri ad motum alterius, trahendo videlicet vniuersum istud extra sphaeram conuexam orbis primi.

Respondeo nullum ex his inconuenientibus sequi ex nostra doctrina. Non quidem primum: sicut enim quando Deus in tempore creauit mundum in hoc spatio in quo nunc est, non est mutatus acquirendo nouam praesentiam ad illum, sed tota mutatio fuit ex parte creaturae quae transiit de non esse ad esse: ita pariter, licet iam produceret de nouo aliquod corpus in spatijs imaginarijs, & fieret illi praesens secundum suam substantiam, in se non mutaretur, sed tota mutatio se teneret ex parte affectus de nouo producti. Neque secundum, quia licet corpora non possint esse in locis diuisis, nisi & ipsa diuidantur, quia sunt in loco, per commensurationem ad ipsum: spiritualia tamen quae sunt in loco per operationem, sicut possunt operari in extremis, non operando in medio; ita possunt absque sui diuisione existere actu in illis, non existendo in medio. Sed de hoc fusius in Tit. de Angelis. Nec demum tertium, nempe quod Deus posset moueri per accidens ad motum istius vniuersi; ad hoc enim verificandum necesse esset, quod sicut qui existit in navi, pendet localiter à navi quae mouetur; ita Deus dependeret localiter ab isto vniuerso, tanquam à loco definitiuo vel circumscriptiuo; siquidem vna ex conditionibus ad motum per accidens est, quod mobile illo motu circumscriptiuè, vel saltem definitiuè, sit in corpore, ad cuius motum dicitur moueri localiter;



## CAPVT X.

*De immutabilitate Eei.*


**D**Eum esse omnino immutabilem probat D. Thomas hic art. 9. ratione quæ virtualiter triplex est, sumitur enim ex tribus attributis, quæ sunt propria fundamenta diuinæ immutabilitatis, scilicet à ratione actus puri, à simplicitate Dei, & eius infinitate, quæ remouent tres condiciones, quæ essentialiter requiruntur, vel saltem aliqua illarum, ad veram mutationem. Ad illam enim requiritur primò potentialitas, seu priuatio & carentia alicuius formæ, quæ se habeat vt terminus à quo: secundo requiritur subiectum mutabile, & susceptiuum diuersarum formarum: tertio necessarius est terminus ad quem, seu forma de nouo producta, & tali subiecto adueniens. Sic ergo D. Thomas tribus rationibus probat omnimodam Dei immutabilitatem. Primò, quia est actus purus, subindeque caret priuatione formæ, quæ se tenet ex parte termini à quo. Secundò, quia est simplicissimus, ac proinde subiectum incapax motus; illud enim debet de necessitate compositionem admittere, cum debeat in se recipere aliquam formam quam non antea habebat. Tertio, quia non est simpliciter infinitus, & omnes perfectiones in se continet, atque ita nihil potest illi aduenire de nouo, nec moueri ad aliquem terminum, seu ad aliquam formam & perfectionem quam antea non habuerit. Vnde Iacobi 1. dicitur: *Apud quem non est transmutatio nec vicissitudo*



*dinis obumbratio. Quæ verba expendens D. Gregorius lib. 12. Moral. cap. 17. ait: Ipsa enim mutabilitas umbra est, quæ quasi Dei obscuraret lucem, si hanc per aliquas vicissitudines permutaret: Sed quia in Deo mutabilitas non venit, nullæ eius lumen umbra vicissitudinis intercidit. Ad hoc attributum referri possunt hæc verba D. Bernardi serm. 80. in Cantica: Deus hanc sibi vindicat miram singularemque suæ essentia simplicitatem. ut non aliud & aliud, non alibi quoque & alibi, sed nemodò quidem & modò inueniatur in eo; nempe in semet manens quod habet est, & quod est, semper & uno modo est: in eo & multa in unum, & diversa in idem rediguntur, ut nec numerositate rerum sumat pluralitatem, nec alterationem de varietate sentiat.*

Ex his intelligas, quod sicut in Deo triplex datur fundamentum immutabilitatis, scilicet ratio actus puri, simplicitas, & infinitas; ita & in quolibet ente creato, triplex est radix mutabilitatis. Prima, quia est ex non ente, & ad non ens continuo fluxu tendit. Secunda, quia est composita, vel ex materia & forma, vel ex subiecto & accidente, vel ex essentia & existentia. Tertia, quia finita est & imperfecta, cui semper aliquid potest vel addi vel auferri. Vnde Seneca epist. 58. *Flumina hæc, & assidua diminutione atque adiectione sunt. Nemo nostrum idem est in senectute quæ fuit iuuenis. Nemo est mane qui fuit pridie. Corpora nostra rapiuntur, fluminum more. Quidquid vides currit cum tempore. Nihil ex ijs quæ videmus manet. Ego ipse dum loquor mutari ista, mutatus sum. Sed homo per ex-*

seris creaturis mutationi existit obnoxius, & ut bellè quidam ait, totus sphaericus & volubilis est, cum enim mutabilis sit ex natura sua, longe mutabilior ex peccato efficitur. Vnde Zeno Veronensis serm. de patientia: Quot die mobilitatibus gaudet, varietatibus studet, miserum se putat, si ipse sit. Et Bernardus de interiori domo cap. 2. Dignè explicare non possum, quot alternationis modos momentaneis perturbationibus induo, & quam multipliciter me alternantium vicissitudinum motibus variare consuevi. Modo me in fiduciam erigo, modò in diffidentiam cado; nunc per constantiam figor, nunc subitaneos terrore concitior. Modo me turbat ira, modò ingens furor exagitat. Meritò ergo homo comparatur Piuoni, cuius (inquit Tertullianus) pluma vestis, multicolor, discolor, & versicolor; nunquam ipsa, sed semper alia, et si semper ipsa, quando alia; toties denique mutanda, quoties mouenda.



## C A P V T X I.


### De aeternitate Dei.

**C**ONSTAT ex dictis capite præcedenti, Deum esse æternum, & æternitatem illi soli propriè competere; sicut enim tempus motum, ita æternitas perfectam immutabilitatem consequitur. Vnde Fulgentius de fide ad Perium cap. 7. Firmiter crede, & nullatenus dubites, Deum sicut immutabilem, ita solum verè æternam esse, In huius rei typum Ezechiel vidit thronum.

thronum Dei, non in firmamento, vel sub firmamentum, ex cuius vniformi motu omne tempus originem habetur per hoc significaretur, Deum ratione suæ æternitatis esse supra omnia tempora, & ante omnia tempora, subindeque principio & fine carere. Quare egregiè Tert. lib. 1. contra Marcionem: *Viua & germana diuinitas, nec de nouitate, nec de vetustate, sed de sua veritate censetur: Deus si est vetus, non erit, si est nouus, non fuit; nouitas initium testificatur, vetustas finem comminatur: Deus autem tam alienus est ab initio & fine, quam à tempore arbitro & metatore initij & finis.*

Æternitas definitur à Boetio, *interminabilis vitæ tota simul & perfecta possessio*. Dicitur *possessio*, ad designandam eius stabilitatem, illud enim possidere dicimur quod firmiter & quietè habemus, & à quo nullatenus dimoueri possumus. Subditur *tota simul*, vt per hoc distinguatur à tempore, cuius essentia tota simul non est, sed per successionem & per partes acquiritur. Additur quod *possessio vitæ est perfecta*, ad excludendum nunc temporis, quod licet sit totum simul, & partibus careat, tamen absolutè non est quid perfectum, nec in eo res aliqua perfectè possidetur. Dicitur *erò æternitas possessio vitæ*, potiùs quam *esse*, quia *esse* (vt ait S. Thomas hic qu. 10. art. 1. ad 2.) non se extendit ad operationem, sicut viuere, quod non solùm de operatione; sed etiam de *esse* prædicatur in viuentibus, quia in viuentibus viuere est *esse*, vt dicitur 3. de anima textu 37. Tandem dicitur quod *æternitas est possessio vitæ interminabilis*, ad designandam

quod illa omni prorsus termino careat, nec habeat vel habere possit initium aut finem: in quo distinguitur à tempore, quod habet initium & finem, & ab ætate, quod licet sine careat, tamen initium habet.



## TRACTATUS II.

### *De visione Dei.*

**Q**uatuor præcipuè in visione Dei consideranda sunt, nimirum eius impossibilitas per vires naturæ & possibilitas per auxilium gratiæ. Duo principia ad illam continentia, species scilicet & lumen gloriæ. Obiecta ad quæ terminatur, & mensura quæ eius duratio mensuratur. De his in hoc tractatu breuiter agendum est. Ascendamus ergo cum Moyse in montem Dei Horeb, & videamus visionem hanc magnam, quæ, ut ait Augustinus, concupisci potest, desiderari potest, verbis explicari potest. Dicamus cum Sponsa in Canticis: Indica mihi quem diligit anima mea, ubi pascas, ubi cubes in meridie. Nam hic pascis (inquit Bernardus serm. 33. in Cant.) Sed non in saturitate. Nec cubare licet, sed stare & vigilare oportet, propter timores nocturnos. Non nec clara lux, nec plena refectio, nec mansio tuta, & ideo indica mihi, ubi cubes in meridie. Vultum tuum Domine requiro, Vultus tuus meridies, Meridies

claratus & intuitiva visio. O verè merities,  
plenitudo fervoris & lucis, solis statio, umbrarum  
extirpationis, desiccatio paludum, factorum  
depulsio! O perenne solstitium, quando iam non  
inclinabitur dies! O lumen meridianum! O  
vernalis tempestas! O autumnalis ubertas! &  
ne me quid præterisse videar, o quies & feriatio  
hyemalis!



## CAPUT I.

*De impossibilitate visionis beatificæ per vires  
nature, & possibilitate eius per  
auxilium gratiæ.*

**D**ico primò, nullam naturam vel substan-  
tiam intellectualem creatam, vel crea-  
bilem, posse connaturaliter, seu ex viribus pro-  
prijs, videre Deum, ut est in se. Constat ex  
Scriptura, nam 1. ad Timoth. 6. Deus dicitur  
inhabitare lucem inaccessibilem: quæ verba  
absolutè prolata satis indicant, quod Deus, ob  
summam suam elevationem, est invisibilis & in-  
accessibilis cuicunque creaturæ, & quod nulli ex-  
traneo à Deo, per se & proprijs viribus, patere  
potest & esse manifesta lux increata divinita-  
tis, hoc est essentia Dei. Vnde Isaia 6. dicitur:  
*Vidi Dominum sedentem in solio excelso,*  
quasi transcendentem proportionem & vires  
cuiusvis intellectus creati, quantumcumque  
elevati. Et Dionys. c. 1. de divin. nomin.  
tribuit elevationi supra naturam, quod men-  
tes angelicæ Deum videant, & ait, eas con-

*stanter & immobiliter ad illucentem sibi rā-  
dium attolli, & congruo permissarum sibi illu-  
minationum amore, velut in altum pennis sub-  
leuari. Demum Aug. lib. 11. de ciuit. c. 2.  
sic discurret: Quamuis non omnis beata esse  
possit creatura, neque enim hoc munus adipis-  
cuntur fere, saxa, ligna &c. ea tamen quæ po-  
test, non ex seipsa potest, quia ex nihilo creata  
est sed ex illo à quo creata est. Cùm ergo re-  
pugnet dari aliquam creaturam, quæ non sit  
ex nihilo, manifestum est, iuxta Augustini  
doctrinam, nullam posse dari, quæ sit naturali-  
ter beata, subindeque quæ Deum, vt in se est,  
connaturaliter videat.*

Ratio etiam id suadet, nam vt discurret D.  
Thomas 3. contra Gent. cap. 52. Quod est  
proprium alicui naturæ superiori, non potest  
competere naturæ inferiori, nisi ex eleuatione  
& subordinatione ad ipsam, sicut aqua non po-  
test esse calida, nisi per actionem ignis in il-  
lam: Sed videre Deum, vt est in se, est pro-  
prium Deo: Ergo non potest alicui creaturæ  
competere, nisi ex actione Dei eam eleuantis  
ad tam sublimem & diuinam operationem.  
Minor probatur: Operari secundum pro-  
priam formam, est proprium cuiuslibet ope-  
rantis, vt patet in igne, & alijs agentibus: At  
videre Deum vt est in se, est operari per diui-  
nam essentiam, tanquam per formam seu spe-  
ciem intelligibilem, cùm ad illam visionem  
impossibilis sit, vel saltem inutilis quæcumque  
alia species distincta ab essentia diuina; vt in-  
fra patebit; Ergo est proprium Deo.

Aliam assignat rationem hìc quæst. 12. art.  
2. quæ potest sub hac forma proponi: Sub-  
stan-

stantia sua natura intelligens, & obiectum connaturaliter & quidditatiuè intellectum, debent conuenire in eodem gradu immaterialitatis: Sed nulla substantia vel natura creata, vel creabilis, potest conuenire cum Deo in gradu immaterialitatis: Ergo non potest illum videre connaturaliter. Minor patet, immaterialitas enim diuina est per depurationem nedum à materia physica, quæ est pars compositi materialis, sed etiam à materia metaphysica, quæ in potentialitate consistit; repugnat autem creaturæ exclusio omnis potentialitatis, sicut & omnis compositionis. Minor autem, in qua est difficultas, probatur inductione. Tres tantum dantur gradus immortalitatis: Primus est animæ rationalis, quæ est immaterialis & incorporea quoad substantiam, sed non quoad modum, cum sit forma corporis, & ab illo quoad suas operationes dependeat. Secundus est naturæ angelicæ, quæ est à materia corpore independens, & habet esse per se subsistens, habet tamen esse, ab essentia & natura distinctum. Tertius & supremus est naturæ diuinæ, quæ est suum esse, & actus purus, omnemque potentialitatem & compositionem excludit. Debet ergo seruari proportio inter naturam intelligentem, & obiectum connaturaliter cognitum, quantum ad tres illos gradus immaterialitatis; ita ut natura quæ est in gradu infimo immaterialitatis, non possit connaturaliter & ex viribus proprijs cognoscere illam quæ est in gradu superiori, nec illa quæ est in gradu superiori, eam quæ est in gradu supremo. Ex quo manifestè colligitur, quod si improportio seu excessus in immaterialitate,

qui reperitur inter animam rationalem & naturam angelicam, impedit quominus anima possit naturaliter videre Angelum, à fortiori ille excessus, & illa improportio, quæ est inter essentiam diuinam, & intellectum humanum, vel angelicum, impedit quod homo vel Angelus possit naturaliter videre Deum.

Obijcies primò contra hanc rationem: Angelus inferior connaturaliter cognoscit superiorem, & tamen est inferioris immaterialitatis ad ipsum. Item anima separata, licet sit inferioris immaterialitatis ad Angelum, potest tamen connaturaliter ipsum cognoscere. Demum intellectus creatus, lumine gloriæ perfusus, non est eiusdem immaterialitatis cum Deo, cum non sit, sicut Deus, actus purus, & tamen videt Deum ut est in se, connaturaliter, cum tale lumen sit participatio diuinæ intellectualitytis, quæ habet diuinam essentiam pro obiecto sibi omnino connaturali: Ergo inter naturam intelligentem & obiectum connaturaliter cognitum, non requiritur semper conuenientia in gradu immaterialitatis, & sic ruit præcipuum nostræ conclusionis fundamentum.

Ad primam instantiam respondeo distinguendo Antecedens: Angelus inferior connaturaliter cognoscit superiorem, & tamen est inferioris immaterialitatis ad ipsum, specificè concedo Antecedens: genericè, quoad gradum, nego Antecedens, & eius consequentiam. Itaque omnes Angeli conueniunt in gradu immaterialitatis, quia omnes sunt expertes compositionis ex materia & forma, etsi intra istum gradum vnus Angelus sit alio perfectior; primumque sufficit, ut vnus alium con-



connaturaliter & quidditatiuè cognoscat.

Ad secundam nego similiter Antecedens; nam vt docet Bannez 1. p. qu. 89. art. 1. dubio 2. modus cognoscendi animæ separatae, per species infusas, non est illi connaturalis, sed præternaturalis; ac proinde cognoscere quidditatiuè Angelos, non est illi connaturale.

Ad ter iam dicendum quod cum visio beata non procedit ab intellectu nostro, etiam lumine gloriæ perfuso, iuxta exigentiam nostræ naturæ, sed super illam, falsum est quod intellectus illustratus lumine gloriæ, omnino connaturaliter videat Deum ad omnimodam enim connaturalitatem principij elicitiui alicuius operationis, cum tali operatione, non sufficit quod hæc operatio, utcumque illi debeat, vel quod utcumque illud in eam influat, sed requiritur quod hæc procedat ab illo iuxta exigentiam suæ naturæ. Vnde D. Thomas 3. p. qu. 9. art. 4. expressè docet, visionem beatam soli intellectui diuino esse omnino connaturalem.

Obijcies secundo: Potest Deus de potentia absoluta facere intellectum creatum, æquiualentem conflato ex intellectu & lumine gloriæ, cum illud sit finitæ & limitatæ virtutis, & quolibet finito dato, possit Deus aliud perfectius, & consequenter æquiualens, producere: Sed tali intellectui, ratione sui esset debita & connaturalis visio beatifica: Ergo potest Deus, saltem de potentia absoluta, producere intellectum, qui connaturaliter videat Deum.

Respondeo negando. Maiorem, nam conflatum ex intellectu & intellectione actuali, li-

mitatum & finitum est , & tamen implicat quod Deus producat intellectum , ratione sui , absque intellectione à seipso distincta , percipientem obiectum . Item conflatum ex intellectu creato , & lumine prophetico , est finitæ & limitatæ perfectionis , & tamen dari nequit intellectus creatus , qui naturali sua vi illi æquiualeat ; alioquin dari posset creatura , quæ naturaliter , & seclusa Dei reuelatione , futura contingentia & libera præsciret , quod repugnat Scripturæ & SS. Patribus , afferentibus præscientiam futurorum esse certissimum ac præcipuum diuinitatis argumentum .

Ex dictis colligitur , implicare contradictionem , creari substantiam completam quæ sit supernaturalis . Implicat enim substantia creata , cuius intellectui sit connaturalis visio beatifica : At si esset possibilis substantia creata supernaturalis , illius intellectui esset connaturaliter debita visio beatifica : Ergo implicat contradictionem , talem substantiam creari à Deo . Maior constat ex supradictis , Minor probatur ex eo quod talis substantia esset proportionata ad videndum Deum : Ergo visio Dei esset eius intellectui naturaliter debita .

Confirmatur : Si daretur substantia creata supernaturalis , cui visio beatifica esset connaturalis , lumen gloriæ quod est vnum ex principiis ad illam requisitis , deberet tali substantiæ esse connaturaliter debitum : Sed hoc repugnat ; Ergo & illud . Maior constat , Minor probatur ex D. Thoma hic art. 5 . ad 3. vbi sic ait : *Dispositio ad formam ignis , non potest esse naturalis , nisi habenti formam ignis . unde lumen gloriæ non potest esse naturale creaturæ , nisi*

nisi creatura esset natura diuina, quod est impossibile. Ex quibus verbis hæc potest formari ratio: Implicat quod vltima dispositio ad aliquam formam, sit connaturalis nisi habentia talem formam: Sed lumen gloriæ est vltima dispositio ad essentiam diuinam, vt est forma intelligibilis: Ergo implicat quod sit connaturalis, nisi illi cui est naturale habere talem formam, scilicet Deo.

Confirmatur amplius: Si lumen gloriæ esset connaturaliter debitum tali substantiæ supernaturali, non esset supernaturale absolutè & simpliciter: Sed hoc dici nequit; Ergo nec illud. Sequela Maioris probatur: De ratione entis absolutè & simpliciter supernaturalis, est quod excedat exigentiam omnis naturæ creatæ & creabilis: At si lumen gloriæ esset connaturaliter debitum substantiæ supernaturali à Deo creabili, non excederet exigentiam totius naturæ creabilis: Ergo non esset absolutè & simpliciter supernaturale, sufficeret excedere exigentiam alicuius naturæ, & non requireretur quod excederet exigentiam omnis naturæ creatæ & creabilis, sequeretur species debitas Angelo superiori, esse supernaturales absolutè & simpliciter, cum sint supra exigentiam Angeli inferioris: Consequens est falsum: Ergo &c.

Obijcies primò: Omne accidens dicit ordinem ad aliquod subiectum sibi connaturale: At subiectum connaturale luminis gloriæ, & aliorum accidentium ordinis supernaturalis, non potest esse aliud, quam substantia supernaturalis creata; Ergo illa est possibilis. Minor probatur: Accidentia supernaturalia, vt

charitas, lumen gloriæ, & similia, non respiciunt aliquam substantiam creatam ordinis naturalis, tanquam proprium & connaturale subiectum; cum inter potentiam & actum, perfectum & perfectibile, debeat esse proportio; neque substantiam increatam Dei, cum illa sit actus purus, & incapax recipiendi accidentia: Ergo illa accidentia non possunt habere aliud subiectum sibi connaturale, quam substantiam creatam ordinis supernaturalis.

Respondeo negando Maiorem, licet enim omne accidens dicat ordinem ad aliquod subiectum, non tamen essentialiter respicit aliquod subiectum sibi connaturale, ut constat in accidentibus quæ educuntur ex potentia violenta subiecti, vel quæ introducuntur per artem. Vnde in rebus creatis triplicem potentiam receptivam distinguere solent Philosophi; unam naturalem, in qua recipiuntur accidentia connaturalia subiecto; alteram violentam, in qua subiectantur accidentia contraria, & repugnantia illius naturæ, sicut se habet calor respectu aquæ; aliam denique obedientialem, quæ quolibet agens subditur Deo ad recipiendas formas ordinis supernaturalis. Accidentia ergo supernaturalia respiciunt substantiam seu potentiam naturalem, non ut naturalis est, sed ut obedientialis, & subdita Deo, seu capax recipiendi influxum agentis supernaturalis.

Obijcies secundò: Non minus substantia Dei participabilis est in ordine supernaturali, quam eius sapientia: Ergo sicut datur sapientia creata supernaturalis & infusa; ita datur  
vel

vel saltem possibilis est substantia creata supernaturalis .

Respondeo distinguendo Antecedens : Non minus substantia Dei participabilis est in ordine supernaturali , participatione accidentali , quam eius sapientia , concedo Antecedens : participatione substantiali , nego Antecedens , & eius consequentiam . Sicut ergo sapientia supernaturalis creata , participat rationem sapientie diuinæ , quæ est substantia , licet non participet modum essendi substantialiter : ita gratia sanctificans est participatio substantie Dei , sed accidentalis , *Id enim quod substantialiter est in Deo , accidentaliter fit in anima* , inquit S. Doctor 1. 2. quæst. 110. art. 2. ad 2. Vnde illa non est substantia , sed accidens , pertinens ad genus qualitatis .

Dico secundo , intellectum creatum , humanum , vel angelicum , posse supernaturaliter eleuari ad videndum Deum vt est in se . Conclusio est certa de fide , definita in Florentino in litteris sanctæ vnionis , vbi dicitur , *animas plenè purgatas intueri Deum clarè trinum & vnum , vt est in se* . Quibus verbis proscribitur error Armenorum , qui dicebant homines beatificari in quadam claritate & fulgore Dei , non tamen ad eius substantie visionem peruenire : quod etiam assererebat aliqui quorum meminit D. Gregor. 18. moral. cap. 18.

Cum visionis beatificæ possibilitas sit supernaturalis , non potest nostra conclusio ratione naturali & euidenti demonstrari , potest tamen duplici congruentia D. Thomæ hic art. 1. probabiliter suaderi . Prima est : Homo per Dei gratiam potest suam beatitudinem adipisci ,

sci, aliàs peioris esset conditionis cæteris creaturis, quarum vnaquæque potest ad suum finem & beatitudinem pertingere: Sed hominis beatitudo in visione Dei, prout est in seipso, consistit, iuxta communionem & veriore sententiam; vel in actu voluntatis, qui visionem Dei, prout est in seipso, supponit: Ergo talis visio possibilis est. Maior constat, Minor probatur. Suprema felicitas hominis consistit in perfectissima coniunctione cum suo primo principio & ultimo fine: Sed talis coniunctio fit per visionem Dei, vel per actum voluntatis illam supponens, cum vnum ex illis sit suprema hominis operatio: Ergo in aliquo illorum suprema hominis felicitas est constituenda.

Secunda congruentia D. Thomæ in hunc modum formatur: Visis effectibus naturalibus, homo desiderat causam videre: Ergo visis effectibus Dei, illum prout est in seipso videre appetit: Sed appetitus naturalis hominis nequit frustrari: Ergo visio Dei, prout est in seipso, homini supernaturaliter adiuto possibilis est. Hanc rationem innuit D. Augustinus lib. 4. contra Iulian. cap. 3. ubi sic ait: *Naturali instinctu beati esse non vellemus, nisi esse possumus.*

Obijcies primò, Deus in Scriptura dicitur invisibilis, & à nullo hominum videri posse; dicitur etiam habitare lucem inaccessibilem: Ergo nullus intellectus creatus potest ipsum videre ut est in se, & ad eius lucem infinitam accedere.

Sed facilè respondetur, quod quando Deus in scriptura dicitur invisibilis, & à nullo homi-

num posse videri, hoc debet intelligi, vel de visione corporea, vel de intellectuali, per vires naturæ habita, vel de comprehensua, vel denique de visione quæ habeatur in hac vita mortali. Ut verò dicatur inaccessibleis, sufficit quod nulla creatura possit per vires naturales ad illum accedere, quamvis Deus possit accessum ad se illi dare, seque illi visibilem facere, per auxilium suæ omnipotentiae; sicut ciuitas non desineret dici absolutè inaccessibleis, si non nisi ipsa volente & iuuante, nullus posset ad eam accedere. Vnde egregiè Anselmus: *Deus inaccessibleis cum sit nostris viribus, acceditur ad illum suis muneribus.*

Obijcies secundò: Chrysostomus homil. 14. in Ioan. explicans illud Ioan. 1. *Deum nemo vidit vnquam*, subiungit: *Nam id quod est Deus, non modo Prophetæ non viderunt, sed nec Angeli, nec Archangeli, &c.* Quibus verbis videtur denegare Angeli beatīs claram Dei visionem. Vnde de illis dicitur 2. Petri 1. *In quem desiderant Angeli perspicere.*

Respondeo cum D. Thoma hic art. 1. ad 1. Chrysostomum solū denegasse Angelis beatīs comprehensiuam Dei cognitionem, non verò intuitiuam, & quidditatiuam; disponebat enim contra Anomeos, qui asseriebant Deum ab intellectu creato comprehendi posse. Nec valet quod in contrarium opponit Vasquez, nempe verissimile non esse, illos hæreticos adeò fuisse stolidos ac insanos, vt comprehensiuam Dei cognitionem sibi arrogarent. Nam reuera illos ad hanc peruenisse insaniam, constat ex Theodoro lib. 4. hæret. fabul. cap. 3. ex Hieronymo in cap. 11. Matth. & ex Socrate lib.



lib. 1. hystor. cap. 7. De quo vide Baronium anno 366. Unde ipsemet Chrysostomus. illos passim stolidos & amentes vocat, & homil. 69. ad populum, possibilitatem & existentiam visionis claræ & intuitivæ Dei apertè docet, ait enim, *Beatos, Regem ipsi intueri, non per introitum, non per enigma, non per speculum, sed facie ad faciem.*

Ad illud verò quod 2. Petri 1. de Angelis beatis dicitur, nempe quod desiderant in Deum prospicere, respondeo, fruitionem beatificam, quâ gaudent Angeli beati, vocari desiderium, ut indicetur eam nullum generare fastidium, sed continuam delectationem & gaudium, ut egregiè explicat D. Gregorius lib. 18. moral. cap. 29. his verbis: *Desiderant sine labore, quia desiderium satietas comitatur, & fatientur sine fastidio, quia ipsa satietas ex desiderio semper accenditur. Sit quoque & nos erimus, quando ad ipsum fontem vitæ venerimus: erit nobis delectabiliter impressa sitis simul atque satietas, sed longè aberis ab hac siti necessitas, longè à satietate fastidium, quia & sitientes satiabimur, & satiati sitiemus.*

Obijcies tertio; Pius distat Deus ab intellectu creato, quam Angelus ab oculo corporeo: Sed ob hanc distantiam oculus corporeus non potest elevari ad videndum Angelum: Ergo à fortiori nec intellectus creatus ad videndum Deum.

Respondet S. Thomas in 4. sent. dist. 49. qu. 3. art. 1. ad 7. plus quidem distare quoad entitatem, non autem quoad proportionem habitudinis potentix ad obiectum; Angelus enim non continetur intra obiectum specificatum



visus corporei, quod est lucidum vel coloratum; Deus verò clarè visus continetur sub obiecto specificatiuo intellectus creati, quod est ens inquantum ens, vt docetur in *Meta-physica*.

Dices, quælibet potentia potest naturaliter ferri in id omne quod continetur sub eius obiecto specificatiuo, oculus enim potest naturaliter videre omnes colores, & auditus percipere omnes sonos: Ergo si Deus clarè visus contineatur intra obiectum specificatiuum intellectus creati, ille poterit non solum ex elevatione Dei, sed etiam connaturaliter, videre Deum vt in se est.

Respondeo distinguendo Antecedens: Potentia potest naturaliter ferri in id omne quod continetur sub eius obiecto specificatiuo, proportionato, concedo Antecedens: impropor-  
tionato, nego Antecedens, & eius consequentiam. Deus enim clarè visus, licet contineatur intra obiectum specificatiuum intellectus humani, quod, vt diximus est ens inquantum ens, non continetur tamen sub eius obiecto connaturali & proportionato, quod est ens cognoscibile per conuersionem ad phantasmata; ideoque vt videat Deum vt est in se, debet eleuari à Deo, & per lumen gloriæ confortari. Solutio est D. Thomæ 3. contra Gent. cap. 54. vbi statim initio capitis, simile argumentum sibi opponit, cui sic respondet: *Divina substantia non sic est extra facultatem intellectus creati quasi aliquid omnino extraneum ab ipso, sicut est sonus à visu, vel substantia immaterialis à sensu (nam ipsa divina substantia est primum intelligibile, & totius intellectualis cognitionis prin-*

*principium*) sed est extra facultatem intellectus creati, sicut excedens virtutem eius, sicut excellentia sensibilia sunt extra facultatem sensuum: indiget igitur confortari intellectus creatus aliquo diuino lumine, ad hoc quod diuinam essentiam videre possit.

Ex dictis colligitur primò oculum corporeum non posse eleuari ad videndum Deum, cum Deus clarè visus sit omnino extra obiectum non solum proportionatum, sed etiam specificatiuum potentiae visuæ, vel sensitiuæ, quod est ens materiale vel corporeum; & nulla potentia ferri possit extra latitudinem sui obiecti specificatiui; alioquin ferretur extra propriam speciem & quidditatem, quod implicat.

Confirmatur: Deus vt in se est, magis distat ab omnibus obiectis sensibilibus, quam vnum obiectum sensibile ab alio, v. g. quam sonus à colore: Sed implicat sonum videri ab oculo corporeo: Ergo & Deum. Neque obstat quod ignis inferni eleuetur à Deo ad torquendos Dæmones, & animas rationales, quæ sunt entia purè spiritualia. Eleuatur enim vt purum instrumentum, quod ferri potest extra obiectum specificatiuum, modò illud in quod agit contineatur intra obiectum principalis agentis, in cuius virtute operatur: potentia autem videns Deum, vtpote vitalis, debet agere vt causa principalis, quæ extra proprium specificatiuum ferri nequit.

Colligitur secundò, nō dari in homine appetitum innatum ad claram Dei visionem; nam appetitus innatus est pondus quoddam naturæ in bonum quoddam sibi connaturaliter debitum,

tum, & proprijs viribus assequibile: At in homine non datur pondus naturæ, sed duntaxat potentia obedientialis, ad claram Dei visionem; cum illa non sit connaturaliter illi debita, nec consequibilis viribus naturæ, sed superexcedens & improporcionata, vt in prima conclusione ostendimus: Ergo non datur in homine appetitus innatus ad illam.


Nec valet quod ait quidam Recentior in sua Theologia mentis & cordis pagina 181. intellectum humanum posse dupliciter considerari, nempe secundum rationem specificam, & secundum rationem communem intellectus vt sic, prout abstrahit ab angelico, humano, & diuino; & sub priori consideratione non habere appetitum innatum ad visionem beatificam, bene tamen sub posteriori; sicut talpæ (inquit) secundum vltimam differentiam repugnat videre, quamuis sub ratione communi animalis, exigat habere potentiam visuam. Quam doctrinam probabilem reputat Martinez 1. 2. qu. 3. art. 8. dub. 2. concl. 7. illamque ex professo docet Herrera in manuscriptis tractatus de visione beata. Verum illa non placet alijs Thomistis, & hæc ratione potest breuiter confutari: Quod conuenit positivè gradui communi, transcendentì, aut generico, nequit repugnare specifico, cum omnia essentialia generi descendant ad speciem; quare ratio animalis non potest contrahi per differentiam aliquam, cui repugnet sentire, nec substantia per aliquid cui repugnet esse per se: Ergo si appetitus innatus in claram Dei visionem repugnet gradui specifico intellectus humani, non potest conuenire conceptui communi

ni intellectus ut sic. Vnde ad exemplum de talpa respondeo, vel rationem animalis non exigere positivè potentiam visivam, sed permittivè solùm, in aliquibus suis inferioribus: vel si ad illam positivè inclinet, non repugnare talpæ videre, secundùm suam essentiali differentiam, sed solùm ratione alicuius indispositionis organi accidentalis. Nec contra primum obstat, si dicas, talpam dici privativè cœcum: Sed privatio est carentia formæ debitæ: Ergo potentia visiva illi debetur: At non secundùm rationem differentialem: Ergo secundùm rationem genericam. Respondetur enim, non esse rigorosam privationem, sed latè acceptam, ad quam sufficit, potentiam visivam deberi gradui generico animalis, non secundùm se, sed solùm in aliquibus suis inferioribus.

Colligitur terciò, ex viribus naturæ non possèdari in homine appetitum elicitum efficacem ad claram Dei visionem, sed inefficacem dumtaxat & conditionatum.

Prima pars probatur: Appetitus elicitus efficax est ille qui fertur in bonum proprijs viribus & ex vi illius desiderij consequibile: Sed visionem beatam non possumus assequi viribus naturæ, ut in prima conclusione ostendimus: Ergo nec habere ad illam viribus naturæ appetitum elicitum efficacem. Secunda verò constat ex discrimine quod inter appetitum efficacem & inefficacem repetitur: ille enim fertur in bonum ut actu consequibile, & per certa media obtinendum; iste verò fertur in bonitatem rei absolutè & nudè consideratam, vnde: appetitu inefficaci & conditionato impossibilia

appeti possunt, sicut plures appetunt semper  
 viuere, habere diuitias infinitas, & alia huius-  
 modi. De hoc appetitu inefficaci & conditio-  
 nato intelligi debet quod ait S. Thomas hic  
 art. 1. nempe inesse homini naturale deside-  
 rium cognoscendi causam cum intuetur effe-  
 ctum. Nec obest si dicas, S. Doctorem ex ta-  
 li appetitu probare possibilitatem visionis bea-  
 tificæ: ex appetitu autem inefficaci & condi-  
 tionato, non concludi possibilitatem rei appe-  
 titæ: cum huiusmodi appetitus sæpe ad im-  
 possible feratur. Respondetur enim, quod li-  
 cet appetitus inefficax metaphysicè possit fru-  
 strari, moraliter tamen non potest, quando in  
 tot sapientibus reperitur, quos in iudicio præ-  
 dictum appetitum regulante, vnanimiter falli,  
 moraliter impossibile est, quamuis non meta-  
 physicè. Vnde ratio D. Thomæ demonstrati-  
 ua non est, sed solum quædam congruentia:  
 Mysteria enim nostræ fidei non possunt de-  
 monstrari, sed probabili tantum congruen-  
 tia suaderi. Hoc pacto idem S. Doctor infra  
 qu. 27. Verbi diuini processionem probabi-  
 liter ostendit, ex eo quod omne intelligens  
 producit in se Verbum & conceptionem rei  
 intellectæ. Et 3. p. quæst. 1. art. 1. probat  
 incarnationem Verbi diuini ex ratione summi  
 boni, cui connaturale est se summo modo com-  
 municare.



## CAPVT III.

*De specie ad visionem beatificam  
concurrente.*

**D**ico primò, Deum non videri à beatis, mediante aliqua specie impressa creata; imò talem speciem esse impossibilem.

Prima pars huius assertionis est contra Ægidium à præsentatione, Augustinianum, qui nedum affirmat, talem speciem de facto dari, verùm etiam non posse sine illa Deum clarè videri. Oppositum docent communiter alij Theologi, cùm S. Thoma, cuius doctrina (vt ait Ægidius Romanus, eiusdem ordinis S. Augustini, in suo defensorio art. 1.) diuinitus fuit inspirata, & cœlesti reuelatione confirmata: Nihilominus probatur hæc pars ratione fundamentali: Ideò requiritur species in intellectu creato ad cognoscendum aliquod obiectum, quia illud, vel non est præsens, aut vntum ipsi intellectui, vel non est intelligibile, propter suam materialitatem; vnde in Angelo non datur species impressa accidentalis, ad sui cognitionem, quia eius substantia, cùm sit intimè præsens ac vnita eius intellectui, & omnino immaterialis, supplet vices speciei, vt ostendemus in Tractatu de Angelis cap. 7. Atqui Deus est summè immaterialis, subindeque perfectissimo modo intelligibilis, & intimè præsens ac vnitus intellectui beatorum: Ergo non videtur à Beatis, mediante aliqua specie impressa creata, sed ipsa diuina essentia immediatè per seipsam supplet

Vices speciei . Et certè si lux creata & corporea non videtur ab oculo per ullam speciem , quia seipsa visibilis est , & oculo intimè præsens ; multò magis lux increata & incorporea diuinæ essentiæ , seipsa videtur à Beatis , & non mediante aliqua specie creata .

Eadem ratione probatur primò secunda pars conclusionis , quæ asserit talem speciem esse impossibilem : Species enim est vicaria obiecti , & forma per se ordinata ad supplendum defectum aliquem ex parte illius , nimirum vel proportionis cum potentia , vel vnionis cum illa : At repugnat Deo defectus proportionis cum intellectu illustrato lumine gloriæ , vel vnionis cum illo , vt de se patet ; Ergo repugnat species per se ad aliquem ex his defectibus supplendum ordinata .

Probatur secundò eadem pars ratione quam habet S. Thomas quodl. 7. art. 1. Effectus formalis speciei impressæ est reddere obiectum proximè intelligibile : Sed repugnat Deum fieri proximè intelligibilem , per aliquam formam creatam & à se distinctam , cum sit per se intelligibilis , imò & sua intelligibilitas , utpote summè immaterialis ; sicut ex eo quod sit sapiens per seipsum , imò & sua sapientia , repugnat fieri sapientem per sapientiam creatam : Ergo repugnat dari speciem impressam creatam , Deum vt est in se repræsentantem .

Probatur tertio alia ratione D. Thomæ hic art. 2. quæ potest sub hac forma proponi : Species & obiectum debent in eodem gradu immaterialitatis constitui : Sed nulla forma creata , vel creabilis , potest esse eiusdem immaterialitatis cum Deo ; alioquin esset actus purus & su-

& suum esse per essentiam, sicut Deus: Ergo nulla forma creata, vel creabilis, potest habere rationem speciei impressæ, Deum quidditati-  
uè repræsentantis.

Confirmatur primò: Quælibet species creata, vel creabilis, magis distat à Deo, quam species sensibilis à quidditate rei materialis, & quam species à phantasmatibus abstracta, à quidditate & substantia Angeli: Sed repugnat per speciem sensibilem cognosci essentiam & quidditatem rei materialis, & per speciem à phantasmatibus abstractam, quidditati-  
uè videri Angelum: Ergo à fortiori implicat per aliquam speciem creatam, Deum quidditati-  
uè videri.

Confirmatur secundò: Species non minorem debet habere proportionem, nec minus conuenire in gradu immaterialitatis cum re quam repræsentat, quam potentia intellectiua cum obiecto quod connaturaliter intelligit: Ergo sicut repugnat dari intellectum creatum, qui connaturaliter videat Deum, quia nullus intellectus creatus aut creabilis, potest esse eiusdem immaterialitatis cum illo, vt cap. præcedenti concl. 1. ostendimus; ita ob eandem rationem, & ob eundem excessum immaterialitatis & puritatis, quo Deus in immensum superat quamcumque formam creatam & creabilem, implicat dari aliquam speciem creatam quæ Deum quidditatiuè repræsentet. Instantiæ quæ contra hanc rationem D. Thomæ fieri solent, solutæ manent ex dictis loco citato in responsione ad primam obiectionem contra primam conclusionem.

Demum eadem secunda pars suaderi potest,  
& in a-



& magis demonstrari impossibilitas speciei creatæ in visione beatifica , alia ratione quam insinuat S. Doctor 3. contra Gent. cap. 49. Species quidditatiuè repræsentans aliquod obiectum , debet habere cum illo similitudinem & conuenientiam specificam, saltem in esse intentionali & intelligibili : Sed hæc conuenientia repugnat omni enti creato & creabili, comparatiuè ad Deum : Ergo implicat dari speciem creatam , Deum quidditatiuè repræsentantem . Minor est certa , tum quia nihil potest esse eiusdem cum Deo immaterialitatis ; tum etiam , quia nihil potest esse idem cum illo , nec habere cum illo vniuocam & specificam conuenientiam secundum aliquod esse reale & non fictum : esse autem intentionale & repræsentatiuum in specie intelligibili, non est aliquod esse fictum , vel aliqua denominatio extrinseca, sed verum & reale esse intrinsecum , quod in immaterialitate fundatur . Major verò sic ostenditur : Species ad hoc datur , vt obiectum quod est extra animam , intra illam ponatur in esse intelligibili , vt vna cum illa ad intellectionem concurrat , fecundando intellectum ad pactum intellectualem verbi : Ergo debet naturam obiecti continere , saltem in esse intelligibili & repræsentatiuo , subindeque in tali esse ei assimilari, & habere cum illo similitudinem seu conuenientiam specificam . Vnde S. Thomas infra quæst. 14. art. 1. per hoc distinxit intelligentia à non intelligentibus , quod illa possunt fieri omnia , & formas aliarum rerum intelligibiliter recipere . Et qu. 55. art. 2. ea ratione docuit , naturam v. g. Gabrielis, non posse deservire per

modum speciei ad omnium rerum intellecti-  
onem ; quia cum sit limitata, nequit intentiona-  
liter omnia aliorum generum entia continere ,  
seu illis assimilari , & Aristoteles 3. de anima  
textu 37. ob eandem rationem asseruit ani-  
mam quodammodo fieri omnia , nimirum in  
esse rationali & representatiuo .

Dico secundò : repugnat etiam dari in visio-  
ne beatifica verbum seu speciem expressam  
creatam .

Hæc conclusio sequitur manifestè ex funda-  
mentis in præcedenti statutis : cum enim spe-  
cies expressa sit perfectior & actualior simili-  
tudo obiecti , quam impressa , & illud ipsum  
quod repræsentat species impressa in actu pri-  
mo , repræsentet expressa in actu secundo ; si  
prima debet esse eiusdem immaterialitatis cum  
obiecto , & habere cum illo similitudinem &  
conuenientiam specificam , saltem in esse in-  
tentionali & intelligibili , multò magis id de-  
bet habere secunda . Vnde si implicet dari spe-  
ciem impressam creatam repræsentatiuam Dei  
ut est in se , eò quòd nulla forma creata posset  
esse eiusdem immaterialitatis cum illo , nec ei  
perfectè assimilari , seu habere cum illo simili-  
tudinem & conuenientiam specificam in esse  
intentionali & intelligibili ; à fortiori repu-  
gnabit dari speciem expressam creatam repræ-  
sentantem quidditatiuè Deum . Addo quod ,  
Deus , cum sit actus purus in ordine intelli-  
gibili , est sua intelligibilitas , non solum in actu  
primo , & per modum obiecti motiui , sed etiam  
in actu secundo , & per modum obiecti termi-  
natiui : Ergo sicut essentia diuina non potest  
fieri proximè intelligibilis per aliquam spe-  
ciem

ciem impressam creatam , ita nec actu intellecta , per verbum à Beatis expressum , & ab illis productum .

Obijcies primò contra primam conclusionem : De ratione speciei intelligibilis est inhærere intellectui , ipsumque informare : Sed hoc , cum inuoluat imperfectionem , essentia Dei conuenire nequit : Ergo illa non potest gerere vices speciei in visione beatifica , subindeque in illa datur species aliqua impressa creata .

Huic obiectioni dupliciter responderi potest , primò negando absolutè Maiorem : nam essentia diuina , respectu intellectus diuini , est vera species intelligibilis , & tamen illi non inhæret , nec illum informat . Item substantia Angeli ( vt tenet communior Theologorum sententia ) est species impressa , quâ seipsum inteligit , & tamen non inhæret , sed per se subsistit . Vnde egregiè obseruat Caietanus hic art. 2. quod speciei impressæ tria per accidens , & totidem per se competere possunt . Primum quod competit per accidens , est quod sit secundum suum esse naturale substantia , vel accidens , subindeque quod inhæreat vel per se subsistat , in Angelo enim , vt dicebamus , respectu cognitionis sui , est substantia , in nobis est accidens . Secundum , quod habeat esse naturale , vel intentionale : in Deo enim & Angelo , respectu cognitionis sui , habet primum , in nobis secundum . Tertium per accidens est , quod sit idem in esse naturali cum potentia , vel ab ea distincta . Primum autem quod per se competit speciei , est vt sit formalis similitudo sui obiecti , & idem cum illo in esse

intentionali & representatiuo. Secundum, vt gaudeat tanta immaterialitate, quanta ipsum obiectum. Tertium, vt sit idem cum intellectu, secundum esse intelligibile.

Secundò responderi potest, quod licet essentia diuina non possit gerere vices causæ formalis in esse naturali & entitatiuo, bene tamen in esse intentionali & intelligibili: cum enim forma physica, qualis est lumen gloriæ, se teneat ex parte subiecti, tanquam ipsum perficiens, limitatur & contrahitur ab eo, ipsique subordinatur, & ab eo dependet. E contra verò forma intelligibilis, cum non se teneat ex parte subiecti, siue intellectus, sed obiecti, tanquam eius similitudo, non subordinatur subiecto, vt intelligibilis est, nec ab eo contrahitur aut limitatur; vt patet in specie representante naturam humanam, quæ licet in esse entitatiuo, in quantum scilicet est accidens, contrahatur siue inducitur à suo subiecto, tamen in esse representatiuo, est æquè vniuersalis ac natura humana, vtpote nullum determinatè ex singularibus representans, sed naturam ipsam secundum totam suam vniuersalitatem. Est etiam alia disparitas inter formam naturalem & intentionalem; consistens in eo quod, cum forma naturalis ad hoc tendat, vt ex sui vnione cum materia fiat vnum completum, debet necessariò esse aliquid incompletum: forma verò intelligibilis, quia è contra non ordinatur ad componendum ex sui vnione cum intellectu vnum tertium, sed tantum ad ipsum perficiendum & complendum, idque tantò melius fiat, quantò completior, & actualior est forma, ipsum perficiens &

complens, species intelligibilis potest esse forma totalis & completa, & consequenter essentia diuina vices eius gerere, licet nequeat munus formæ naturalis præstare.

Obijcies secundò: species impressa necessaria ad videndum Deum vt est in se, potest esse finita: Ergo & creata. Consequentia patet, Antecedens probatur: Ad effectum finitum non exigitur virtus infinita: Sed visio beatifica, ad quam species impressa vt virtus concurrit, est quid finitum: Ergo non exigit speciem infinitam.

Confirmatur: Ad repræsentandum infinitum obiectum, finito modo, non requiritur infinitas in specie repræsentante: Sed species quidditatiua Dei non repræsentaret illum infinito modo, & comprehensiuè, quia illam repræsentaret intellectui finito: Ergo non deberet esse infinita.

Ad obiectionem respondeo negando Antecedens, & ad eius probationem, distinguo Maiorem: Ad effectum finitum non requiritur virtus infinita, si illa se teneat ex parte potentiae, concedo Maiorem: Si se teneat ex parte obiecti, per modum similitudinis illius, nego Maiorem vniuersaliter sumptam; si enim illud obiectum sit infinitum, sicut Deus, debet illa similitudo esse eiusdem naturæ cum illo in esse intelligibili, & conuenire cum eo in esse entitativo quoad gradum immaterialitatis, subindeque esse infinitæ perfectionis, vt constat ex supra dictis. Vel secundò distinguo Maiorem: Ad effectum finitum non requiritur virtus infinita, per se primò, transgât Maior: per se secundò, nego Maiorem, &

concessa Minori, distingnatur pariter consequens. Sicut ergo Authores qui censent peccatum mortale in ratione offensæ continere malitiam extrinsecè tantùm & obiectivè infinitam, dicunt illud per se primò solùm exigere satisfactionem simili infinitate, extrinsecà nempe, gaudentem, quia tamen repugnat dari satisfactionem quæ infinitatem habeat, nisi à persona infinita procedat, & eo ipso quod procedat à persona infinita, non potest non gaudere infinitate intrinsecà, idèd per se secundò infinitatem intrinsecam in satisfactione exposcere. Ita similiter dico, quod etsi visio beatifica per se primò solùm requirat speciem impressam obiecti infiniti; quia tamen omnino repugnat, talem speciem dari, quin sit in seipsa intrinsecè infinita, utpote eiusdem perfectionis & immaterialitatis cum illo, petit, saltem per se secundò, in specie infinitatem intrinsecam.

Ad confirmationem, concessa Maiori, nego Maiorem, repugnat enim dari speciem impressam repræsentantem Deum quidditatiuè, quæ ipsum non repræsentet infinito modo, & comprehensivè, cum enim esset eiusdem immaterialitatis cum Deo, & cum illo identificata, saltem in esse intentionali & intelligibili, ei repugnare finito modo Deum repræsentare, subindeque illum comprehendere.

Obijcies tertio contra secundam conclusionem D. Thomas 1. p. qu. 27. art. 1. ait quod *omne intelligens, eo ipso quod intelligit; format verbum*. Ergo censet beatos in visione beatifica verbum producere.

Respondeo D. Thomam non loqui de omni  
sup-

supposito intelligere, per distributionem completam ex parte intellectuum, sed per distributionem accommodam; ita ut sensus sit, omne suppositum intellectuale, in aliqua intellectione format verbum. Ex quo infert, etiam suppositum intellectuale increatum, nempe Deum, in aliqua sui cognitione verbum producere. Quæ illatio, licet non sit demonstratiua, est tamen probabilis; mysteria enim nostræ fidei, inter quæ præcipuum tenet locum productio Verbi Diuini, non possunt euidenter demonstrari, sed probabiliter tantum & congruenter suaderi.

Obijcies quartò: Verbum non distinguitur ab intellectu; sed in beatis necessariò datur intellectio creata, & ab ipsis producta: Ergo & verbum creatum. Minor constat, Maior probatur: intellectio & verbum habent eundem effectum formalem, nempe reddere intellectum intelligentem in actu secundo: Ergo non distinguuntur.

Respõdeo negando Maiorem, verbum enim est terminus intellectiõis, non verò ipsa intellectio, ut docent nostri Thomistæ in Philosophia. Ad probationem in contrarium dico, quod licet intellectio & verbum reddant intellectum intelligentem in actu secundo, diuersimodè tamen id præstant; intellectio enim reddit intellectum intelligentem in actu secundo, per modum operationis, sicut calefactio reddit calorem calefacientem; verbum autem id præstat, per modum termini producti per intellectiõem, & tanquam medium in quo ipsa intellectio, ut contemplatio, speculatur obiectum.



Dices, si intellectio & verbum inter se comparentur per modum actionis, & termini per eam producti, sequitur in visione beatifica dari verbum per ipsam productum, cum repugnet dari actionem sine termino à se distincto per illam producto. Vnde amor beatificus producit terminum, qui vocatur impulsus, & Pater æternus format verbum in cognitione notionali essentiae, quidni ergo pariter beati in illius visione & cognitione verbum producent?

Respondeo negando sequelam, & ad eius probationem dico cum S. Thoma 1. contra Gent. cap. 100, quod licet habere terminum à se productum, sit de ratione actionis transeuntis, quæ non est propter se, sed propter suum terminum, ut calefactio propter calorem à se productum, non tamen de ratione actionis immanentis; licet enim hæc aliquando terminum producat, quando scilicet indiget illo, non tamen est de conceptu essentiali illius terminum productum à seipsa distinctum habere; quia cum non sit propter terminum, sed potius terminus ordinetur ad ipsam, sicut patet in verbo, quod est propter intellectionem, & ut illi deferuiat, solum producit terminum, quando indiget illo; unde quia visio beatifica eo non eget (cò quòd essentia diuina sit intimè præsens & vnita intellectui beatorum; non solum per modum principij, sed etiam per modum termini actualis intellectionis) nulum verbum per eam producit. Amor tamen beatificus impulsus producit, quia impulsus, qui est voluntatis terminus, non est vltima actualitas obiecti amari, sed ponitur ut



voluntatem completè & perfectè in obiectum inclinet; vnde quantumcumque perfectum sit obiectum amatum, adhuc impulsus voluntatis admittitur: verbum autem ponitur vt vltima actualitas obiecti intellecti, quare quando obiectum est in vltima actualitate (vt contingit in visione beatifica) verbum non producit. Pater verò æternus format Verbum in cognitione notionali essentia, non ex indigentia, sed ex fecunditate; non enim illud producit vt essentia diuina intelligatur, sed quia eius cognitio fecunda est ad intra ad Verbi productionem.

Obijcies vltimò: De ratione verbi est esse semper actu cognitum, cum sit terminus intrinsecus actualis intellectiōis: Sed essentia diuina non est semper & ab æterno actu cognita, saltem ab intellectu creato: Ergo non potest habere rationem verbi seu speciei expressæ, respectu illius.

Respondeo essentiam diuinam, quantum est de se, fuisse semper actu cognitam ab intellectu creato, id est ex se sufficientem habuisse immaterialitatem & actualitatem, ad terminandam intellectiōem creatam, & visionem beatificam; non fuisse tamen de facto actu semper cognitam, defectu connotati, id est intellectus creati, qui semper & ab æterno non fuit. Sicut personalitas diuina, quantum est de se, semper terminauit humanitatem, hoc est nihil ei ex parte sui deficiebat, vt terminaret; licet de facto non semper terminauerit, ob defectum connotati, nempe humanitatis, quæ terminanda erat.

## CAPVT III.

*De necessitate luminis gloriæ ad videndum  
Deum.*

Certum de fide est, intellectum creatum de via ordinaria indigere lumine gloriæ ad videndum Deum; hoc enim definitur in Concilio Viennensi in Clementina *Ad nostrum*, contra Begardos & Beguinas, existimantes intellectum creatum posse naturaliter videre Deum. Ratio etiam id suadet, potentia enim quæ ex natura sua est insufficiens ad aliquem actum eliciendum indiget confortari & eleuari per aliquam virtutem in se receptam. Sed intellectus creatus (vt cap. i. ostensum est) ex se & ex sua natura insufficiens est & impropportionatus ad videndum Deum vt est in se: Ergo ad hoc indiget virtute aliqua supernaturali ei superaddita, quæ lumen gloriæ à Theologis appellatur. Neque valet si dicas, ad hoc sufficere essentiam diuinam, unitam intellectui beatorum per modum speciei, nam species supplens vicem obiecti, non dat virtutem potentie ad illud videndum, sed eam supponit, vt patet in eo qui habet læsam vel debilem potentiam visiuam; nam quantumcumque species visibiles obiecti, perfectæ & efficaces ponantur in oculo, non sanatur neque confortatur visus eius: Ergo defectus virtutis qui est in intellectu creato ad videndum Deum, non potest sufficienter suppleri per essentiam diuinam, in ratione speciei intelligibilis ipsi unitam.

Confirmatur : Improportio quæ est in intellectu ad eliciendum actum fidei , non suppletur per solam speciem obiecti credibilis , sed insuper requiritur lumen fidei : Ergo à fortiori insufficiencia & improportio quæ est in illo ad videndum Deum vt est in se , impleri non poterit per solam vnionem diuinæ essentia in ratione speciei , sed debet necessariò confortari & eleuari per lumen gloriæ , quod duo præstat munia in visione beatifica : primum est , disponere intellectum creatum ad vnionem essentia diuinæ per modum speciei intelligibilis , vt docet D. Thomas hic art. 5. alterum , illum confortare & eleuare ad eliciendam visionem beatificam . Hoc præmissis .

Quærent hic Theologi , an intellectus creatus possit de potentia absoluta elicere visionem beatificam , sine lumine gloriæ creato ? Partem affirmatiuam tenent plures ex Recentioribus , inter quos aliqui existimant , Deum in ratione luminis vniri posse intellectui creato , sicut ei vnitur in ratione speciei , & per talem vnionem ipsum potentem reddere ad eliciendam visionem beatificam . Alij docent , Deum id posse præstare per specialem assistentiam , vel concursum simultaneum . Alij verò recurrunt ad aliquam potentiam obedientialem , proximè & immediatè actiuam & productiuam actuum & effectuum supernaturalium , quam dicunt singulis rebus creatis naturaliter esse congenitam , & compleri per concursum Dei simultaneum ordinis supernaturalis .

Sententia tamen negans , verior & probabilior videtur : cum enim intellectus creatus sit intrinsecè insufficiens & improportionatus ad

elicendam visionem beatificam, non potest  
 eam elicere, nisi prius saltem natura fiat po-  
 tens intrinsecè & proportionatus ad illam: Sed  
 non potest fieri intrinsecè potens ad illam eli-  
 ciendam, sine lumine gloriæ creato. Ergo si-  
 ne illo non potest, etiam de potentia absoluta,  
 elicere visionem beatificam. Maior constat,  
 nam actus primus essentialiter præsupponitur  
 ad secundum, vnde est illa celeberrima regula in  
 topicis, *ab actu ad potentiam optima est conse-  
 quentia*. Minor verò probatur, confutando  
 tres illos modos quibus Adversarij asserunt,  
 intellectum creatum posse reddi potentem ad  
 elicendam visionem beatificam, absque lumi-  
 ne gloriæ creato. Et in primis quod Deus in  
 ratione luminis gloriæ non possit intellectui  
 creato vniri, sicut ei vnitur in ratione speciei  
 intelligibilis, videtur manifestum ex princi-  
 pijs supra statutis; magna enim est disparitas  
 inter speciem impressam & lumen gloriæ,  
 nam species impressa est forma intelligibilis,  
 se tenens ex parte obiecti, & eiusdem perfe-  
 ctionis & immaterialitatis cum illo; vnde ad  
 illam non requiritur inhærentia vel informa-  
 tio, sed tantum conuenientia & similitudo cum  
 obiecto; nam inhærentia vel informatio per-  
 tinet ad genus physicum, & per accidens se ha-  
 bent ad genus intelligibile: lumen autem  
 gloriæ est forma physica, se tenens ex parte po-  
 tentiæ, quare requirit inhærentiam & infor-  
 mationem: vnde cum diuina essentia non pos-  
 sit informare intellectum creatum, nec ipsi in-  
 hærere, non potest illi vniri in ratione lumi-  
 nis, sed solum in ratione speciei & formæ in-  
 telligibilis.

Quod verò per specialem Dei assistentiam non possit intellectus creatus reddi potens ad eliciendam visionem beatificam, sic ostenditur. Vel ex tali assistentia deriuatur in intellectum creatum aliqua virtus intrinseca, vel nulla ei superadditur? Si primum dicatur, habemus intentum, nam talis virtus superaddita, debet esse quædam participatio diuinæ intellectualitatis, subindeque lumen gloriæ. Si verò secundum affirmetur, ex tali assistentia intellectus creatus non poterit fieri intrinsecè potens ad eliciendam visionem beatificam; impossibile enim est id quod est de se impotens & improporcionatum ad eliciendam aliquam operationem, reddi potens & proporcionatum ad illam producendam, nisi intrinsecè mutetur, ac proinde nisi in se recipiat aliquam formam aut virtutem intrinsecam quam antea non habebat; causam enim esse potentem ad operandum, non est aliqua denominatio extrinseca, sed intrinseca, à virtute aliqua & principio interno petita.

Quod diximus de speciali Dei assistentia, de eius concursu simultaneo dicendum est; cum enim talis concursus, non sit in causam, sed in actionem, vel effectum, eam intrinsecè non immutat, subindeque de impotente non reddit illam potentem ad eliciendam aliquam operationem altioris ordinis, ad quam, vt docet S. Thomas 3. contra Gent. cap. 33. nulla potentia creata potest fieri potens & proporcionata, nisi per alicuius nouæ formæ adeptionem; sicut diaphanum non potest illuminare, nisi fiat lucidum actu, per formam lucis receptam in ipso de nouo.

Demum quod intellectus creatis non possit fieri proximè potens ad eliciendam visionem beatificam, per potentiam obedientialem, proximè & immediatè actiuam, & productiuam actuum & effectuum supernaturalem, & rebus omnibus implantatam, probatur breuiter contra Suarez, Meratium, & alios Recentiores: Primò quia talis potentia est expressè contra S. Thomam dicentem 1. 2. qu. 109. art. 1. *Forma vlt: a naturalem efficaciam non potest, nisi per aliquam formam superadditam.* Et 3. p. qu. 62. art. 4. admittentem in Sacramentis nouæ legis, virtutem intrinsecam ad producendam gratiam, quam dicit esse incompletam & fluentem; hæc enim virtus prorsus inutilis esset ac superflua, si in Sacramentis nouæ legis daretur potentia obedientialis gratiæ productiua. Vnde Suarez, & alij qui talem potentiam admittunt, negant Sacramenta nouæ legis, per virtutem fluentem & transeuntem eleuari. Secundò talis potentia, si daretur, esset naturalis, utpote singulis rebus creatis à natura congenita; & supernaturalis, utpote ad actus vires naturæ excedentes ordinata. Item esset finita, quia esset identificata cum entitate cuiuslibet rei creatæ, quæ finita est; & infinita, quia esset productiua cuiuscumque rei producibilis, quæ est infinita, saltem in potentia; nam dato quocumque effectui producto, potest perfectior & perfectior in infinitum produci. Tertiò per illam potentiam destruitur totus ordo gratiæ, & omnia quæ ad illum pertinent, inutilia prorsus ac superflua redduntur; frustra enim fit per plura quod potest fieri per pauciora, si ergo per illam potentiam & con-

cur-

cursum simultaneum homo potest elicere actus supernaturales, inutiles erunt virtutes infusæ ad illos eliciendos, inutilis erit character in Sacerdotibus ad consecrandum, superuacaneum lumen gloriæ in beatis ad videndum Deum. Nec dici potest tales habitus requiri ad connaturaliter operandum, cum enim hæc potentia sit ingenita & naturalis, mediante illa homo magis connaturaliter operabitur, quam medijs formis & qualitatibus aduentitijs, à Deo infusis, & illi superadditis.

Obijcies primò: D. Thomas in 4. dist. 49. quæst. 2. art. 7. sic ait: *Miraculosè fieri potest, ut aliquis intellectus, non habens nisi dispositiones viæ, eleuetur ad videndum Deum per essentiam*: Sed lumen gloriæ non est dispositio viæ, sed patriæ: Ergo censet intellectum posse sine illo diuinam essentiam videre, sicut eam de facto vidit D. Paulus in raptu; cum enim tunc esset viator, intellectus eius non fuit ad talem visionem eleuatus per lumen gloriæ, quod solis comprehensoribus conceditur.

Respondeo D. Thomam asserentem posse intellectum sine lumine gloriæ Deum videre, de potentia absoluta, debere intelligi de lumine gloriæ habitualiter communicato; non excludere tamen lumen gloriæ per modum transeuntis concessum, sicut fuit in D. Paulo, quando in raptu vidit diuinam essentiam. Vnde idem S. Doctor 2. 2. quæst. 175. art. 3. ad 2. *Essentia diuina videri ab intellectu creato non potest, nisi per lumen gloriæ, quod dupliciter participari potest. Uno mod. per modum forme immanentis, & sic beatos facit in patria, ali-*

modo per modum cuiusdam passionis transeuntis, & hoc modo lumen illud fuit in Paulo, quando raptus fuit.

Dices, D. Thomas loco in obiectione adducto, ait *miraculosè fieri potest, ut aliquis intellectus, non habens nisi dispositiones viæ, eleuetur ad videndum Deum per essentiam*: Sed lumen gloriæ transeunter communicatum, non est dispositio viæ: Ergo iuxta D. Thomam Deus videri potest, de potentia absoluta, sine lumine gloriæ, siue permanenter siue transeunter communicato.

Respondeo quod licet lumen gloriæ transeunter communicatum, non sit dispositio viæ positivè, hoc est exacta à statu viatoris, est tamen dispositio viæ permissivè, id est non impossibile cum statu viatoris; ad differentiam luminis permanenter communicati, quod cum statu puri viatoris incompatible est.

Obijcies secundò: Idem Doctor Angelicus 1. p. qu. 105. art. 2. sic ait: *Erroneum est dicere, Deum non posse facere per seipsum omnes determinatos effectus qui sunt per quamcumque causam creatam*: Sed Deus medio lumine gloriæ facit quod intellectus creatus eliciat beatificam visionem: Ergo id poterit præstare per seipsum, & gerere vices luminis gloriæ, sicut gerit vices speciei intelligibilis.

Respondeo D. Thomam debere intelligi de effectibus causæ creatæ, purè efficientis, non autè quando involuitur genus causæ formalis; unde cum lumen gloriæ, non solum in genere causæ efficientis, sed etiam formalis, concurrat ad visionem beatificam, Deus non potest facere quod intellectus eliciat visionem siue illo; si-



cut non potest efficere quod homo intelligat sine intellectu, aut viuat sine anima. Non potest etiam essentia diuina gerere vices luminis gloriæ, sicut gerit vices speciei impressæ, ob rationem discriminis supra assignatam, impugnando primum modum dicendi Aduersariorum.

Obijcies tertio: Ex duobus trahentibus nauim, quilibet seorsim sumptus est impotens & improporcionatus ad talem tractionem, & fit potens & proporcionatus per solum concursum simultaneum alterius, absque intrinseca sui mutatione: Ergo similiter intellectus creatus poterit fieri potens ad eliciendam visionem beatificam, absque intrinseca sui mutatione, & luminis gloriæ infusione, per hoc quod Deus specialiter illi assistat, & cum eo simul concurrat.

Respondeo, concesso Antecedenti, negando consequentiam, & paritatem, ob duplicem rationem discriminis. Prima est, quia in duobus trahentibus nauim, impotentia & improporcio ad talem tractionem, prouenit solum ex excessu intensiuo effectus, vnde per multiplicationem virtutis aut concursus eiusdem speciei, potest fieri perfecta proportio: improporcio verò quæ est inter intellectum creatum & visionem beatificam, prouenit ex eo quod talis operatio est ordinis altioris & diuini; vnde talis improporcio non potest vinci, nisi per additionem formæ ordinis diuini & supernaturalis, nimirum luminis gloriæ, permanenter, vel saltem, transeunter, communicati. Secunda disparitas est, quia duo trahentes nauim, sunt causæ partiales tractionis: intelle-


ctus verò, & lumen gloriæ, non concurrunt ad visionem beatificam, vt causæ partiales; nam vt ait S. Thomas 3. contra Gent. cap. 70. *Non sic idem effectus causæ naturali & diuinæ virtuti tribuitur, quasi partim à Deo, & partim à naturali agente fiat.*

Obijcies quartò: Datur in Deo perfectissimum & absolutissimum dominium in omnes creaturas: Ergo & in creaturis perfecta subiectio & potentia obedientialis ad efficiendum omne id quod Deus voluerit, subindeque vt intellectus eliciat visionem beatificam, sine lumine gloriæ. Vnde D. Thomas in 4. dist. 8. qu. 2. art. 3. ad 4. *Sicut creaturæ inest potentia obedientiæ, vt in ea fiat quidquid creator disposuerit; ita etiam vt ea media fiat, quæ est ratio instrumenti.* Quibus verbis videtur admittere non solum potentiam obedientialem passiuam, ad recipiendam quidquid Deus voluerit, sed etiam actiuam, ad coope- randum illi in omnibus quæ voluerit.

Respondeo, concesso Antecedente, negandò consequentiam; ratio enim pleni & perfecti dominij in Deo, exigit quidem quod Deus possit vti creaturis ad libitum, non tamen quod possit medijs illis supernaturales effectus vel operationes producere, absque illarum eleuatione & immutatione, per receptionem alicuius formæ vel qualitatis supernaturalis; quia hoc implicat contradictionem, vt ex supra dictis constat. Sicut ergo diuini dominij plena potentia, non requirit vt creatura agat sine actione, possit sine potentia, cognoscat sine intellectione; ita non postulat vt effectus supernaturales sine virtute supernaturali produ-  
can-

cantur, nec per consequens ut intellectus visionem beatificam eliciat sine lumine gloriæ. Vnde ad locum D. Thomæ in obiectione adductum, dicendum est, illum verbis illis solum declarare voluisse, in qualibet creatura esse virtutem obedientialem passivam, ad recipiendum virtutem à Deo, per quam instrumentaliter illi cooperetur ad effectus supernaturales & miraculosos: non verò quod sit in creatura potentia obedientialis proximè actiua, & quæ nullam requirat virtutem superadditam, sed solum concursum Dei simultaneum, ut Aduersarij contendunt.

Dices, si non detur in intellectu creato potentia obedientialis actiua ad videndum Deum, non influet actiue, sed se habebit merè passiuè ad visionem beatificam, sicut aqua se habet ad calefactionem. Sed negatur sequela & paritas, calor enim in aqua nullam supponit virtutem, etiam radicalem ad calefaciendum, lumen verò gloriæ supponit in intellectu creato virtutem radicalem & remotam ad videndum Deum.



## C A P V T. IV.

### *De inequalitate visionis beatæ.*

Certum est, Beatorum vnum alio perfectius Deum videre; ad iustum enim remuneratorem spectat, ut pro inæqualibus meritis inæqualia præmia concedantur: Sed hic in via inæqualia sunt iustorum merita: Ergo  
& in

& in patria inæqualia pariter sunt vel erunt eorum præmia . Vnde Ioann. 14. dicitur : *In domo Patris mei mansiones multe sunt .* Et 1. Corinth. 15. *Stella differt à stella in claritate ,* vbi loquitur Apostolus de inæquali gloria corporum in resurrectione , quæ cum à gloria essentiali profluat , hæc debet esse inæqualis , sicut & illa . Demum Florentinum in decreto de Purgat. definit , *Beatos intueri Deum sicuti est , pro meritorum tamen diuersitate , alium alio perfectius .* Difficultas ergo est & controuersia inter Theologos , vnde oriatur inæqualitas illa quæ in visione beatificæ reperitur , an à solo lumine gloriæ , vel etiam à naturali perfectione intellectus creati ; ita vt intellectus perspicacior , cum æquali lumine gloriæ , clariùs videat diuinam essentiam , quam minùs perspicax ?

Communior & probabilior sententia , inæqualitatem visionis , in solam luminis gloriæ inæqualitatem , censet esse reducendam . Ratio est , quia inæqualitas visionis beatificæ reduci debet in virtutem proximam & immediatam , non autem in radicalem & remotam ; nam ista non agit nisi iuxta proportionem virtutis proximæ , & vt per illam eleuata : Sed lumen gloriæ est virtus proximè & immediatè influens in visionem beatificam , intellectus verò in eam influit radicaliter tantùm & remotè , & vt eleuatus per lumen gloriæ , vt constat ex dictis capite præcedenti : Ergo inæqualitas visionis beatæ , in lumen gloriæ , non verò in perfectionem & perspicaciam naturalem intellectus creati , reducenda est . Vnde D. Thomas hic art. 6. ad 3. ait quod *diuersi-*

*tas videndi Deum erit per diversam facultatem intellectus, non quidem naturalem, sed gloriosam.*

Confirmatur primò : inæqualitas visionis beatæ provenit ex eo quod diuina essentia magis vel minùs perfectè vniatur intellectui creato in ratione speciei intelligibilis : Sed quod essentia diuina, in ratione formæ & speciei intelligibilis, magis vel minùs perfectè vniatur intellectui creato, provenit ex maiori vel minori intensiōe luminis gloriæ, cùm illud sit vltima dispositio ad talem vnionem, vt docet D. Thomas hìc art. 5. non verò ex maiori vel minori perfectiōe naturali intellectus creati : Ergo inæqualitas visionis beatæ provenit ex maiori vel minori intensiōe luminis gloriæ, non verò ex maiori vel minori perfectiōe intellectus. Alioquin daretur aliquis gradus beatitudinis, qui non corresponderet gratiæ, sed naturæ; maior enim actiuitas & perspicacia intellectus creati, cùm sit aliquid ordinis naturalis, est beneficium naturæ, non gratiæ, & à Deo vt creatore, non verò vt glorificatore procedens. Nec obest quod S. Thomas 3. p. qu. 10. art. 4. ad 2. dicat *gradus visionis diuine magis attendi secundum ordinem gratiæ, quam secundum ordinem naturæ*. Nam ly *magis* non sumitur comparatiuè, sed exclusiuè, ita vt idem significet ac *potius*. Sicut eum Paulus dicit de Moyse, *magis eligens affligi cum populo Dei, quam temporalis peccati habere incurritatem*.

Obijcies : Quando duæ causæ concurrunt ad eundem effectum, ille crescit in perfectiōe, quando aliqua illarum crescit in virtute & acti-

aëtiuitate ; sic quia potentia visiva , & species obiecti visibilis , concurrunt ad visionem corpoream , si augeatur virtus & perspicacia potentiae , vel si in ea ponatur species obiecti perfectior , elicitur visio magis perfecta : Sed ad visionem beatam non solum lumen gloriæ , sed etiam intellectus creatus efficienter concurrat , cum ad eam non se habeat merè passive : Ergo sicut intensius lumen , ita & perfectior ac perspicacior intellectus , perfectiorem elicit visionem .

Respondeo Maiorem esse veram , quando causa perfectior influit per se vt perfectior , vel vt habet virtutem proximam & immediatam , in effectum ; secus autem quando concurrat tantum secundum virtutem radicalem , & maior eius perfectio materialiter se habet & per accidens , vt contingit in proposito , cum intellectus creatus concurrat ad visionem beatam , non secundum suam aptitudinem naturalem , sed secundum obedientialem quam habet vt eleuetur per lumen gloriæ , quæ est æqualis in omnibus intellectibus creatis . Ex quo patet disparitas ad exemplum adductum , nam potentia visiva , & species , proximè & immediatè influunt in visionem corpoream , & habent vim proximam ad agendum , saltem partialem & incompletam : intellectus autem creatus solum radicaliter concurrat ad visionem beatam , nec confert seorsum aëtiuitatem , & virtutem proximam ad agendum , sed suam quam habet subijcit , lumini gloriæ , vt eleuabilem ab ipso , sicque redditur vna tantum virtus proportionata & proxima ad visionem .

Dices , si hoc ita sit , intellectus creatus erit

purum instrumentum in visione beata, cum non agat nisi ut eleuatus per lumen gloriæ, sicut instrumentum non agit nisi ut eleuatum à causa principali.

Sed nego sequelam: primò quia causa instrumentalis ita mouetur ab aliquo agente extrinseco, ut tamen seipsam à principio intrinseco non moueat, ut constat in ferra, malleo, penicillo, & alijs instrumentis artificialibus: intellectus verò creatus, non ita mouetur à Deo ad visionem beatificam, quod seipsum à principio intrinseco non moueat; cum in ea vitaliter operetur, & viuat vitâ æternâ, & de ratione causæ vitalis, & vitaliter operantis, fit quod se moueat ab intrinseco, ut docent Philosophi in libris de anima. Secundò, quia de ratione instrumenti propriè sumpti est ut eleuetur extra latitudinem sui obiecti adæquati, ut constat in aqua baptismali, quæ eleuatur ad producendam gratiam, quæ est extra latitudinem obiecti adæquati cuiuscumque agentis creati: intellectus verò creatus, licet in visione beatifica eleuetur extra latitudinem sui obiecti proportionati & connaturalis, non eleuatur tamen extra latitudinem sui obiecti adæquati & specificatiui, ut cap. 1. concl. 2. declarauimus. Tertiò, instrumentum propriè sumptum, neque habet virtutem proximam, neque radicalem, ad effectum causæ principalis; aqua enim v. g. non habet virtutem radicalem ad producendam gratiam, neque ferra ad scindendum artificiosè: Sed intellectus creatus habet vim, saltem radicalem & remotam, ad videndum Deum, ut ex supra dictis constat; Ergo non se habet ut purum instru-

instrumentum respectu visionis beatificæ ; Dixi *purum instrumentum* , quia non est inconueniens concedere intellectum creatum , lumine gloriæ perfusum , esse instrumentum Dei in ordine ad visionem beatificam , improprie , & lato modo , & in generali quadam acceptione , quæ illud non extrahit à ratione causæ principalis , vt enim ait D. Thomas q. 24. de verit. art. 1. ad 5. *Instrumentum dupliciter dicitur : vno modo-proprie , quando scilicet aliquid ita ab altero mouetur , quod non conferriur ei à mouente aliquod principium talis motus , sicut ferra mouetur à Carpentario , & tale instrumentum est expers libertatis . Alio modo dicitur instrumentum magis communiter quidquid est mouens ab alio motum , siue sit in eo principium sui motus , siue non .*

Ex dictis colligitur , visiones beatas Angelorum & hominum esse eiusdem speciei . Nam illarum diuersitas oritur à sola diuersitate luminis gloriæ , vt ostensum est : Sed omnia lumina gloriæ sunt eiusdem speciei , cum respiciant idem obiectum formale , scilicet Deum , cognoscibilem vt est in se , & eodem essentialiter modo tendant in ipsum , scilicet clarè & finitè : Ergo & omnes visiones beatificæ Angelorum & hominum . Neque obest quod tales visiones , non solùm à lumine gloriæ , sed etiam ab intellectu angelico & humano , qui essentialiter specie inter se distinguuntur , procedant . Non enim procedunt ab illis , ratione virtutis naturalis , sed potentiæ obedientialis , radicalis & remotæ , in quo intellectus angelicus & humanus specie inter se conueniunt .



## CAPUT V.

*De obiecto visionis beatificæ.*

**D**ico primò, Beati de factò vident diuinam essentiam, Trinitatem personarum, & omnia attributa; inò repugnat videri diuinam essentiam, non visis attributis, & personis.

Prima pars huius assertionis constat ex Florentino in litteris vnionis, vbi dicitur quod *Deus vnus & trinus videtur à beatis*, & ex illo 1. Ioan. 3. *Cùm apparuerit similes ei erimus, quia videbimus eum sicuti est*: Sed Deus est in se vnus, & trinus; omnipotens, iustus, misericors &c. Ergo vt talis videtur à beatis. Ratio etiam suffragatur, cùm enim visio beata sit merces fidei nostræ, per eam clarè cognoscimus in patria quæ nobis hìc in via per fidem obscurè reuelantur: Sed per fidem nobis obscurè reuelantur quæ spectant ad Dei naturam, eiusque attributa, & personas: Ergo illa per speciem & claram visionem nobis manifestantur in patria.

Secunda pars, quam Scotus, & eius Discipuli, nec non aliqui ex recentioribus negant, probatur ex triplici dote seu prærogatiua visionis beatificæ, quæ est cognitio quidditatiua, intuitiua, & beatificatiua: In primis enim implicat videri aliquid quidditatiuè, secundùm quod est in se, non visis prædicatis quæ illi quidditatiuè competunt, prout est in se: At de quidditate diuinæ essentiæ, prout in se, sunt attributa, & relationes, vt de attributis con-

stat ex dictis supra cap. 4. & de relationibus ostendemus in Tract. de Trinit. cap. 4. §. 2. Ergo repugnat diuinam essentiam quidditati-  
uè prout est in se videri, non visis attributis & relationibus.

Idem colligatur ex ratione intuitionis, cognitio enim intuitiua per hoc differt ab abstractiua, quod hæc apprehendit obiectum proportionaliter ad captum intellectus, illa autem videt & intuetur obiectum vt est in se à parte rei. Ergo cum Deus sit in se vnus & trinus, & includat in se essentiam, attributa, & relationes, repugnat illum videri & intuitiue cognosci, non visis relationibus & attributis. Addo quod cognitio intuitiua non terminatur ad solam naturam & quidditatem obiecti, sed fertur in rem, vt est in se subsistens & existens à parte rei, vnde cum natura diuina subsistat & existat in tribus personis, repugnat illam videri seu intuitiue cognosci sine illis.

Eadem repugnantia demonstratur ex tertia prerogatiua, nam cognitio beatificatiua debet perfecte satiare & quietare appetitum beati, cum beatitudo sit quies & satietas omnium desideriorum. Sed si visio beata attingeret solam essentiam diuinam, nec se extenderet ad attributa & personas sanctissimæ Trinitatis, non perfecte satiare nec quietaret intellectum beati: Ergo non esset cognitio perfecte beatificans. Maior constat, Minor sic probatur. Cum naturaliter desideremus, visa essentia, videre eius proprietates, & visa natura subsistente, videre modum subsistentiæ eius; attributa autem sint proprietates diuinæ essentiæ, & relationes modi substantiæ eius; si beatus viden-  
do

do diuinam essentiam , non videret aliquod ex eius attributis , vel aliquam ex diuinis relationibus , remaneret in eo desiderium videndi illud attributum , vel illam relationem : Ergo non esset eius appetitus plenè satiatuſ & quietuſ .

Obijcies primò : Essentia diuina communicatur Filio per æternam generationem , non communicata paternitate : Ergo similiter potest visione beatifica videri , non visa paternitate . Antecedens est certum fidei certitudine . Consequentia verò inde probatur , quod tota ratio ob quam essentia in diuinis communicetur Filio , non communicata paternitate , est virtualis eorum distinctio , quæ proinde videtur sufficere , vt essentia videri possit , non visis relationibus & attributis .

Respondeo negando consequentiam , & eius probationem , quod enim essentia diuina communicari possit Filio , non communicata paternitate , non oritur præcisè ex eo quod virtualiter distinguatur ab illa ( aliàs enim cum non solum à relationibus , sed etiam ab attributis distinguatur virtualiter , communicari posset Filio , non communicatis attributis ) sed ex eo insuper quod paternitas & filiatio opponuntur relatiuè in ratione communicabilium ; vnde ad veritatem consequentis & paritatis esset opus quod etiam opponerentur relatiuè in ratione visibilium , quod tamen apertè falsum est , aliàs enim Pater & Filius nunquam videri possent simul per eandem visionem .

Addo quod , licet essentia & paternitas distinguantur virtualiter , in ratione communicabilium , non tamen in ratione visibilium ;

quia in visione beatifica essentia diuina gerit  
vices speciei intelligibilis, non solum respectu  
sui, sed etiam respectu attributorum, & rela-  
tionum, absque villo virtuali discrimine.

Obijcies secundò: Obiectum primum  
potest videri sine secundo: Sed essentia di-  
uina est obiectum primum visionis beatifi-  
cæ, attributa verò & relationes pertinent tan-  
tum ad obiectum secundum: Ergo potest  
videri diuina essentia, non visis relationibus  
& attributis.

Respondeo primò, distinguendo Maiorem:  
Obiectum primum potest videri sine se-  
cundo, quando non habet necessariam con-  
nexionem cum illo, concedo. Si sint inter se  
connexa, & vnum transcendentaliter includa-  
tur in alio, nego. Vnde cum essentia diuina sit  
necessariò connexa cum relationibus & attri-  
butis, & in illis intime includatur, quamuis  
deur quod attributa & relationes pertineant  
ad obiectum secundum visionis beatæ, inde  
tamen non sequitur, diuinam essentiam posse  
videri sine illis.

Respondeo secundò, negando Minorem, re-  
lationes enim & attributa non sunt propriè  
objecta secunda visionis beatificæ, sed modi  
essenciales obiecti primi & specificatiui, si-  
ne quibus illud videri nequit: sicut sensibile  
proprium non potest videri sine communi: v.  
g. color sine extensione & figura; ex quo in-  
ferunt plures Theologi in tractatu de Eucha-  
ristia, corpus Christi in ea videri non posse,  
quia licet sit lucidum & coloratum, caret ta-  
men figura & extensione locali.

Dico secundò, Beatos videre aliqua Dei de-  
cre-

creta : Vt enim infra dicemus , illi vident ea quæ pertinent ad proprium statum , inter quæ sunt aliqua Dei decreta , illa præcipuè quæ spectant ad eorum prædestinationem & salutem . Non vident tamen omnia , alioquin omnia obiecta à Deo liberè volita , omniaque futura , ab illis cognoscerentur , quod dici nequit , vt constat de vltimo die iudicij , & quo dicitur Matth. 24. & Marci 13. *De vltimo die iudicij nemo scit , neque Angeli in celo .*

Si autem quæras , quomodo illa cognoscantur à Beatis ? Respondeo aliqua cognosci ab illis in Verbo , & lumen gloriæ , quod eminenter continet lumen propheticum , quo decreta Dei libera & futura contingentia reuelantur . Alia verò cognosci extra Verbum , per reuelationem Dei immediatam , aut mediatam ; Deus enim immediatè per seipsum illuminat Angelos superiores , inferiores verò mediantibus superioribus , vt ostendemus in Tractatu de Angelis .

Dico tertio , beatos videre creaturas possibles in essentia diuina tanquam in causa & medio priùs cognito . Cognitio enim beatorum est exemplata à cognitione quâ Deus seipsum cognoscit , & illius imitatio & participatio : Sed Deus cognoscendo seipsum , cognoscit creaturas possibles in sua essentia tanquam in causa , vt tractatu sequenti ostendemus : Ergo similiter beati videntes essentiam diuinam , in ea tanquam in causa eas cognoscunt . Et idem cum proportionem de creaturis existentibus & futuris dicendum est , eas nimirum cognosci à beatis in essentia diuina , non nudè sumpta , sed vt per liberum Dei de-

cretum determinata. Vnde Augustinus lib. 13. confess. c. 15. ait Angelos *videre faciem Dei semper, & ibi legere quid quid velit aeterna voluntas eius*. Et Bernardus lib. 5. de consideratione cap. 4. asserit beatos videre in Deo *cogitationes pacis, mysteria bonae voluntatis*; quibus apertè significatur, creaturas, etiam ut existentes, vel futuras, videri in Verbo. Argumenta quæ contra hanc conclusionem fieri solent, commodius proponuntur & solvantur tractatu sequenti, quando agemus de scientia possibili, *quæ simplicis intelligentiæ appellatur*.

Dico quartò, beatos clarè & distinctè cognoscere mysteria nostræ fidei, cælum, elementa, ac præcipuas partes huius vniuersi, & ea quæ ad proprium statum pertinent.

Probatur conclusio hoc discursu: Beatitudo perfectè satiare debet omnem appetitum iustum creaturæ rationalis: Beatus autem tripliciter potest considerari, primò ut est eleuatus ad ordinem gratiæ, secundò ut est pars vniuersi, tertio quatenus est talis persona particularis, & quatenus fuit in tali dignitate constitutus, puta Rex, Summus Pontifex, Patriarcha religionis, paterfamilias, &c. Et secundum hanc triplicem considerationem, diuersa appetit cognoscere obiecta. Primo enim modo petit cognoscere mysteria fidei, ut gratiam, lumen gloriæ, suam prædestinationem, mysterium Incarnationis, Eucharistiæ, &c. Secundo modo petit cognoscere species, & naturas, ac partes principales huius vniuersi, ut Angelos, cælos, elementa &c. Tertio modo petit cognoscere ea quæ pertinent ad suum statum: v. g. D. Gregorius; quia fuit Summus Pon-

Pontifex, appetit cognoscere ea quæ pertinent ad statum præsentem vel futurum Ecclesiæ, S. Dominicus ea quæ pertinent ad statum sui Ordinis, S. Ludovicus ea quæ pertinent ad statum regni Franciæ: Ergo Beati cognoscunt per visionem beatificam myſteria noſtræ fidei, præcipuas partes huius vniuerſi, & ea quæ ad proprium statum pertinent.



## CAPUT VI.

*De mensura visionis beatificæ.*

**D**ico breuiter, visionem beatificam non mensurari tempore, nec æuo, nec æternitate essentiali, sed participata.

Prima pars patet, tempus enim est mensura rerum successiuarum: sed visio beata est tota simul, quia beati omnia quæ vident in verbo, vident in vnica specie diuinæ essentia: ea autem quæ videntur in vnica specie, videntur simul, & non successiuè: Quam rationem tangit D. Bern. serm. 30. in Cant. his verbis: *Ille visio stat, quia forma stat quæ tunc videtur: est enim, nec vllam capit ex eo quod est, fuit, vel erit mutationem.*

Confirmatur: principia visionis beatificæ, nempe lumen gloriæ, & diuina essentia gerens vices speciei intelligibilis, non mensurantur tempore, vt constat: Ergo nec ipsa visio beatifica.

Secunda pars non videtur minùs certa, cum enim visio beatifica sit participatio diuinæ in-



lectionis, reddit animam veluti deiformem, & diuino modo operantem, subindeque modo simpliciore & immutabiliore, quam sit Angelus in suo esse; vnde cum diuersitas mensuræ durationis rerum, sumatur ex diuerso gradu immutabilitatis illarum, vt docet D. Thomas supra qu. 10. art. 5. visio beatifica petit mensurari aliquā mensurā nobiliori & vniuniformiori quam sit æuum, quod mensurat substantiam Angelorum.

Confirmatur: Æuum, licet sit in se immutabile & totum simul, admittit aliquā successionem, & aliquas variationes accidentales in Angelo, siue quoad mutationes locales, siue quoad diuersos actus, vt dicemus in Tractatu de Angelis: visio autem beata, cum constituat creaturam intellectualem in vltimo termino & fine, ac summa beatitudine, quæ non potest amplius crescere, nullam admittit successionem, aut variationem, etiam accidentalem, in ratione visionis. Vnde Augustinus 15. de Trinit. cap. 16. loquens de visione beata ait: *Non erunt volubiles nostræ cogitationes, ab alijs in alia euntes atque redeuntes, sed omnem scientiam nostram simul vno conceptu videbimus.* Et Bernard. 5. de consider. *Non enim tunc fragilis acies mentis nostræ, quantumcumque vehementer intendens, aliquatenus dissiliet, restituetur in suam pluralitatem: colliget se magis adunabit. conformabitque unitati illius, vel potius unitati illi.*

Dices, Æuum est mensura rei immutabilis in suo esse, & mutabilis secundum operationes ei adiunctas: Sed visio beatifica, quamuis sit immutabilis in suo esse, est tamen mutabilis  
quo




quoad operationes ei adiunctas, nimirum quoad illuminationes & revelationes quas beati extra verbum successivè recipiunt; cum statim initio beatitudinis non videant omnia quæ pertinent ad eorum statum, sed de his paulatim & successivè illuminentur: Ergo visio beatifica mensuratur xuo.


Respondeo quod quando dicitur, xuum esse mensuram rei immutabilis in suo esse, & mutabilis secundum operationes, hoc debet intelligi de operationibus illi adiunctis per se, non verò de illi adiunctis solum per accidens: illuminationes verò & revelationes quæ fiunt extra verbum, non pertinent per se ad visionem beatam, nec ab eà emanant, sicut amor, fructio, & delectatio, sed per accidens tantum: pertinent enim ad aliud genus cognitionis, quam Theologi appellant scientiam infusam, quæ per accidens ad visionem beatificam consequitur.

Tertia demum pars conclusionis, asserens visionem beatam non mensurari æternitate essentiali, sed participata, constat ex eo quod id quod mensuratur æternitate essentiali, debet esse omnino immutabile, tam ab extrinseco, quam ab intrinseco; sicut enim tempus consequitur motum, ita æternitas omnimodam immutabilitatem: Sed visio beatifica, quamvis ab intrinseco sit invariabilis & indefectibilis, admittit tamen mutabilitatem & defectibilitatem ab extrinseco; Deus. n. potest illā destruere & mutare, de ab soluta potentia, & efficere quod sit maior vel minor in eodem subiecto, pro diversis temporibus: Ergo non mensuratur æternitate essentiali, sed participata. Un-

de D. Thomas 3. contra Gent. cap. 61. ait  
*visionem beatam esse in participatione eternita-  
 tis* Et in hac parte supra qu. 10. art. 5. ad 1.  
 dicit quod *creatura spiritualis, quantum ad vi-  
 sionem gloriae, participant eternitatem.*

Dices, Essentia diuina, quæ in visione bea-  
 tifica gerit vices speciei, mensuratur æternita-  
 te essentiali: Ergo & ipsa visio; Respondeo  
 essentiam diuinam, vt est in se, mensurari æter-  
 nitate essentiali, non tamen præcisè quatenus  
 gerit vices speciei in visione beatifica; quia  
 concursus eius ad visionem incipit, & potest  
 desinere, & illa potest modò ad maiorem,  
 modò ad minorem visionem concurrere, quod  
 totum importat aliquam mutabilitatem, saltem  
 ab extrinseco, & in ordine ad potentiam Dei  
 absolutam.






## TRACTATUS III.

### *De scientia Dei.*

**I**N hoc Tractatu agemus primò de obiecto formali tam motiuo quam terminatiuo intellectus diuini. Secundò de scientia Dei respectu possibilium, quæ simplicis notitiæ seu intelligentiæ appellari solet. Tertiò de causalitate scientiæ Dei. Quartè de scientia Dei respectu futurorum contingentium. Quintò de scientia media, quæ magnum ac celebre disputandi argumentum est.



### C A P V T I.

*De obiecto formali tam motiuo quam terminatiuo intellectus diuini.*

**D**ico primò, obiectum formale & primarium intellectus diuini, non est ens, vt commune analogicè enti creato & increato, sed solum ens increatum.

Probatur triplici ratione desumpta ex D. Tho. 1. contra Gent. cap. 48. Prima est: Illud solum per se primò ab intellectu cognoscitur,

cuius specie intellectus intelligit: Sed species quā Deus intelligit, est sola diuina essentia: Ergo illa sola potest esse per se primò intellecta ab intellectu diuino, & consequenter creaturæ non possunt pertinere ad obiectum primum illius. Minor est certa; nam species est simul cum intellectu principium intellectiōis: Sed nihil à diuina essentia distinctum, potest esse principium intellectiōis diuinæ: Ergo nec esse species quā Deus intelligit. Maior autem sic probatur à D. Thoma: *Operatio formæ quæ est operationis principium proportionatur*: Sed species est forma & principium intellectiōis; Ergo hæc debet cum illa proportionari, subindeque non potest illam excedere: Sed si aliud esset per se primò ab intellectiōe cognitum, & aliud per se primò à specie repræsentatum, non feruaretur proportio intellectiōis cum specie: Ergo illud solū est per se primò ab intellectu cognitum, quod per se primò illi repræsentatur per speciem.

Secunda ratio D. Thomæ, quæ est quinta in ordine, sic ab illo formatur: Primò & per se intellectum est perfectio intelligentis, secundum hoc enim intellectus est perfectius, quod intelligit in actu, quod fit per hoc quod est vnum cum primò & per se intellecto: Sed nihil creatum potest esse perfectio intellectus diuini: Ergo nihil creatum potest esse primò intellectum ab ipso, subindeque obiectum illius primum, non potest esse ens vt sic, commune analogicè enti creato & increato.

Tertia ratio, quæ est septima in ordine, sic habet: Potentiæ specificantur ab obiecto formali & primario, vt communiter docent Phi-

Iosophi : Sed intellectus diuinus specificari nequit ab ente creato : Ergo illud non potest esse eius obiectum formale & primum, nec per consequens ens, vt commune analogicè entis creato & increato. Maior constat, Minor etiam videtur manifesta, nam dare specificationem potentia, est in illam exercere veram & propriam causalitatem; nihil autem creatum potest esse causa vera & propria alicuius perfectionis diuinæ, aliàs aliqua diuina perfectio, verè & propriè à creaturis dependeret, quod implicat : Ergo intellectus diuinus ab ente creato specificari nequit.

Dico secundò, relationes & attributa non sunt obiectum formale motuum intellectus diuini, sed id conuenit soli diuinæ essentia, vt virtualiter ab illis distinctæ.

Probatur primò : Intelligere diuinum, cum sit constitutum naturæ diuinæ. vt Tract. præcedenti cap. 3. ostensum est, nihil supponit in Deo, seipso virtualiter prius : Sed si relationes & attributa essent obiectum formale motuum intellectus diuini, intelligere Dei supponeret in Deo aliquid virtualiter prius seipso : Ergo relationes & attributa non sunt obiectum formale motuum intellectus diuini. Maior constat, nam de ratione primarij constitutiui est esse primum quod in re constituta intelligitur. Minor etiam videtur manifesta, nam obiectum motuum, virtualiter ab intellectione distinctum, est prius illa virtualiter : Ergo si relationes & attributa, quæ virtualiter ab intellectu & intellectione Dei distinguuntur, essent obiectum formale motuum intellectus diuini, intelligere Dei supponeret in Deo aliquid

quid virtualiter prius seipso,

Probatur secundò : Volitio est vnum ex diuinis attributis : Sed volitioni diuinæ repugnat esse obiectum formale motuum intellectus diuini : Ergo & attributis . Maior constat , Minor probatur . Obiectum motuum intellectus diuinæ , est prius illà virtualiter : Sed volitio Dei non potest esse prior virtualiter intellectus diuinæ , cum intellectio prior sit volitione : Ergo repugnat volitioni diuinæ esse obiectum motuum respectu intellectus diuinæ .

Probatur tertio, & ostenditur relationes diuinas non esse obiectum formale motuum intellectus diuini . Illud est obiectum formale motuum diuini intellectus , quod est species , vel gerit munus speciei qua fecundatur ad intellectum : Sed relationes diuinæ non habent rationem speciei fecundantis intellectum diuinum ad intellectum : Ergo nec rationem obiecti motui respectu illius . Maior patet , Minor probatur . Species est principium quo intelligendi : Sed relationes diuinæ non sunt principium quo intellectus diuinæ : Ergo non sunt species respectu intellectus diuini . Minor probatur , tum de intellectu essentiali , nam absoluta sunt priora notionalibus , & relatiuis , & consequenter nequeunt esse ab illis vt à principio . Tum de notionali , relationes enim filiationis & spirationis non sunt principia quo intellectus notionalis , qua Pater Verbum producit , imò nec ipsa paternitas ; nam Verbum est simile Patri dicenti in principio quo : non est autem illi simile in paternitate : Ergo illa non est principium quo  
in.

intellektionis notionalis , quâ Pater Verbum producit .

Confirmatur : Si relationes diuinæ non solum ratione essentiae , sed etiam ratione sui essent species quibus Deus intelligeret , sequeretur non solum virtualiter sed etiam realiter multiplicari rationem speciei in Deo : Sed hoc dici nequit : Ergo nec illud . Minor pater , non enim minus inconueniens videtur multiplicari in Deo realiter speciem intelligibilem , quam intellectum , vel intellektionem . Sequela autem Maioris probatur : Ea quæ conueniunt relationibus diuinis ratione illius quod addunt supra essentiam & lineam absolutam , realiter multiplicantur : Ergo si ratio speciei illis conuenit ratione illius quod addunt supra essentiam , realiter multiplicatur species in Deo .

Dico tertio , relationes & attributa non pertinere ad obiectum formale & primarium , terminatiuum intellectus diuini , sed illud esse solam essentiam , vt ab illis virtualiter distinctam .

Hæc conclusio sequitur ex fundamentis in præcedenti statutis . In primis enim obiectum motiuium & terminatiuum , inter se correspondere debent , cum idem ordo seruetur inter obiecta in terminando cognitionem , ac in terminando repræsentationem ; vnde quia ens rationis non repræsentatur per propriam speciem , sed per speciem entis realis , ad cuius similitudinem confingitur , non primario , sed secundo , ab intellectu nostro cognoscitur ; nec alia ratione creaturæ secundo cognoscuntur à Deo , nisi quia secundo repræsentantur .

cantur per speciem qua diuinus intellectus intelligit : Ergo si relationes & attributa , non sint obiectum primum , motuum intellectus diuini , idque competat soli diuinæ essentiae , vt virtualiter ab illis distinctæ , non etiam pariter obiectum primum , terminatum illius , sed hoc conueniet soli diuinæ essentiae , vt virtualiter ab illis distinctæ .

Deinde , si relationes & attributa non possunt esse obiectum formale motuum intellectus diuini , eò quod intellectio diuina , vtpote naturæ diuinæ constitutiva , nihil supponat in Deo seipsa virtualiter prius , ob eandem rationem non possunt esse obiectum formale terminatum illius ; obiectum enim terminatum ab intellectu virtualiter distinctum est prius illa , quandoquidem est veluti causa illius .

Obijcies primò contra primam conclusionem : Quo aliqua potentia est perfectior , eò vniuersalius habet obiectum , quare sensus interni vniuersalius habent obiectum , quàm externi ; & quia inter internos præminet sensus communis , vniuersalius illi correspondet obiectum ; item quia intellectus excedit in perfectione imaginatiuam , vniuersaliori gaudet obiecto , vnde cum intellectus diuinus sit potentia perfectissima , vniuersalissimum debet habere obiectum : Sed ens abstrahens à creato & increato , vniuersalius est ente increato : Ergo obiectum formale intellectus diuini , non est ens increatum , sed ens vt sic , abstrahens à creato & increato .

Respondeo distinguendo maiorem : Quò aliqua potentia est perfectior , eò habet obiectum vniuersalius , vniuersalitate continentiae &



causalitatis, concedo maiorem : vniuersalitate prædicationis , nego maiorem , & sub eadem distinctione minoris, nego consequentiam . Ex eo igitur quod intellectus diuinus sit perfectissimus, solum sequitur eius obiectum debere esse vniuersalius continentia & causaliter , non autem prædicatione ; nam vniuersalitas continentiae eminentialis, perfectior est vniuersalitate prædicationis , cum hæc in potentialitate ; illa verò in actualitate fundetur .


Obijcies secundò contra secundam conclusionem : Ideò natura diuina est ratione sui species, subindeque obiectum motuum intellectus diuini, quia est actus purus, omnem potentialitatem excludens : Sed etiam attributa & relationes , ratione sui , & vt virtualiter ab essentia diuina distincta, sunt actus purus, omnemque potentialitatem excludunt , alias summè perfecta non essent : Ergo sunt species quæ diuinus intellectus intelligit .

Respondeo essentiam diuinam non habere rationem speciei , & obiecti motui intellectus diuini , ex communi ratione actus puri , sed quia est actus purus primordialis , omnes Dei perfectiones radicaliter continens , quod non conuenit relationibus & attributis . Sicut ergo, licet natura Angeli , & illius proprietates in gradu immaterialitatis conueniant ; sola tamen natura vnitur eius intellectui vt species , quia est radix cæterarum perfectionum ; ita quamuis attributa & relationes cum natura diuina in ratione actus puri conueniant, sola tamen natura est species quam intellectus diuinus omnes Dei formalitates cognoscit , quia est radix omnium illarum , & consequenter sufficiens

eiens ad omnia repræsentanda.

Obijcies tertio cōtra tertiam conclusionem :  
 Ens diuinum vt sic est commune relationibus  
 & attributis , & omni enti diuino , non verò  
 diuina essentia , vt ab attributis & relationibus  
 virtualiter distincta , cū de illis non prædice-  
 tur , quatenus ab illis distinguitur : Ergo ens  
 diuinum vt sic , debet assignari pro obiecto for-  
 mali primario terminatio intellectus diuini ,  
 non verò ipsa diuina essentia , vt ab attributis  
 & relationibus virtualiter distincta .

Respondéo ens , diuinum vt sic esse commu-  
 ne relationibus & attributis , & omni enti di-  
 uino , communitate rationis , sicut ens creatum  
 vt sic est commune omnibus creaturis ; essen-  
 tiam verò diuinam esse relationibus & attri-  
 butis communem , communitate reali , vt pote  
 a cū virtualiter & radicaliter ea continentem .  
 Vnde cū ista continentia sit perfectior aliā  
 ( nam commune per rationem , potentialiter ad  
 illa inferiora se habet , & concipitur vt diuisibi-  
 le & multiplicabile in illis ) essentia diuina as-  
 signatur à nobis pro obiecto formali primario  
 terminatio intellectus diuini , non verò ratio  
 entis diuini vt sic .



## CAPVT II.

*De scientia Dei respectu possibilium, quæ simplicis intelligentiæ appellantur.*

**V**T certum supponunt omnes Theologi contra Aureolum, Deum cognoscere creaturas secundum illud esse proprium & particulare quod in seipsis habent, vel habere possunt, & non solum secundum illud esse eminens & increatum quod habent in Deo. Cum enim scientia Dei sit infinitè perfecta, debet se extendere ad quodcumque cognoscibile, distinctè & in particulari; & cum sit causa rerum, vt ostendemus capite sequenti, sicut illas producit, secundum esse proprium & particulare quod habent in seipsis, ita & illas cognoscit. Sed celebris est controuersia inter eos, de modo quo Deus illas cognoscit, an scilicet eas cognoscat immediate, & independenter ab essentia diuina prius cognita, an verò solum mediatè, & in essentia diuina tanquam in causa, & medio prius cognito? Primum asserunt plures ex Recentioribus, secundum Thomistæ: aliqui vero, vt ab hac difficultate facilius se expediant, vtrumque modum cognoscendi creaturas in Deo admittunt.

Dico primò, Deus cognoscit creaturas possibles in sua essentia tanquam in causa, & medio prius cognito.

Hanc conclusionem docet expressè Dionys. c. 7. de diuin. nomin. vbi ait quod *Deus ex se & in se per causam, rerum omnium anticipatam noticiam habet. Quod vnico causæ comple-*

*Deus omnia nōscit. Quod seipsam cognoscens di-  
uina sapientia, nouit omnia. Illam etiam a-  
pertè tradit S. Thomas varijs in locis præsertim  
I. contra Gent. cap. 49. Et in hac parte supra  
qu. 12. art. 8. & hic qu. 14. art. 6. vbi illam  
probat hac ratione: Non potest aliqua causa  
comprehendi, nisi in ea cognoscantur effectus  
in illa contenti: Sed Deus est causa continens  
eminenter creaturas, & seipsum comprehen-  
dens: Ergo in se vt in causa omnes creaturas  
cognoscit. Minor patet, Maior probatur.  
Tunc aliqua causa comprehenditur, quando  
cognoscitur adæquatè, & omni modo quo co-  
gnoscibilis est: Sed non potest cognosci adæ-  
quatè, & omni modo quo cognoscibilis est,  
nisi in illa cognoscantur effectus quos virtuali-  
ter continet; Ergo non potest cognosci com-  
prehensiuè, nisi in illa cognoscantur effectus  
quos eminenter aut virtualiter continet. Ma-  
ior constat, minor probatur. Causa continens  
eminenter aut virtualiter aliquos effectus, po-  
test attingi vt ratio cognitionis illorum: Ergo  
nisi sic cognoscatur, non cognoscitur adæqua-  
tè, & omni modo quo cognoscibilis est.*

*Confirmatur: Cognitio quam Deus habet de  
creaturis est sapientia: Atqui non esset talis; si  
eas non cognosceret in sua essentia vt in causa  
Sapientia enim est cognitio effectus per causam  
altissimam; causa autem altissima creaturæ est  
Dei essentia: Ergo &c.*

*Dico secundò, Deus non cognoscit creaturas  
possibiles in seipsis immediatè, hoc est inde-  
pendenter ab essentia diuina priùs visa & co-  
gnita, subindeque non cognoscit illas duobus  
modis, nempe in seipso mediatè, & in seipsis  
im-*

immeditè . Ita D. Thom. hic art. 5. ad finem corporis, vbi sic concludit : *Igitur dicendum est quod Deus seipsum videt in seipso : alia autem à se videt non in ipsis , sed in seipso .*

Ratio etiam id suadet , primo quia si Deus cognosceret creaturas immeditè in seipsis , & independentè ab essentia diuina priùs cognita, obiectum formale & specificatiuum intellectus diuini esset ens creatum , vel ens vt sic, abstrahens à creato & increato : Sed hoc dici nequit : Ergo nec illud . Sequela Maioris est euidentis, illud enim est obiectum formale & specificatiuum intellectus quod ratione sui , atque adeo immeditè , attingitur per illum . Minor autem capite præcedenti probata est triplici ratione desumpta ex D. Thom. 1. contra Gent. cap. 48.

Secundò, non potest Deus cognoscere creaturas , nisi vtendo ad hoc sua essentia tanquam specie intelligibili : Atqui vtendo sua essentia tanquam specie intelligibili , non cognoscit creaturas immeditè in seipsis , sed mediatè in seipsis tanquam obiecto primario & priùs cognito : Ergo &c. Maior constat , Deus enim non potest cognoscere creaturas per speciem creatam , tum quia esset in potentia ad eam , & ab ipsa perficeretur ; tum etiam , quia cum ab æterno omnia cognoscat , sequeretur aliquid creatum , nempe speciem illam , esse ab æterno . Minor verò probatur : Essentia diuina , vt species , non repræsentat per se primò & immeditè creaturas : Ergo Deus vtendo sua essentia tanquam specie intelligibili , non cognoscit creaturas immeditè in seipsis . Consequentia patet, quia eo modo cognoscitur obiectum

ctum per speciem, quo ab illa repræsentatur. Antecedens verò, quod aliqui ex Aduersariis negant, probatur primò, quia obiectum immediatè repræsentatum per speciem, debet conuenire cum illa in gradu immaterialitatis, vt docet D. Thomas supra quæst. 12. art. 2. inferens ex hoc principio, nullam speciem creatam posse repræsentare quidditatiuè Deum: Sed nihil creatum potest cum diuina essentia talem conuenientiam habere, alioquin esset actus purus, sicut Deus: Ergo nihil creatum potest repræsentari immediatè per essentiam diuinam, vt speciem. Secundò, repræsentatio speciei vel est ratione similitudinis, vel ratione identitatis cum obiecto: Sed essentia diuina nulli rei creatæ potest esse perfectè similis, & multò minùs cum ea identificari: Ergo essentia diuina vt species, nullam rem creatam primariò repræsentare potest. Tertiò, cum species à suo obiecto primario siue immediato specificetur, si essentia diuina vt species primariò siue immediatè repræsentaret creaturas, ab illis perfectionem suam specificam acciperet, quod implicat: Ergo essentia diuina, vt species; non repræsentat per se primò & immediatè creaturas.

Obijeies primò contra primam conclusionem: Essentia diuina nequit habere rationem mediij ducentis in cognitionem creaturarum: Ergo Deus illas non cognoscit mediatè in sua essentia vt causa. Consequentia patet, Antecedens verò probat Vasquez dupliciter; Primò quia medium quod ducit in cognitionem alterius, dicere debet relationem realem ad ipsum, eique perfectè assimilari, quæ tamen duo  
con-

conuenire nequeunt diuinæ essentia, respectu creaturarum. Secundò, quia medium ducens in cognitionem alterius, debet habere necessariam connexionem cum illo, aliàs non posset ducere in certam & infallibilem illius cognitionem; sicut medium probabile non ducit in certam ac scientificam cognitionem conclusionis, quia necessariò cum illa non connectitur: Sed essentia diuina non habet necessariam connexionem cum creaturis possibilibus, alioquin illis destructis, ea pariter destrueretur, quod videtur absurdum: Ergo non potest esse medium ducens in cognitionem illarum.

Respondeo negando Antecedens, & ad primam eius probationem dico, quod licet medium cognitionis, & res quæ in eo cognoscitur, debeant dicere relationem realem ad inuicem, & perfectè assimilari, quando ambo sunt eiusdem ordinis, & conueniunt vniuocè; non tamen quando medium est ordinis superioris ac increati, & conueniunt tantùm analogicè; sicut essentia diuina & creaturæ; tunc enim medium illud est independents ab eo quod manifestat, & sufficit quod res manifestata, quæ è contra ab eo dependet, dicat habitudinem realem ad ipsum. Et certè, cum species sit formalis similitudo sui obiecti primarij, maiorem dicit habitudinem ad ipsum, magisque debet ei assimilari, quam illud quod habet rationem mediij prius cogniti; & tamen docet Vasquez, diuinam essentiam, absque eo quod dicat realem habitudinem ad creaturas, & perfectè eis assimiletur, habere rationem speciei, ipsas immediate, atque adeò primario representantis, Non est ergo cur neget, eam  
ha-

habere posse, absque reali habitudine ad creaturas, & similitudine omnimoda cum eis, rationem mediij in quo ut prius cognito, & tanquam in causa, virtualiter eas continente, Deo repræsententur.


At secundam probationem Antecedentis, nego Minorem, & ad eius probationem dico quod destructis creaturis possibilibus, destrueretur diuina omnipotentia, non quidem à priori, & per locum intrinsecum, sed à posteriori, & per locum extrinsecum. Ratio est, quia possibilitas creaturarum non est aliquid in se actu extra potentiam causæ, nec proinde potest destrui nisi in causa: non potest autem hac possibilitas in causa destrui, nisi destruaturs vis producendi creaturas, quæ est ipsamet causa, ac proinde nisi destruaturs ipsa causa, Ex quo intelliges, absque vlla Dei imperfectione admitti posse & deberi contra Vasquez, quod Deus foret impossibilis, si vel vnica musca esset impossibilis: item quod Deus non magis necessariò existat, quam musca sit necessariò possibilis.

Obijcies secundò contra secundam conclusionem. Cognoscuntur à Deo omni modo quo sunt cognoscibiles, aliàs infinitus in cognoscendo non esset: Atqui sunt cognoscibiles non solum in essentia diuina ut causa, sed etiam immediatè in seipsis; & de facto utroque modo cognoscuntur ab anima Christi, & ab Angelis beatis, in quibus admittitur, post Augustinum, duplex cognitio creaturarum, matutina scilicet & vespertina; seu in verbo, & extra verbum: Ergo Deus non solum cognoscit creatum in sua essentia tanquam in cau-



causa, sed etiam immediatè in seipsis.

Respondeo distinguendo Maiorem: omni modo non dicente imperfectionem ex parte cognitionis, concedo Maiorem. Si modus cognoscendi inuoluat imperfectionem, nego Maiorem, & sub eadem distinctione Minoris, nego consequentiam. Nam, ut ex supradictis constat, cognitio immediata creaturarum in seipsis, in cognitionem refundit imperfectionem dependentiæ & specificationis ab ipsis. Ex quo patet disparitas ad exempla adducta, actibus enim creatis animæ Christi, & cognitioni Angelorum, non repugnat talis imperfectio, sicut cognitionem diuinæ; quia obiectum specificationum intellectus humani, vel angelici, non est ens increatum, sed ens ut sic, prout abstrahit à creato & increato: obiectum verò specificationum intellectus diuini, est ens increatum tantum, seu sola essentia diuina, ut capite præcedenti ostensum est.



### C A P V T III.

#### *De causalitate scientia Dei respectu creaturarum.*

**N**emo negat scientiam Dei, saltem directiue concurrere ad productionem creaturarum; cum enim Deus sit agens intellectuale, nec cæco modo procedat in rerum productione, sed cum infinita sapientia, omnia in numero, pondere, & mensura efficiat, fit inde scientiam Dei prælucere omnibus operibus

eius, ipsumque in productione creaturarum dirigere. Vnde dicitur Ps. 103. *Omnia in sapientia fecisti*, & Proverb. 3. *Dominus sapientia fundavit terram, stabilivit cælos prudentiâ*. Difficultas ergo restat, an scientia diuina, non solum directiuè, sed etiam effectiuè, concurrat ad rerum productionem, & cuiam scientiæ talis causalitas effectiua conueniat, an illi quæ dicitur simplicis intelligentiæ, vel ei quæ visionis appellatur? Pro resolutione.

Dico primò, scientiam Dei esse causam rerum, non solum directiuam sed etiam effectiuam.

Probatur primò ex Augustino 5. de Trinit. cap. 15. ubi sic ait: *Vniuersas creaturas spirituales & corporales, non quia sunt ideo nouit Deus, sed ideo sunt, quia nouit*: Sed hæc causalitas non posset esse vera, si Dei scientia non esset causa productiua rerum: Ergo iuxta Augustinum scientia Dei ad productionem rerum effectiuè concurrat.

Ratio etiam id suadet, tum quia (vt infra ostendemus) Deus producit res ad extra, per actum imperij, qui procedit ab intellectu, quamuis supponat motionem voluntatis, vt docet D. Thomas 1. 2. q. 17. a. 1. Tum etiam, quia si Dei scientia non esset causa effectiua rerum, ab illis penderet & mensuraretur, quantum ad veritatem & certitudinem; illa enim cognitio dependet ab obiecto, & ab illo mensuratur quantum ad veritatem & certitudinem, quæ illud non facit, sed supponit.

Neque valet responsio quorundam recentiorum, dicentium scientiam Dei pendere à rebus creatis, tanquam ab obiectis, non verò tanquam

quam à causis physicè influentibus . In primis enim hæc responsio apertè repugnat doctrinæ D. Thomæ , nam hic art. 8. ad 3. sic ait : *Si cutscibilia naturalia sunt priora quam scientia nostra , & mensura eius , ita scientia Dei est prior quam res naturales , & mensura ipsarum .* Et n<sup>o</sup> q. 16. art. 1. ponit hoc discrimen inter in e lectum diuinum & nostrum , quod noster pendet à rebus , non verò diuinus , à quo res potius pendent , & dicuntur veræ , quia ei adæquantur .

Secundò , si scientia Dei penderet à rebus creatis , tanquam ab obiectis ; & in illis supponeret & non faceret certitudinem & veritatem , non esset quantum ad hoc perfectior scientiâ Angelorum ; cum enim illi non accipiant species à rebus , sed habeant à Deo infusas , illorum scientia non pendet à rebus creatis , in genere causæ efficientis & physicè influentis in eorum intellectum , sicut scientia nostra , quæ accipit species à rebus , sed in genere tantum causæ materialis & obiectiux : Ergo si hoc secundo modo , diuina scientia pendeat & causetur à rebus , non erit perfectior , nec magis independens ab illis , quam scientia Angelorum .

Tertiò , scientia Dei non est minùs perfecta , nec minùs independens à rebus creatis , quam eius amor : Sed diuinus amor non pendet nec mensuratur à bonitate & perfectione quæ sit in rebus , nec illam supponit , sed ponit & efficit , vt docet D. Thomas infra q. 20. art. 2. his verbis : *Amor Dei est infundens & creans bonitatem rebus* : Ergo similiter scientia Dei non pendet à certitudine & veritate quæ sit in re-

bus, nec illam supponit, sed potius efficit.

Dico secundo, scientiam simplicis intelligentiæ esse causam effectiuam rerum in actu primo, scientiam verò visionis, ut est libera & approbationis, eas causare in actu secundo.

Prima pars patet, nam scientia simplicis intelligentiæ continet in se ideas rerum possibilem, & se habet sicut ars in mente artificis, antecedens voluntatem producendi opus, quæ est productiua in actu primo operum artificialium.

Secunda verò, quæ negatur à Recentioribus, probatur primo ex SS. Patribus: D. enim Augustinus lib. 13. confess. cap. ultimo hæc scribit: *Nos itaque quæ fecisti videmus, quia sunt; tu autem, quia vides ea sunt.* D. Gregorius 20. moral. cap. 23. *Quæ sunt (inquit) non ab æternitate eius videntur, quia sunt, sed ideo sunt, quia videntur.* Et lib. 32. cap. 6. *Non existentia videndo creat, existentia videndo continet.* Vbi cum vtantur verbo *videre*, scientiam non simplicis intelligentiæ, sed visionis apertè iudicant.

Probatur secundo ex D. Th. in 1. dist. 39. q. 1. art. 1. ad 5. ubi sic ait: *Esse Dei non subiacet libertati voluntatis, sicut scire operativum creature*: At scientia quæ subiacet libertati voluntatis Diuinæ, seu libero Dei decreto, non est penè possibilem, sed futurorum, nec simplicis intelligentiæ, sed visionis: Ergo ista ex mente D. Thomæ est creaturarum causa, non verò illa.

Probatur tertio: Scientia quæ est causa in actu secundo futurationis & existentiae rerum, debet illas ut futuras & existentes cognoscere;

At-

Atqui scientia simplicis intelligentiæ non est cognitio rerum ut futurorum atque existentium, sed solum ut mere possibilium: Ergo illa non est causa in actu secundo futuritionis & existentia rerum, sed hæc causalitas competit scientiæ visionis, quæ Deus futura & existentia cognoscit. Minor expressè dicitur à S. Th. hic q. 14. art. 9. his verbis: *Quædam licet non sint in actu, tamen vel fuerunt, vel erunt, & omnia ista Deus dicitur scire scientia visionis: quædam verò sunt quæ sunt in potentia Dei vel creature, quæ tamen nec sunt, nec erunt; & respectu horum non dicitur habere scientiam visionis, sed simplicis essentiæ.* Maior verò videtur manifesta, tum quia sicut illud quod ignorat medicina, non curat, ita illud quod ignorat ars vel scientia, non causat. Tum etiam, quia iuxta Augustinum lib. 11. de ciuit. c. 10. *Deus non fecit aliquid nesciens: fecisset autem, si actus & scientia qua causat rerum futuritionem & existentiam, ad eas non terminaretur ut ad objecta scita & cognita, sed solum tanquam ad effectus per causalitatem productos: Ergo &c.*

Demum eadem pars hæc ratione fundamentali probari potest: Deus producit creaturas per actum imperij, iuxta illud Ps. 148. *Ipsè dixit & facta sunt, ipse mandauit, & creata sunt:* Sed imperium est scientia visionis: Ergo scientia visionis est causa rerum. Minor probatur; Imperium sequitur efficacem electionem rerum in Deo: Sed actus supponens efficacem electionem, est scientia visionis; & non simplicis intelligentiæ: Ergo imperium est scientia visionis. Minor constat; scientia

enim simplicis intelligentiæ, cum non sit libera, sed necessaria, non supponit, sed antecedit electionem & decretum voluntatis diuinæ. Ergo actus supponens talem electionem & decretum, est scientia visionis. Maior autem in qua est difficultas, ostenditur primò ex D. Thomæ 1. 2. q. 17. art. 1. ad finem corporis; ubi sic ait: *Vnde relinquitur quod imperare sit actus rationis, præsupposito actu voluntatis, in cuius virtute ratio mouet per imperium ad exercitium actus*: Ergo imperium diuinum præsupponit efficacem rerum electionem: Secundo probatur ratione: Imperium est actus practicus & liber intellectus: Sed omnis intellectus libertas, ex actu voluntatis sic originatur, & illum supponit, cum voluntas sit primum liberum, & prima libertatis radix: Ergo imperium est actus intellectus, supponens efficacem electionem voluntatis.

Ad pleniorē huius conclusionis intelligentiam & plurium argumentorum solutionem diligenter obseruandum est, me dixisse in secunda parte conclusionis, scientiam visionis esse causam rerum in actu secundo, ut est libera & approbationis; quia sicut licet intellectio & dictio sint vnica actio intellectus, quæ simul est productio verbi, & contemplatio illius; ea tamen quatenus est pura obiecti contemplatio, &, ut loquuntur Philosophi, quatenus est in esse quieto, non est productiua verbi, sed supponit illud prius natura & ratione factum à seipsa, quatenus est dictio. Ita quoque, etsi scientia approbationis & visionis, vnica sit scientia in Deo, omnino indistincta, quæ secundum diuersos respectus quos dicit,

cit, vel ad decretum, quod supponit, vel ad obiectum quod intuetur, diuersa illa nomina fortitur: ipsa tamen quatenus formaliter visionis est, & prout consideratur vt purè intuitiua & contemplatiua sui obiecti, non est causa rerum, sed eas supponit in aliquo priori natura & rationis factas à seipsa, quatenus est practica & approbationis. Vnde D. Thomas hic art. 8. ad finem corporis ait, scientiam Dei esse causam rerum, *secundùm quod habet voluntatem coniunctam, & prout consuevit nominari scientia approbationis*. Ex quo facilè intelliges, quomodo Deus non causet peccata, quamuis ea cognoscat per scientiam visionis; quia nimirum illa non cognoscit per scientiam visionis, quatenus est approbationis, eò quòd ea nullum supponant in Deo decretum positium, quo velit & approbet illorum existentiam vel futuritionem, sed permissium dumtaxat, quo vult permittere eorum malitiam & deformitatem.

Obijcies primò contra primam conclusionem; Non magis pertinet ad vim intellectiuam suam obiectum efficere, quam ad potentiam effectiuam suum opus intelligere: sed potentia effectiua non intelligit suum opus: Ergo nec intellectiua efficit suum obiectum.

Respondeo distinguendo Maiorem, & concedendo illam de vi intellectiua, quæ est mere speculatiua, negando verò de vi intellectiua, quæ est eminenter speculatiua & practica; huic enim còuenit intelligere simul & efficere, vt patet in intellectiōe nostra (quæ vt supra dicebamus) simul habet rationem dictionis & intellectiōis respectu verbi quod

producit; illud enim intelligendo producit, & producendo intelligit. Idem cum proportionem de scientia Dei libera, quæ est eminenter speculatiua & practica, dicendum est.

Obijcies secundò contra secundam partem secundæ conclusionis: D. Thomas hic art. 9. ait quod illa scientia est causa rerum, quæ cum sit indifferens ad opposita, ex determinatione voluntatis producit determinatum effectum: Atqui scientia visionis non est indifferens ad opposita, bene tamen scientia simplicis intelligentiæ, nempe ad productionem vel non productionem creaturarum, & ad productionem illarum potius quam aliarum: Ergo in doctrina D. Thomæ, scientia visionis non est causa rerum, sed scientia simplicis intelligentiæ.

Confirmatur: S. Doctor ibidem ait, scientiam in Deo esse causa rerum, sicut scientia artificis est causa artefactorum: Atqui scientia artificis, quæ est causa artefactorum, non est intuitiua; cum ille non intuentur artefactum, nisi postquam factum est, & existit: Ergo similiter scientia in Deo quæ est causa rerum, non est illa quæ dicitur visionis, siue intuitiua, sed ea quæ vocatur simplicis intelligentiæ, quæ est abstractiua.

Ad obiectionem respondeo distinguendo Minorem; scientia visionis non est indifferens ad opposita, postquam à ratione scientiæ simplicis intelligentiæ transiit ad rationem scientiæ visionis, concedo Minorem. Antequam transiret ad illum statum, & dum erat tantum scientia simplicis intelligentiæ, nego Minorem & consequentiam, Scientia enim quæ in  
do-



doctrina D. Thomæ citat, cum sit indifferens ad opposita, ex determinatione voluntatis producit determinatum effectum, est scientia transiens à statu simplicis intelligentiæ; sub quo est ad opposita indifferens, ad statum scientiæ visionis, sub quo ex determinatione voluntatis habet producere determinatum effectum. Unde argumentum non excludit, quod ut est scientia visionis non sit causa rerum, sed tantum quod priusquam ex determinatione voluntatis fieret talis, debebat esse indifferens ad opposita; atque adeo scientia simplicis intelligentiæ, quod libenter admittimus; fateamur enim eandem esse entitatiuè scientiam, quæ antecederet ad decretum liberum diuinæ voluntatis est indifferens ad productionem rerum, subindeque simplicis intelligentiæ, quæque nihilominus adueniente illo decreto, determinatur ad illarum productionem, & dicitur scientia visionis.

Ad confirmationem dicendum est, scientiam Dei practicam conuenire in aliquo cum scientia artificis creati, & in multis ab illa differre; coueniunt enim in hoc quod vtræque concurrat ad opus, non solum directiuè, sed etiam effectiuè; differunt verò primò, in eo quod artifex creatus non operatur nudo & solo imperio, neque in instanti, sed cum mora temporis, & cum applicatione actiuorum & passiuorum ex quo fit quod eius scientia non potest intuitiuè ferri in opus, dum actu fit, sed solum postquam factum est. Deus autem producit res in instanti, & per solum actum imperij, nec indiget applicare actiua passiuis, sed reducit res ex nihilo: vnde eius scientia practica,

potest in eodem instanti, quo operatur, intuiti-  
uè ferri in creaturas quas producit. Secundò  
differt scientia Dei à scientia artificis, eo quod  
scientia artificis, post factum opus, est purè  
speculatiua, quia artefactum dependet ab ea  
tantùm in fieri, non autem in conseruari; At  
verò res omnes creatæ à scientia Dei practica  
dependent, non solùm in fieri, sed etiam in  
conseruari, iuxta illud quod ex Gregorio ma-  
gno supra retulimus; *Non existentia videndo  
creat, & existentia videndo continet*. Vnde  
scientia Dei respectu creaturarum, semper ma-  
net eminenter formaliter speculatiua & pra-  
ctica, non verò scientia artificis respectu arte-  
factorum. Ex hoc facile intelliges illud Ge-  
neseos 1. quod nobis Aduersarij obijciunt: *Vi-  
dit Deus cuncta quæ fecerat, & erant valde bo-  
na*. Hoc enim intelligi debet de scientia vi-  
sionis, non quatenus est productiua, sed prout  
est conseruatiua rerum; sub hac enim ratione  
supponit illas factas & existentes, sicut conser-  
uatio supponit creationem.

Obijciens tertio: Scientia visionis supponit  
res existentes & futuras: Ergo non causat ea-  
rum existentiam & futuritionem. Consequen-  
tia patet, nulla enim causa præsupponit suum  
effectum. Antecedens vero probatur quoad  
vtramque partem. Et in primis quod scientia  
visionis supponat res existentes videtur mani-  
festum, ex eo quod scientia intuitiua supponat  
suum obiectum, iam factum & existens, cum  
impossibile sit intueri ea quæ non sunt. Quod  
verò etiam supponat illarum futuritionem,  
constat ex eo quod illa subsequitur decretum  
diuinæ voluntatis, per quod res extrahun-  
tur

tur à statu meræ possibilitatis, ad statum futurationis.

Respondeo negando Antecedens quoad utramque partem, & ad probationem primæ dico, quod licet scientia intuitiua, quando est merè speculatiua, supponat suum obiectum iam factum & existens, secus tamen quando est eminenter speculatiua & practica. Vel id concedo de scientia intuitiua, quæ mensuratur à rebus; nego verò de scientia intuitiua, quæ est mensura rerum: Scientia autem visionis Dei non est purè speculatiua, sed etiam practica, nec mensuratur à rebus, sed est illarum mensura ut supra ostensum est. Potestque hæc doctrina & responsio pluribus exemplis illustrari. Nam in mysterio Trinitatis, Pater æternus videndo Filium, ipsum producit, & ipsum producendo videt; & si visio oculi mei lumen funderet, ut Sol lucem suam, videndo illuminaret, ac illuminando videret. Item ens rationis est obiectum cognitionis humanæ, ut exercitè existens, & tamen est effectus illius, non enim causatur per cognitionem, qua ut possibile attingitur, sed per notitiam, per quam exercitè existens apprehenditur. Denique intellectio nostra, ut supra dicebamus, simul habet rationem dictionis & intellectio- nis respectu verbi quod producit, illudque intelligendo producit; & producendo intelligit.

Ad probationem verò secundæ partis Antecedentis, dicendum est, quod licet ratione diuini decreti res sint futuræ inchoatiuè & incomplete, non tamen totaliter & completè, quia principium immediatè productiuum rerum,

rum, & potentia executiua Dei, non est eius voluntas, sed intellectus practicus, qui producit res ad extra, per actum imperij, vt infra patebit. Vnde donec talis actus imperij sit & intelligatur in Deo, nondum intelligitur causa totalis & completa productionis & futurationis rerum, sed inchoatiua duntaxat & incompleta.

*Corollaria notatu digna:*

Ex dictis colligitur primò, hanc propositionem, *Ideo res sunt futurae, quia sciuntur à Deo*, esse veram, non solum in sensu illatiuo, sed etiam in sensu causali. Nam quia rationalitas v. g. est causa risibilitatis, hæc propositio, *homo est risibilis, quia rationalis*, est vera non solum in sensu illatiuo, sed etiam in sensu causali: Ergo similiter, si scientia visionis in Deo sit causa rerum, vt in secunda conclusione ostendimus, hæc propositio, *Ideo res sunt futurae, quia sciuntur à Deo*, erit vera in sensu causali, & non tantum in sensu illatiuo. Vnde magister sentent. in 2. dist. 38. *Neque res futurae sunt causae Dei praescientiae, licet enim, si non essent futurae, non praescirentur à Deo, non tamen ideò praesciuntur à Deo, quia futurae sunt: Si enim hoc esset, tunc eius quod æternum est, aliquid existeret causa, ab eo alienum, ab eo diuersum, & ex creaturis penderet scientia creatoris, & creatum esset in creati causa.* Quam rationem supra fuisse expendimus, probando secundam partem secundae conclusionis.

Quod si obijcias cum Aduersarijs, Iustibum  
mar-

martyrem qu. 18. ad Gentiles, oppositum docuisse his verbis: *Non est prænatio causa huius quod futurum erat, sed quod futurum erat est causa prænationis.* Item Origenem in cap. 8. Epist. ad Romam dixisse, non ideò res esse futuras, quia præsciuntur à Deo, sed potius Deum illas præscire, quia futuræ sunt.

Respondeo primò, hæc & alia similia Patrum testimonia, æquè aduersùs doctrinam Aduersariorum, ac contra nostram posse obijci, cum illi doceant scientiam simplicis intelligentiæ, vt connotantem voluptatem Dei, siue eius decretum esse causa rerum; & tamen Patres citati, & alij duos nobis obijciunt, dicunt absolutè, præscientiam Dei non esse causam futuritionis rerum.

Respondeo secundò, Patres locis citatis loqui de peccatis, de quibus verissimum est dicere, illa non esse futura, quia sciuntur & cognoscuntur à Deo per scientiam visionis, vt in fine conclusionis secundæ declarauimus. Quod si interdum Patres non loquantur de peccatis, sed de actibus liberis, quicumq; illi sint; solum intendunt, diuinam præscientiam non esse causam totalem & adæquatam illorum, ita quod eius causalitas impediat vel excludat liberam determinationem & cooperationem nostræ voluntatis, eique inferat aliquam violentiam & coactionem, vt exponit D. Th. q. 2. de verit. art. 14. ad 1. Aliam responsionem adhibet verbis Origenis hic art. 8. ad 1. dicens, quod cum Origenes dixit, non ideo res esse futuras, quia sciuntur à Deo, intelligendus est de scientia, non vt adiunctam habet voluntatem, & vt connotat decretum illius, sed se-

cun-

secundum rationem generalem scientiæ ut sic ,  
 cui ut tali non competit ratio causalitatis .  
 Quod autem addidit, ideò præscire Deum ali-  
 qua , quia sunt futura , intelligendum esse se-  
 cundum causam consequentiæ , non verò se-  
 cundum causam essendi , id est in sensu non  
 casuali, sed illatiuo ; sicut ista propositio : *quia*  
*Petrus est risibilis , est rationalis .*

Colligitur secundo , potentiam Dei execu-  
 tiuam, seu productiuam creaturarum , non di-  
 stingui virtualiter ab eius intellectu & volun-  
 tate, sed esse ipsummet intellectum Dei pra-  
 cticum , ut motum & applicatum à voluntate .  
 Illud enim attributum in Deo est immediatè  
 productiuum creaturarum, quod elicit actum,  
 per quem Deus de facto producit creaturas :  
 Atqui talis actus elicitur ab intellectu Dei  
 practico , ut moto & applicato à voluntate :  
 Ergo ille est principium immediatè producti-  
 uum creaturarum , seu potentia Dei creatiua .  
 Maior patet , minor probatur . Deus ad extra  
 producit creaturas per actum imperij : sed im-  
 perium est actus elicitus ab intellectu practi-  
 co, ut moto à voluntate : Ergo actus quo Deus  
 ad extra producit creaturas , ab eius intellectu  
 elicitur . Maior constat ex varijs Scripturæ  
 locis , in quibus productio creaturarum , Dei  
 imperio tribuitur : dicitur enim Genes. 1. *Fiat*  
*lux , & facta est lux .* Et Ps. 148. *Ipse dixit ,*  
*& facta sunt , ipse mandauit , & creata sunt .*  
 Et Matth. 1. *Volo , mundare :* quæ duo verba  
 separatim legenda sunt , ut obseruat D. Hiero-  
 nymus . Item Ioan. 11. Christus ait Lazaro  
 mortuo, *Lazare veni feras .* Et Matth. 8 *Im-*  
*perauit ventis & mari ,* Vbi eleganter Hiero-  
 ny-

nymus : Ex hoc loco intelligimus quod omnes creaturæ sentiant createrem imperantem , non errore hereticorum , qui omnia p̄ tant animantia , sed maiestate conditoris , quod apud nos insensibilia , illi sensibilia sunt . Minor verò expressè docetur à D. Thoma 1. 2. quæst. 17. art. 1. vbi ait quod *imperare est actus rationis , præsupposito actu voluntatis , in cuius virtute ratio mouet .* Ratio etiam id siadet : Imperium enim ( vt ibidem docet S. Doctor ) tria importat , scilicet intimationem , ordinationem , & motionem : duo prima habet intellectus à seipso , intimatio enim est spiritualis locutio , iuxta illud , *Os iusti meditabitur sapientiam , & lingua eius loquetur iudicium .* Ordinatio etiam ad intellectum spectat , quia est effectus prudentiæ exequentis , prudentia verò est in intellectu . Tertium verò habet à voluntate , quæ est primum mouens quantum ad exercitium : Ergo imperium est actus elicited ab intellectu practico , vt moto à voluntate .

Ex hoc intelliges , actualem productionem creaturarum esse ab arte vel à scientia Dei practica ; est enim , vt iam ostendimus , actus elicited ab intellectu diuino : Sed non est actus luminis primorum principiorum , quod erga Deum versatur ; nec prudentiæ , quæ versatur circa agibilia : Ergo est actus artis vel scientiæ practicæ Dei , quæ nullatenus differunt , vt in artifice creato conspicitur .

Dices , Imperium non est actus artis , vel scientiæ practicæ , sed prudentiæ : Ergo si Deus ad extra producat creaturas per actum imperij , illarum productio , non erit actus artis , vel scientiæ practicæ Dei , sed prudent-

dentia aut providentia diuina?


Respondeo quod imperium erga agibilia, est actus prudentia, imperium verò circa factibilia, est actus artis; & quia actualis creaturarum productio erga factibilia versatur, non est actus prudentia; sed artis diuina. Ex quo inferes, eos qui artem à scientia practica Dei virtualiter & attributaliter distinguunt, difficilè saluare posse, productionem creaturarum esse actum scientia practica Dei, illamq; obtinere in Deo rationem potentia, executiua.

Contra istud corollarium obijci potest, quod D. Thomas infra q. 25. art. 1. ad 4. expressè docet, potentiam executiuam in Deo distingui virtualiter ab eius intellectu & voluntate, ait enim: *Potentia non ponitur in Deo, ut aliquid distinctum à scientia & voluntate secundum rem, sed secundum rationem in quantum scilicet potentia importat rationem principij exequentis id quod voluntas imperat, & ad quod scientia dirigit.*

Respondeo, præter hanc responsionem, aliam subiunxisse S. Doctorem, subdit enim: *Vel dicendum quod ipsa scientia vel voluntas diuina, secundum quod est principium effectiuum, habet rationem potentia.* Quæ secunda solutio exprimit vltimū illius iudicium, vnde magis illi standum est, quam præcedenti. Præsertim cum opusc. 11. cap. 3. & quodlib. 6. art. 1. expressè doceat, Angelos mouere cælos, conceptione intellectus efficaci, seu per actum imperij, subindeque in illis non agnoscat potentiam loco motiuam, distinctam ab intellectu practico. Quod à fortiori de Deo, utpote simpliciiori, & perfectiori, sentiendum est.



Colligitur tertio, in hoc differre scientiam visionis à scientia simplici intelligentiæ, quod ista concurret ad productionem rerum directiuè solum, directione remota; illa verò directiuè, directione proxima ac immediata, & efficienter. Ista enim ad productionem rerum concurret per modum consilij, illa per modum imperij: Sed consilium remotè tantum & mediatè dirigit artificem ad opus faciendum, imperium verò proximè & immediatè, & insuper effectiuè concurret ad illius productionem, vt ex supra dictis constat: Ergo scientia simplicis intelligentiæ non tantum modo concurret ad perfectionem rerum, directiuè scilicet, directione remota & mediata scientia autem visionis duobus modis, nempe directiuè, directione proxima & immediata, ac efficienter.



## C A P V T IV.

### *De scientia futurorum contingentium.*

**C**ertum est, Deum ab æterno habere certam & infallibilem futurorum contingentium notitiam, cum enim sit causa illorum, ea cognoscit, quando illa producit in tempore, alias ageret modo cæco & ignaro, & sine prouidentia & sapientia; quare eum diuina scientia sit inuariabilis, nec possit aliquid cognoscere in tempore quod non cognouerit ab æterno, manifestum est, Deum habuisse ab æterno omnium futurorum præscientiam.

Vn-

Vnde Augustinus 5. de ciuit. cap. 9. *Confiteri esse Deum ; & negare prescium futurorum , apertissima insania est .* Solùm ergo difficultas est , & controuersia inter Theologos , de modo , seu de medio , in quo Deus illa ab æterno cognoscit . Molina enim & Becanus existimant Deum illa cognoscere antecederet ad suum decretum , in causis liberis & contingentibus , seu in penetratione & perfectissima cognitione voluntatis humanæ , quam *supercomprehensionem* appellant , ad distinctionem cognitionis diuinæ ab Angelica , quæ licet comprehendat voluntatem hominis , in illa tamen non cognoscit actus eius liberos futuros , sicut Deus . Huic sententiæ accedit opinio Theophili Raynaudi , asserentis Deum per scientiam mediam cognoscere quid factura esset voluntas creata in his vel illis circumstantijs , si sibi relinqueretur , & si sola sine concursu illius operari possit . Suarez verò & Fonseca , quibus adhæsit Fasolis , docent , Deum cognoscere futura contingentia , & nostros actus liberos , in suo decreto ( non quidem actuali & exercito , vt volunt Thomistæ ) sed futuro & ponendo in sequenti signo . Alij censet Deum cognoscere futura contingentia in propositionibus contradictoriè oppositis , seu in vi & lege contradictionis , quæ petit vt vna propositio sit determinatè vera , & altera falsa . Alij demum scientiæ mediæ defensores , vt ab hac difficultate faciliùs se expediant , asserunt Deum non cognoscere futura contingentia in aliquo medio obiectiuo , sed immediatè in seipsis , & in veritate obiectiua , quam dicunt illa habere independentè à decreto Dei , ex suppositione  
euen-

uentis futuri. Antequam nostram declaremus & stabiliamus sententiam, varia illa Recentiorum placita, breuiter confutanda sunt.

## §. I.

*Refelluntur omnes sententiæ.*

Dico primò, futura contingentia, siue absoluta, siue conditionata, non posse certò & infallibiliter à diuino intellectu cognosci in causis liberis vel contingentibus, vt præueniunt decretum seu prædeterminationem diuinam. Ita D. Thomas hic a. 13. vbi sic ait: *Causa contingens se habet ad opposita & sic contingens vt futurum non subditur per certitudinem alicui cognitioni: Vnde quicumque cognoscit effectum contingentem in sua causa tantum, non habet de eo nisi coniecturalem cognitionem.* Quibus verbis S. Doctor conclusionem nostram & docuit & probauit: Sicut enim in principio solùm probabili & opinatiuo, non possunt conclusiones certò & scientificè cognosci, sed opinatiuè tantùm; ita nec in causa indifferenti: & indeterminata, possunt effectus contingentes futuri certò & determinatè cognosci, sed coniecturaliter tantùm: Atqui causæ liberæ & contingentes, ex se & antecedenter ad decretum seu determinationem diuinam, sunt indifferentes & indeterminatæ ad producendam vel non producendam futura contingentia & libera, & possunt vel ab extrinseco impediri, ne in actum exeant, vel se determinare ad actum oppositum: Ergo in illis sic consideratis, non possunt certò & infal-

fallibiliter, sed solum coniecturaliter, futura  
 contingentia cognosci. Vnde S. Thomas in  
 1. dist. 38. q. 1. art. 1. *Quædam causæ sunt*  
*quæ se habent ad utrumlibet, & in istis causis*  
*effectus de futuro nullam habent certitudinem,*  
*vel determinationem.*

Respondet Molina, quod licet per simpli-  
 cem comprehensionem non possint in causa in-  
 differenti & indeterminata, certò cognosci ef-  
 fectus contingentes aut liberi, bene tamen per  
 supercomprehensionem. Vnde licet futura  
 contingentia non possint cognosci ab Angelo  
 in causis secundis, certò & infallibiliter, sed  
 tantum coniecturaliter, bene tamen à Deo.

Sed contra: cum de ratione comprehensio-  
 nis sit, ut nihil rei comprehensæ lateat cogno-  
scentem, licet supercomprehensio excedat com-  
 prehensionem, ille tamen excessus non se te-  
 net ex parte obiecti, ita ut supercomprehensio  
 attingat in obiecto aliquid quod non cognoscit  
 comprehensio, sed ex parte modi cognoscendi,  
 quatenus clariùs per eam videtur quod per  
 comprehensionem obscuriùs cognoscitur. Vn-  
 de ex eo quod Deus voluntatem humanam su-  
 percomprehendat, solum potest inferri, quod  
 in ea, antecederet ad suum decretum, habeat  
 perfectiorem & clariorem cognitionem conie-  
 cturalem de actibus eius liberis, quam Ange-  
 lus, qui eam tantum comprehendit; non ta-  
 men quod illos in ipsa certò & infallibiliter  
 cognoscat. Sicut ex eo quod Deus principium  
 probabile & opinatum, non solum compre-  
 hendat, sed etiam supercomprehendat, non se-  
 quitur quod in eo certò & scientificè cogno-  
 scat conclusiones quas virtualiter continet, sed

tantum quod de illis perfectionem habeat cognitionem opinatiuam, quam Angelus.

Dices cum Molina : Deus, in sententia Thomistarum, cognoscit certò & infallibiter in causis liberis prædeterminatis, effectus siue actus liberos futuros : Sed huiusmodi causæ, etiam vt subsunt diuinæ prædeterminationi, sunt indifferentes ; alioquin prædeterminatio Dei tolleret illarum indifferentiam, & per consequens illarum libertatem : Ergo in causis indifferentibus futura libera & contingentia certò & infallibiliter cognosci possunt. Vnde S. Thomas 1. contra Gent. cap. 67. docet, quod sicut ex causa necessaria, certò cognoscitur effectus necessarius, ita ex causa contingenti, non impedita, certò cognoscitur effectus contingens.

Respondeo, concessa maiori, distinguendo minorem : causæ liberæ, vt subsunt diuinæ prædeterminationi, sunt indifferentes, indifferentia potentiâli & priuatiua, nego minorem. Indifferentia actuali & positiua, concedo minorem. Similiter distinguo consequens : Ergo in causis indifferentibus, indifferentia potentiâli & priuatiua, possunt certò cognosci effectus liberi, nego. Indifferentibus indifferentia actuali & positiua, concedo.

Explicatur solutio : Duplex est indifferentia arbitrij creati, vna potentiâlis & priuatiua, quæ consistit in carentia & suspensione actus, vnde à quibusdam vocatur *indifferentia suspensionis*, eamque habet voluntas creata, antequam operetur ; non ex libertate, quæ est perfectio, sed ex imperfectione, nempe ex eo quod non sit actus purus. Alia verò positiua & actualis,

lis, quæ in eo consistit, quod voluntas dum acti operatur, retineat potentiam ad oppositum. Licet autem diuina prædeterminatio non tollat istam indifferentiam; quæ est de ratione libertatis, bene tamen aliam, quæ est eius imperfectio. Vnde non mirum; quod Deus in causis liberis prædeterminatis actus liberi arbitrij certò & infallibiliter cognoscere valeat, vtpote cum diuina prædeterminatio habeat certum & infallibilem nexum cum actibus ad quos datur; non tamen in causis liberis nudè sumptis, & à Deo non prædeterminatis, eò quod illæ sic consideratæ sint, indeterminatæ ad operandum, & indifferentes indifferentia suspensionis, seu potentiæ & priuatiuæ.

Ad locum D. Thomæ respondco ex Ferrariensi ibidem, loqui S. Doctorem de causis naturalibus, quæ si ab extrinseco non impediuntur, ita determinatæ sunt ad proprios effectus, ac causæ necessaria; vnde in illis, si negatio impedimentorum certò innotescat, qualiter contingit in Deo, certò cognosci possunt illarum effectus futuri: secùs autem in libero arbitrio creato, quod, etiam omni extrinseco impedimento excluso, potest ab intrinseco indifferenter agere vel non agere; ac proinde, etsi omnium impedimentorum negatio euidenter cognoscatur à Deo, nequit in illo infallibiliter cognoscere actus liberos, vt determinatè futuros.

Ex dictis consutata manet singularis sententia Theophili Raynaudi, asserentis Deum scientia media explorare quid factura esset nostra voluntas in his vis vel illis circumstantijs:  
 si se

si se sola & absque diuino concursu agere posset . Si enim voluntas creatâ , vt habet adiunctum concursum Dei simultaneum , & vt subest motioni & gratiæ moraliter tantum excitanti, nō potest esse medium, in quo Deus certō & infallibiliter cognoscat eius actus libero-futuros, vt contra Molinam ostendimus, à fortiori eadem voluntas , nudè & solitariè sumpta, & sine concursu Dei considerata, non poterit habere rationem medij ducentis in certam & infallibilem suorum actuum futurorum notitiam . Addo quod , inquirere quid homo faceret , si se solo ageret : idem est ac inuestigare , quid facturus esset homo, si esset Deus , cum soli Deo conueniat agere independentè à quocumque alio , & sine auxilio & concursu alterius : At ridiculum est fingere , quod Deus exploret per scientiam mediam quid homo facturus esset , si esset Deus ; Ergo & absurda planè videtur Theophili sententia . Vnde non immerita cum Augustino epist. 56. exclamat quidam Redentior : *Pudet me ista refellere , cum eos non pudeat ista sentire . Cum vero ausi sint etiam defendere , non iam eorum , sed ipsius generis humani me pudet , cuius aures hæc ferre potuerant .*

Dico secundo , Deum non cognoscere futura contingentia & libera , pro priori ad suum decretum exercitè existens , in ipsomet decreto cognito vt futuro & donando in sequenti signo .

Ratio fundamentalis est , quia diuinum decretum , vtpote æternitate mensurarum , non potest esse nec concipi cum fundamento in re v futurum ; futuritio enim repugnat æternitati , t  
quæ

quæ cum sit indiuisibilis, & tota simul, non  
notit præteritum neque futurum, sed quidquid  
in ea est, non nisi est, vt ait Augustinus super  
Psalm. 101.

Neque valet si dicas cum Suarez, hoc argu-  
mentum probare quidem, Deum non posse co-  
gnoscere suum decretum vt realiter futurum,  
sed non demonstrare, illud non posse cogno-  
sci ab eo, vt futurum virtualiter; sicut enim  
in Deo datur prioritas virtualis inter essen-  
tiam & attributa, ita in diuinis decretis potest  
admitti futuritio virtualis. Non valet, in-  
quam, nam prioritas tantum à quo, non suffi-  
cit ad futuritionem etiam virtualem; sed ne-  
cessariò requiritur prioritas existentia & in-  
stantis in quo: At hæc non potest reperiri in  
Deo: Ergo nec futuritio virtualis. Minor con-  
stat, tum quia omnia quæ sunt in Deo existunt  
per vnicam indiuisibilem existentiam, tum  
etiam, quia se mutuò transcendunt, & vnum  
intrinsecè imbibitur in alio; ea vero quæ per  
vnicam existentiam existunt, & quæ se mutuò  
transcendunt, non possunt esse vel concipi prio-  
ra & posteriora, prioritate existentia, & in-  
stantis in quo. Maior vero probatur, tum ex  
eo quod, si prioritas tantum à quo sufficeret ad  
futuritionem virtualem, Verbum Diuinum  
pro priori a quo originis, quo Pater intelligi-  
tur vt principium illius, obtineret rationem fu-  
turi respectu Patris, quod nullus Theologo-  
rum admittit. Tum etiam, quia illud idem  
virtualiter exigitur ad futuritionem virtua-  
lem, quod realiter requiritur ad futuritionem  
realem: Atqui ad istam non sufficit quæcum-  
que prioritas vel posterioritas realis, sed re-  
qui-



quiritur quod vnum sit prius realiter existens quam aliud; vt constat exemplo essentia & proprietatum, quæ licet realiter inter se distinguantur, & essentia sit realiter prior proprietatibus, vtpote illarum principium; tamen inter essentiam & proprietates non datur vera successio, nec proprietates verè & realiter sunt futuræ respectu essentia; quia simul cum illa existunt, & essentia non est illis prior, prioritate existentia & instantis in quo, sed prioritate tantum naturæ, & instantis à quo: Ergo similiter ad futuritionem virtualem, non sufficit quacumque prioritas, & posterioritas, sed requiritur quod vnum sit prius alio, prioritate existentia & instantis in quo.

Potest insuper probari conclusio, & impugnari sententia Suaris, ex absurdo & inconuenienti quod ex illa sequitur, nempe scientiam absolutorum in Deo, non minùs esse mediam inter liberam & naturalem, quam scientiam conditionatorum, in sententia Molinæ, & aliorum defensorum scientia mediæ: si enim hæc non sit libera perfectè, sed tantum imperfectè, vel media inter liberam & naturalem (vt isti dicunt) quia licet obiectiue inuoluat liberam Dei decretum, non tamen subiectiue & vt exercitè existens in Deo: cum idem dicat Suarez de scientia absolutorum, necessariò concludendum erit, scientiam istam æquè mediatè inter naturalem & liberam, ac eam quæ est de futuris contingentibus conditionatis. Dabitur ergo in Deo duplex scientia media, vna conditionatorum, altera absolutorum: vna à Molina, altera à Suarez excogitata, quod absurdum est.

Obijcies cum Suarez : Deus pro illo signo rationis , in quo nondum intelligitur habere liberum decretum , comprehendit suam essentiam & voluntatem : Sed non potest illam comprehendere , nisi in ea cognoscat sua decreta futura in sequenti signo ; cum enim cognitio comprehensiva sit omnibus modis perfectissima , debet se extendere ad id omne quod in obiecto comprehensio continetur : Ergo Deus cognoscit sua decreta ut futura , subindeque in illis sic cognitis , futura contingentia contemplatur . Confirmatur : Deus per scientiam simplicis intelligentiæ cognoscit sua decreta ut possibilia . Ergo & ut futura .

Ad objectionem respondeo quod licet Deus in illo priori in quo concipiuntur tantum eius actus naturales & necessarij , comprehendat per scientiam simplicis intelligentiæ suam essentiam & voluntatem , in ea tamen non cognoscit sua decreta ut futura ; quia cum in tali signo divina voluntas sit omnino indifferens & indeterminata ad rerum productionem , non est medium in quo divina decreta possint cognosci ut determinatè futura ; ut enim supra dicebamus contra Molinam , in causa indifferenti & indeterminata non potest certò cognosci determinatus effectus .

Ad confirmationem dicendum , Deum per scientiam simplicis intelligentiæ cognoscere sua decreta ut possibilia , sumendo possibile largo modo , prout nimirum significat illud quod absolutè non repugnat ( in quo sensu essentia Dei , attributa , Personæ divinæ , & omnia quæ sunt in Deo , possibilia dici possunt ) non verò , si possibile propriè & in stricta significatione  
vsur-

usurpetur, prout nempe denotat illud quod continetur solum in potentia causæ omnino indifferentis & indeterminatæ ad eius productionem; ad hoc necessarium esset, ut Deus in aliquo signo rationis in quo, & non solum à quo, cognosceret suam voluntatem omnino indifferentem & indeterminatam ad futuritionem vel non futuritionem rerum, quod tamen repugnat, ut ex supra dictis constat.

Ex hoc intelliges, quod si Deus ab æterno creasset Angelum operantem, v. g. diligentem, eius dilectio non possit ab illo cognosci ut futura; quia esset tantum posterior ipsa essentia Angeli, posterioritate à quo, quæ (ut supra ostendimus) non sufficit ad futuritionem etiam virtualem; alioquin proprietate possent dici futuræ respectu essentiæ, & Pater æternus posset cognoscere suum Verbum ut futurum.

Dico tertio, non cognosci à Deo futura contingentia, siue absoluta, siue conditionata, in propositionibus contradictoriè oppositis, ex vi & lege contradictionis.

Probatur primò: Vis contradictionis non magis petit veritatem unius propositionis, v. g. affirmatiuæ, quam alterius, scilicet negatiuæ: sed indifferenter se habet ad hoc, ut docet Aristoteles 1. Perhiern. & D. Thomas ibidem lect. 13. & constabit ex infra dicendis: At in medio indifferenti non potest certò sciri aliquid determinatum, ut in prima conclusione ostendimus: Ergo in propositionibus contradictorijs non possunt, ex vi contradictionis, contingentia, ut determinatè futura, vel non futura à Deo cognosci. Hanc rationem infi-

quat S. Doctor quæst. 16. de malo art. 7. his verbis : *Ea quæ sunt ad utrumlibet non possunt cognosci in suis causis determinatè, sed sub distinctione, utpote quia erunt vel non erunt, sic enim habent veritatem.*

Probatur secundò : Vis contradictionis non petit quod vna propositio sit determinatè vera, & altera falsa, pro priori ad diuinum decretum, sed ad summum pro omni instanti reali : Ergo in propositionibus contradictoriè oppositis, ex vi & lege contradictionis, cognosci nequeunt contingentia vt futura; pro priori ad decretum. Consequentia patet, Antecedens probatur. Si vis contradictionis peteret quod vna propositio esset determinatè vera, & altera falsa, pro priori ad decretum, postularer etiam quod id haberet pro omni priori & signo imaginabili : Sed hoc dici nequit : Ergo nec illud. Sequela Maioris videtur manifesta, nam vis oppositionis contradictoriæ fundatur in illo primo principio, *Quodlibet est vel non est*, quod est verum pro omni instanti & signo rationis excogitabili. Minor etiam non est minùs certa, si enim vis oppositionis contradictoriæ postularer, quod vna propositio esset determinatè vera, & altera falsa, pro omni priori & signo rationis imaginabili, sequeretur quod propositiones contradictoriæ de futuro contingenti essent determinatæ veræ, pro priori ad rerum possibilitatem, & consequenter quod priùs à Deo cognosceretur aliquid vt futurum, quam vt possibile. Imò, quod magis est, sequeretur quod pro priori rationis ad existentiam Dei, & ad prædicata necessaria illius, deberent verificari. Ex quo alteriùs fieret,

ret, quod prius prioritate rationis aliquid esset futurum, quam Deus conciperetur existens, quo nihil absurdius dici vel excogitari potest.

Probatur tertio: si veritas determinata futurorum contingentium, subindeque determinata illorum futuritio, oriatur ex vi & natura oppositionis contradictoriæ, non erit contingens nec libera, sed absolute necessaria, sicque tolletur omnis libertas & contingentia rerum: At hoc dici nequit: Ergo nec illud. Sequela Maioris probatur: Effectus consequens ad causam necessariam necessitate absoluta, eandem sortitur cum ea necessitatem. Sed vis & naturæ oppositionis contradictoriæ, est causa necessaria necessitate absoluta, cum illa fundetur (ut supra dicebamus) in hoc primo principio, *quodlibet est, vel non est*, quo nihil potest dari vel concipi magis necessarium: Ergo si veritas determinata futurorum contingentium, subindeque determinata illorum futuritio oriatur ex vi & natura oppositionis contradictoriæ, non erit libera & contingens, sed necessaria, necessitate absoluta, sicque omnia euenient necessario necessitate absoluta, nullaque erit libertas & contingentia in rebus.

Ex dictis patet responsio ad præcipuum Adversariorum fundamentum, quod sumitur ex vi & lege contradictionis, quæ exigat ut una ex contradictorijs sit determinatè vera, & altera determinatè falsa. Ostendimus enim in secunda probatione conclusionis, vim & naturam contradictionis exigere quidem ut una ex contradictorijs sit determinatè vera, & alte-

ra falsa , pro omni instanti reali , non tamen , pro omni instanti & signo rationis & naturæ , nec per consequens pro signo rationis antecedenti decretum .

Dices , propositio disiunctiua constans ex duabus contradictorijs , v. g. *ista Petrus disputabit vel non disputabit* , est vera pro priori ad decretum , determinata veritate : At veritas huius disiunctiue ex veritate alicuius partis desumitur , & consequenter determinata illius veritas ex determinata veritate alicuius partis dependet : Ergo aliqua pars predictæ disiunctiue debet esse determinatè vera , pro illo priori ad decretum diuinum , & consequenter poterit à diuino intellectu , pro illo priori , vt determinatiue vera cognosci .

Respondeo ; concessa Maiori , negando Minorem ; veritas enim illius disiunctiue sumitur ex impossibilitate partium inter se , quantum ad veritatem vel falsitatem , non verò ex veritate ipsarum partium ex quibus componitur : illa enim propositio non solum est vera , sed etiam omnino necessaria , & tamen nulla ex partibus ex quibus componitur , est necessariæ veritatis . Item illa propositio non solum est vera pro priori ad decretum , sed etiam pro signo possibilitatis rerum , cum sit veritatis omnino necessariæ & æternæ , non minus quam ista , *homo est animal rationale* ; & tamen pro tali signo nulla ex suis partibus est determinatè vera , vt constat ex supra dictis : Ergo veritas talis propositionis à suarum partium veritate non pendet , & consequenter ex eo quod sit vera pro priori ad decretum , non recte colligitur , aliquam ex illis ex quibus  
com-

componitur, debere pro eodem priori determinata veritate gaudere.

Dico quartò, futura contingentia non cognosci à Deo, pro priori ad decretum in illorum determinata veritate obiectiua.

Probatur ratione fundamentali: Pro priori ad decretum nulla est determinata veritas obiectiua in futuris contingentibus: Ergo non possunt pro priori ad illud cognosci in sua veritate obiectiua determinata. Consequentia patet, Antecedens probatur: Veritas obiectiua determinata de obiecto futuro, præsupponit ipsum obiectum vt futurum: Sed pro priori ad decretum, nullum contingens est determinatè futurum: Ergo pro illo priori nulla est determinata veritas obiectiua in futuris contingentibus. Maior constat ex illo communi axioma, *Ex eo quod res est vel non est, propositio dicitur verà vel falsa.* Minor verò, in qua est difficultas, probatur multipliciter. Primò ex D. Thoma hic qu. 16. art. 3. ad 2. vbi hæc scribit: *Illud quod nunc est, ex eo futurum fuit antequam esset, quia in causa sua erat. ut fieret, unde sublata causa non erat futurum illud fieri: sola autem causa prima est æterna, unde non sequitur quod ex quâ sunt, semper fuit verum ea esse futura nisi quatenus in causa sempiterna fuit vt essent futura, quæ quidem causa solus est Deus.* Ex quibus ita arguo: Eatenus tantùm aliquid est futurum ab æterno, quatenus in causa prima fuit vt esset futurum: At non fuit vt esset futurum in causa prima, ratione omnipotentia, vt considerata in actu primo, nam vt sic tantùm dat denominationem possibilis: Ergo fuit vt esset futurum in causa



prima ; vt per decretum determinata , & consequenter pro priori ad illud , nihil potest esse vel concipi vt determinatè futurum . Vnde August. lib. 26. contra Faustum cap. 4. reddens rationem cur fateatur se nescire an aliquid sit futurum ( *Ideo inquit* ) *nescio , quia quid habeat de hac re voluntas Dei me latet , illud me tamen non latet sine dubio futurum , si hoc Dei voluntas habet .*

Secundò probatur eadem Minor hac ratione : Decretum Dei est prima radix & primum principium determinatæ futuritionis in rebus : Ergo pro priori ad illud , contingentia non possunt esse vel concipi vt determinatè futura . Consequentia patet, Antecedens probatur . Illud est prima radix & primum principium determinatæ futuritionis in rebus , quod primò determinat primum principium possibilitatis illarum : At primum determinans primum principium possibilitatis rerum , nimirum diuinam omnipotentiam , est diuinum decretum ; cum enim Deus non sit agens naturale , sed liberum , eius omnipotentia non potest determinari ad agendum , nisi à libero suæ voluntatis decreto : Ergo illud est prima radix & primum principium determinatæ futuritionis in rebus .

Probatur tertio, Minor principalis ex natura & definitione : futurum enim est illud quod est determinatum in suis causis , ad habendam existentiam pro duratione sequenti ; Sed pro priori ad decretum , contingentia non sunt determinata in suis causis ad habendam existentiam pro duratione sequenti . Ergo pro illo priori non sunt determinatè futura . Minor constat ;  
de-



decretum enim est ipsamet determinatio causæ primæ, à qua pendet & quam supponit aliarum causarum determinatio. Maior autem probatur ex differentia quæ intercedit inter possibile, futurum, & existens. Res enim merè possibilis continetur intra potentiam causæ omnino indifferentis & indeterminatæ ad eius productionem. Res existens est totaliter egressa è suis causis, & posita extra dependentias illarum. Res verò futura, cum sit media inter merè possibilem & existentem, etiam medio modo se habet; nec est totaliter posita extra suas causas, sicut existens, neque contenta in sola potentia causæ omnino indifferentis ad eius productionem, sicut merè possibilis, sed continetur in determinatione ipsius causæ inclinatæ ac determinatæ ad dandam illi existentiam in aliqua differentia temporis. Vnde D. Thom. q. 16. de malo art. 3. *Cognoscere futura in causa sua, nihil aliud est, quam cognoscere præsentem inclinationem causæ ad effectum.* Et qu. 2. de verit. art. 12. *Cum dicitur hoc est futurum, designatur ordo qui est in causis illius rei ad eius productionem.*

Demum probatur Minor principalis: Implicat intelligi rem ut possibilem, non præintellecta omnipotentia Dei, à qua constituitur potens in ordine ad productionem rerum: Ergo implicat intelligi rem ut futuram, non præintellecto diuino decreto. Patet consequentia, nam sicut possibilitas rei dicit ordinem ad omnipotentiam diuinam, ita futuritio ad decretum liberum, à quo illa desumitur.

Probatir secundo conclusio, euertendo præcipuum fundamentum aduersæ sententiæ: si

propositiones de futuro contingenti haberent determinatam veritatem obiectiuam, pro priori ad decretum, maxime quia in tempore futuro habebunt suam de inesse veram: v. g. ista propositio, *si Deus Petrum vocauerit, consentiet*, ideo secundum Aduersarios est determinatè vera, ante decretum, quia adueniente tempore, pro quo consensus futurus dicitur, & conditione posita, Petrus consentiet determinatè: At ex veritate propositionis de inesse, non licet colligere veritatem determinatam in propositione de futuro contingenti, pro priori ad decretum, sed ad summum pro omni instanti reali: Ergo ruit præcipuum fundamentum aduersæ sententiæ. Minor probatur: si ex veritate propositionis de inesse, posset colligi determinata veritas in propositione de futuro contingenti, pro priori ad decretum, ob eandem rationem inferre liceret, talem propositionem esse veram, & consensum Petri futurum, posita conditione, non solum pro priori ad decretum, sed etiam pro signo possibilitatis rerum, & pro signo antecedente diuinam omnipotentiam, & ipsius Dei existentiam, ut conclusionem præcedenti arguebamus contra illos qui docent futura contingencia habere pro priori ad decretum determinatam veritatem obiectiuam, ex vi & lege oppositionis contradictoriæ: Sed hoc absurdissimum est, ut constat: Ergo ex veritate propositionis de inesse, non licet colligere veritatem determinatam in propositione de futuro contingenti, pro priori ad decretum.

Contra istam conclusionem obijciunt Aduersarij, & est præcipuum illorum fundamentum.

mentum: Illa propositio est determinatè vera, quæ est conformis suo obiecto : Sed hæc propositio , *Antichristus erit* , etiam pro priori ad decretum , est conformis suo obiecto : Ergo pro tali signo est determinatè vera . Minor probatur : tunc propositio est conformis obiecto , quando illud ita se habet , vt per eam enuntiatur : At obiectum huius propositionis , *Antichristus eris* , ita se habet vt enuntiatur per illam , cùm re vera Antichristus sic habiturus existentiam in aliqua differentia temporis , vt de fide certum est , & in Scriptura reuelatum : Ergo &c.

Confirmatur : Illa propositio de futuro est determinatè vera, quæ aliquando habebit suam de præsentis seu de inesse veram ; veritas enim propositionis de futuro , per suam de inesse seu de præsentis regulari & cognosci debet : Sed hæc propositio , *Antichristus erit* , habebit aliquando suam de inesse veram ; aliquando enim verum erit dicere , *Antichristus nunc est* , vt est certum de fide : Ergo determinatè vera .

Ad obiectionem respondeo concessa maiori , negando minorem , & ad probationem illius , distinguo maiorem . Tunc propositio est conformis obiecto , quando ita se habet vt per eam enuntiatur : Si hoc habeat ex vi illius signi , in quo enuntiatur ; siue ex vi dispositionis factæ in tali signo , concedo maiorem . Si hoc habeat ex vi alterius signi , siue ex vi dispositionis factæ in alio signo subsequenti , nego maiorem . Quod autem Antichristus sit habiturus existentiam , pro aliqua differentia temporis , hoc non prouenit ex vi dispositionis

factæ in signo antecedenti decretum , sed ex vi ipsius decreti , qui voluntas diuina ab æterno se determinauit ad producendum aliquando Antichristum ; & quia tale decretum , seu determinatio causæ primæ , in scriptura reuelata est , non mirum , quod hæc propositio *Antichristus erit* , modò non solùm sit determinatè vera , sed etiam certa de fide .

Ad confirmationem similiter respondeo , concessa maiori , distinguendo minorem : hæc propositio , *Antichristus erit* , formata pro priori ad diuinum decretum , habebit aliquando suam de inesse veram , ex vi talis prioris , & dispositionis in eo factæ , nego minorem . Ex vi signi posterioris , & ratione diuini decreti determinantis aliquando producere Antichristum , concedo minorem , & eodem modo distinguo consequens .

Dices , obiectum huius propositionis *Antichristus erit* , non est determinatio causæ primæ ( alioquin non esset de futuro , sed de præsentia ) sed existentia ipsius Antichristi , habenda pro tempore futuro : Ergo quamuis causâ primâ in signo antecedenti decretum , non sit determinata ad producendum Antichristum , hoc tamen non obstat , quin talis propositio , pro illo priori , sit determinatè vera .

Respondeo obiectum huius propositionis , & aliarum propositionum de futuro contingenti , neque esse solam determinationem causæ , neque solam existentiam , vt habendam pro tempore futuro , sed existentiam vt habendam , ex vi præsentis determinationis causæ . Vnde quamuis decretum , seu determinatio causæ primæ , vel secundæ , non sit obiectum harum pro-

positionum , est tamen eius fundamentum , & prima regula , proportio radix conformitatis quam habent cum illo ; eo proportionali modo , quo indifferens iudicium rationis , est prima regula liberæ determinationis voluntatis . Quare ut aliqua res in aliquo signo sit & concipiatur ut futura , non sufficit quod sit habitura aliquando existentiam ( hoc enim non potest verificari de re possibili , considerata in statu meræ possibilitatis ) sed insuper requiritur , quod sit habitura existentiam , ex vi præsentis determinationis causæ ; quod non potest verificari de Antichristo , pro priori ad diuinum decretum , cum pro tali signo diuina voluntas sit omnino indifferens & indeterminata ad eius productionem .

## §. II.

*Vna sententia statuitur .*

**D**ico quintò , Deum certò & infallibiliter cognoscere futura , contingentia in decreto prædeterminante eorum futuritionem .

Probatur primò ex SS. Patribus : Hilarius enim 9. de Trinit. sic ait : *Quæ Deus facere decreuit , in sua voluntate cognouit* . Augustinus de prædest. Sanctorum cap. 10. certam de futuris promissis noticiam reperit à prædestinatione Dei his verbis : *Prædestinatione sua Deus ea præscinit quæ fuerat ipse facturus* . Et paulò infra : *Quando promisit Deus Abrahæ fidem gentium , non de nostræ voluntatis potestate , sed de sua prædestinatione promisit : promissi enim quod ipse facturus erat , non quod homines* , &c.

Ex quibus duplex argumentum desumo. Primum est : Quod Deus est factururus in sua prædestinatione prænoscit : At Deus omnes actiones nostras, quantumcumque liberas, factururus est, iuxta illud Isaïæ : *Omnia opera nostra operatus es in nobis Domine* : Ergo eas cognoscit in sua prædestinatione, id est in decreto & prædefinitione suæ voluntatis. Sæpe enim apud Augustinum, & alios SS. Patres, hoc nomen *prædestinatio* vsurpatur pro decreto præordinante & prædefiniente rerum futuritionem, ut constat ex Tractatu 68. in Ioan. ubi ait quod *Deus fecit futura, ea prædestinando.*

Alterum argumentum est : quod Deus promittit de sua prædestinatione, non de nostræ voluntatis potestate promittit : At Deus multoties nostras actiones liberas promittit, iuxta illud Ezechielis : *Faciam ut in præceptis meis ambuletis* : Ergo illas promittit de sua prædestinatione, & easdem in sua prædestinatione cognoscit. Vrde de bono persever. cap. 17. loquens de nostris bonis operibus, ait : *Si Deus ea daturum esse præscivit, profecto prædestinavit* : Quæ consequentia seu illatio non esset bona, si præscientia nostrorum operum, non esset fundata in prædestinatione seu prædefinitione voluntatis diuinæ. Constat ergo Deum, iuxta doctrinam Augustini, non cognoscere nostra opera futura, in seipsis immediatè, aut in veritate illorum obiectiua, ut docent Aduersarij, sed in suo decreto, quod proinde debet esse ab intrinseco efficax, & prædeterminans, quia illud solum (ut infra ostendemus) potest habere rationem medij ducentis in certam & infallibilem futurorum contingentium notitiam.

Probatur secundò conclusio ex D. Thoma , qui pluribus in locis apertè facit nostræ sententiæ , nam in 1. dist. 39. qu. 1. art. 1. ad 5. docet scientiam Dei respectu futurorum contingentium, subiacere libertati suæ voluntatis : scientia autem quæ subiacet libertati voluntatis diuinæ , subiacet eius decreto , illique vt medio innititur . Et 1. contra G. nt. c. 68. sic ait : *Sicut Deus cognoscendo suum esse , cognoscit esse cuiuslibet rei , ita cognoscendo suum intelligere & velle , cognoscit omnem cogitationem & voluntatem .* Quo nihil apertius & expressius dici potest . Et post multa sic concludit : *Dominum quod habet voluntas supra suos actus , per quod in eis est potestate velle & non velle , excludit determinationem virtutis ad unum , & violentiam causæ exterioris agentis , non autem excludit influentiam superioris causæ , à qua est ei esse & operari , & sic remanet casualitas in causa prima , quæ Deus est , respectu motuum voluntatis , vt sic Deus seipsum cognoscendo , huiusmodi cognoscere possit .* Demum lib. 3. cap. 56. ait : *Deus scit omnes nostras voluntates ( id est volitiones ) per hoc quod est nobis causa volendi .* Quibus locis S. Doctor rationem fundamentalem nostræ conclusionis insinuat : Deus enim ( vt supra cap. 2. ostendimus ) non cognoscit res immediatè in seipsis , sed solum in seipso , & in essentia sua tanquam in causa , iuxta illud Dionysij cap. 7. de diuin. nomin. *Non secundum visionem singulis se immittit , sed secundum causæ continentiam scit omnia .* Atqui Deus , cum non sit agens naturale , sed liberum , respectu creaturarum , non est causæ futuritionis rerum , nisi vt determi-

na-



natus per liberum ſuæ voluntatis decretum : Ergo non cognoscit futura contingentia , niſi in ſuo decreto , ſeu in ſua eſſentia , vt per illud determinata , ſicut non cognoscit merè poſſibilia , niſi in ſua eſſentia , vt modificata per attributum ſuæ omnipotentia .

Confirmatur & magis illustratur hac ratio : Diuina eſſentia repræſentat creaturas , vt illarum cauſa : Ergo per id ſolum poterit determinari in ratione repræſentantis futura contingentia , per quod determinatur in ratione cauſæ illorum : At ſolum decretum illam ad cauſandum determinat : Ergo per illud ſolum determinari poteſt vt illa repræſentet . Vnde D. Thomas in 2. diſt. 39. qu. 1. art. 2. ad 1. docet quod Deus non habet ideas determinatas rerum creandarum , niſi ex propoſito ſuæ voluntatis .

Dices , quæ licet præſcientia futurorum fundetur in decreto , illud tamen non eſſe prædeterminans .

Sed contra : Vt aliquid habeat rationem mediij ducētis infallibiliter in cognitionem alterius , duo requiruntur ; primum , quod iplum præcedat , prioritate ſaltem naturæ & cauſalitatis ; aliàs enim , ſi eſſet purè concomitans , non magis eſſet ratio cognoscendi aliud , quam iſtud ratio iplum cognoscendi : ſecundum , quod habeat neceſſarium vel infallibilem cum ipſo nexum , aliàs enim non poterit certò ducere in notitiam eius : Sed vtraque conditio conuenire nequit , niſi decreto prædeterminanti ; ſi enim ſit indiſſerens , non habebit nexum infallibilem cum actibus voluntatis humanæ , quia poterit indiſſerenter cum conſen-



su vel diffensu componi : Si verò supponat prævisionem futuri consensus & determinationis voluntatis humanæ , illam non causat , nec per consequens eam prioritate naturæ & causalitatis antecedit : Ergo solum prædeterminans , potest habere rationem mediij , in quo Deus certò & infallibiliter futura contingentia cognoscat .

Obijcies primò : Quotiescumque D. Thomas agit de scientia futurorum contingentium , & de medio in quo ea cognoscit , semper recurrit ad eorum in æternitate præsentiam , vt certò illa cognoscat , & nunquam facit mentionem diuini decreti , vt videri potest in 1. dist. 38. quæst. 1. art. 5. & alijs in locis infra referendis : Ergo censet Deum non cognoscere illa in decreto prædeterminante . Vnde aliqui recentiores contendunt cum Campanella , S. Doctorem , neque scientiam mediam , neque decreta prædeterminantia admittere , sed totam futurorum contingentium notitiam , ad præsentiam illorum in æternitate reducere .

Sed respondetur primò , negando Antecedens , nam loco in obiectione citato D. Thomas explicans modum quo Deus futura contingentia cognoscit , vtrumque medium clarè expressit , dicens : *Deus non solum videt ordinem sui ad rem , ex cuius potestate res est futura .* ( Ecce cognitionem futurorum in decreto , neque enim dicit ordinem necessarium ad futura , sed liberum , per decretum ) *sed ipsius rei esse intuetur .* Ecce præsentiam in æternitate ex decreto secutam .

Respondeo secundò , quod quamuis S. Doctor

ctor formaliter & in terminis, tale medium non expressisset, illud tamen per manifestam illationem deducitur ex illo principio, quod sæpe reperit & inculcat, tanquam præcipuum suæ doctrinæ fundamentum, nimirum Deum omnia in seipso & in sua essentia tanquam in causâ cognoscere; nam diuina essentia, vel omnipotentia, non potest esse causa futuritionis rerum, nec illas ut futuras repræsentare, nisi ut modificata & determinata per decretum, ut ex supra dictis constet. Ratio autem cur D. Thomas agendo de scientia Dei respectu futurorum contingentium & de medio in quo ea cognoscit, sæpissime recurat ad eorum præsentiam in æternitate, est quia talis præsentia conducit, imò necessaria est, ut Deus habeat inuariabilem & intuitiuam eorum notitiam, ut constabit ex dicendis §. sequenti.

Obijcies secundo: In causa remota vniuersali non potest certò & infallibiliter cognosci effectus, v. g. in motu solis non potest certò cognosci generatio plantæ, aut floritio arboris: Sed diuinum decretum est causa tantùm remota & vniuersalis futurorum contingentium: Ergo illa non possunt certò cognosci in decreto.

Respondeo distinguendo maiorem: in causa remota & vniuersali, effectus non potest certò cognosci, quando est impedibilis à causa proxima & particulari, concedo. Quando non est impedibilis, nego. Decretum autem diuinum, cum sit infinitæ virtutis & efficacix, non potest à causis secundis contingentibus impediri, ne siuum consequatur effectum. non solùm quantum ad substantiam, sed etiam quantum ad

- mo-

modum libertatis & contingentiae. Vnde duplex est notabile discrimen inter concursum solis, & aliarum causarum vniuersalium, & concursum Dei, qui est prima & vniuersalissima causa. Primum est, quod cum concursus solis, & aliorum corporum coelestium, sit virtutis & efficaciae finitae, potest impediri, ne suum producat & consequatur effectum: secus verò concursus Dei, cum eius virtus & efficacia infinita sit. Secundum discrimen est, quod causae secundae vniuersales, per se primò attingunt in suis effectibus rationes communes vel genericas, puta viuentis, vel corporis corruptibilis, quae cum sint potentiales & determinabiles; etiam concursus illarum est indifferens, potentialis, ac determinabilis à causis inferioribus & particularibus. Causa autem prima & vniuersalissima, cum per se primò attingat in omnibus rebus creatis rationem entis, & actualitatem & existentiae, quae non est potentialis & determinabilis, sed actualis, & determinatiua, non influit in causas secundas per concursum indifferentem & determinabilem, sed potius eas determinat & applicat ad agendum, conformiter ad illarum naturam & conditionem.

Obijcies tertio: Si Deus in decreto omnia futura contingentia cognosceret, etiam in illa futura peccata praesciret; Sed hoc dici nequit, aliàs esset causa & author peccati: Ergo nec illud.

Respondeo, concessa maiori, negando minorem, Deus enim cognoscit peccata futura in decreto positiuo, quo statuit positiuè concurrere ad entitatem & bonitatem physicam actu-

actuum maiorum, & in decreto permissiuo; quo vult permittere eorum malitiam & deformitatem, seu denegare auxilium efficax ad vitandum peccatum; ex hoc enim duplici decreto sequitur infallibiliter peccatum, ex primo quidem sequitur eius entitas & bonitas physica, consecutione physica & causalitatis, sicut quilibet effectus sequitur ad suam causam; ex secundo verò sequitur eius malitia & deformitas, non consecutione physica & causalitatis, sed duntaxat consecutione logica & illationis, sicut destructio siue annihilatio creaturæ, infallibiliter sequitur suspensionem siue denegationem diuini concursus à quo conseruatur in esse; vel sicut ex remotione columnæ, sequitur casus lapidis, qui ab illa sustentatur, & ex remotione salis corruptio carniū quæ per illud impeditur. Quemadmodum enim, licet causa per se descensus lapidis, non sic remouio columnæ, sed lapidis grauitas; nec subtractio salis sit causa per corruptionis carniū, sed mixtio, seu pugna quatuor primarum qualitatum, sequitur tamen infallibiliter ad illato, tanquam ad remouens prohibens. Ita pariter, licet denegatio auxilij efficacis non sit causa peccati, sed malitia & defectibilitas voluntatis humanæ; si tamen Deus, ob rationes occultas suæ infinitæ sapientiæ & providentiæ, deserat hominem, per denegationem auxilij efficacis, infallibiliter homo peccabit: iuxta illud Innocentij primi epist. 25. ad Concilium Carthaginense: *Necesse est, ut quo auxiliante vincimus, eo non adiuvante vincamus.*

Dices, ille qui remouet columnam, à qua  
sa-

sistentatur lapis , censetur esse causa , saltem moralis & indirecta , casus lapidis ; & ille qui subtrahit sal à carnibus , ex cuius subtractione sequitur illarum corruptio , reputatur causa saltem moralis & indirecta corruptionis illarum : Ergo pariter Deus subtrahens homini auxilium efficax , ex cuius denegatione sequitur infallibiliter peccatum , erit causa , saltem moralis & indirecta , illius .

Respondeo primò , illud argumentum posse in Aduersarios retorqueri , utpote cum peccatum non minùs sequatur infallibiliter , ad denegationem gratiæ congruæ , in eorum sententia , quam ad denegationem gratiæ ex se efficacis , & physicè prædeterminantis , in doctrina Thomistarum .

Respondeo secundò , concesso Antecedente , negando consequentiam , & paritatem . Ille enim qui remouet columnam sustentantem lapidem , vel subtrahit sal à carnibus , tenetur interdum illud non subtrahere , nec columnam remouere ; Deus autem nunquam tenetur dare auxilium efficax ad eliciendum actum virtutis peccato oppositum : ut autem id quod sequitur ad defectum actionis , alteri imputetur , tria requiruntur , nimirum quod possit , & debeat , & non agat , ut docet S. Thomas 1. 2. quæst. 6. art. 3. Ex quo ibidem qu. 79. art. 1. infert , Deum non posse dici causam peccati , etiam indirectam . Deus ( inquit ) peccati causa etiam indirecta dici non potest , nec debet , quia tametsi non trabeat auxilium , quod si præberet , homines non peccarent , hoc trium facit secundum ordinem suum  
sa .

sapientie & iustitie ; cum ipse sit sapientia & iustitia : unde non imputatur ei quod a'ius peccet , sicut cause peccati ; sicut gubernator non dicitur causa submersionis navis , nisi quando subtrahit gubernationem , potens & debens gubernare . Sed de hoc fusiùs tractatu sequenti , cum exponemus concordiam sanctitatis Dei , cum efficacia & causalitate diuinorum decretorum .

## §. III.

*Aliud medium in quo Deus futura contingentia cognoscit , eorum nimirum presentia in eternitate .*

**N**on potest hoc medium perfectè intelligi , nisi priùs declaretur modus quo futura contingentia sunt Deo presentia in eternitate , an obiectiue solùm , ratione præscientiæ ; vel etiam physicè & realiter , ratione eternitatis ? Primum tenent Scotus , Durandus , Suarez , Vasquez , & plures ex Recentioribus . Secundum docent Thomistæ , quos sequuntur ex Patribus Societatis Molina , Fonseca , Granadus , & Ruizius , cum quibus .

Dico primò , futura contingentia sunt Deo ab æterno presentia , non solùm obiectiue & intentionaliter , ratione præscientiæ , sed etiam physicè & realiter , ratione eternitatis .

Probatur primò ex SS. Patribus negantibus Deo præscientiam in rigore , eò quod Deo nihil sit futurum , sed omnia sint illi presentia . Ita Augustinus lib. 2. ad Simplic. quæst. 2. ubi sic discurret : *Quid est præscientia , nisi scientia fu-*

futurorum? Quid autem futurum est Deo, qui omnia supergreditur tempora? Si enim in scientia res ipsa habet non sunt futura, sed presentia, ac per hoc non iam præscientia, sed tantum scientia dici potest: Si autem sicut in ordine temporalium, ita & apud Deum nondum sunt quæ futura sunt, sed ea prævenit sciendo: his ergo ea sentit, uno quidem modo secundum futurorum præscientiam: altera vero modo secundum presentium scientiam: aliquid ergo temporaliter accedit scientiæ Dei, quod absurdissimum & suffissimum est. Idem docet Gregorius Magnus lib. 20. Moral. cap. 23. his verbis: Quomodo est præsciens, dum nulla nisi quæ futura sunt præsciuntur, & scimus quia Deo futurum nihil est? Item Anselmus lib. de causa Diaboli cap. 21. sic ait: Præscientia Dei non propriè dicitur præscientia cui enim omnia sunt presentia, non habet futurorum præscientiam, sed præsentium scientiam.

Ex his Sanctorum Patrum testimonijs triplex argumentum defumo: Primum est SS. Patres locis relatis negant Deo præscientiam in rigore, eò quod omnia sint illi presentia: At ex eo quod omnia sint Deo obiectivè solum presentia, non rectè probatur, ei non convenire præsentiam in rigore; cum Prophetarum mentibus multa sint obiectivè presentia, de quibus tamen habent in rigore præscientiam: Sentiant ergo prædicti Patres, futura esse Deo presentia ab aeterno, non solum obiectivè, ratione scientiæ, sed etiam realiter & physice, ratione aternitatis.

Secundum argumentum sic procedit: Patres citati non solum affirmant omnia esse Deo præsen-

sentia, sed etiam absolute negant Deo esse aliquid futurum: At ex obiectiua presentia non tollitur ratio absolutæ futuritionis, bene tamen ex physica: Ergo de ista & non tantum de priua SS. Patres loquuntur.

Tertium argumentum est: si creaturæ omnes nobis futuræ, non essent Deo physicè in æternitate præsentēs, sequeretur illum aliquid in tempore scire de nouo, quod absurdissimum & falsissimum reputat Augustinus. Sequela patet, nam rem dum est, videret ut sibi physicè præsentem, & antequam esset, illam ut sibi futuram cognosceret. Ergo aliquid in tempore sciret de nouo, & his, seu duobus modis, idem cognosceret: *Uno quidem modo secundum futurorum præscientiam, altero vero modo secundum præsentium scientiam*, ut ait idem S. Doctor loco citato ad Simplicianum.

Eodem discursu utitur S. Thomas in 1. dist. 58. qu. 1. art. 5. Item qu. 2. de verit. art. 12. ubi sic ratiocinatur: *Cum visio diuinæ scientiæ æternitate mensuretur, quæ est tota simul, & totum tempus includit, nec alteri parti temporis dicitur, sequitur ut quidquid in tempore geritur, non ut futurum, sed ut præsens videatur*. Vbi probat futura contingentia videri à Deo, seu ab illo intuitiuè cognosci, quia sunt diuinæ æternitati præsentia. Quare non potest intelligi de presentia obiectiua, & intentionali, sed solum de reali & physica. Tum quia aliàs, cum præsentia obiectiua in videri consistat, probans ideò videri, quia sunt præsentia, idem per idem probaret, & istum sensum efficeret: ideò videntur, quia videntur, quod est ridiculum, Tum etiam, quia ad cognitionem in-



initium alicuius obiecti, non sufficit sola presentia obiectiva illius in mente cognoscentis, sed requiritur realis illius presentia & existentia, ut infra ostendemus. Tum denique quia, cum aeternitas non sit attributum pertinens ad cognitionem, sed ad durationem, non causat presentiam obiectivam, sed realem & physicam. Vnde idem S. Doctor loco supra citato ex primo scientiarum, sic habet: *Cum Deus uno aeterno intuitu, non successivo, omnia tempora videat; omnia contingencia in temporibus diversis, ab aeterno presentialiter videt, non tantum ut habentia esse in cognitione sua, &c.* Ergo praeter presentiam obiectivam quam habent futura contingencia in mente divina, ratione scientiae, aliam cognoscit realem & physicam, quae illis competit, ratione aeternitatis, ambientis omne tempus, & omnes differentias eius.

Potest insuper probari conclusio ratione fundamentali, & à priori, desumpta ex natura & perfectione aeternitatis: illa enim est duratio infinita, indivisibilis, & tota simul, ut constat ex eius definitione à Boetio tradita, & tract. 1. cap. ultimo à nobis explicata: Ergo aeternitas, ratione infinitatis, continet omnem durationis mensuram, nempe praeteritum, praesens, & futurum: ratione indivisibilitatis, secundum se tota illa continet; & ratione simultatis omnibus durationibus inter se succedentibus, absque successione, ab aeterno coexistit; ac proinde omnia tempora, & omnia tempore mensurata, etsi inter se inuicem succedentia, Deo ab aeterno in aeternitate coexistunt. Vnde egregie Bernardus serm. 80. in

*Cant. Tempora sub ea transeunt, non ei: futura non expectat, præterita non recogitat, præsentia, non experitur, experientia scilicet transeunte. Et Petrus Damianus opusc. 36. cap. 8. Omnia quæ apud nos elabendo discurrunt, aut per temporum vicissitudines se variant, apud illud hodie (æternitatis) stant, & immutabiliter perseverant. In illo scilicet hodie, dies adhuc immobilis est, quo mundus isto sumpsit originem, in illo iam & ille nihilominus est, quo iudicandus est per æterni iudicij æquitatem.*

Respondent Aduersarij, ex indiuisibilitate æternitatis, solum posse inferri, quod careat successione sibi intrinseca, non autem extrinseca, desumpta ex rebus creatis, inter se succedentibus, & successiuè diuinæ æternitati coexistentibus.

Sed contra: Imprimis: hæc responsio repugnât verbis Cardinalis Damiani, iam relatis, & definitioni æternitatis, à Boetio traditæ: si enim æternitas non careat successione illi extrinseca, desumpta ex rebus creatis inter se succedentibus, falsum erit, quod omnia quæ apud nos elabendo discurrunt, aut per temporum vicissitudines se variant, in nunc æternitatis stent & immutabiliter perseverent. Item falsum erit quod ait Boetius nempe quod æternitas sit *tota simul & perfectæ possessio*, nam ex quocunque capite defectus actualis possessionis proneniat, siue ab intrinseco, siue ex defectu extrinseci quod est possidendum, non saluatur ratio perfectæ possessionis, ut patet in illo qui diuitias non possidet, ex illarum defectu.

Secundò potest hæc solutio impugnari, ex eo quod si daretur corpus infinitum in ratione extensionis, omnibus alijs, quantumcumque distantibus inter se, simul adesset: Ergo cum æternitas sit infinita in ratione durationis: debet similiter omnibus durationibus, quantumcumque distantibus in ratione durationis, subindeque præterito, præsentì, & futuro, simul & absque successione adhuc intrinseca, coexistere.

Confirmatur: Ex distantia locali duorum corporum inter se, non inferitur illorum distantia, respectu diuinæ immensitatis: Ergo pariter ex successione futurorum ad inuicem, non potest inferri successio illorum, respectu æternitatis.

Dico secundò, realem & physicam futurorum contingentium in æternitate præsentiam, necessarium esse, vt scientia quam Deus habet de illis, sit intuitiua; & inuariabilis, non verò vt sit certa, & infallibilis.

Prima pars probatur: Notitia intuitiua & cognitio abstractiua in hoc differunt, quod prima ad rem existentem & realiter præsentem terminatur, secunda verò abstrahit à reali præsentia & existentia obiecti, & obiectiuam seu intentionalem solum requirit; qua propter cognitio prophetica, quamuis terminetur ad res futuras, vt obiectiue præsentem, in mente Prophetæ, non est intuitiua, sed abstractiua. Vide D. Thomas q. 3. de verit. art. 3. ad 8. *Visio addit supra simplicem cognitionem, aliquid extra genus notitiæ, quod est existentia rei*: Ergo cum futura contingentia non sint ab æterno in propria duratione vt terminent

ab æterno notitiam Dei intuitiuam, & ab eō cognoscantur per scientiam visionis, necesse est quod ab æterno sint illi præsentia in mensura suæ æternitatis.

Probatur etiam secunda pars; Sicut enim teste D. Thoma infra q. 19. art. 7. voluntas Dei mutaretur, si aliquid inciperet velle quod prius non voluit; ita scientia Dei mutaretur, si inciperet videre aliquid ut sibi præsens quod antea non videbat: At seclusa præsentia rerum in æternitate, Deus incipere in tempore videre res ut sibi præsentem, quæ ab æterno videbat tantum ut sibi futuras: Ergo, illa seclusa, scientia Dei respectu futurorum esset variabilis, & transiret de abstractiua in intuitiuam, quando obiectum transiret de futuro in præsens, & rursus rediret de intuitiua in abstractiua, quando obiectum transiret de præsenti in præteritum. Vnde Ecclesiastici 39. dicitur: *Opera omnis carnis coram illo, à seculo & usque in seculum respicit, & nihil est mirabile in conspectu eius.* Quibus verbis Scriptura reddens rationem, quare nihil sit nouum nec mirabile in oculis Dei, non illam assignat, quam quia à seculo & usque in seculum respicit: id est, quia videt omnia ut sibi præsentia in sua æternitate. Eodem discursu utitur D. Thomæ hic art. 15. ad 2. his verbis: *Si aliquid esset quod prius Deus nesciuisset, & postea sciret, esset eius scientia variabilis: Sed hoc esse non potest, quia quidquid est, vel potest esse secundum aliquod tempus, Deus in æterno suo sit.*

Tertia denique pars, quæ asserit, realem & physicam futurorum contingentium in æternitate

nitate præsentiam, nec esse necessariam, ut scientia, quam Deus habet de illis sit certa & infallibilis, constat ex dictis §. præcedenti; ibi enim ostendimus, diuinum decretum esse medium in quo futura contingentia certò & infallibiliter cognosci possunt. Vnde si per impossibile illa non coexisterent Deo in æternitate, adhuc tamen ab illo in suo decreto efficaci, certò & infallibiliter cognosci possent. Patet id in futuris conditionatis, quorum conditio nunquam purificabatur, nam Deus ea certò & infallibiliter in decreto conditionato cognoscit, quamuis non sunt illi præsentia in æternitate, quia nunquam existent in tempore, defectu conditionis quæ nunquam ponetur.

Dices, D. Thòmas 1. contra Gent. c. 67. docet quod ut contingens subdatur certæ cognitioni, requiritur ut habeat esse determinatum, & non possit non esse; si enim posset non esse, posset etiam falli cognitio; unde cum contingens ut futurum, & ut contentum in suis causis, possit non esse, hinc infert S. Doctor, illud non posse certò cognosci ut futurum, subindeque ut terminet certam & infallibilem scientiam, debere cognosci in seipso, prout eff præsens in mensura æternitatis.

Respondeo D. Thomam ibi non considerare futura contingentia per ordinem ad causam primam, in qua, ratione decreti efficaci & inuariabilis, certò & infallibiliter continentur; sed solum respectiue ad causas secundas contingentes & mutabiles, & prout abstrahunt à diuino decreto, eas determinante & applicante ad agendum; sub qua ratione

non possunt esse medium, in quo Deus futura contingentia certò cognoscat, ac proinde respectu ad illas, nulla potest esse ratio certitudinis cognitionis diuinæ, respectu futurorum, nisi præsentia illorum in æternitate.

Obijcies primò contra primam conclusionem: Si Antichristus v. g. nunc existeret in æternitate, verum esset dicere de illo, quod existeret ab æterno: Sed hoc repugnat fidei: Ergo & illud. Sequela Maioris videtur manifesta, existere enim in æternitate: idem est ac existere ab æterno.

Confirmatur: Si Antichristus in æternitate existeret, deberet in ea esse productus, cum existentia non possit illi communicari, nisi media creatione, vel productione: Sed hoc dici nequit, aliàs ille bis produceretur, nempe in æternitate, tanquam in mensura superiori, & in tempore tanquam in mensura propria, in qua aliquando existere debet: Ergo nec illud.

Ut hæc & similia argumenta facilè diluantur, & denegatur radix deceptionis & hallucinationis Aduersariorum in hac materia, diligenter obseruandum est, præsentiam realem & physicam futurorum contingentiam in æternitate, tribus modis posse concipi, vel imaginari. Primò per quandam anticipatam illorum productionem in æternitate, distinctam ab illa qua producuntur in tempore; ita vt Antichristus v. g. concipiatur vt præsens in æternitate, quia in illa iam productus est, & positus extra causas. Secundò per coextensionem ipsius rei temporalis ad totam æternitatem, eo ferè modo quo illi coextenderetur.

tempus infinitum, si daretur. Tertiò per coextensionem ipsius aternitatis ad illam differentiam temporis, in qua futura contingentia aliquando existent, & erant presentia. Duo primi modi, nec admittuntur à Thomistis, nec ab ullo Catholico admitti possunt; cum Scriptura testetur; nihil esse productum ab aeterno, sed omnia incoepisse in tempore. Vnde quando dicimus, futura contingentia esse realiter Deo presentia in sua aternitate, hoc debet intelligi in tertio sensu, & de tertio modo presentiae nimirum per coextensionem ipsius aternitatis ad illam differentiam temporis futuri, in qua illa existent, in propria mensura & duratione.

Ad objectionem ergo respondeo, negando sequelam Maioris, aliud enim est, Antichristum esse ab aeterno, & aliud illum existere in aternitate: ut enim esset ab aeterno, deberet eius existentia ad totam aternitatem coextendi, eo ferè modo quo ipsi coextenderetur tempus infinitum: ut autem dicatur esse praesens & existens in aternitate, hoc non requiritur, sed sufficit quod illa differentia temporis; in qua aliquando existet, nunc contineatur in aternitate; istaque, ratione suae infinitatis, ad eam virtualiter se extendat.

Ad confirmationem nego similiter sequelam Maioris, ut enim Antichristus dicatur praesens & existens in aternitate, non requiritur quod in ea producat, sicut imaginantur Aduersarij, sed sufficit quod eius productio, quae est futura in tempore, sit praesens in aternitate; ratione enim huius productionis temporalis & futurae, dicitur Antichristus praesens



sens & existens in æternitate ; quia cum illa sit mensura infinita , indiuisibilis , & tota simul , continet omnem durationis mensuram & differentiam , absque vlla successione , & in vnico nunc indiuisibili , vt antea declarauimus .

Dices , Æuum Angeli est mensura à parte post infinita , & formaliter indiuisibilis , ac tota simul , & tamen futura contingentia , antequam existant , non sunt realiter præsentia Angelo in æuo ; aliàs enim ea cognosceret Angelus intuitiue , antequam essent in propria duratione . Item immensitas Dei æque est infinita , ac eius æternitas , & tamen non continet loca præterita , vel futura , sed tantum præsentia & actu existentia : Ergo ex eo quod æternitas sit mensura infinita ; non sequitur eam continere res temporales & successiuas , quando sunt præteritæ , vel futuræ , sed solum quando sunt actu præsentis & existentes .

Respondeo , concessio Antecedente , negando consequentiam & paritatem . Disparitas est , quantum ad primum , quod sicut esse Angeli , quamuis superius ad esse naturæ corporeæ , ipsum tamen non continet in se ; sed disparatè se habet ad illud . Ita similiter , licet æuum sit mensura excellentior tempore , ipsum tamen non ambit , sed ad illud disparatè se habet . Secus verò res se habet in æternitate , sicut enim esse diuinum continet in se esse cuiuslibet creaturæ , ita æternitas , quæ est propria mensura diuini esse , non solum est perfectior qualibet alia inferiori mensura , sed etiam omnes illas continet . Potest hoc explicari exemplo loci communis , per respectum  
ad



ad loca particularia , cui comparatur æternitas ; & loci particularis maioris , per ordinem ad alia loca particularia minora , cui simile est æuum . Sicut enim locus particularis maior , non debet necessariò continere alia minora loca ( Affrica enim v. g. licet sit maior Gallia , eam tamen non continet ) ita licet æuum sit duratio maior tempore , quia tamen est mensura particularis , cui tempus non subordinatur essentialiter , non continet res præteritas vel futuras in tempore . E contra verò , quemadmodum locus communis ambit omnia loca particularia , v. g. supremum cœlum omnia alia corpora sibi inferiora : ita æternitas , cum non sit mensura particularis , sicut æuum , sed vniuersalis , debet omnes inferiores durationes , & earum partes , continere realiter , idque modo indiuisibili , & absque successione , eo quod sit formaliter indiuisibilis & tota simul .

Ratio verò disparitatis quoad secundam consistit in eo quod immensitas est infinita solum in ratione virtutis locatiuæ , non vero in linea durationis , sicut æternitas . Vnde cum infinitum solum continere debeat omnem perfectionem possibilem , pertinentem ad propriam lineam , immensitas , quæ est virtus repletiua omnis loci , debet quidem continere & replere omnem locum præsentem , omnesque eius differentias , scilicet sursum , deorsum , propinquum , remotum &c. non tamen loca præterita , vel futura . E contra verò æternitas , omnes differentias ad lineam durationis pertinentes , id est præteritum , præsens , & futurum , sine quo vastissimo & infinito completi

debet, nec expectare quod res ipsæ temporales exsistant, ut illas contineat & mensuret. Vnde Isidorus de summo bono cap. 6. *Omnia tempora præcedit diuina æternitas, nec in Deo præteritum, præsens, & futurum aliquid creditur, sed omnia præsentia in eo dicuntur, quia æternitate sua cuncta complectitur.*

Obijcies secundò: Implicat aliquid existere in mensura superiori & aliena, nisi existat in propria, sibi que intrinseca, repugnat enim v. g. aliquid corpus esse sub coelo, tanquam sub primo locante, nisi existat in aliquo loco inferiori, sibi proprio & adæquato: Sed Antichristus v. g. non existit nunc in duratione & mensura propria: Ergo nec in mensura superiori æternitatis.

Respondeo Maiorem esse veram, quando mensura extrinseca & superior, finita & limitata est, ut accidit in exemplo adducto; secus verò, si sit infinita & illimitata, ut contingit in proposito; æternitas enim est infinita in ratione durationis, & ratione suæ infinitatis, non solum ad tempus præsens, sed etiam ad præteritum & futurum potest se extendere; unde ut aliquid ab ea continetur, non requiritur quod actu existat in propria mensura, sed sufficit quod extiterit, vel extitutum sit.

Obijcies tertio, sequeretur ex nostra sententia, Antichristus simul esse & non esse in æternitate: quod implicat. Probatum sequela: Antichristus secundum nostra principia existit realiter in æternitate, quatenus illa, ratione suæ infinitatis, continet differentiam illam temporis futuri, in qua Antichristus aliquando existet. Sed ex hoc etiam sequitur quod

quod idem Antichristus non sit in æternitate ; cum similiter æternitas , ratione eiusdem infinitatis , contineat differentiam temporis præsentis , in quo Antichristus nondum est : Ergo iuxta nostra principia , Antichristus simul est & non est in æternitate . Sequitur etiam ex nostra sententia , Adamum & Antichristum , creationem mundi , & ultimum iudicium , inter se mutuò coexistere . Sicut enim quæ sunt eadem uni tertio , sunt eadem inter se , ita quæ sunt præsentia & coexistentia uni tertio , debent esse præsentia & coexistentia inter se : Sed in nostra sententia , Adam & Antichristus , creatio mundi , & ultimum iudicium , sunt præsentia & coexistentia uni tertio , nempe æternitati : Ergo & inter se .

Pro solutione horum & similium argumentorum , diligenter observandum est , quod sicut esse divinum , quamvis simplicissimum , æquivaleret multis perfectionibus quæ sunt dispersæ in rebus creatis & potest ab illis diversimodè participari : ita licet eius æternitas sit indivisibilis & tota simul , habet tamen latitudinem quandam virtualem , seu partes virtualiter distinctas , per correspondentiam & analogiam ad nostrum tempus ; ita ut concipiamus illam habere unam partem virtualem , correspondentem temporis præterito , alteram correspondentem temporis præsentis , & alteram correspondentem temporis futuro , & has diversas partes virtuales , diversos æternitatis sinus , nonnullis appellant . Hoc præmissis .

Ad primum respondeo primò , quod sicut ratione distinctionis virtualis , de divinis attri-


butis & relationibus verificari possunt prædicata contradictoria : v. g. quod Deus inquantum iustus punit , inquantum misericors non punit : quod Pater communicat suam essentiam Filio , & non communicat illi paternitatem , vt tract. 1. cap. 3. declarauimus . Ita distinctio partium virtualium in æternitate , sufficit vt de Antichristo verificentur prædicata contradictoria . Secundò dici potest , has propositiones , Antichristus est & non est in æternitate , non esse propriè contradictorias , quia non verificantur de æternitate secundum idem formaliter , sed solùm ratione diuersarum partium virtualium quas continet , & per habitudinem & correspondentiam ad diuersas partes nostri temporis . Sicut istæ , Deus inquantum iustus punit , inquantum misericors non punit . Pater communicat Filio essentiam , & non communicat illi paternitatem , non sunt propriè contradictoriæ , quia verificantur de eadem entitate increata Dei , prout æquiualeat absoluto & respectiuo , & diuersis perfectionibus , quæ sunt dispersæ in rebus inferioribus .

Ad secundum dicendum , quod sicut illa quæ sunt idem vni tertio adæquatè , sunt idem inter se , secus verò illa quæ sunt idem vbi tertio inadæquatè , vt constat in Personis Diuinis , quæ licet sint inadæquatè idem in essentia , non sunt tamen idem inter se . Ita etiam quæ coexistunt & sunt præsentia vni tertio adæquatè & totaliter , coexistunt etiam inter se , non tamen illa quæ coexistunt vni tertio solùm inadæquatè , & non totaliter . Adam verò & Antichristus non coexistunt æternitati

totaliter & adæquatè, & secundùm totam extensionem virtualem quam includit ; sed in adæquatè tantum , & secundùm aliquam solùm eius virtualitatem , quia non cœsistunt illi , quatenus æquiualeat omnibus differentijs temporis , & quatenus in se continet omnes illos sinus & partes virtuales , de quibus antea diximus , sed solùm inquantum continet vnã partem virtualem , correspondentem differentia temporis præteriti , in qua Adamus extitit , & alteram correspondentem tempori futuro , in quo Antichristus existet .

Ex dictis toto hoc capite intelliges , tria esse media , in quibus Deus certò & infallibiliter futura contingentia cognoscit . Primum est decretum prædeterminans , quod ratione suæ infinitæ virtutis & efficacis , habet certam & infallibilem cum illis connexionem . Secundùm , ipsæ causæ secundæ , à Deo prædeterminatæ ; licet enim causæ secundæ , vnde sumptæ , & secundùm se consideratæ , non possint habere rationem medijs , in quo Deus certò & infallibiliter futura contingentia cognoscat , vt §. 1. contra Molinam ostendimus , bene tamen , vt subsunt decreto prædeterminanti , & physicæ prædeterminationi , quæ est huius decreti executio & causalitas . Vnde quando S. Thomas hic art. 13. & alibi docet futura contingentia non posse certò cognosci in causis secundis , hoc debet intelligi de causis secundis , nudè sumptis , & indeterminatis ad agendum , non verò de illis , vt decreto prædeterminanti & diuinæ motioni ac prædeterminationi subiectis : nam quod in talibus causis certò cognoscat futura , expressè docet 1.

contra Gent. cap. 67. & quaest. 12. de verit.  
art. 10. Tertium denique medium, in quo  
Deus non solum certò, sed etiam intuitiue, &  
inuariabiliter cognoscit futura contingentia,  
est eius aternitas, quæ ratione suæ infinitatis,  
indiuisibilitatis, & simultatis, simul, & in  
unico nunc indiuisibili, continet & mensurat  
omnes differentias temporis, & omnia quæ in  
illis successiue fiunt & transeunt. Sicut cen-  
trum, quamuis indiuisibile, adest tamen cui-  
que puncto opposito in circumferentia, & om-  
nibus lineis, ab eadem circumferentia ad cen-  
trum deductis. Vnde Deus (vt ait S. Tho-  
mas hic art. 13. ad 3. & quaest. 2. de verit.  
art. 12.) ita se habet in ordine ad præterita  
& futura, sicut existens in alta specula, ex qua  
intueretur totam viam, & omnes in ea transeun-  
tes; licet enim vnus purgat post alium, & po-  
sterior non videat priorem, ille tamen qui est  
in specula, omnes simul intuetur, & habet si-  
bi præsentēs. Ita similiter Deus habet sibi  
præsentēs in specula suæ aternitatis res om-  
nes temporales & successiuas, etiam præteri-  
tas, & futuras, licet istæ succedant illis, &  
in propria mensura & duratione nequeant si-  
mul existere.



## CAPUT V.

## De scientia mediâ.

**D**ARI in Deo certam & infallibilem futurorum conditionatorum notitiam, docent communiter Thomistæ, & satis apertè colligitur ex varijs Scripturæ testimonijs, quibûs illa futura reuelantur. Nam 1. Regum 23. 3. Regum 11. & Matth. 11. tria prænantiantur futura conditionata, nempe traditio David in manus Saul, si mandat in Ceyla. Peruersio filiorum Israel, si ingrediantur ad filias Gentium, & conuersio Tyrionum & Sydoniorum, si Christus apud illos prædicasset, & fecisset signa ac miracula quæ fecit apud Iudæos.

Nec valet quod respondent Curiel, Corneio, Typhanius, & alij, hæc dici tantum per exaggerationem humanam, vel secundum probabilent tantum cognitionem, quam Deus habebat de huiusmodi futuris, attendendo ad inclinationem causarum secundarum, quæ positis illis conditionibus, de se magis erant inclinatæ ad illos effectus, quam ad oppositos. Unde Scriptura post verba illa Matth. 11. *Si in Tyro & Sydone &c.* addit: *Si in Sodomis factæ fuissent virtutes, quæ factæ sunt in te, fortè mansissent usque ad hunc diem.* Vbi particula *forè*, solam probabilitatem & coniecturam, non autem infallibilitatem & certitudinem denotare videtur. Non valet, inquam, hæc responsio: Primò, quia seductio & auersio cordis filiorum Israel, si ad alienigenas ingrederen-

tur,

tur , vt certissima prænuntiatur 3. Regum  
 11. ait enim Scriptura . *Non ingrediemini ad  
 eas , certissime enim auertent corda vestra .*  
 Quæ particula *certissime* , omnimodam certitu-  
 dinem & infallibilitatem , & non solam pro-  
 babilitatem & coniecturam significat .

Secundò , quia D. Augustinus de bono per-  
 seuer. cap. 9. agens de Tyrijs & Sydonijs ,  
 ait : *Sed nunquid possumus dicere , etiam Ty-  
 rios , & Sydonios , talibus apud se virtutibus  
 factis , credere noluisse , aut credituros non fuis-  
 se , si fierent ; cum eis ipse Dominus attestetur ,  
 quod aëhuri essent magnæ humilitatis peniten-  
 tiam , si in eis facta essent diuinarum illa signa  
 virtutum ?* Manifestè ergo Augustinus ad-  
 mittit certitudinem illius futuri conditionati ,  
 nempe quod credituri essent Tyrij , si talia si-  
 gna vidissent .

Tertiò , D. Thomas quæst. 12. de verit. ar-  
 tic. 10. & 2. 2. quæst. 171. artic. 6. ad 2. do-  
 cet , quod quamuis Prophetæ quandoq; solùm  
 reueletur futurum , quantum ad ordinationem  
 causarum ad ipsum : cognitio tamen Dei , non  
 solùm terminatur ad dispositionem causarum ;  
 sed etiam infallibiliter ad euentum futurum  
 vel non futurum : Ergo tametsi futura condi-  
 tionata reuelata in Scriptura , aliquando Pro-  
 phetæ solùm innotescant , quoad ordinem cau-  
 sarum ad ipsa ; tamen cognitio & præscientia  
 diuina , non solum ad ordinem causarum ter-  
 minari debet , sed etiam ad euentum futurum ,  
 vel negationem eius , sub tali conditione , &  
 consequenter futura conditionata certò & in-  
 fallibiliter cognoscuntur à Deo , vel vt vera ,  
 vel vt falsa determinatè .



Quartò, licet sublatiis decretis conditionatis, non possit dari in Deo certa & infallibilis futurorum conditionatorum scientia; illis tamen admissis, eorum certa notitia Deo denegari non potest; cum enim talia decreta sint ab intrinseco efficacia, ut tractatu sequenti ostendemus, habent nexum infallibilem cum huiusmodi futuris, & sunt medium aptissimum, in quo fundetur certa & infallibilis eorum cognitio, ut capite præcedenti dicebamus de decretis absolutis: At in Deo posse absque inconuenienti, imò & debere admitti decreta absoluta ex parte subiecti, & conditionata ex parte obiecti, constabit ex infra dicendis: Ergo datur in Deo certa & infallibilis futurorum conditionatorum notitia.

Neque obstat quod Scriptura tribuens Deo huiusmodi futurorum scientiam, utatur interdum particula *fortè*, vel *forſitan*; illa enim non semper denotat dubitationem, vel incertitudinem, sed liberi arbitrij mutabilitatem, vel ipsius rei difficultatem. Vnde Hieronymus super cap. 26. Ieremiæ: *Verbum ambiguum forſitan, maiestati Dei non potest conuenire, sed nostro loquitur affectu, ut liberum homini seruetur arbitrium.* Addo quod, etsi talis particula denotaret aliquam dubietatem, vel coniecturalem cognitionem in Deo, respectu futurorum conditionatorum; ea tamen non esset respectu illorum, per ordinem ad decretum diuinum, sed per ordinem ad causas secundas, respectiuè ad quas contingentia dicuntur. Vnde ex illa posset solùm inferri, huiusmodi futura cognosci à Deo coniecturaliter, per respectum ad causas creatas, in quibus fallibilis

ter continetur, non verò per ordinem ad suum decretum, in quo tanquam in causa certa & infallibili continentur. In eodem sensu intelligi & explicari debet Augustinus, cum lib. de prædest. Sanct. cap. 14. explicans illud Sapient. 4. *Raptus est, ne malitia mutaret intellectum eius*, ait: *Diffum est secundum pericula vitæ huius, non secundum præscientiam Dei, qui hoc præsciuit quod futurum erat, non quod futurum non erat*. His enim verbis solum intendit docere, quod in Scriptura Deus reuelauerat futurum, illud secundum ordinem quem dicebat ad causas secundas & inferiores, per ordinem ad quas non habebat omnimodam certitudinem & infallibilitatem, sed probabilem tantum & coniecturalem. Et hic etiam est verus & germanus sensus nonnullorum Thomistarum, qui videntur tribuere Deo cognitionem tantum coniecturalem de huiusmodi futuris; nam manifestè loquuntur de illis, ut contentis in causis secundis, & per respectum ad illas; non verò prout in diuino decreto continentur, & respectuè ad illud.

Hoc præmissò, de quo, ut dixi, nulla fere inter Thomistas est dubitatio, totius difficultatis, & controuersie, quæ inter illos & Patres Societatis versatur, punctum, in hoc positum est, an Deus futura conditionata cognoscat independentè à prædicto decreto conditionato, subindeque in signo rationis illud antecedente, vel solum dependente ab illo, & in signo illud subsequente. Primum docent scientiæ mediæ defensores, secundum eius impugnatores, qui (ut fatetur Typhanus, insignis ex eadem Societate Theologus, & Academiæ

Mussipontana Cancellarius, in lib. de ordine, deque priori & posteriori cap. 25. ) & antiquitate, & numero, & authoritate, longè sunt potiores. Imò cap. præcedenti ait, *nullum alium Theologum ante Molinam; nec per summum quidem de scientia media cogitasse, nec eam ullibi, vel supposuisse, vel adhibuisse, ad ullam siue Scripturæ, siue Theologiæ Scholasticæ difficultatem expediendam.*

## §. I.

*Impugnatur scientia media ex doctrina  
S. Augustini & M. Thomæ.*

**P**Lura possum proferre D. Augustini testimonia, quibus expungi videtur scientia media, seu cognitio futurorum conditionatorum, independens à decreto, eoque anterior; sed in hoc Manuali breuitati studens, ea tantum proferam quæ tradit S. Doctor in libris de prædestinatione Sanctorum, & de bono perseuerantiæ, quos scripsit post acceptas epistolas Prosperi & Hilarij, aduersus reliquias Pelagianorum, & ut epistolis illis responderet. In primo ergo libro cap. 10. sic habet: *Prædestinatione quippe Deus ea præsciuit quæ fuerat ipse factururus.* Et infra: *Quando promisit Abraham fidem Gentium, non de nostræ voluntatis potestate, sed de sua prædestinatione promisit: promisit enim quod ipse factururus erat, non quod homines, &c.* Vbi S. Pater scientiam mediam exclusit, & prorsus eliminauit. Eius enim assertores dicunt, ideò Deum posse prædicare vel promittere, quoniam conuertentur nec ne, quia

quia præscit quinam obtemperaturi sint gratiæ omnibus oblata. At verò Augustinus docet, ideò Deum posse prædicere vel promittere actus nostros, quia potens est illos facere, non de nostra potestate, sed de sua prædestinatione. Et iterum cap. 17. eiusdem libri docet nulla posse Deum præscire futura, nisi in decreto, ex quo plane omnis usus scientiæ mediæ interdicitur. Verba eius sunt: *Hæc est immobilis veritas prædestinationis & gratiæ. Nam quid est quod ait Apostolus, sicut elegit nos in ipso ante mundi constitutionem? quod profecto, si propterea dictum est, quia præsciuit Deus credituros, non quia facturus fuerat ipse credentes, contra istam præscientiam loquitur Filius dicens, non vos me elegistis, sed ego elegi vos electi sunt itaque ante mundi constitutionem, ea prædestinatione qua Deus sua facta præsciuit.*

Respondent Aduersarij, quod dum Augustinus docet Deum futura nostra opera in sua prædestinatione præscire, loquitur de futuris absolutis, non verò de conditionatis; subindeque non excludit scientiam mediam, quæ est cognitio futurorum conditionatorum ante decretum seu prædefinitionem conditionalem voluntatis diuinæ.

Sed contra primò: D. Augustinus ibi loquitur de illis futuris, de quibus à Prospero & Hilario fuerat interrogatus, & de quibus mentionem fecerat in libro de sex quæstionibus Paganorum: At illa sunt futura conditionata, erant enim ibi quæstio de isto futuro: *si Christus tali tempore & loco apud Gentiles prædicasset, an illi credidissent vel non? ut*

constat ex prædictis Epistolis Prosperi & Hilarij : Ergo ibi loquitur de futuris conditionatis .

Secundò , Augustinus non solùm docet , ad præscientiam futurorum requiri prædestinationem seu decretum , sed etiam in ipsa prædestinatione seu decreto , Deum futura cognoscere , vt constat ex illis verbis : *Prædestinatione sua quippe Deus ea præscinit quæ fuerat ipse facturus* & ex istis : *Electi sunt ante mundi constitutionem , ea prædestinatione qua Deus sua facta præscinit* . Sed hoc non potest verificari de futuris etiam absolutis , in sententia Aduersariorum ; licet enim quidam ex illis velut præscientiam absolutorum supponere in Deo decretum absolutum , negant tamen eam in illo fundari , seu illi vt medio inniti , & docent Deum cognoscere omnia futura contingentia , siue absoluta , siue conditionata , in causis secundis ab illo comprehensis , vt existimant Molina & Beccanus ; vel , vt alij magis communiter censent , immediatè in seipsis , ac in eorum veritate obiectina : Ergo illi manifestè Augustino contradicunt , ab eoque longissimè distant .

Tertiò , Ergo Augustinus loquatur de futuris absolutis , si Deus futura absoluta in sua prædestinatione cognoscit , hoc est propter dependentiam quam habent ab illa : Sed ab eisdem causis in statu conditionato dependent futura conditionata , à quibus in statu absoluto dependent futura absoluta : Ergo sicut ista Deus cognoscit in sua prædestinatione , seu decreto absoluto & efficaci , ita & illa in sua prædestinatione , seu decreto conditionato , contemplatur .  
De-

Demum, si Deus futura absoluta in decreto absoluto cognoscat, tale decretum debet esse infallibiliter & ab intrinseco cum illis connectum, ac proinde de se efficax, & causans determinationem voluntatis humanæ; si enim esset purè indifferens, & à libero arbitrio determinationem expectans, non posset esse medium conducent ad certam & infallibilem nostrorum actuum liberorum cognitionem; cum in causa indifferenti, ut indifferens est, non possit certò & infallibiliter cognosci effectus futurus, ut supra contra Molinam & Beccanum ostendimus. Dato autem decretum ab intrinseco efficax, nostras actiones liberas praeuenire, & causare liberam nostri arbitrij determinationem, penitus evanescit scientia media, quæ (ut fatentur eius defensores) non nisi cum decreto indifferenti, & à voluntate creata determinabili, stare potest: Ergo dato quod Augustinus loco citato loquatur de cognitione abiotorum, manifestè tamen excludit scientiam mediam.

Potest etiam impugnari talis scientia ex altero libro Augustini, qui *de bono perseverantia* inscribitur; nam in eo S. Doctor respondens D. Prospero, & suam mentem ac doctrinam exponens, circa quæstionem de qua illum in sua epistola interrogauerat nempe. *At ea quæ sunt à Deo præscita, sint etiam ab eo prædestinata; ita ut præscientia sit subnixæ decreto, vel è contra decretum præscientiæ?* tradit duas regulas generales, ex quibus apertissimè sequitur destructio scientiæ mediæ. Prima habetur cap. 17. ubi loquens de bonis operibus, sic ait: *An fortè nec ista dicuntur prædestinata?* Er-

go nec dantur à Deo , aut ea se daturum esse nesciit . Quid si & datur , & ea se daturum esse præsciuit , perfectio prædestinavit . Quibus verbis S. Doctor aperte docet , hæc duo , præscientiam & prædestinationem , respectu bonorum , in Deo eodem modo se habere , & , vt ita loquar , eodem passu incedere ; subindeque sicut datur in Deo præscientia futurorum conditionalium , ita in illa admittendam esse eorum prædestinationem , seu prædefinitionem conditionalem , & sic vacare scientiam mediam , quæ est præscientia futurorum conditionalium , independens à decreto seu prædefinitione conditionali voluntatis diuinæ .

Secunda regula generalis , quam tradit Augustinus cap. 18. eiusdem libri , est : Quando in Scriptura vel SS. Patribus inuenitur nomen præscientiæ , & agitur de vocatione electorum , nomine præscientiæ debet intelligi prædestinatio . Verba eius sunt ; *Deum prædestinasse est hoc præscisse quod fuerat ipse facturus .* Quid ergo nos prohibet , quando ad aliquos verbi Dei tractatores legimus Dei præsentiam , & agitur de vocatione electorum , eandem prædestinationem intelligere . Quæ regula esset omnino falsa , si daretur aliqua præscientia explorans futuritionem rerum , independens à decreto , illudque præueniens , vt constat : Ergo D. Augustinus non agnoscit in Deo talem præscientiam , nec per consequens scientiam mediam .

## Quid de D. Thoma ?

In omnibus semper Augustino adhæsit fidelissimus eius discipulus S. Thomas, quare non potuit ei placere scientia media, si Augustino displicuerit; nec ab illo approbari, si ab isto fuerit reprobata. Et certè plura extant doctrinæ huius Doctoris Angelici principia, quæ apertè repugnant scientiæ mediæ, & quibus penitus iugulatur & extinguitur.

In primis enim vnum ex principijs quæ S. doctor sæpe repetit ac inculcat, tanquam præcipuum suæ doctrinæ fundamentum est, Deum non cognoscere res immediatè in seipsis, sed solùm in seipso, & in essentia sua tanquam in causa, & medio prius cognito. Ita expressè docet hic qu. 14. art. 5. in corpore, quod his verbis, concludit: *Sic igitur dicendum est, quod Deus seipsum videt in seipso; alia autem à se videt, non in ipsis, sed in seipso.* Idem reperit in resp. ad primùm. Et 1. contra gentes cap. 49. probat ex Dionysio, Deum omnia cognoscere in sua essentia tanquam in causa. Et cap. 65. de ratione 5. sic ait: *Cognitio Dei est de tribus omnibus per causam; se enim cognoscendo, qui est omnium causa, alia quasi suos effectus cognoscit.* Quod cap. 67. extendit ad futura contingentia, & cap. 68. ad actus liberos voluntatis nostræ, ait enim: *Deus scit omnes voluntates nostras (id est volitiones) per hoc quod est nobis causa volendi.* Ex quo principio sequitur, manifesta destructio scientiæ mediæ; cum enim essentia diuina non sit causa rerum, nisi vt habet adiunctam voluntatem, &

nisi



nisi ut determinata per decretum ( cò quod Deus non sit agens ad extra per modum naturæ, sed per modum liberi ) si Deus in illa tanquam in causa , & medio priùs cognito , futura contingentia & libera contemplatur , manifestum est , illum ea non cognoscere antecedenter ad suum decretum per scientiam mediam .

Secundò idem S. Doctor in 1. dist. 39. qu. 1. art. 1. ad 5. docet scientiam Dei respectu futurorum contingentium subiacere libertati voluntatis diuinæ , quod repetit art. 2. ad 1. his verbis : *Ipsum scire in Deo est subiectum libertati voluntatis* : At scientia quæ subiacet libertati voluntatis diuinæ , subiacet diuino decreto , illique ut medio innititur : cùm decretum sit ipsam exercitium voluntatis & libertatis diuinæ : Ergo iuxta D. Thomam scientia Dei respectu futurorum contingentium fundatur in decreto, illique ut medio innititur, subindeque non est scientia media, quæ est independens à decreto , eoque anterior .

Nec valet , si dicas, D. Thomam ibi tantùm loqui de scientia absolutorum , non verò de scientia conditionalium . Hoc enim dato , & non concessio , nihilominus præcluditur aditus scientiæ mediæ ; quia , ut supra dicebamus , si præsentia absolutorum nitatur decreto , illud debet esse de se efficax , & ab intrinseco cum illis connexum , subindeque excludens scientiam mediam , quæ supponit decretum indifferens , & à voluntate humana quoad speciem actus determinabile .

Tertò D. Thomas hic qu. 14. art. 8. ad 1. & qu. . de ver t. art. 14. ad 1. docet non

ideò res sciri à Deo, quia futuræ sunt, sed ideò futuras esse, quia sciuntur à Deo. Vnde explicat dictum Origenis dicentis, *quia futurum est aliquid, ideò scitur à Deo*, & dicit, hoc non esse intelligendum secundùm causam essendi, sed tantùm secundùm causam inferendi. Hoc verò negant vnanimiter assertores scientiæ mediæ, & meritò, quia illo eam vident interimi; nam cùm scientia visionis non sit causa rerum, nisi supposito decreto, si nihil est futurum, nisi quia Deus videt esse futurum, profecto nihil intuetur futurum ante, sed post decretum.

Quartò idem S. Doctor eadem quæst. 14. eodemque art. 8. ad 5. docet scientiam Dei esse priorem rebus, nec ab illis mensurari, quantum ad veritatem & certitudinem, sed potius esse illarum regulam & mensuram, ait enim: *sicut scibilia naturalia sunt priora scientia nostra, & mensura eius: ita scientia Dei est prior quam res naturales, & mensura ipsarum*. Et 1. 2. qu. 93. art. 1. ad 3. *Ratio intellectus divini (inquit) aliter se habet ad res, quam ratio humani intellectus. Intellectus enim humanus est mensuratus a rebus, ut scilicet conceptus hominis non sit verus propter seipsum, sed dicitur verus ex hoc quod consonat rebus. Intellectus verò divinus est mensura rerum, quia unaquæque res in tantum habet de veritate, in quantum imitatur intellectum divinum*. At cùm illo Angelici Doctoris principio, non posse stare scientiam mediam, evidens est, quia talis scientia non est regula & mensura certitudinis & veritatis futurorum conditionalium, sed potius eorum futuritionem & ve-

ritatem obiectiuam supponit, eamque dumtaxat speculatur & explorat: Ergo scientia media principijs doctrinæ D. Thomæ repugnat.

Quintò S. Thomas qu. 6. de verit. art. 3. cum sibi obieciſſet contra certitudinem prædestinationis, quod prædestinatio non habet certitudinem absolutam, sed tantum conditionatam, ex hypothesi, quod voluntas humana consentiat, responderet: *Ad quartum dicendum, quod causa secunda quam oportet supponere ad indicendum prædestinationis effectum, etiam ordini prædestinationis subiacet, & ideo ordo prædestinationis, quamvis sit cum suppositione voluntatis humanæ, nihilominus tamen absolutam habet certitudinem.* Vbi apertè docet, prædestinationem non supponere scientiam explorationem consensus; quia nimirum ipse consensus prædestinationi & decreto subiacet, illudque subsequitur. Quod si consensus subiaceret decreto & prædestinationi, planum est, antequam Deus de tali consensu habeat prædestinationem seu decretum, illum non esse futurum, nec proinde posse prævideri ut futurum, per scientiam mediam.

Demum evidens est scientiam mediam, destructo eius obiecto, stare non posse: At D. Thomas apertè excludit obiectum scientiæ mediæ, nimirum veritatem obiectiuam determinatam propositionem contradictoriarum de futuro contingentium lect. 13. super c. 8. libri periherm. denegat huiusmodi propositionibus veritatem determinatam: quia futurum contingens non habet esse determinatum in causis liberis. Et in 1. sent. dist. 38. q. 1. art.

5. ad 2. sic ait: *Futurum contingens non est determinatè verum antequam fiat, quia non habet causas determinatas.* Item q. 16. de malo art. 7. *Ea (inquit) quæ sunt ad utrumlibet, non possunt præcognosci in suis causis determinatè, sed sub distinctione, utpote. quia erunt vel non erunt, sic enim habent veritatem.* Ergo scientia media cum principijs doctrinæ D. Th. stare non potest.

### §. II.

*Confutatur scientia media ratione fundamentalis, & à priori, desumpta ex definitione futuri.*

**H**Æc ratio potest sic breuiter proponi: Ante decretum & prædefinitionem voluntatis diuinæ, nihil est absolutè, vel conditionate futurum, nec proinde eognoscibile ut tale ab intellectu diuino: Ergo pro priori ad illud non datur in Deo certa & infallibilis futurorum conditionatorum cognitio, quæ à Recentioribus appellatur *scientia media*. Consequentia patet, Antecedens probatur. Futurum est illud quod est determinatum in causa, ab habendam existentiam pro tempore sequenti: Sed ante decretum & prædefinitionem voluntatis diuinæ, nihil est absolutè vel sub conditione determinatum in causa, ad habendam existentiam pro tempore sequenti, cum decretum sit ipsa determinatio causæ primæ: Ergo pro illo priori nihil est absolutè vel conditionatè futurum. Minor est euident, Maior verò probatur primò ex D. Thoma hic qu.

16. art. 7. ad 3. ubi sic habet: *Omne quod est, ex eo futurum fuit, antequam esset, quia in causa sua erat ut fieret, unde sublata causa non esset futurum illud fieri.* Et qu. 14. art. 3. *Alio modo potest considerari contingens, ut est in sua causa, & ita consideratur ut futurum.* Item qu. 2. de verit. art. 12. ad 7. *Cum dicitur hoc est futurum, assignatur ordo qui est in causis illius rei ad productionem eius.* Ordo autem ille nihil est aliud, quam determinatio & præparatio causarum, ad rei productionem, ut asserit idem S. Doctor in toto illo articulo, & præcipuè in resp. ad 7. Ergo iuxta doctrinam D. Thomæ, futurum est illud quod est determinatum in causa, ad habendam existentiam pro tempore sequenti.

Ratio etiam id suadet, nam rem esse futurum, est aliqua demonstratio realis, non quidem intrinseca, sed extrinseca, denominatio enim intrinseca non potest competere rei non existenti: Ergo debet ab aliqua forma reali & extrinseca provenire: At talis forma non potest esse alia, quam determinatio causæ ad eius productionem: Ergo rem esse futuram, nihil est aliud quam illam esse determinatam in causa ad habendam existentiam pro tempore sequenti. Minor probatur: Talis forma non potest esse ipsa causa præcisè ut potens ad producendum effectum; cum ut sic tantum tribuat denominationem possibilis: non potest etiam esse eadem causa, ut actu influens esse in effectum, sic enim dat denominationem existentis: Ergo solum potest esse eadem causa, ut determinata ad dandam illi existentiam in duratione sequenti.

Ex quo intelliges, falsum esse quod dicunt nonnulli defensores scientiæ mediæ, ut vim huius argumenti eludant; nempe ad futuritionem non requiri necessariò determinationem in causa, sed sufficere quod res habitura sit aliquando existentiam, tametsi nulla quoad hoc præcesserit determinatio in causa. Si enim hæc responsio & doctrina esset vera, sequeretur res possibles conceptas in statu meræ possibilitatis, posse dici futuras; nam de Antichristo v. g. in statu meræ possibilitatis concepto, verum est dicere, quod aliquando erit; quia nimirum causa prima, in sequenti signo, per decretum liberum suæ voluntatis se determinavit ad dandam illi aliquando existentiam.

Ex hoc etiam impugnata manet aliorum Recentiorum evasio, & nova doctrina, qui ut pariter sese ab hoc argumento expediant, dicunt futurum nihil reale positivum importare, futuritionis tempore existens, sed solam carentiam existentiae pro tunc, ex qua & existentia postea habenda, futuritio aut futurum constituitur. Hanc enim doctrinam esse falsam, ex eo constat, quod non alia ratione, pro signo possibilitatis puræ, non potest de aliquo verè affirmari, quod sit futurum, nisi quia pro tali signo non convenit ei aliquod prædicatum, illud distinguens à re purè possibili, & cum statu puræ possibilitatis repugnans: Ergo ut tempore futuritionis de aliquo verè affirmetur esse futurum, debet illi convenire prædicatum illud distinguens à re purè possibili, & cum statu puræ possibilitatis repugnans: Sed carentia existentiae, quæ, in illorum Recentio-

rum

rum sententia, solum conuenit rei futurae, tempore futuritionis, non est praedicatum cum statu purae possibilitatis repugnans, nec distinguens a pure possibili, ut constat: Ergo praeter carentiam existentiae, debet aliud assignari tempore futuritionis, a quo res dominetur futura, & distinguatur a mere possibili, quod non potest esse aliud, quam determinatio causae ad dandam illi existentiam pro tempore sequenti.

Dices, quod licet carentia existentiae non sit praedicatum distinguens a pure possibili, carentia tamen existentiae, cum ordine ad existentiam habendam, potest distinctionem istam praestare, cum non conueniat rei in statu purae possibilitatis.

Sed contra: Ordo ad existentiam habendam non competit rei futurae a se, sed a sua causa, ut constat: Sed non a causa, ut indifferenti & indeterminata ad eius productionem, cum ut sic tribuat tantum denominationem possibilis: Ergo solum ei competit a causa ut determinata ad productionem illius, subindeque ab ipsa determinatione causae. Vnde D. Thomas loco supra citato docet quod ordo qui est in causa ad productionem rei futurae, nihil aliud est, quam determinatio & praeparatio causarum. Et D. Augustinus cap. 9. de corrept. & gratia, & lib. 6. de Genesi ad litt. cap. 17. dicit Deum facere futura, nihil aliud esse, quam eorum causas praeparare: Et Tract. 68. in Ioan. asserit quod Deus fecit futura, ea praedestinanda.

Dices rursus: si futurum esset illud quod est determinatum in causa, posset aliquid esse



futurum, quod nunquam erit præsens & existens; potest enim contingere, causam secundam esse ad aliquem effectum determinatam & inclinatum, qui tamen in re non ponetur, sed eius oppositum, quia impediatur ab alia causa superiori & potentiori: At hoc videtur absurdum: Ergo & illud.

Respondeo nihil posse dici vel esse futurum, per ordinem ad causam primam, omnipotentem, & immutabilem, quod non ponatur aliquando in tempore, bene tamen per ordinem ad causas secundas, mutabiles, & contingentes, ut colligitur ex Aristotele 2. de generat. textu 64. ubi sic ait: *Futurus quis incedere, non incedet.* Quia nimirum determinatio illa, qua quis volendo incedere, faciebat futuram deambulationem, vel mutatur a voluntate, vel impeditur ab alio, ne sortiatur suum effectum. Idem docet S. Thomas 1. Perihierm. cap. 8. lect. 13. & 1. p. quæst. 16. art. 3. & quæst. 19. art. 7. ad 2. ubi hæc scribit: *Deus aliquando pronuntiât aliquid futurum, secundum quod continetur in ordine causarum inferiorum, puta secundum dispositionem naturæ vel meritorum, quod tamen non fit, quia aliter est in causa superiori divina.* Sicut cum Isaias prædixit Ezechia, *Dispone domui tue, quia merieris & tu, & non vives.* Neque tunc ita evenit, quia ab æterno aliter fuit in scientia & voluntate divina, quæ immutabilis est.



## §. III.

*Alia ratio fundamentalis.*

**F**uturitio conditionata transfert rem cui competit, à statu parte possibilitatis, ad statum aliqualis futuritionis: Sed implicat rem transire à statu puræ possibilitatis, ad statum aliqualis futuritionis, nisi medio diuino decreto: Ergo illud debet præcedere futuritionem rerum conditionatam, & per consequens pro priori ad illud non possunt contingentia esse nec cognosci à Deo ut conditionatè futura, per scientiam mediam. Maior constat, futurum enim conditionatum mediat inter merè possibile & absolutè futurum, subindeque futuritio conditionata non relinquit rem in statu puræ possibilitatis, sed illam transfert ad statum aliqualis futuritionis. Minor verò probatur multipliciter: Primò quia transitus ille non competit rei ratione sui, sed dependenter ab influxu causæ primæ: At hæc non agit nisi medio decreto: Ergo nequit intelligi transitus iste, nisi mediante decreto.

Secundò, futuritio conditionata est aliquid reale & non merum ens rationis: Sed omnis realitas competens rebus, illis conuenit dependenter à Deo, ut agente per intellectum & voluntatem, & consequenter medio decreto libero: Ergo futuritio conditionata nequit competere rebus nisi dependenter à decreto, subindeque implicat rem transire à statu meræ possibilitatis ad statum futuritionis conditionata, nisi illo mediante.

Tertiò , futuritio conditionata dicit aliquam actualitatem , quam non dicit mera possibilitas , dicit enim ordinem ad existentiam ut habendam ; si ponatur aliqua conditio , à quo præscindit id quod est purè possibile : At maior illa , actualitas ordoque ille ad existentiam sub conditione habendam , non potest subterfugere diuinam causalitatem ; alioquin daretur gradus aliquis actualitatis & existentiae , qui à Deo ut primo ente & primo actu non procederet : Ergo debet à Deo ut prima causa procedere , mediante libero decreto suæ voluntatis .

Quartò , quod est futurum conditionatè , respicere debet voluntatem diuinam alio modo dispositam , quam si esset merè possibile : At quod est merè possibile respicit voluntatem diuinam , ut omnino indifferentem & indeterminatam : Ergo quod est conditionatè futurum , illam respicere debet ut determinatam per aliquod liberum Dei decretum ; non absolutum , sed conditionatum .

Quintò , conditionata futuritio non conuenit rei creæ à seipsa , sed per respectum ad causam primam : At non per respectum ad illam , ut præcisè potentem , cum ab illa sic considerata , sumatur solùm ratio possibilis : Ergo per respectum ad illam , ut determinatam per decretum .

Denum non minùs dependent futura conditionata à decreto conditionato , quam absoluta ab absoluto . Sed nihil potest transire à statu puræ possibilitatis , ad statum futuritionis absolutæ , nisi mediante decreto absoluto , ut capite præcedenti conclusione quarta , qua-

maior rationibus demonstrauimus : Ergo nec futura conditionata possunt transferri à statu meræ possibilitatis , ad statum futuritionis conditionatæ , nisi mediante decreto conditionato .

Respondent primò Aduersarij , hoc inter futura absoluta & conditionata interessè discrimen , quod absoluta dependent à decreto actuali & exercito , seu actu in Deo existente , conditionata verò non requirunt decretum actu existens in voluntate diuina , sed tantùm decretum quod esset , si poneretur conditio . Existencia enim causæ ( inquit ) habere debet proportionem cum existentia effectus ; unde sicut necessarium est vt effectui qui est , assignetur causa quæ pariter sit , ita sufficit si effectui qui erit , assignetur causa quæ erit , & effectui qui esset , causa quæ esset . Quia ergo futura conditionata , nec sunt , nec erant , sed solum essent , si conditio poneretur , facis est quod pro eis assignetur in Deo aliquod decretum quod esset , si poneretur conditio , subindeque non realiter , sed obiectiuè tantùm existens in Deo , pro illo priori quo cognoscit res conditionatè futuras per scientiam mediam .

Verùm hæc solutio , & doctrina , quæ est præcipuum azylum & latibulum scientiæ mediæ , multipliciter confutari potest . In primis enim decretum illud , quod Aduersarij dicunt obiectiuè existere in mente diuina , pro illo priori quo cognoscit futura conditionata , non obijcitur intellectui diuino , vt merè possibile , cum à decreto purè possibili non sumatur denominatio futuri , sed tantùm possibilis , in effectibus voluntatis diuinæ : non obijcitur etiam

pro tunc vt futurum , cū repugnet Deum cō-  
gnoscere sua decreta vt futura , vt cap. præ-  
cedenti §. 1. concl. 2. contra Suarez ostendi-  
mus , & fatentur alij defensores scientiæ me-  
diæ : Ergo pro illo priori obijcitur intellectui  
diuino, vt præsens , & exercitè existens , cū  
inter possibile , futurum , & præsens , nullum  
detur medium ; & consequenter , cū intelle-  
ctus diuinus sit omninò infallibilis , diuinum  
decretum verè pro nunc est præsens , & exer-  
citè existens in Deo .

Secundò , rem esse futuram sub conditione ,  
pro tunc futuritionis , est liberum Deo : Ergo  
pro illo tunc debet esse volitum ab ipso , &  
consequenter debet in illo esse decretum a-  
ctuale & exercitum . Veraque consequentia  
patet , Antecedens vero constat ex eo quod ni-  
hil est necessarium respectu Dei , nisi essen-  
tiæ rerum , & illarum connexiones essen-  
tiales .

Tertiò , licet res possibilis non sit effectus  
existens de facto , sed tantum possibiliter , ni-  
hilominus tamen requirit essentialiter omni-  
potentiam , vt de facto existentem . Item futu-  
ra absoluta non sunt actu , sed erunt in aliqua  
differentia temporis , & nihilominus requirunt  
in Deo aliquod decretum actuale & exerci-  
tum , vt fatentur Aduersarij ; Ergo quamuis  
effectus sub conditione futurus , non sit exi-  
stens de facto , sed futurus sub conditione , ni-  
hilominus exposcit essentialiter decretum di-  
uinum exercitè existens in Deo .

Confirmatur & magis illustratur hæc ratio ;  
Si non obstante quod res absolutè futura non  
existat , sed extitura sit , petit nihilominus de-  
cre-

cretum existens de facto in Deo, iam non est eadem ratio de diuinis decretis & de alijs causis, siquidem illæ solùm vt futuræ exiguntur ad absolutam futuritionem suorum effectuum, decretum autem diuinum, vt exercitè existens, ad illam requiritur, & consequenter ex eo quod aliæ causæ, solùm vt futuræ sub conditione, exigantur ad conditionatam futuritionem suorum effectuum, non rectè colligunt Aduersarij, hoc idem sufficere in decretis diuinis. Vnde quando dicunt, quod existentia causæ habere debet proportionem cum existentia effectus, subindeque effectui qui erit, sufficit assignare causam quæ erit, & effectui qui esset, causam quæ esset, distinguendum est: quando causæ repugnat futuritio, nego: quando illi non repugnat, transeat. Sic quia diuino concursui non repugnat futuritio, effectus futurus non requirit illum vt præsentem & de facto existentem: è contra verò, quia diuino decreto repugnat futuritio, etiam virtualis, vt supra contra Suarez ostendimus, & nobiscum fatentur alij scientiæ mediæ defensores, futura siue absoluta siue conditionata, decretum præsens, actuale, & exercitum in Deo requiritur.

Dices, quòd licet diuino decreto repugnet futuritio absoluta, non tamen conditionata.

Sed contra: Ideo illi repugnat absoluta futuritio, quia repugnat Deo absoluta mutatio: At illi etiam repugnat mutatio; supposita aliqua conditione: Ergo diuino decreto repugnat etiam futuritio conditionata. Minor constat, cum enim Deus sit omnimodè immutabilis,

Es, diuinæ voluntati, sub quacunque conditione, repugnat mutari. Maior verò communiter asseritur à Theologis in Tractatu de voluntate Dei, vbi docent, quod si diuinum decretum esset absolutè futurum, mutaretur diuina voluntas, quia transiret de non volente, pro aliquo instanti in quo, in volentem in alio.

Confirmatur & magis illustratur hæc ratio: Futuro conditionato repugnare nequit transitus in futurum absolutum, si purificatur conditio: At licet purificetur conditio; repugnat diuinis decretis quod sint absolutè futura, aliàs mutaretur diuina voluntas: Ergo illis etiam repugnat esse futura sub conditione.

Respondent secundò aliqui Recentiores, negando maiorem primi argumenti, nempe quod futuritio conditionata transferat rem cui competit, à statu puræ possibilitatis, ad statum aliquis futuritionis, quia (inquirunt) ad verum transitum requiritur, rem aliquod tempus sub priori statu transigere, antequam ad alterum deducatur, quod rebus futuris competere nequit, cum futuritio illis conueniat ab æterno. Sed si valeret hæc solutio seu ratiocinatio, posset aliquis negare, solem, & Angelum, & quamlibet rem permanentem, ab æterno creatam ( vt creari nihil repugnat ( transire à non ente & nihilo ad esse, quod absurdum est, cum ad talem transitum satis sit ex proprijs meritis deberi rei creatæ statum nihili, & potuisse per totam æternitatem, vel ad tempus, in eo detineri. Quid verò horum deest futuris quibuscunque, à Deo præcitis ab æterno, vt illis non minus transitus à possibili ad futurum competat, quam ut rebus ab æterno creatis transitus à

nihilò ad esse ? cum re vera eadem res quæ modò dicitur futura , potuerit esse sub statu purè possibilis , & talis status ei debeat .

## §. IV.

*Alia impugnatio scientiæ mediæ , petita ex principijs Aduersariorum .*

**H**Oc argumentum potest sic breuiter proponi : Non potest dari in Deo scientia mediæ , si nullum possit dari instans , vel signum rationis , in quo res contingentes & liberae sint prius cognoscibiles vt conditionatè futuræ , quam vt futura absolutè : Sed ita res se habet , iuxta Aduersariorum principia : Ergo iuxta illa nō potest dari in Deo scientia mediæ . Maior constat , scientia enim mediæ , quæ circa conditionata versatur , est priori scientia absolutorum , cū , vt docent eius defensores , Deum dirigat in suis decretis absolutis . Minor verò , in qua est difficultas , sic ostenditur . Aduersarij docent res contingentes & liberae , esse conditionatè futuras , in signo antecedenti diuinum decretum , & vt tales à Deo cognosci per scientiam mediā : quia possunt de illis formari propositiones contradictoriæ , quarum vna debet esse determinatè vera , & altera falsa , & consequenter obiectum illarum determinatè futurum , vel non futurum . Vel vt alij volunt , quia in tali signo potest fieri suppositio euentus futuri , seu supponi quod res illa aliquando erit , si ponatur talis vel talis conditio : Atqui hæ duæ causæ seu probationes , pro veritate & futuritione conditionerum in signo an-  
an-



antecedenti diuinum decretum, militant etiam pro futuris absolutis; quia ex illis pariter formari possunt propositiones contradictoriae, & supponi quod aliquando erunt: quid ergo impedit, quin in re conditionatorum fruantur, illisque pariter competat determinata veritas obiectiua & futuritio, in illo signo antecedenti diuinum decretum, in quo Aduersarij constituunt in Deo scientiam mediam. Imò cum propositiones contradictoriae de conditionatis, componantur ex absolutis simplicibus, & quaelibet pars sit aliquo modo prior toto, propositiones contradictoriae de futuris absolutis, prius debent esse verae & cognoscibiles à Deo, quam contradictoriae de futuris conditionatis, subindeque earum obiecta, nempe futura absoluta, prius habere rationem futuri, quam conditionata, & per consequens scientia absolutorum in Deo præcedere debebat conditionatorum notitiam, si standum sit. Aduersariorum principijs. Vnde P. Martinonius, nouissimus Societatis scriptor hic disp. 9. sect. 6. num. 53. sic discurret: *Futura conditionatè non minus vera sunt, quam ea quæ sunt contingenter absolute futura, sunt determinatè vera: Ergo futura conditionatè, sunt similiter determinatè vera. Minor patet ex iam dictis, Maior probatur. Quia non minus est contradictio præcisa & immediata inter has duas propositiones, si Petrus ponatur in his circumstantijs, negabit Christum, & si ponatur in his circumstantijs, non negabit Christum, quam sit inter has duas: Petrus positus in his circumstantijs negabit Christum, & Petrus positus in his circumstantijs non negabit Christum: ubicumque autem est contradictio præ-*



*præcisa & immediata, unum extremum est determinatè seu distinctè falsum; & alterum est determinatè seu distinctè verum, quare non minus in conditionatè quam absolutè futuris, unum est verum determinatè, & alterum falsum. Quibus verbis expressè docet, futura contingentia, tam absoluta, quam conditionata; esse determinatè vera, & cognoscibilia ab intellectu diuino, in signo antecedenti decretum; imò ex veritate obiectiua, quam supponit inesse futuris absolutis ante decretum, probat determinatam veritatem in conditionatis: Ergo ipsa Aduersariorum principia penitus euertunt scientiam mediam,*

*Ex his intelliges, talem scientiam non esse necessariam ad dirigendum Deum in suis decretis absolutis, vt docent eius defensores; imò potius ad hoc esse prorsus inutilem; cum iuxta illorum principia, scientia conditionatorum non possit esse vel concipi priùs in Deo præscientia absolutorum, vt iam ostendimus. Non potest etiam esse necessaria vel utilis ad saluandam hominum libertatem, cum potius eam penitus destruat & euertat, si standum sit Aduersariorum principijs, quod duplici argumento euinco. Primum est: Illa scientia tollit libertatem, quæ supponit res esse futuras, ex vi & natura oppositionis contradictoriæ: Atqui scientia media hoc supponit: Ergo libertatem destruit. Maior constat, cum enim oppositio contradictoria sit causa necessaria necessitate absoluta, vtpote fundata in illo primo principio quodlibet est vel non est, quo nihil potest esse vel concipi magis necessarium, futuritio ad illam consequens, & ex il-*

la proueniens non potest esse libera vel contingens, sed naturalis tantum & necessaria. Minor verò sic ostenditur: Assertores scientiæ mediæ docent, propositiones contradictorias de futuris contingentibus, non solum conditionatis, sed etiam absolutis, habere determinatam veritatem vel falsitatem, ratione oppositionis contradictoriæ, ut iam ostendimus ex Patre Martinono, qui id apertè profitetur, cum cæteris Societatis Doctoribus: Ergo cum veritas obiectiua futurorum contingentium, supponat illorum futuritionem, imò nihil aliud sit, quam ipsa futuritio rei contingentis, ut obiecta intellectui diuino, & ab ipso cognita, vel cognoscibilis, manifestum est, iuxta illorum principia, determinatam futuritionem rerum contingentium, ex vi & natura oppositionis contradictoriæ prouenire.

Alterum argumentum sic breuiter proponi potest: Illa scientia tollit libertatem & contingentiam rerum, quæ supponit eas esse futuras, ante primum principium, & veluti primam radicem contingentiæ & libertatis creatæ: Atqui scientia mediæ hoc supponit: Ergo libertatem tollit. Maior constat. Minor probatur. Scientia mediæ supponit res esse futuras, saltem conditionatè, ante diuinum decretum: Sed illud est primum principium, & veluti prima radix libertatis & contingentiæ rerum, cum sit exercitium primi liberi, & primum in genere liberum, primumque in quolibet genere, sit causa & mensura cæterorum: Ergo scientia mediæ supponit res esse futuras, saltem conditionatè, ante primum principium, primamque radicem libertatis & contingentiæ  
re-

terum . Plura alia absurda & inconuenientia , sequuntur ex scientia media , vt quod tollat à Deo dignitatem primæ causæ , primique liberi & determinantis , ac supremum dominium quod habet in voluntates nostras , quod illi attribuat modum concurrendi cum causis liberis , cœcum & ignarum , vagum & indeterminatum , quod viam sternat duplici Semipelagianorum errori , sed de his fusè in Clypeo Theologiæ Thomisticæ disp. 6. art. 6.

## §. V.

*Præcipuæ electiones solvantur ?*

**O**missis pluribus Scripturæ testimonijs , quæ solum probant dari in Deo certam & infallibilem futurorum conditionatorum notitiam , quia illa non negamus ; sed in decretis conditionatis fundari contendimus , vnicum restat , quod Molina *Lydium lapidem* appellat , & in quo præcipuum scientiæ mediæ robur consistere putat , habeturque Matth. 11. vbi Christus obiurgat & increpat incredulitatem Iudæorum , comparatione Tyrriorum , qui eisdem miraculis visis , magna poenitentiae signa dedissent : talis verò increpatio fuisset iniusta , si poenitentia Gentilium in statu conditionato , fuisset à Deo cognita in decreto efficaci & prædeterminante illos ad poenitentiam , ex hypothese prædicationis Christi ; potuissent enim Iudæi iustam adhibere responsionem , nimirum ipsos non egisse poenitentiam , visis miraculis Christi , quia non habuerunt tale decretum præparans illis gratiam efficacem , & prædeterminantem ad poenitentiam , sed au-  
xilia

xilia duntaxat sufficientia, quæ dant tantum posse, & non applicant voluntatem ad actum, sicut efficacia & prædeterminantia.

Verum quia hæc difficultas pertinet ad Tractatum de auxilijs, & de illa redibit sermo tractatu sequenti, cum agemus de efficacia voluntatis diuinæ, nunc breuiter respondeo. Iudæos iustè increpatos fuisse à Christo, exemplo Tyrriorum & Sidoniorum, non solum quia ipsi erant pares in auxilijs sufficientibus, quæ dantur ad posse, sed etiam, quia plura gratiæ efficaci, quæ datur ad agere, impedimenta præstabant, ratione maioris entitatis, indurationis, & ingritudinis. Vnde Augustinus de bono perseuer. cap. 14. *Non erant sic excæcati, nec sic induratum cor Tyrriorum & Sidoniorum, quoniam credidissent, si qualia viderunt isti (scilicet Iudæi) signa vidissent*, Solutio est D. Thomæ 3. contra Gent. c. 59. ubi docet, quod quamuis homo non possit se disponere ad primam gratiam, potest tamen impedimentum præstare illius receptioni, & se reddere illa magis, vel minus indignum, per minora vel graviora peccata. Sicut, etsi homo non possit lumen Solis ad se trahere, potest tamen eius illuminationem impedire, claudendo ianuam vel fenestram. *Licet (inquirit) aliquis per motum liberi arbitrij, diuinam gratiam nec promereri nec aduocare possit, potest tamen seipsum impedire ne eam recipiat, & cum hoc sit in potestate liberi arbitrij, non immerito imputatur ei qui impedimentum præstat gratiæ receptioni.* Sed de hoc fusiùs loco citato.

Obijciunt secundò Aduersarij aliqua SS. Patrum testimonia, quæ videntur fauere scientiæ

tia mediæ : Augustinus enim lib. de prædest. Sanctorum cap. 10. docet prædestinationem non posse esse sine præscientia , bene tamen præscientiam sine prædestinatione ; Ergo censet posse dari præscientiam independentem à prædestinatione seu prædefinitione voluntatis diuinæ , subindeque scientiam mediam . Unde ad Simplicianum q. 2. inquit , *Deum sic vocare eum cuius miseretur , quomodo scit ei congruere , ut vocantem non respuat* : Et D. Thomas 3. p. q. 1. art. 3. ad 4. ait quod *prædestinatio supponit præscientiam futurorum* : Et non futurorum in statu absoluto , aliàs prædestinatio non haberet causam meritoriam in nobis : Ergo in statu conditionato .

Ad Augustinum respondeo in primo testimonio ipsum manifestè loqui de peccatis , quæ Deus, præscit in decreto permissiuo , sed non prædestinat, nec decernit, ait enim : *Prædestinatione quippe Deus ea præsciuit quæ fuerat ipse factururus ; præscire autem potest quæcumque non facit, sicut quæcumque peccata* . In secundo verò , cùm ait , *Deum sic vocare eum cuius miseretur , quomodo scit ei congruere, &c.* Hoc non debet intelligi de scientia merè speculativa ; & independente à decreto , sed de practica , & fundata in decreto , quæ mediante gratia efficaci faciat talem congruitatem & coaptationem , iuxta illud Apostoli ad Hebræos 13. *Aptet vos Deus in omni bono , faciens in vobis quod placet coram se* . Id est , faciat vos velle omne bonum , ut exponit D. Thomas lect. 3. In eodem sensu Cardinalis Toletus annor. 54. in cap. 7. Lucæ interpretatur verba Chrysostomi homil. 31. & 65:

in Matthæum, ubi agens de vocatione Pauli & Matthæi, ait *Deum tunc eos vocasse quando nouerat consensuros*, dicit enim sensum illorum verborum esse istum, Deum tunc eos vocasse, quando præsciuit se operaturum in illis, ut obtemperarent. *Nisi sic intelligas doctrinam Chrysostomi* (inquit) *illi non consentio, sed contrariam omino veram existimo.*

Ad locum D. Thomæ desumptum ex 3. parte respondeo ibi sermonem esse de absolute futuris, ut constat ex intento argumenti, & eius solutione, qua intendit prædestinationem Christi fuisse post præuisionem peccati primi hominis, illamque supposuisse: præuisio autem peccati, quam supponit prædestinatio Christi, non est conditionata, sed absoluta, ut clarum est in via S. Thomæ, aliàs non esset verum, Adamo non peccante, Christum non venturum. Nec ex hoc sequitur, dari causam meritoriam prædestinationis in nobis, quia ut acutè ibi Caietanus notauit, futura quæ ad prædestinationem supponuntur, sunt illa quæ per prædestinationem non constituuntur, id est quæ in sui esse à prædestinatione non eliciuntur, nec imperantur: omne autem meritum nostrum est effectus per prædestinationem constitutus, ideoque non supponitur præuisus ad illam, nec datur causa prædestinationis in nobis, etsi aliqua futura absoluta, ad prædestinationem supponantur præuisa.

Obijciunt tertio: Futura conditionata, quorum conditio nunquam ponetur, non cognoscuntur à Deo, per scientiam simplicis intelligentiæ, cum illa ad sola possibilis & necessaria terminetur; neque per scientiam

visionis, quia illa circa ea tantum versatur, quæ sunt Deo præsentia in sua æternitate; talia verò futura, cum nunquam habitura sint existentiam in tempore, defectu conditionis quæ nunquam purificabitur, non sunt realiter, sed obiectiue tantum, Deo præsentia in æternitate: Ergo illa non possunt à Deo cognosci, nisi per scientiam mediam.

Respondeo futura illa cognosci à Deo per scientiam visionis, non quatenus est visionis formaliter, quia sub hac ratione terminatur solum ad res futuras, ut præsentia in æternitate, sed inquantum est libera & approbationis, seu prout habet adiunctum decretum diuinæ voluntatis, in quo fundatur, & cui ut medio innititur; sic enim non terminatur solum ad res futuras; ut præsentia in æternitate, sed etiam ad omnia obiecta libera & contingencia, quæcumque illa sint, se extendit. Potest etiam dici, futura illa cognosci per scientiam simplicis intelligentiæ: nam sicut datur in Deo scientia visionis naturalis & necessaria, scilicet visio essentiæ diuinæ, & alia libera, scilicet intuitiua creaturarum in speculo æternitatis. Ita datur scientia simplicis intelligentiæ naturalis, quæ circa merè possibilia versatur, & libera, quæ fertur circa conditionatè futura. Quando autem D. Thomas & Theologi dicunt, scientiam simplicis intelligentiæ esse merè naturalem, hoc ideò asserunt, quia illa præcipue occupatur circa merè possibilia, quæ Deus naturaliter & necessario cognoscit.

Obijciunt quartò SS. Patres docent, scientiam Dei respectu futurorum contingentium, esse valde mirabilem, & humani ingenij  
captum



captum transcendere : At hoc verum non esset , si illa esset fundata in decreto prædeterminante , vt docent Thomistæ ; cum nihil in hoc mirabile sit , quod Deus videat sua decreta , & in illis effectus futuros, cum ipsis infallibiliter connexos : Ergo illa est independens à tali decreto , subindeque scientia media .

Respondeo , concessa Maiori , negando Minorem , nihil enim mirabilius in Deo , quam quod nihil extra seipsum , sed omnia tanquam in causa , & veluti speculo purissimo , contempletur in sua essentia , vel nudè sumpta , vel per decretum determinata . Ex hoc enim provenit , quod eius scientia sit causa rerum , & eminenter speculatiua & practica . Quod non sit mensurata à rebus , sed potius illarum regula & mensura . Quod sit omnino certa & infallibilis , vtpote nixa medio certissimo & infallibili . Et tandem quod sit infinita , & ad omnia se extendens , cum nihil possit subterfugere Dei causalitatem , è contra verò , in sententia Aduersariorum , scientia Dei respectu futurorum contingentium , est merè speculatiua , & exploratrix , ac mensurata à rebus , non verò illarum regula & mensura , cum non faciat , sed supponat illarum futuritionem ; nec ideo res futurae sint , quia sciuntur à Deo , sed potius ideò ab illo sciuntur , quia futurae sunt . Vnde illa similis est scientiæ Astrologorum , quæ non facit , sed solùm speculatur & explorat confectiones siderum , cursusque planetarum .

Obijcies quintò : Nemo prudenter aliquid statuit de fine , nisi præcognoscat media apta  
&



& proportionata ad ipsum assequendum : vnde est illud Lucæ 14. *Quis ex vobis valens turrim ædificare , non prius secum cogitat , an habeat sumptus ad perficiendam sufficientes : Ergo antequam Deus decernat efficaciter nostram conuersionem , præcognoscit an talibus vel talibus medijs , ipsam infallibiliter assecuturus sit : Sed hoc non potest cognoscere , nisi per scientiam mediam : Ergo illa in Deo admittenda est .*

Respondeo, concesso Antecedenti , & consequenti , negando Minorem subsumptam ; Deus enim media apta & proportionata ad nostram conuersionem , cognoscit per scientiam simplicis intelligentiæ , qua comprehendit suam omnipotentiam , & videt in thesauris eius latere infinita media seu auxilia , quibus potest efficaciter & suauiter ad se trahere voluntates nostras , quando , & vbi voluerit . *Quis enim ( inquit Augustinus in Enchirid. cap. 98. ) tam impiè dispiat , ut dicat Deum malas hominum voluntates , quas voluerit , quando voluerit , vbi voluerit , in bonum necesse conuèrtere ?*

## §. VI.

*Soluuntur argumenta quæ fieri solent contra decreta conditionata , quæ admittuntur à Thomistis .*

**A**ntequam argumenta illa proponamus ac diluamus , diligenter obseruandum est , aliquam volitionem , seu aliquod decretum , posse dici duobus modis conditionatum . Pri-

mò ex parte subiecti, quando scilicet subiectum non habet actu voluntatem aliquid faciendi, sed illam haberet, si poneretur aliqua conditio, vt si quis dicat: *Ego vellem venari, si hoc liceret Clerico*. Per hunc enim modum loquendi, non significo me habere actu volitionem circa venationem, sed illam habiturum, si ea liceret Clerico. Secundò ex parte obiecti; quando scilicet habetur actu volitio efficax ex parte volentis, suspenditur tamen effectus eius, donec ponatur conditio, qua accedente redigetur ad actum, vt si dicam, *Volo & voueo ire Romam, si conualuero ab infirmitate*; tunc enim habetur præsens & efficax voluntas talis peregrinationis, sed expectatur restitutio sanitatis, à qua vt a conditione dependet. Decreta conditionata primi generis, dari in Deo non possunt, quia illa inuolunt imperfectionem potentialitatis & suspensionis Deo repugnantem; Thomistæ tamen docent in eo admittenda esse decreta conditionata secundo modo, seu ex parte obiecti, saltem circa futura illa conditionata, quæ Deum se cognoscere in Scripturis testatur, & quæ spectant ad ordinem diuinæ prouidentiae, & ad gubernationem vniuersi. Ista enim nullam dicunt imperfectionem in volente, sicut alia, vt docet D. Thomas in 1. dist. 46. q. 1. art. 1. ad 2. his verbis: *Voluntas antecedens potest dici conditionata, nec tamen est imperfectio ex parte voluntatis diuinæ, sed ex parte voliti, quod non accipitur cum omnibus circumstantiis quæ exiguntur ad rectum ordinem in salutem*.

Illæ autem esse in Deo admittenda probari po-

potest, tum quia, cū futura conditionata sine magis actualia . quam quæ sunt merè possibilia ( connotant enim existentiam , vt habendam sub conditione , à qua tamen connotatione præscindunt res merè possibiles ) assignari debet causa aliqua huius maioris actualitatis : non est autem alia assignabilis , præter decretum obiectivè conditionatum . Tum etiam , quia si Deus non esset suo decreto determinatus ad eorum futuritionem conditionatam , esset indeterminata illa futuritio , & consequenter falsò Deus ea revelasset in scripturis potius vt futura , si poneretur conditio , quam vt non futura . Maximè cū nonnulla ex eis sint omnino disparata , eorumque proinde futuritio nullam habeat connexionem cum suis conditionibus , ex natura rei , sed tantum ex beneplacito Dei .

Porro contra illa decreta multipliciter insurgunt defensores scientiæ mediæ , eaque multiplici titulo expungere & amandare conantur , nempe ex eorum nouitate ; inutilitate , absurditate , & impossibilitate . In primis dicunt , illa esse noua , & à Thomistis excogitata , cū nec in Scriptura , nec in SS. Patribus , nec apud D. Thomam , vllum extet illorum vestigium . Secundò , illa esse otiosa , cū ad diuinam prouidentiam & gubernationem rerum minimè deseruiant . Tertiò , illa esse ridicula & nugatoria ; ridiculum enim videtur ponere in Deo decretum conditionatum de conuersione Tyriorum , sub conditione prædicationis Christi , reddita impossibili per aliud decretum , quod Deus absolutè statuit quod Christus apud Tyrios nunquam prædicaret . Sicut

Vana & irrisoria est promissio, ea conditione à sponfore facta, quam nolit apponere; vt si quis dicat, dabo tibi decem aureos, si ea die venero, & statuat se non venturum. Quartò, illa esse impossibilia, tum quia, si Deus habuisset decretum conditionatum conuertendi v. g. Tyrios, supposito quod Christus prædicaret illis, cum aliunde decreuerit quod Christus apud ipsos nunquam prædicaret, haberet eo ipso affectus contrarios, & inter se minimè cohærentes, quod impossibile est. Tum etiam, quia omne decretum diuinæ voluntatis infert & causat aliquam mutationem realem & physicam in creatura: decreta verò conditionata, quorum conditio nunquam ponetur, nullam possunt inferre & causare mutationem in creatura, defectu conditionis quæ nunquam purificabatur: Ergo illa sunt impossibilia in Deo.

Verùm hæc laxia sunt; nec multo sudore indigent vt soluantur. Ad primum enim respondeo, negando decreta illa nullum habere fundamentum in Scriptura, vel SS. Patribus: nihil enim in Scriptura frequentius illa Dei voluntate, quam vocant antecedentem de salute omnium hominum, quam D. Thomas supra relatus dicit esse conditionatam ex parte obiecti. Plura etiam in Scriptura reperiuntur pacta vel promissa Dei de rebus sub conditione futura, nunquam implendis; vt voluntas Dei conferendi posteris iusticiam originalem, si illorum parens & caput diuino præcepto obtemperaret; vt pactum cum Dauide initum seruandi perpetuò regnum hæreditarium eius filiis, si patris pietatem imitarentur, vt voluntas

tas Patris æterni mittendi Filio plures legiones Angelorum , si rogaretur . Scriptura etiam Deo attribuit notitiam quorundam futurorum conditionatorum , quorum euentus nullam habet connexionem cum conditione , quale est illud Elisei ad Regem Ioas 4. Regum 13. *Si percussisses quinquies , aut sexies , siue septies terram , percussisses Syriam vsque ad consumptionem* . Patet enim quod deuastatio Syriæ non erat connexa cum illa terræ percussione : non potuit ergo Deus asserere , futuram esse illam deuastationem , ex vi connexionis , sed solum ex efficacia sui decreti ,

Habent etiam illa decreta fundamentum in SS. Patribus , cum S. Dionysius , & D. Thomas , passim doceat , Deum omnia siueabilia siue futura in sua essentia tanquam in causa cognoscere : ex illo enim principio , quod in utroque S. Doctore communissimum est , decreta conditionata manifestè colliguntur ; cum ( vt sæpe diximus ) essentia diuina non possit esse causa futurorum conditionatorum , nisi vt modificata & determinata per decretum conditionatum , eò quòd Deus non sit agens necessarium , sed liberum , & omnia operetur iuxta consilium voluntatis suæ , vt ait Apostolus . Item D. Thomas infra q. 19. ait. 7. ad 2. expressè asserit , Deum velle *quod aliquid quandoque sit futurum , secundum causam inferiorem , quod tamen futurum sit , secundum causam superiorem* : constat autem futurum illud esse conditionatum , eò quòd foret , nisi Deus aliter ordinasset propter rationes suæ prouidentix nobis occultas .

Ad secundum nego decora illa esse in Deo

otiosa & superflua : quemadmodum enim , licet Deus decreuerit denegare gloriam aliquibus , & media efficaciter ad eam conducentia ; tamen voluntas antecedens quam habet de salute omnium , non est otiosa & superflua , quia per eam præparantur omnibus media ad salutem sufficientia . Ita similiter , cum decreta de quibus loquimur , conducant tum ad gubernationem & providentiam Dei ( prudentis enim gubernatoris est , paratum se exhibere ad multa facienda , quæ tamen nunquam erunt ) tum ad transferendum res à statu meræ possibilitatis , ad statum futuritionis conditionatæ , & ad fundandum certam veritatis eorum notitiam , otiosa & superflua censi non debent ; & multò minùs absurda & ridicula , sed honesta , prudentissima , & summa veneratione digna ; licet enim in agentibus particularibus absurda videantur volitiones & promissiones de re aliqua facienda sub conditione aliqua , quam nolunt implere , non tamen in prouisorio generali ; vt constat de voluntate antecedente & conditionata saluandi omnes homines , quam Deus non vult in omnibus adimpleri , ob rationes occultas suæ providentiæ . Vnde Adversariorum instantiæ vires tantùm habent ab angusta & demissa cogitatione nostra , qua Deum vt particulare agens concipimus , more aliorum quæ nobis familiaria sunt , & ægrè possumus assurgere ad vniuersalissimi & œcumenici gubernatoris providentiam , nullo fine cohibitam , ad quam pertinet plures defectus tum phycos tum morales in hoc vniuerso permittere , & non solùm diuersa , sed etiam contraria ordinare , iuxta illud Ecclesiasti.

c. 33. *Intuere omnia opera altissimi : duo & duo, & unum contra unum*. Ex quo patet responsio ad tertiam instantiam Aduersariorum, qua ostendere conantur illorum decretorum absurditatem.


Ad vltimam, quæ est de illorum impossibilitate, nego primam probationem : non magis enim opponuntur decretum conditionatum quod Deus habuit de fide Tyrriorum, posito quod Christus apud eos prædicaret ; & decretum absolutum, quo statuit quod Christus illis non prædicaret, quam voluntas antecedens de salute omnium, & voluntas consequens saluandi tantum electos ; quas tamen nullam habere inter se oppositionem, eò quod non sint de obiecto eodem modo, sed diuersimodè considerato, tractatu sequenti ostendemus.

Ad secundam probationem respondeo cum Aluare, quod quando decretum est absolutum, tunc debet inducere in creatura mutationem realem & physicam, absolutam ; quando autem est conditionatum non debet inducere mutationem realem absolutè, sed solum sub conditione, id est sufficit quod ex vi illius decreti, realiter mutaretur creatura, si conditio impleretur.


Quæres, an decreta conditionata sint admittenda in Deo circa omnes combinationes rerum possibiles, quarum aliquæ interdum videntur ridiculæ & absurdæ, vt si *capra saltet, gallus cantabit. Si Turca dormiat Constanti-nopoli, Papa orabit Romæ?* Respondeo negatiuè, sufficit enim poni in Deo decreta conditionata, circa illa futura sub conditione, quæ

in Scriptura reuelata sunt , vel quæ ordini diuinæ prouidentiae deferuiunt ; circa alia verò , præsertim si sint omnino disparata , indecens videtur ac superfluum , illa in Deo admittere ; sufficit enim quod Deus habeat decretum generale , quo vult non se determinare ad illorum futuritionem , vel non futuritionem , subindeque illa in statu meræ possibilitatis relinquere .

Argumenta Aduersariorum , quæ procedunt ex læsione libertatis humanæ vel sanctitatis diuinæ , commodius proponentur & soluentur Tractatu sequenti , cum agemus de prædestinationibus diuinis .








## TRACTATUS IV.

### *De voluntate Dei.*

**I**N hoc Tractatu agemus . Primò de obiecto voluntatis diuinæ . Secundò de illius libertate , eiusque cum diuina immutabilitate concordia . Tertiò de voluntate Dei antecedente , qua vult omnes homines saluos fieri . Quartò de efficacia voluntatis diuinæ . Quintò de quibusdam attributis & affectibus ad diuinam voluntatem pertinentibus, nimirum amore, gaudio, iustitia, & misericordia Dei .



### CAPVT I.

#### *De obiecto formali motu & terminatiue voluntatis diuinæ .*

**D**ari in Deo voluntatem , negari non potest, semel admisso intellectu : nam sicut ad omnem formam naturalem sequitur inclinatio ad bonum conueniens , puta ad formam ignis inclinatio ad locum sursum, ad formam lapidis propensio ad locum deorsum : ita ad formam intelligibilem sequitur inclinatio

ad bonum conueniens naturæ intellectuali, quæ in agentibus intellectualibus voluntas appellatur. Cum ergo in Deo sit perfectissimus intellectus, in eo quoque reperiri perfectissimam voluntatem necesse est. Constat autem ex dictis tract. 1. cap. 3. illam non esse de formalissimo conceptu, seu de constitutione metaphysica diuinæ naturæ, cum natura Dei constituatur formaliter per intelligere, quod prius concipitur in Deo, quam velle, quia nihil est volitum, quin præcognitum; imò, cum vis appetitiua sit inclinatio in id quod est conueniens naturæ appetentis, debet necessariò præsupponere eius naturam adæquatè constitutam, vt sit regula & mensura appetendi. Solùm ergo hic restat declarandum, quodnam sit obiectum formale, tam motiuum, quam terminatiuum voluntatis diuinæ.

Dico igitur, obiectum motiuum & terminatiuum voluntatis diuinæ, esse solam bonitatem diuinam & increatam, non autem bonum in communi, vt abstrahit à creato & increato.

Prima pars probatur primò ex D. Thoma hic q. 19. art. 2. ad 2. vbi sic discurreit: *In his quæ volumus propter finem, tota ratio mouendi est finis, & hoc est quod mouet voluntatem, unde cum Deus alia à se non velit nisi propter finem, qui est sua bonitas, non sequitur quod aliquid aliud moueat voluntatem eius, nisi bonitas sua.* Quibus verbis S. Doctor conclusionem nostram & docuit & probauit: Obiectum enim motiuum voluntatis est finis, quia medium, vt medium, solum est volitum, vt conducat ad finem: At sola bonitas diuina & in-

increata, est finis voluntatis diuinæ: Ergo ea sola est obiectum motuum illius.

Probatur secundò eadem pars: Diuina voluntas non mouetur, etiam partialiter, à bonitate creata: Ergo bonitas increata est obiectum formale adæquatè motuum illius, non verò bonitas vt sic, abstrahens à creata & increata. Consequentia patet, Antecedens verò probatur. Si diuina voluntas moueretur à bonitate creata, etiam solùm partialiter, amor quo diligeret creaturam, esset non tantùm effectiuus, sed etiam affectiuus; cum enim amor tantùm affectiuus bonitatis obiecti, eam non supponat, sed ponat, nequit ab ea allici siue moueri: Sed amor quo Deus diligit creaturam, non est affectiuus, sed tantùm effectiuus, vt docet D. Bernardus de amore diuino cap. 4. his verbis: *Non afficeris à nobis, vel ad nos, cum nos amas: nos à te, & in te, & ad te afficimur, cum amamus te*: Et D. Thomas hic q. 20. art. 1. vbi ait quod *amor Dei est infundens & creans bonitatem in rebus*. Ratio quoque suffragatur, amor enim effectiōis inclinat & transformatur amantem in amatum: Deus autem è contra omnia inclinat & trahit ad seipsum, repugnatque ipsum transformari in creaturam: Ergo diuina voluntas non mouetur, etiam partialiter, à bonitate creata.

Secunda verò pars, quæ est de obiecto terminatiuo, hac ratione suadetur: Illud est obiectum formale terminatiuum alicuius potentie, quod per se primò ab illa attingitur, cætera verò ratione illius: Atqui sola diuina bonitas se primò attingitur à voluntate Dei, bona verò creata, non nisi ratione illius, quan-

doquidem ipsa est finis omnium aliorum, iuxta illud Prouerb. 16. *Omnia propter semetipsum operatus est Dominus*: Ergo sola bonitas diuina est obiectum formale terminatiuum voluntatis diuinæ.

Probatur secundò eadem pars: Obiectum formale siue motiuium siue terminatiuum alicuius potentia, debet habere perfectam cum ea proportionem & commensurationem, in ratione obiecti: Sed bonum vt sic, abstrahens à creato & increato, non habet perfectam cum diuina voluntate proportionem & commensurationem; cum hæc sit actus purissimus, & omnis potentialitatis expers, illud verò sit potentiale, & contineat solum in potentia & in confuso omnem rationem entitatis & bonitatis: Ergo bonum vt sic, abstrahens à creato & increato, non est obiectum formale, siue motiuium, siue terminatiuum diuinæ voluntatis, sed sola bonitas diuina & increata, quæ cum sit actus purissimus, & perfectissimo atque actualissimo modo contineat omnem bonitatem creatam & participatam, habet perfectam cum diuina voluntate proportionem & commensurationem.

Confirmatur: Voluntas diuina se habet ad suum obiectum, sicut intellectus ad suum: Sed sola veritas increata est obiectum formale motiuium & terminatiuum intellectus diuini, vt tractatu præcedenti cap. 1. ostensum est: Ergo & sola bonitas increata est obiectum formale motiuium & terminatiuum diuinæ voluntatis.

Obijcies primò contra primam partem conclusionis: Merita nostra mouent Dei volun-

latein ad præmiandũ : Ergo obiectũ meriti-  
uum, illius , non est sola bonitas increata , sed  
etiam bonitas moralis & creata , quæ in acti-  
bus nostris meritorijs inuenitur .

Respondeo distinguendo Antecedens : Me-  
rita nostra mouent Dei voluntatem , vt in se-  
ipsis considerata , nego . Vt in diuina bonita-  
te virtualiter contenta , concedo . Quod si in-  
stes , & dicas , merita nostra , vt in Dei boni-  
tate virtualiter contenta , non habere ratio-  
nem meriti . Respondeo vt talia non habere  
formaliter rationem meriti , bene tamen vir-  
tualiter , & hoc sufficere vt bonitas diuina , sic  
ea continens , moueat voluntatem Dei ad exer-  
cendum actum iustitiæ circa ea in seipsis  
contenta .


Obijcies secundò contra secundam partem  
conclusionis: Obiectum formale terminatiuum  
alicuius potentia, continere debet omnia obie-  
cta particularia, quæ possunt ab illa attingi, &  
de illis prædicari , vt patet inductione facta in  
omnibus potentijs & habitibus : Sed diuina  
bonitas non continet bonitatem creatam , ad  
quam diuina voluntas se extendit , neque de il-  
la prædicatur ; bene tamen ratio boni vt sic , vt  
abstrahens à creato & increato : Ergo hæc &  
non illa est obiectum formale terminatiuum  
voluntatis diuinæ .

Respondeo distinguendo maiorem : conti-  
nere debet omnia obiecta particularia , conti-  
nentia formali , aut eminentiali , concedo ma-  
iorem . Continentia determinatè formali , ne-  
go maiorem . Similiter distinguo minorem :  
bonitas diuina non continet bonitatem crea-  
tam , continentia formali , concedo minorem :

con-

continentia eminentiali, nego minorem, & consequentiam. Ad illud verò quod subiungitur, nempe quod obiectum formale prædicari debeat de omnibus obiectis materialibus dicendum est, debere de illis prædicari, vel in recto, vel in obliquo; non requiri tamen semper quod de illis prædicetur in recto, ut constat in Theologia, cuius obiectum formale est Deus, qui non prædicatur in recto, sed tantum in obliquo de creaturis; licet enim illæ sint aliquid Dei, nempe eius effectus, non potest tamen dici quod illæ sint Deus.

Potest etiam obijci contra utramque partem conclusionis difficile argumentum, nempe quod si Deus in amore creaturarum rationalium, solum suam bonitatem pro fine, & motivo, ac termino formali respiceret, amaret eas propter seipsum, subindeque non amaret eas amore amicitiae, sed concupiscentiae. Verum, quia de hoc redibit sermo in tractatu de charitate, ne eadem inutiliter repetantur, huius difficultatis resolutionem ad illum tractatum remittimus.



## C A P V T II.

*De libertate voluntatis Dei, eiusque cum  
diuina immutabilitate concordia.*

**N**ihil fide certius, & lumine naturali notius, quam in Deo esse perfectissimam libertatem; sed nihil in Theologia difficilius, quam illam cum diuina immutabilitate concilia-

liare. Cum enim libertas indifferentiam exigat, ratione cuius res ita sit ut possit non esse, & è contra immutabilitas necessitatem importet, ratione cuius res ita sit ut non possit non esse, difficile concipi potest, quomodo summa Dei immutabilitas, cum summa eius libertate & indifferentia consistere possit.

Aliqui nodum huius difficultatis conantur solvere, asserendo actum Dei liberum non consistere in aliqua formalitate Deo intrinseca, sed in denominatione pure extrinseca, proveniente ab effectibus à Deo productis, vel ab actione per quam producuntur, quam volunt esse formaliter transeuntem. Hæc sententia tribuitur Aureolo, cui accedunt quidam recentiores, qui docent actum Dei liberum, partialiter saltem & inadæquatè, per illa constitui.

Alij in alio extremo positi, existimant actum Dei liberum superaddere ad perfectiones Dei necessarias, perfectionem aliquam intrinsecam, quæ quia libera est, potuit absque ulla imperfectione Deo deficere, seu in illo non esse. Hæc sententia communiter tribuitur Caletano à Recentioribus, sed immerito; ut Nazarius, Ioannes à S. Thoma, & alij ex nostris Thomistis demonstrant, ipsumque interpretantur de defectibilitate non perfectionis, sed pæne terminationis, modo infra explicando. Sed cuiuscunque Authoris illa sit, ad eam reducitur, vel accedit opinio quorundam Recentiorum, existimantium actum Dei liberum superaddere ad necessarium, modum aliquem seu realitatem modalem, quæ potuit Deo deficere, seu in eius voluntate non esse.

Alij,



Alij, vt ab hac difficultate sese facilius expediant, confugiunt ad respectum rationis, afferentes actum Dei liberum constitui per respectum rationis ad creaturas existentes vel futuras. Ita Vasquez, & Marcus à Serra.

Demum nostri Thomistæ communiter docent, actum Dei liberum superaddere ad perfectiones necessarias terminationem ratione distinctam, quæ potuerit deficere vel non esse in Deo. Sed difficultas & controuersia est inter illos, an illa potuerit non esse in Deo, secundum aliquam rationem intrinsecam, & secundum id quod dicit in recto, vel solum secundum aliquid extrinsecum, & ex parte illius quod importat in obliquo. Nazarius enim, Gonzales, & alij, volunt illam potuisse Deo deficere solum ratione extrinseci connotati, creaturæ nimirum existentis, vel futuræ. Magister verò Godoy hic disp. 48. §. 5. & sequentibus, docet illam potuisse deficere, secundum aliquam rationem intrinsecam, non quidem sub conceptu perfectionis, vel entitatis, sed sub conceptu puræ terminationis, & pro hac sententia citat Suarez, & Arauicum. Hunc etiam dicendi modum, & explicandi Dei libertatem, vt probabilem, & menti ac doctrinæ D. Thomæ consonum, defendunt Salmatigenses hic disp. 7. dubio 8.

Dico primò, decretum Dei liberum non constitui per aliquid extrinsecum, nempe per effectus quos Deus ad extra produxit, vel per actionem & causalitatem, per quam illos produxit.

Probatum multipliciter: Primò quia implicat causam constitui per suum effectum, cum prius



prius natura quam illum producat, debeat esse constituta : Sed creaturæ productæ, & actio productiua illarum (supposito quod illa sit formaliter transiens) sunt effectus decreti voluntatis diuinæ, Deus enim (vt ait Apostolus) *operatur omnia secundum consilium voluntatis suæ* : Ergo repugnat liberum Dei decretum, constitui per effectus ab illo productos, vel per actionem productiuam illorum.

Secundò, Decretum creandi v.g. mundum, ab æterno conuenit Deo, & consequenter illius constitutum est ab æterno : Sed nec effectus causati à Deo, nec actio qua causantur (supposito quod illa sit formaliter transiens) sunt ab æterno : Ergo per illas non potest constitui liberum Dei decretum.

Tertiò, Denominatio liberè volentis est Deo intrinseca, subindeque proueniens ab aliqua forma intrinseca, & in Deo existente : Sed nec effectus à Deo producti, nec actio transiens productiua illorum, sunt intra Deum, sed extra : Ergo denominatio liberè volentis, non potest ab illis prouenire.

Demum, diuina voluntas non solum est indifferens ad causandum vel non causandum creaturas, sed etiam ad volendum vel nolendum eas causare : Ergo per ordinem ad volitionem vel nolitionem indifferentem, constituitur liberè volens, vel nolens : Sed effectus causati, & actio qua causantur ; non sunt volitio : Ergo non constituunt liberum Dei decretum.

Ex his confutata manet sententia illorum recentiorum, qui existimant liberum Dei decretum, partialiter saltem & inadæquatè, consti-

stitui per effectus quos Deus ad extra produxit, vel per actionem & causalitatem, per quam illos produxit. Nam rationes adductæ probant decretum Dei liberum non posse, etiam partialiter & inadæquatè, per illa constitui. Tum quia implicite causam, etiam partialiter & inadæquatè, constitui per suum effectum, quia prius natura quam illum producat, debet esse completè & adæquatè constituta. Tum etiam, quia decretum creandi mundum; ab æterno Deo conuenit, subindeque ab æterno est in Deo adæquatum illius constitutum. Tum deniquè, quia denominatio liberè volentis, adæquatè prouenire debet ab aliqua forma Deo intrinseca, & in ipso existente.

Dico secundò, libertas diuina non consistit in productione Deo intrinseca, ac defectibili, seu quæ potuerit in Deo non esse.

Probatur: Tum quia si Deo deesse posset aliqua perfectio, nec esset immutabilis, nec infinite perfectus. Tum etiam, quia in Deo admittenda non est perfectio imperfectioni admixta: Sed perfectio defectibilis entitatiuè in ratione perfectionis, imperfectionem importat; non posse non esse, maxima imperfectio est: Ergo Deo concedenda non est.

Dico tertio, actus Dei liber non superaddit ad necessarium, modum aliquem seu entitatem modalem, quæ potuerit Deo deficere, siue in illo non esse. Probatur: Tum quia talis entitas modalis defectibilis, esset imperfecta, sicut perfectio defectibilis, cum posse non esse, seu posse esse nihil, sit supremus imperfectionis gradus, Tum etiam, quia diceret in e ssen-  
tia

tia diuina imperfectionem potentialitatis ; nam essentia diuina se haberet ad illam , sicut potentia ad actum , & sicut perfectibile ad perfectum , & cum illa faceret realem compositionem ; hoc ipso enim quod esset realiter defectibilis , non potest identificari cum essentia diuina , quæ est omnino indefectibilis .

Dico quartò , actum Dei liberum non constitui per respectum rationis ad creaturas .

Probat<sup>ur</sup> : Vel talis respectus sumitur fundamentaliter , vel formaliter ? Si primum dicatur , restat explicare , quodnam sit illius fundamentum , an sit aliquid creatum , vel increatum , Deo intrinsecum , vel extrinsecum , & an dicat perfectionem vel non ; & sic hæc sententia coincidet cum præcedentibus iam impugnatis , vel cum ea quam sequenti conclusione exponemus . Secundum verò affirmari nequit : Tum quia ens reale , quale est liberum Dei decretum , nequit constitui per aliquam formam rationis , ab intellectu constitutam . Tum etiam , quia vel ille respectus rationis formatur à Deo , vel à creatura ? Non à creatura , cum Deus sit liber ab æterno , & intellectus creatus sit in tempore . Nec etiam à Deo , nam vel Deus illum formaret per actum liberum , vel per necessarium ? Nec secundum , alias respectus ille esse necessarius Deo , & consequenter non posset constituere liberum eius decretum . Nec primum , quia omnis actus liber intellectus diuini , decretum liberum voluntatis constitutum supponit , cum libertas intellectus à libertate voluntatis oriatur .

Adde quod absurdissimum videtur , decreta Dei libera , quæ sunt vera & realis causa crea-

tura-

turarum, & à quibus tota vis diuinæ providentiæ, & rerum vniuersi series pendet, & in quibus tanquam in medio fundatur scientia Dei libera seu visionis, in mera entia rationis resolui.

Dico vltimò, actum Dei liberum addere ad actum necessarium, terminationem ad creaturas, defectibilem, seu deesse possibilem, sub ratione terminationis, non verò sub ratione perfectionis, vel entitatis. Hæc conclusio sequitur ex dictis in præcedentibus, cum enim actus liber Dei non constituatur per denominationem purè extrinsecam à creaturis petitam, vt in prima conclusione ostendimus, sed per aliquid Deo intrinsecum, defectibile tamen secundum aliquam formalitatem, quia hoc exigit libertas & indifferentia voluntatis; terminatio voluntatis diuinæ ad creaturas, debet esse defectibilis, seu deesse possibilis, secundum aliquam rationem & formalitatem: Sed non potest esse defectibilis, seu deesse possibilis, in ratione perfectionis, vel entitatis, vt constat ex dictis in secunda & tertia conclusione: Ergo debet esse defectibilis, seu deesse possibilis, saltem sub ratione puræ terminationis, vt actum Dei liberum constituere possit.

Dices cum Gonzale, illam terminationem esse defectibilem ratione extrinseci connotati, non verò ratione illius quod importat in recto.

Sed contra primò: Illa terminatio debet esse defectibilis, secundum id quod constituit Deum liberè volentem, cum defectibilitas sit de ratione libertatis & indifferentiæ: At non

con-

constituit Deum liberè volentem per id quod dicit de connotato , sed per illud quod dicit in recto ; alioquin Deus constitueretur liberè volens per solam denominationem extrinsecam à creaturis petitam , non verò per aliquid ipsi intrinsecum , quod est incidere in opinionem Aureoli , conclusione prima confutatam : Ergo terminatio illa debet esse defectibilis , non solùm ratione extrinseci connotati , sed etiam ratione illius quod importat in recto .

Contra secundò Decretum liberum est Deo ratio cognoscendi creaturas existentes aut futuras , vt tractatu præcedenti cap. 4. §. 2. ostensum est . Ex quo sic licet arguere . Ratio cognoscendi creaturas existentes vel futuras , debet esse libera , ac proinde defectibilis , sub ea ratione & conceptu , sub quo est ratio illas cognoscendi : At non est ratio cognoscendi creaturas existentes vel futuras , formalitas intrinseca , secundùm id quod in obliquo & terminatiuè importat , sed secundùm id quod importat intrinsece & in recto : Ergo vt sic debet esse defectibilis , seu deesse possibilis . Maior constat , si enim ratio cognoscendi creaturas non esset libera , sed necessaria , non esset medium ad liberam sed necessariam cognitionem . Minor etiam evidens est ; nam id quod decretum Dei in obliquo importat , est creatura existens vel futura : At hæc non est ratio seu medium cognoscendi , sed tantùm res cognita : Ergo decretum Dei non est illi ratio cognoscendi creaturas , secundùm id quod in obliquo & extrinsecè importat , sed secundùm id quod importat intrinsecè & in recto .

Contra tertio : Defectibilitas sub conceptu

intrinsecæ terminationis, absque defectu entitatis & perfectionis, nullam arguit imperfectionem in Deo, & aliàs illa admissa, melius & facilius explicatur libertas diuinæ volitionis: Ergo illa admitti debet. Consequentia patet, antecedens verò, præterquam quod ex obiectionū solutione constabit, breuiter suadet. Solus perfectionis aut entitatis defectus, imperfectio est: Sed defectibilitas sub conceptu puræ terminationis, nec perfectionis, nec entitatis defectum importat, vt constabit ex infra dicendis: Ergo nullam arguit in Deo imperfectionem.

Confirmatur: Ex defectibilitate illius terminationis intrinsecæ, sub conceptu puræ terminationis, nulla potest inferri mutabilitas in voluntate diuina: Ergo admittenda est. Consequentia patet, ideò enim à Deo reijcitur perfectio vel entitas defectibilis, quia ex illa sequitur realis mutatio, vel mutabilitas in eo, vt supra arguebamus. Antecedens verò probatur: Mutatio est transitus de non esse ad esse, vel de esse ad non esse, & consequenter petit aduentum vel carentiam formæ, sub conceptu essendi, subindeque sub ratione entitatis & perfectionis: Ergo terminatio defectibilis solum sub conceptu terminationis, & indefectibilis sub conceptu entitatis, nullam infert mutationem vel mutabilitatem in Deo. Quod potest explicari ex mysterio Incarnationis: nam quia subsistentia diuina habet exercitium terminandi intrinsecè naturam humanam, sine additione nouæ entitatis aut perfectionis, licet eam desineret terminare, non propterea mutaretur, quia nihil entitatis aut perfectionis

his deperderet , sed solum desineret habere exercitium quod antea habebat .

Ex his habes solutionem huius difficillimi modi , quem initio huius capituli proposuimus , & perfectam libertatis Dei cum eius immutabilitate concordiam . Ex eo enim quod actus liber Dei addit terminationem ad creaturas , defectibilem sub rationem terminationis , perfectè saluatur Dei libertas & indifferentia , quæ exigit ut res ita sit , ut possit non esse . Ex eo verò quod illa terminatio est indefectibilis sub ratione entitatis & perfectionis , subsistit summa eius immutabilitas , quia mutatio exigit transitum de non esse ad esse , vel de esse ad non esse .

Obijcies primò : Terminatio actus liberi Dei ad creaturas , sub conceptu terminationis , est entitas diuina intrinseca Deo : Ergo si potuit deficere , aut non esse in Deo , sub conceptu terminationis , potuit etiam deficere sub conceptu entitatis , vel si sub conceptu entitatis non potuit deficere , non potuit pariter deficere sub conceptu terminationis . Simile argumentum fieri potest de perfectione , non terminatio voluntatis diuinæ ad creaturas , dicit perfectionem : Ergo si potuit Deo deficere sub conceptu terminationis , potuit etiam deficere sub conceptu perfectionis .

Ad primum argumentum respondeo quod quamuis terminatio actu liberi Dei ad creaturas , sub conceptu terminationis , sit implicitè entitas diuina , non tamen explicat conceptum entitatis diuinæ , ab illaque distinguitur virtuali distinctione , quæ distinctio sufficiens est , ut quamuis deficiat , vel possit deficere , sub

conceptu terminationis, non deficiat, nec possit deficere, sub conceptu entitatis. Sicut, quamvis deformitas peccati, implicite importet conceptum entitatis positivæ, quia tamen illum non explicat, ab illoque distinguitur penes implicitum & explicitum, stat optimè deformitatem peccati causari à Deo, sub conceptu entitatis, absque eo quod ab illo causeatur, sub conceptu deformitatis. Ex quo patet responsio ad secundum argumentum, licet enim terminatio illa perfectionem implicet, ratione entitatis increatæ, quam transcendentaliter includit, eam tamen sub conceptu terminationis formaliter non exprimit. Vnde licet potuerit Deo deficere sub conceptu terminationis, non tamen sub conceptu perfectionis.

Dices, Exercitium voluntatis Dei ut liberæ, reducens eam de actu primo ad secundum, perfectionem exprimit: Sed terminatio illa est exercitium voluntatis Dei ut liberæ, reducens illam de actu primo ad secundum: Ergo exprimit perfectionem.

Confirmatur: Omnis actualitas exprimit perfectionem: Sed exercitium illud est actualitas: Ergo exprimit perfectionem.

Ad instantiam respondeo distinguendo maiorem: exercitium voluntatis Dei ut liberæ, reducens eam de actu primo ad secundum, entitativum, perfectionem exprimit, concedo maiorem. Terminativum, nego maiorem. Similiter distinguo minorem, terminatio illa est exercitium reducens de actu primo ad secundum, terminativum, concedo minorem: entitativum, nego minorem, & consequentiam:




tiam: Ad confirmationem eodem modo distinguo maiorem: omnis actualitas entitativa dicit seu exprimit perfectionem, concedo maiorem. Purè terminativa, nego maiorem. Hæc enim, licet perfectionem implicet, ratione entitatis diuinæ & increatæ, quam transcendentaliter includit, eam tamen formaliter non exprimit. Sicut relatio, sub conceptu relationis, & quantum ad rationem *Ad*, non exprimit perfectionem, quamvis eam implicitè includat, & ab ea perfectè præscindi nequeat.

Obijcies secundò: Si terminatio actus diuinæ voluntatis ad creaturas, non existat necessario in Deo, sed possit vel potuerit illi deficere, seu in illo non esse, non solum secundum id quod extrinsecè & in obliquo importat, sed etiam quantum ad id quod importat intrinsecè & in recto, sequitur quod distinguatur realiter à terminatione necessaria, eo ipso enim quod possit deesse, potest ab illa realiter separari realis autem separabilitas est maximum signum realis distinctionis. Sequitur etiam, Deum posse vel potuisse mutari: nam mutari nihil aliud est, quam aliter se habere intrinsecè ac prius: Sed si talis terminatio non existat necessario in Deo, sed possit vel potuerit illi deficere, Deus potest, vel potuit aliter se habere intrinsecè ac prius: Ergo potest, vel potuit mutari.

Respondeo negando utramque sequelam, & ad probationem primæ dico, ad distinctionem realem requiri separabilitatem quoad entitatem, cum autem terminatio necessaria & terminatio liber actus diuinæ voluntatis, habeant

eandem entitatem nequeunt separari ab inuicem secundum conceptum entitatis, sed tantum secundum conceptum terminationis. Quod explicari potest & suaderi exemplo relationis patris ad duos filios, quæ desinente vno, desinit terminari ad ipsum, remanendo terminata ad alium superstitem, absque eo quod propterea terminatio quoad vnum, quæ desinit, distinguatur realiter à terminatione ad alium, quæ remanet, eò nimirum quod eadem sit vtriusque realitas & entitas.

Ad probationem secundæ distinguo maiorem: mutari nihil aliud est, quam aliter se habere intrinsecè ac prius, per acquisitionem nouæ formæ, entitatis, aut perfectionis: concedo. Per solam nouam terminationem, nego. Solutio patet ex supra dictis, & potest magis illustrari exemplo supra adducto; licet enim Verbum Diuinum in Incarnatione aliter se habeat intrinsecè ac prius, & fiat intrinsecè homo, cum antea intrinsecè homo non esset; quia tamen hoc non fit per nouæ formæ, entitatis, aut perfectionis acquisitionem, sed solum per nouam terminationem naturæ humanæ, quam antea non terminabat, non mutatur per incarnationem, vt in tractatu de Incarnatione fusius exponemus.



## CAPVT III.

*De voluntate Dei antecedente, qua vult  
omnes homines saluos fieri.*

**C**irca voluntatem Dei antecedentem plures ac celebres sunt difficultates & controuersiae, breuiter hic resoluendae. Prima est, an post Adæ lapsum sit in Deo voluntas generalis & antecedens saluandi omnes homines? Secunda, an talis voluntas sit in Deo formaliter & propriè, vel solum eminenter, aut metaphoricè? Tertia, qua ratione voluntas illa generalis saluandi omnes homines, appelletur antecedens? Quarta, in quo sensu dicatur conditionata? Quinta, an ex vi talis voluntatis Christus pro omnibus passus & mortuus fuerit, seu mortem & passionem suam obtulerit & ordinauerit ad salutem, non paucorum tantum, sed omnium & singulorum hominum? Sexta, an per voluntatem antecedentem præparentur auxilia ad salutem sufficientia?

## §. I.

*Quatuor primæ difficultates breuiter  
resoluntur.*

**D**ico primò, Deum voluntate generali & antecedente, velle omnes homines, etiam post Adæ lapsum, saluos facere. Est contra Iansenium lib. 9. & 10. de gratia Christi Saluatoris, vbi docet Deum habuisse quidem ta-

lem voluntatem pro omnibus & singulis hominibus, consideratis in statu innocentiae, sed non post Adæ lapsum, & præuisionem peccati originalis.

Probatur conclusio ex celebri illo testimonio Apostoli 1. ad Tim. 2. *Deus vult omnes homines saluos fieri &c.* ubi patet sermonem esse de hominibus in statu naturæ lapsæ constitutis, tum quia loquitur de hominibus prout nunc sunt, vult enim eis fieri orationes & obsecrationes apud Deum. Tum etiam, quia ibidem ait ad hanc voluntatem Dei implendam, Christum se obtulisse redemptionem pro omnibus: redemptio autem supponit lapsum in originale.

Nec solum Apostolus assertionem nostram apertè docet, sed etiam eam probat triplici ratione quam insinuat verbis istis, quæ ibidem subiungit: *Quia vnus est Deus omnium, vnus est mediator Dei & hominum, qui dedit semetipsum pro omnibus.* Deus ergo vult omnium hominum salutem, primò quia est Deus & Dominus omnium, qui omnes æquè condidit, omniumque curam & prouidentiam gerit. Vnde Ignatius epist. 6. ad Philadelph. dicit *amantorem omnium esse Deum nostrum, & velle omnes homines saluos fieri, propter quod & solem facit oriri super bonos & malos, & pluit super iustos & iniustos.* Secundò, quia est mediator non solum quorundam hominum, sed omnium prorsus. Quam rationem rectè ponderat Caietanus in commentarijs super hunc locum Apostoli, his verbis: *Si plures essent mediatores inter Deum & homines, existimaretur quod vnus esset mediator pro quibusdam & alius pro*

prò alijs , sed ex eo quod unus est mediator Dei & hominum , ad reconciliandum homines Deo , illi uni incumbit mediare inter Deum & omnes homines . Tertio , quia est omnium hominum redemptor , & pro omnibus mortuus est . Vnde iuxta Apostolum , voluntas Dei antecedens saluandi homines , & voluntas Christi moriendi pro illis , sunt veluti parallelae , & sibi inuicem correspondent .

Dico secundo , voluntatem antecedentem , qua Deus vult omnes homines saluos fieri , propriè & formaliter , & non tantum metaphoricè , vel eminenter , esse in Deo .

Probatur primò : Voluntas antecedens , qua Deus vult omnes homines saluos fieri , est voluntas beneplaciti , & non tantum signi , vt docet S. Thomas quæst. 23. de verit. art. 2. his verbis : *Voluntas de Deo propriè dicitur , & hæc est voluntas beneplaciti , quæ per antecedentem & consequentem distinguitur* . Idem asserit in cap. 2. epist. 1. ad Timoth. lect. 1. vbi exponens verba illa Apostoli : *Vult omnes homines saluos fieri* , hanc voluntatem reducit ad voluntatem beneplaciti : Sed voluntas beneplaciti formaliter & propriè reperitur in Deo , vt docet idem S. Doctor hic quæst. 19. artic. 11. vbi sic ait : *Voluntas propriè dicta vocatur voluntas beneplaciti , voluntas autem metaphoricè dicta est voluntas signi* : Ergo voluntas antecedens qua Deus vult omnes homines saluos fieri , propriè & formaliter reperitur in Deo , & non tantum metaphoricè , vel eminenter .

Confirmatur : Idem Doctor Angelicus ibidem art. 6. ad 1. comparat voluntatem an-

tecedentem quam Deus habet de salute omnium hominum, voluntati antecedenti qui iudex dicitur velle homicidam, inquantum hominem, vivere. Et lect. 1. in cap. 2. 1. ad Timoth. voluntati antecedenti conseruandi merces absolutè consideratas, quam habet mercator, imminente tempestate: & certissimum est, pium & iustum iudicem velle propriè & formaliter, eum qui est homicida, vt hominem viuere, quamuis inefficaciter: similiter mercatorem, imminente tempestatis periculo, velle propriè & formaliter, quamuis inefficaciter, conseruare suas merces, ratione scilicet commodi quod earum conseruatio quantum est de se affert: Ergo pariter voluntas antecedens quam Deus habet de salute omnium hominum, quamuis non sit efficax respectu omnium, est in Deo propriè & formaliter.

Probatur secundò, obiectum voluntatis antecedentis, nempe salus omnium hominum, secundum se considerata, est propriè & formaliter volibile, cum sub hac ratione sit bonum, nec consideretur vt impeditium maioris boni, manifestationis scilicet diuinæ iustitiæ erga aliquos, & suæ misericordiæ erga alios: Ergo est à Deo volitum, propriè & formaliter, & non tantum metaphoricè, vel eminenter.

Dico tertio, voluntas Dei non denominatur antecedens, ex eo quod consensum, merita vel demerita nostræ voluntatis, eorumque præuisionem antecedit; nec consequens ex eo quod vtrumque præsupponat: Sed ideò dicitur antecedens, quòd versetur circa bonum  
crea-

creaturæ, absolutè & præcisè secundum se consideratum; consequens verò, quia terminatur ad ipsum, ut indutum omnibus suis individualibus circumstantijs.

Prima pars probatur: Voluntas Dei consequens, cum sit de se efficax, & causa nostri consensus, ut capite sequenti ostendemus, illum prioritate saltem naturæ & causalitatis antecedit: Ergo voluntas Dei non denominatur antecedens, ex eo quod antecedit nostrum consensum. Consequentia patet, alioquin enim membra diuisionis voluntatis Dei in antecedentem & consequentem confunderentur. Item prædestinatio includit voluntatem salutis, non solum antecedentem, sed etiam consequentem, ut asserit D. Thomas in 1. ad Annib. dist. 46. q. vnica art. 2. ad 1. & constat ex eo quod alioquin non esset efficax, quandoquidem voluntas solum inefficax, qualis est antecedens, includeret: Atqui prædestinatio non supponit præscientiam meritorum, ut ostendemus in tractatu de prædestinatione: Ergo voluntas consequens non est illa quæ præsentiam meritorum supponit.

Secunda pars conclusionis est expressè D. Thomas hic q. 19. art. 6. ad 1. item in 1. dist. 46. q. 1. art. 1. ad 2. nec non lect. 1. in cap. 2. primæ ad Timoch. & sic breuiter explicatur. Cum hæ duæ voluntates siue volitiones non distinguantur in Deo, nisi per ordinem ad obiecta siue connotata materialia, nec proinde diuersam illam habeant denominationem antecedentis & consequentis, nisi ex illis; ea quæ fertur in bonum creatum, absolutè & secundum se consideratum, rectè dicitur ante-

cedens ; & illa quæ terminatur ad idem bonum , vt indutum omnibus suis circumstantijs particularibus , rectè appellatur consequens ; si bonum illud præcisè secundum se consideratum , antecedit seipsum , vt vestitum particularibus circumstantijs : Atqui sic est , hæc enim superinductio circumstantiarum particularium , est quoddam accidens respectu talis boni secundum se considerati , ipsumque proinde aliquo modo præsupponit : Ergo voluntas Dei rectè dicitur antecedens , ex eo quod versetur circa bonum creaturæ secundum se consideratum ; consequens verò , ex eo quod terminetur ad illud , vt vestitum omnibus suis circumstantijs .

Dico quartò , voluntatem antecedentem saluandi omnes homines , non dici conditionatam , eò quod pendeat tanquam à conditione , à consensu quem expectet à libero arbitrio , sed ex eo quod importet actum conditionatum , quo Deus vellet salutem omnium hominum , nisi hoc repugnaret ordini suæ prouidentiae , manifestationi suæ iustitiæ , & bono generalitotius vniuersi . Ita D. Thomas in 1. dist. 46. q. 1. art. 1. ad 2. vbi ait : *Voluntas antecedens potest dici conditionata , nec tamen est imperfectio ex parte voluntatis diuinæ , sed ex parte voliti , quod non accipitur cum omnibus circumstantijs , quæ exiguntur ad rectum ordinem in salutem .* Idem docet in 1. ad Timoth. cap. 2. lect. 1.

Ratio etiam suffragatur : cum enim homines non possint velle salutem , nisi Deus velit eos velle , & nisi in eis operetur ipsum velle , vt docet Apostolus ad Philipenses 2. & Augu-  
sti-



stinus in solil. cap. 24. his verbis : *Velle quod bonum est non possum, nisi tu velis*, implicat quod in Deo sit decretum aut volitio saluandi homines, dependens tanquam à conditione à consensu & volitione hominum, illamque ab humana voluntate expectans. Vnde Ecclesia Lugdunensis in libro de defensione veritatis Sacrae Scripturae ; *Certè illud in hac questione manifestum est, quod etiam si generaliter & indifferenter, omnes homines Deus vult saluos fieri, in aliorum tamen cordibus, benignitate misericordiae suae, ipse operatur eandem voluntatem suam, ut & ipsi saluari velint, & saluentur : qualibus & Apostolus dicit, cum timore & tremore vestram salutem operamini, Deus est enim qui operatur in nobis velle & perficere, pro bona voluntate. In aliorum cordibus, sententia iusti & occulti iudicii sui non operatur hanc salutarem voluntatem, sed dimittit eos in suo arbitrio, ut quia noluerunt credere, iusta volitione damnentur.*

Obijcies primo contra primam conclusionem: D. Augustinus non intellexit vniuersaliter locum illum Apostoli, *Deus vult omnes homines saluos fieri*, sed triplicè ei limitationem adhibuit. Prima quam tradit lib. 4. contra Iulian. cap. 8. de corrept. & gratia cap. 14. & de prædest. Sanctorum cap. 8. est quod particula *omnes* non sumatur vniuersaliter, sed per distributionem accommodam, pro illis qui salui fiunt; ita quod hæc propositio faciat hunc sensum : Deus vult omnes qui saluantur saluos fieri, siue nullus sit saluus nisi quem Deus vult. Eo modo quo dicitur ludimagister docere omnes adolescentes alicuius ciuitatis,

non quòd omnes instruat, sed quia nullus eruditur, nisi ab ipso. Secunda quæ habetur in Enchir. cap. 105. & alibi, est quod *ly omnes* sumitur quidem vniuersaliter, sed vniuersalitate incompleta, nempe pro generibus singulorum, non verò pro singulis generum, hoc est non pro omnibus omnino singularibus hominum, sed pro omni genere hominum, pro Iudæis & Gentilibus, seruis & liberis, principibus & priuatis, doctis & indoctis, adultis & paruulis, viris ac mulieribus &c. quia ex illis omnibus conditionibus, aliqui prædestinati sunt, & salui fiunt. Sicut cum dicitur, omne animal fuit in arca Noë, non est sensus, ibi omnia animalium indiuidua extitisse, sed aliqua ex quacunque specie. Tertia limitatio apud Augustinum de corrept. & gratia cap. 15. & lib. 22. de ciuit. cap. 1. est Deum velle, non formaliter, sed causaliter, omnes homines saluos fieri, faciendo vt sancti homines salutem omnium velint. Sicut cum ad Roman. & dicitur: *Spiritus sanctus postulat pro nobis gemitibus inenarrabilibus*, idem est ac postulare nos facit; & cum Genes. 21. dicitur. *Nunc cognoui quod timeas Dominum*, sensus est, cognoscere feci: Ergo ex Augustino Deus non habet voluntatem generalem & antecedentem saluandi omnes homines in natura lapsa existentes, sed aliquos duntaxat, subindeque talis voluntas in Deo admittenda non est. Maxime, quia Semipelagiani recurrerant olim ad voluntatem illam, & allegabant testimonium illud Apostoli à nobis adductum, tanquam præcipuum sue hæreseos fundamentum, vt videre est in Epistolis Prosperi

& Hilarij ad Augustinum .

Respondeo D. Augustinum locis citatis intelligendum esse de voluntate consequente ; non verò de antecedente ; ita quod sensus eius doctrinæ sit , propositionem Apostoli intellectam de voluntate consequenti saluandi homines , quam habet Deus , non esse vniuersaliter accipiendum , sed cum aliqua ex tribus allatis limitationibus ; cum quo stat , quod si intelligatur de voluntate antecedenti ( sicut eam intellexit Damascenus de fide orthodoxa cap. 24. ) possit & debeat vniuersaliter accipi . Vnde D. Thomas in 1. dist. 46. qu. 1. art. 1. ad 1. *Secundum Damascenum* ( inquit ) *verbum Apostoli intelligitur de voluntate antecedente , & non de consequente , sed secundum Augustinum intelligitur de consequente .*

Ad illud quod subiungitur de Semipelagianis , dicendum est , eos intellexisse & explicuisse voluntatem antecedentem , modo toto cœlo diuerso , ab eo quo vtuntur Discipuli S. Thomæ . Illi enim dicebant , esse quandam generalem & conditionatam voluntatem Dei , liberi arbitrij præuisum & exploratum consensum expectantem , quæ proinde ex eodem consensu fiebat consequens & efficax ; unde non admittebant , Deum specialiori dilectione prosequi electos , quam reprobos , sed æque illis velle salutem , quantum ex parte illius est . Nos verò ab his abhorremus , vt patet ex dictis conclusionibus 3. & 4. & magis constabit ex dicendis in Tractatu de prædestinatione .

Obijcies secundò contra secundam conclusionem D. Thomas in opusculo de præscien-

tia & prædestinatione cap. 6. ait voluntatem quam habet Deus de salute omnium hominum, esse voluntatem signi. Et hîc quæst. 19. art. 6. ad 1. nec non 3. p. quæst. 21. art. 4. in corp. dicit quod *illa magis est appellanda velleitas, quam absoluta voluntas*. Item D. Chrysostomus homil. 1. in epist. ad Ephes. voluntatem illam nomine desiderij appellat, dicens quod *Deus mirum in modum cupit, vehementerque desiderat nostram salutem*. Atqui nec voluntas signi, nec velleitas, nec desiderium, reperiuntur in Deo propriè & formaliter, sed metaphoricè tantùm, vel eminenter: Ergo nec voluntas antecedens de salute omnium hominum. Ratio etiam id suadet nulla enim voluntas inefficax, potest esse propriè & formaliter in Deo; tum quia iuxta Scripturam, omnis voluntas Dei est efficax, ac semper impletur, vt constat ex illo Isaia 46. *Omnis voluntas mea fiat*, & ex illo Psalmi 134. *Omnia quaecumque voluit Dominus fecit*. Tum etiam, quia omnis voluntas inefficax, & carens effectu, dicit imperfectionem: Atqui voluntas antecedens saluandi omnes homines, est inefficax, cùm omnes salutem non consequantur: Ergo non est in Deo propriè & formaliter.

Ad D. Thomam respondeo opusculum illud non esse S. Doctoris, quod colligitur, tum ex eo quod non habetur in Romana impressione operum S. Thomæ, alijs præferenda. Tum etiam, quia alioquin sibi manifestè contradiceret, quandoquidem oppositum docuit expressè quæst. 23. de verit. supra citata. Dici-  
tiam potest, quod licet voluntas illa, secundum

dum quod formaliter in Deo existit, sit voluntas beneplaciti, quatenus tamen aliquo signo exteriori manifestari, potest appellari voluntas signi; & hoc secundò modo eam considerasse D. Thomam in opusculo citato, si sit ab eo editum, sed ex hoc nihil contra nos. Quando verò voluntatem illam *velleitatem* appellat, per hoc non intendit docere, illam non esse voluntatem de facto, aut non esse formaliter in Deo, sed solum illam non esse voluntatem simpliciter, sed secundum quid, quatenus attingit obiectum secundum se, & præcisum à circumstantijs. Sic enim clarè seipsum explicat hìc art. 6. ad 1. Vel talem voluntatem appellat *velleitatem*, quia non est absoluta, sed conditionata: voluntas enim conditionata, comparatiuè ad absolutam, *velleitas* appellari solet, vt declarat idem S. Doctor in 4. distinct. 17. quæst. 2. art. 1. ad 3. his verbis: *Quamvis voluntas completa non possit esse de impossibili, bene tamen voluntas conditionata, quæ & velleitas dicitur.*

Ad Chrysostomum respondent, illum usurpare nomen desiderij latè, & in ampla quadam significatione, quatenus ferventissimus amor alicuius rei, etiam præsentis & possessæ, desiderium eius interdum appellatur, vt constat ex illo 1. Petri 1. *In quem desiderant Angeli prospicere.*

Ad rationem subiunctam, nego maiorem; & ad primam eius probationem dico, Scripturam locis citatis solum velle, declarare, omnem voluntatem Dei simpliciter dictam, qualis est voluntas consequens, esse efficacem, & semper impleri, cum quo stat, dari in eo forma-

maliter voluntatem secundum quid, qualis est antecedens, quæ non impletur, ut colligitur ex illo Matth. 23. *Ierusalem Ierusalem, quæ occidis Prophetas &c. quoties volui congregare filios tuos, & noluisti.*

Ad secundam probationem dicendum est, dupliciter aliquam voluntatem dici posse inefficacem: primò ex impedimento aliquo extrinseco, vincente aut retardante efficaciam ipsius; Secundò ex propria ordinatione & providentia ipsius volentis. Voluntas inefficax primo modo est imperfecta, & non potest reperiri in Deo; secus verò voluntas inefficax solum secundo modo, qualiter est voluntas antecedens de salute omnium hominum; Deus enim ex propria ordinatione & providentia vult quod careat effectu, & sit inefficax in multis, ut nimirum detur locus mutabilitati & libertati voluntatis humanæ, & suorum attributorum manifestationi.

Dices, esto talis voluntas sit in Deo formaliter, illa tamen non potest esse vera & sincera; si enim esset in manu mercatoris, fugere aut sedare tempestatem, ne merces perirent, quis crederet illum habere veram & sinceram voluntatem de illarum conservatione, si imminuentem tempestatem non vitaret aut vinceret? cum ergo Deus habeat in thesauris suis omnipotentia infinita media, quibus potest omnes homines saluare, non videtur habere veram & sinceram voluntatem saluandi eos, quibus talia media & auxilia denegat, & confert vix offert solum sufficientia.

Respondeo, concessio antecedente, negando consequentiam, & paritatem. Ratio discrimi-

nis est quia mercator est persona particularis, cuius est intendere suam particulare bonum, & lucrum, vnde si imminente tempestate non facit quidquid potest ad mercium conseruationem, conuincitur non velle sincerè eas seruare: At verò Deus est prouisor vniuersalis, cuius est intendere & prospicere commune bonum vniuersi, & permittere quod aliqua creaturæ deficiant, & frustrentur suo fine: vnde cum sincera voluntate salutis alicuius absolute consideratæ, potest permittere vt cadat in peccatum, eique denegare auxilia efficacia ad illud vitandum, ne impediatur maius bonum, videlicet ordo diuinæ prouidentiae, vniuersi pulchritudo, attributorum manifestatio, decor iustitiae, splendor misericordiae &c.

Obijcies tertio contra tertiam conclusionem: Damascenus lib. 1. de fide cap. 9. dicit voluntatem consequentem in Deo à nostro vitio ortum ducere, & D. Thomas in 1. dist. 46. quaest. 1. art. 1. ait expressè quod *voluntas consequens praesupponit praescientiam operum*: Ergo ex eo rectè denominatur talis, & consequenter rectè etiam dicitur antecedens, quia praescientiam illam praecedit.


Respondéo quod quando D. Damascenus & S. Thomas dicunt quod voluntas consequens ortum habet ex vitio nostro, & supponit praescientiam operum, non loquuntur de voluntate antecedente, vniuersaliter sumpta, & secundum quod se extendit tam ad bona opera, à Deo praedefinita, quam ad mala, ab illo permessa; sed de voluntate consequente, specialiter sumpta, seu de voluntate consequenti punitiua, quæ supponit culpam, & ex vitio nostro



stro ortum ducit, iuxta illud Tertulliani, *Deus de suo misericors, de nostro iustus*. Vt enim explicant voluntatem Dei consequentem, ponunt exemplum in aliquo obiecto particulari, quod Deus vult, supposita prauisione peccati, scilicet damnationem & pœnam æternam reproborum; quamuis non sit necessarium; vt id omne quod Deus vult voluntate consequenti, præsupponat peccatum, aut præscientiam meritorum vel demeritorum, vt constat in prædestinatione, quæ est voluntas Dei consequens, & tamen, in sententiâ S. Thomæ, præscientiam meritorum non supponit.

Obijciens quartò, contra quartam conclusionem: Deus non saluat homines, nisi velint: Ergo voluntas antecedens saluandi omnes homines, dependet à volitione hominis, quam Deus expectat à libero arbitrio.

Sed nego consequentiam, licet enim Deus non saluet homines, nisi volentes, & suæ vocationi liberè consentientes, hanc tamen volitionem & consensum, non expectat à libero arbitrio, sed illum in corde hominis per suam gratiam efficit & operetur: iuxta illud Augustini epist. 107. *Vt in Deum credamus, & piè viuamus, non volentis, neque currentis, sed miserentis est Dei, non quia velle non debemus & currere, sed quia ipse in nobis & velle operatur & currere.*





## § II.

*Resolvitur quinta difficultas, an scilicet  
Christus pro omnibus passus &  
mortuus sit ?*

**D**ico quintò, Christum passum & mortuum esse pro omnibus, seu mortem & passionem suam obtulisse & ordinasse ad salutem non paucorum tantùm, sed omnium & singulorum hominum.

Probatur primò conclusio ex verbis istis Apostoli 2. ad Corinth. 5. *Si unus pro omnibus mortuus est, ergo omnes mortui sunt, & pro omnibus mortuus est Christus.* Quo loco probat Apostolus, quod omnes & singuli homines mortui sunt, id est contraxerunt debitum moriendi in Adamo, ex eo quod Christus pro omnibus mortuus est : Atqui omnes omnino distributiue mortui sunt in Adamo, & in eo contraxerunt debitum moriendi : Ergo & Christus mortuus est pro omnibus & singulis hominibus distributiue, & non solum pro generibus singulorum ut interpretatur Iansenius. Neque solum quantum ad sufficientiam pretij, ut alij dicunt, cum in hoc sensu possit etiam dici mortuus pro dæmonibus & pro damnatis. Vnde Tridentinum sess. 6. c. 3. definit Christum mortuum esse pro omnibus in eo sensu in quo negabatur à Caluino : Calvinus autem non negabat, Christum esse mortuum pro omnibus, quantum ad sufficientiam pretij; neque etiam pro aliquibus ex omni genere, & conditione : nam in caput 17. Ioan. utra-

que

que hac euasione utitur, ad explicanda Scripturæ loca, in quibus dicitur Christum mortuum esse pro omnibus: Ergo &c.

Accedunt testimonia SS. Patrum, præsertim Augustini, cui potissimum confidit Iansenius: Nam in commentarijs in Psal. 95. sub finem sic ait: *iudicabit orbem terrarum in æquitate, non partem, quia non partem emit. Totum iudicare habet, quia pro toto pretium dedit.* Et lib. 2. de Symb. ad Catechum. cap. 8. Christum sic inducit loquentem, & reprobris exprobrantem: *Videtis vulnera quæ inflixistis? Agnoscitis latus quod pupugistis? quoniam & per vos & propter vos apertum est, nec tamen intrare voluistis.* Item lib. 6. contra Julian. cap. 1. probat ex testimonio Apostoli supra adducto, omnes homines mortuos esse morte peccati, quia pro omnibus Christus mortuus est. Verba eius sunt: *Vnus (inquit Apostolus) pro omnibus mortuus est, ergo omnes mortui sunt, ostendens fieri non potuisse, ut moreretur nisi pro mortuis: ex hoc enim probavit, omnes mortuos esse, quia pro omnibus mortuis, mortuus est unus: impingo, inculco, infercio recusanti...* *Vnus pro omnibus mortuus est, ergo omnes mortui sunt. Vide quia consequens esse voluit, ut intelligantur omnes mortui, si pro omnibus mortuus est. Quia ergo non in corpore, restat ut in peccato esse mortuos omnes, si pro omnibus Christus mortuus est, nemo neget, nemo dubitet, qui se non negat aut dubitat esse Christianum.*

Ratio etiam suffragatur: nam si pro omnium & singulorum salute Christus non obierit, nutat vnum ex præcipuis fidei nostræ funda-

damentis : nam iuxta doctrinam & institutionem Ecclesiæ, vnusquisque fidelis tenetur credere, Christum esse suum redemptorem, non minus quam Deum esse suum creatorem, & illum vt talem inuocare : At hoc non potest credere, & Christus aliquorum tantum redemptor est ; præsertim verò si dicatur esse tantum redemptor electorum, de quorum numero se esse nemo credere potest, sine speciali reuelatione, vt definit Tridentinum sess. 6. cap. 13. Ergo Christus est omnium hominum redemptor, & pro omnium salute passus & mortuus est . Vnde Ecclesia in solemnibus precibus frequenter hæc verba repetit : *Fidelium Deus omnium conditor & redemptor*, & in hymnis Ecclesiasticis dicitur : *Iesu redemptor omnium* . Quibus consonant hæc verba Ambrosij in Psal. 118. *Mysticus sol ille iustitiæ omnibus ortus est, omnibus venit, omnibus passus est, & omnibus resurrexit* .

Addo doctrinam illam de generali Christi redemptione, non solum fidem nostram firmare, sed etiam spem roborare, & charitatem accendere, vt disertè docent SS. Patres : Augustinus enim libro meditationum cap. 14. sic ait : *Omnis spes & totius fiduciæ certitudo mihi est in pretioso sanguine Christi, qui effusus est propter nos, & propter nostram salutem*. Et serm. 5. ad Fratres *Filius Dei pro nobis mortuus est, securus esto accepturum te vitam ipsius, qui pignus habes mortem ipsius . Quam vitam tibi seruat iustificato, qui suam mortem donauit & impio ? Quam certa & quam firma promissione seruat iustis vitam suam, qui donauit iniustis mortem suam ? Impium te quæsiuit vt*

redimeret, redemptum deseret ut perdat? *Ma-*  
*la vestra pertuli, bona mea non reddam? Fons*  
*vite mortuus est propter nos, negabit vitam*  
*suam, qui pro nobis erogavit mortem suam?*  
 Similiter Christi mortem & generalem redem-  
 ptionem, esse magnum charitatis incentivum,  
 docet Apostolus 2. ad Corinth. 5. his verbis:  
*Charitas Christi urget nos, quoniam si vnus pro*  
*omnibus mortuus est, ergo omnes mortui sunt, &*  
*pro omnibus mortuus est Christus, ut & qui vi-*  
*uant iam non sibi uiuant, sed ei qui pro ipsis*  
*mortuus est.* Vnde Bernardus serm. 20. in  
 Cant. *Opus redemptionis nostræ omnino ama-*  
*rem nostrum facile vendicat totum sibi; hoc no-*  
*stram deuotionem & blandius allicit, & iu-*  
*stius exigit, & arctius stringit, & afficit ve-*  
*hementius.*

Contra istam conclusionem imprimis obijci  
 possunt aliqua Scripturæ testimonia, in qui-  
 bus agens de Christi morte & redemptione,  
 utitur hac voce *multi*, ut Matth. 20. *Filius ho-*  
*minis venit dare animam suam redemptionem*  
*pro multis.* Et 26. *Hic est enim sanguis meus*  
*novi testamenti, qui pro multis effundetur &c.*  
 Sed ad hoc respondetur, his locis significari  
 sanguinem Christi effusum esse pro multis,  
 quantum ad efficaciam, & pro omnibus, quan-  
 tum ad sufficientiam, ut interpretatur D. Tho-  
 mas super illum locum Matthæi. Vel dici po-  
 test, quod *ly multi* (teste Augustino lib. 6.  
 operis prioris contra Iulian. cap. 12. & lib. 2.  
 posterioris cap. 134. item lib. 20. de ciuit.  
 cap. 32.) frequenter vsurpari in Scriptura,  
 pro *ly omnes*, ut Daniel. 12. *Et multi de his*  
*qui dormiunt in terræ puluere, enigilabunt, id*  
 est

est omnes resurgent in die iudicii. Et ad Roman. 5. *Si enim unius delicto multi mortui sunt.*

Secundò obijciuntur alia testimonia, in quibus Christus dicitur non orasse pro reprobis: Ioan. 17. *Non pro mundo rogo, sed pro his quos dedisti mihi.* Id est (vt interpretatur Augustinus homil. 160. & 107. in Ioan.) non pro reprobis, sed pro prædestinatis. Vnde S. Thomas 3. p. q. 21. art. 4. ad 2. ait, *Christum non orasse pro omnibus crucifixoribus, neque etiam pro omnibus qui erant credituri in eum.* Verum ad hoc respondetur, his verbis non significari, quod Christus nullo modo pro reprobis orauerit oratione illa peculiari, quam tunc post coenam ultimam fundebat pro solis Apostolis. Vel quod pro ipsis non orauerit, oratione absoluta, & procedente ex voluntate consequenti, vt illis vitam æternam, & media ad illam efficaciter conducentia, à Patre obtineret. Vnde subdit S. Doctor, post verba adducta: *Sed pro his solum qui erant prædestinati, vt per ipsum vitam consequerentur eternam.* Quibus verbis apertè declarat, se tantum illud genus orationis in Christo negasse pro omnibus crucifixoribus suis, quam habuit pro electis.

Tertiò obijcitur quod ad Hebræos 9. versu 12. redemptio Christi dicitur æterna. Sed ad hoc facilè respondetur, illam dici æternam, non eò quod pertinet ad solos prædestinatos, in quibus solis perennis est fructus mortis Christi, sed eò quod non debeat iterari, sicut sacrificia vetera, quibus ibi comparatur sacrificium mortis Christi.

Quartò obijciuntur hæc verba Concilij Valentini Gallia tertij cap. 4. *Christus non est mortuus pro his qui in impietate mortui sunt.* Verùm sensus verborum illòrum est, Christum non esse mortuum, vt impij supplicijs æternis addicti, ab eis eximerentur, beneficio Saluatoris; non tamen negare Concilium quod dum viuerent, fuerit eis ablata Christi redemptio; & auxilia ad salutem sufficientia.

Demum obijcit Tansenius plura Augustini testimonia, quibus asserit illos tantùm redemptos esse à Christo, qui actu saluantur, & neminem perire ex his quos Christus redemit, & pro quibus mortuus est. Sed breuiter respondetur, hanc vocem *redimere*, duos habere sensus, imprimis enim significat; sufficiens pretium pro libertate captiui offerre, cum voluntate sincera, vt tale pretium ibi applicetur: secundò idem significat quod actu liberare captiuum à seruitute. Quando ergo Augustinus ait, illos tantùm esse redemptos à Christo, qui actu saluantur, vel neminem perire ex his quos Christus redemit, loquitur de redemptione non in primo, sed in secundo sensu, sicut & Prosper, dum in resp. ad 1. obiectionem Vincentij ait: *Qui hoc sæculum sine fide Christi, & sine regeneratione sacramenti, pertranseunt, redemptionis alieni sunt:* Solùm enim vult, illos non esse redemptos in actu secundo, & quoad applicationem. Vnde ibidem dicit: *Cum propter vnā omnium naturam, & vnā omnium causam, à Domino nostro in veritate susceptam, rectè omnes dicantur redempti, & tamen non omnes à captiuitate sint liberati, redem-*

demptionis proprietas penes illos est, qui non iam vasa diaboli, sed vasa sunt Christi. Id est, hi tantum dicuntur propriè redempti, qui sunt iustificati, & à potestate diaboli liberati.

### §. III.

*Ultima difficultas resolvitur.*

**D**ico ultimò, Deum per voluntatem antecedentem præparare hominibus, etiam in statu naturæ lapsæ, media seu auxilia ad salutem sufficientia. Est exptesse D. Thomæ super caput 12. epistola ad Hebræos lect. 3. ubi sic ait: *Deus vult omnes homines saluos fieri, & ideo gratia nulli deest, sed omnibus quantum in se est communitas.* Et 3. contra Gent. cap. 159. *Deus (inquit) quantum in se est paratus est omnibus dare gratiam, vult enim omnes homines saluos fieri.* Ipsum autem loqui de hominibus in statu naturæ lapsæ, ex eo apertè colligitur, quod alioquin non debuisset dicere, Deum paratum esse, sed paratum fuisse omnibus dare gratiam. Demùm idem S. Doctor in 1. dist. 46. qu. 1. art. 1. loquens de voluntate Dei antecedente, sic habet: *Huius voluntatis effectus est ipse ordo in finem salutis, & promouentia in finem omnibus communiter proposita tam naturalia, quam gratuita.* Quibus verbis rationem fundamentalem nostræ conclusionis infinitæ: *Deus enim per voluntatem antecedentem ordinat omnes homines in finem salutis: huius enim voluntatis effectus est ipse ordo in finem salutis,* inquit S. Doctor;

Et or: Ergo per illam præparat hominibus media seu auxilia ad salutem sufficientia. Consequentia patet, cum enim finis non sit consequibilis, nisi per media, implicat homines per voluntatem antecedentem sufficienter ordinari in finem salutis, nisi per illam media & auxilia ad salutem sufficientia præparentur.

Confirmatur: Eo ipso quod Deus per voluntatem antecedentem ordinat homines ad salutem & finem supernaturalem, eos obligat ad observanda præcepta supernaturalia, quæ sunt media ad eius consecutionem necessaria: Sed non potest homo sine auxilijs sufficientibus obligari ad observantiam præceptorum supernaturalium, alioquin obligaretur ad impossibile, cum non possit sine auxilio gratiæ, præcepta supernaturalia adimplere: Ergo per voluntatem antecedentem Deus præparat hominibus auxilia supernaturalia sufficientia ad salutem.

Contra istam conclusionem objicit primò quidem Recentior: Voluntas Dei antecedens de salute omnium hominum, nihil aliud est quam velleitas, quæ solùm naturam humanam, secundùm rationem generalem naturæ, & ut à Deo ad salutem condita est, respicit: Atqui voluntas per quam Deus hominibus in statu naturæ corruptæ, media necessaria ad salutem præparat, est vera & propriè dicta voluntas, & non solùm quædam velleitas, & respicit homines in particulari, ut sunt in seipsis, non verò solùm naturam humanam, secundùm rationem generalem naturæ, & ut à Deo ad salutem condita est: Ergo Deus per voluntatem antecedentem non præparat ho-



hominibus in statu naturæ lapsæ , media seu auxilia ad salutem necessaria .

Respondeo negando maiorem , quoad utramque partem ; in primis enim falsum est quod voluntas antecedens non sit vera & propriè dicta voluntas , licet non sit voluntas simpliciter , sed secundum quid , nec absoluta , sed conditionata , propter quod interdum velleitas appellatur , ut docet D. Thomas supra citatus . Falsum etiam est , quod talis voluntas non respiciat homines in particulari ut sunt in seipsis ; nam quando D. Thomas docet quod voluntas antecedens est illa quæ respicit naturam humanam secundum rationem generalem naturæ non intendit quod respiciat illam ut sic , & ut præcisam ab omnibus singularibus , sed quod respiciat omnes homines in indiuiduo & in particulari , ut conueniunt & communicant in eadem natura ad salutem condita , & ad finem supernaturalem ordinata .

Obijcit secundo : Per eam solùm voluntatem Deus operatur in hominibus quæ ad eorum salutem conducunt , per quam illa simpliciter vult : Atqui per voluntatem antecedentem nihil vult simpliciter eorum quæ ad hominum salutem conducunt : Ergo per illam nihil eorum operatur . Vnde S. Thomas in 1. dist. 47. quæst. 1. artic. 2. docet quod operatio non correspondet voluntati antecedenti , sed consequenti .

Respondeo , concessa maiori , distinguendo minorem : per voluntatem antecedentem Deus nihil vult simpliciter eorum quæ ad humanam salutem conducunt , efficaciter , concedo : inefficaciter nego . Similiter distinguo conse-

quens : Ergo per illam nihil operatur eorum  
 quæ ad hominum salutem conducunt , efficaci-  
 ter, concedo : inefficaciter, nego . Vt enim ait  
 D. Thomas supra citatus : *Huius voluntatis*  
*effectus est ipse ordo in finem salutis , & promo-*  
*uentia in finem , omnibus naturaliter proposita ,*  
*tam naturalia , quam gratuita .* Vnde quando  
 quod operatio non correspondet voluntati an-  
 tecedenti , sed consequenti , loquitur de opera-  
 tione & effectu principali , qualis est præpara-  
 tio auxiliorum efficacium , & gloriæ consecuti-  
 o ; non verò de operatione & effectu minùs  
 principali , qualis est simplex ordinatio in fi-  
 nem salutis , & præparatio auxiliorum suffi-  
 cientium .

Dices , Idem S. Doctor comparat volunta-  
 tem antecedentem saluandi omnes homines ,  
 voluntati iudicis , qui simpliciter vult homici-  
 dam suspendi , sed secundum quid vellet eum  
 viuere , scilicet in quantum homo est : Ergo si-  
 cut iudex ex hac voluntate qua vellet homi-  
 cidam viuere , nulla ei media præparat, quibus  
 capitis pœnam euadere possit , ita nec Deus  
 &c. Sed nego consequentiam & paritatem ,  
 ratio verò discriminis est , quia iudex non est  
 prouisor generalis , sicut Deus ,



## CAPVT IV.

*De efficacia voluntatis diuinæ .*

**V**T diuinæ voluntatis efficacia perfectè intelligatur , duæ sunt hic resoluendæ celebres controuersiæ . Prima versatur inter Thomistas & defensores scientiæ mediæ , an scilicet diuina decretâ circa actus nostros liberos , sint ab intrinseco efficacia , & prædeterminantia voluntatem , vel purè indifferentia , & expectantia voluntatis determinationem & consensum ? Secunda est aduersus Iansenium , & sectatores eius , an nimirum diuinorum decretorum efficacias & prædeterminatio , non habeat solùm locum pro statu naturæ lapsæ , sed etiam ad statum innocentie Angelorum & hominum extendatur ?

## §. I.

*Decreta diuinæ voluntatis circa actus nostros liberos , sunt ex se efficacia , & prædeterminantia voluntatem .*

**P**Robatur primò ex Scriptura , ait enim Apostolus 1. Corinth. 4. *Nesura quod scriptum est , unus contra alterum inflatur præ alio : quis enim te discernit ? Quid habes quod non accepisti ? Si autem accepisti , quid gloriaris quasi non acceperis ?* Ex quibus verbis hoc potest desumi argumentum : Si diuinum decretum circa actus nostros liberos , non sit ab intrinseco efficax , & prædeterminans volun-

tatem humanam, sed purè indifferens, & ab illa determinabile ad speciem actus, non erit ratio discernendi consentientem à non consentiente, sed ad voluntatem creatam reducetur tale discrimen, subindeque vnus homo poterit inflari & gloriari aduersus alterum: Sed hoc repugnat verbis Apostoli: Ergo & illud, Sequela maioris probatur: discrimen effectus, non ad id in quo causæ cōueniunt, sed ad id in quo differunt, debet reduci: nam quia duo indiuidua eiusdem speciei conueniunt in ratione specifica, & duæ species in gradu generico, non possunt inter se discerni vel distingui per rationem illam communem, specificam, vel genericam: Sed consensurus & non consensurus conueniunt in decreto, si illud prout est à Deo sit purè indifferens, & differunt solùm penes consensum & dissensum liberi arbitrij, indifferentiam & potentialitatem talis decreti ad actus diuersæ speciei determinantis: Ergo non in diuinum decretum, sed in liberum arbitrium, reducitur discretio seu discrimen consentientis à non-consentiente.

Probatur secundò ex SS. Patribus, qui passim docent, hanc quæstionem, *cur vni detur gratia, & vocatio efficax, non verò alteri?* esse omnino inscrutabilem & impenetrabilem, nec posse solui per humani arbitrij velle vel nolle. Ita D. Prosper de vocat. gentium lib. I. cap. ultimo, vbi sic habet: *Igitur profunditas illius quæstionis, quam secundùm admirationem Apostoli, impenetrabilem confitemur, per liberi arbitrij velle vel nolle non soluitur, quia licet insit homini malum nollē, tamen nisi donatum non habet bonum velle.* Similiter Augustinus hu-  
ius

ius quæstionis profunditatem non aliter soluit, quam recurrendo ad inscrutabilia iudicia Dei, ut constat ex tractatu 26. in Ioan. ubi sic ait: *Quare hunc trahat & alium non trahat, noli velle iudicare, si non vis errare.* Et de Spiritu & litt. cap. 34. *Si quis (inquit) me interroget, cur illi ita suadeatur, ut persuadeatur, illi autem non? (id est quare vni detur vocatio efficax, non verò alteri) duo solum occurrunt quæ respondere mihi placeat. O altitudo diuitiarum! & nunquid iniquitas apud Deum? Cui hac responsio non placet, querat Augustino doctiores, sed caueat ne inueniat presumptores.* At si Deus circa nostros actus liberos haberet decretum purè indifferens, & expectans determinationem & consensum liberi arbitrij, illud determinantis ad speciem actus, facilis esset solutio illius quæstionis, facile enim responderi posset (sicut & ipsi respondent Aduersarij) ideò vocationem esse efficacem in vno, non verò in altero, quia vnus vult illi obtemperare, & per scientiam mediam præuidetur consensurus, non verò alter; vel quia vnus per liberum arbitrium diuini decreti indifferentiam, ad actum talis speciei determinat, non verò alter. Sicut inquirenti, cur sol cum ficulnea producat ficus, cum olea oliuas, cum vite racemos? facile respondetur, quia concursus Solis, de se indifferens, & indeterminatus, modificatur in causis inferioribus, in quibus recipitur, & ab illis ad hos potius quam illos effectus producendos determinatur: Ergo decreta Dei circa actus nostros liberos non sunt purè indifferentia, sed determinantia, & ab intrinseco efficacia.

Probatur tertio ex D. Augustino, qui varijs in locis apertè fauet nostræ sententiæ : tract. 105. in Ioan. ait quod *Deus omnia futura prædestinavit*, id est prædefiniuit. Et tractat. 68. *Deus fecit futura, ea prædestinando*. Et de prædest. Sanct. cap. 10. *Prædestinatione sua Deus ea præsciuit quæ fuerat ipse factururus* : Deus autem non potest in sua prædestinatione, seu decreto, actus nostros futuros præscire, nisi tale decretum sit de se efficax, & causans liberam nostræ voluntatis determinationem, subindeque eam prædeterminans, ut in tractatu de scientia Dei cap. 4. §. 2. ostensum est : Ergo D. Augustinus agnoscit in Deo decreta circa actus nostros liberos de se efficacia & prædeterminantia voluntatem nostram. Quod potest confirmari ex eo quod S. Doctor pluribus in locis agnoscit gratiam ab intrinseco efficacem, quæ Deus hominum corda conuertit, quando voluerit, quomodo voluerit, & ubi voluerit, ut constat præcipuè ex libro de prædest. Sanctorum cap. 8. ubi sic ait : *Hæc itaque gratia (scilicet efficax) quæ occultè humanis cordibus divina largitate tribuitur, à nullo duro corde respuitur, ideo quippè tribuitur, ut cordis duritia primitus auferatur*. At semel admissa gratia ab intrinseco efficaci & infallibili, prout venit à Deo, necessariò debet concedi decretum de se & ab intrinseco efficax, ac prædeterminans voluntatem, ut fatetur Aduersarij, & de se manifestum est : Ergo decreta ab intrinseco & ex propria natura efficacia, sunt de mente Augustini.

Probatur quartò ex D. Thoma, qui etiam pluribus in locis manifesta docet nostram sen-

rentiam. Nam quolib. 12. artic. 4. subscribit sententia illorum qui dicunt, quod *a providentia Dei omnia sunt prædeterminata*, & in hoc sensu ibidem docet, cum Augustino, posse concedi quod omnia subijciantur fato, dummodo nemine fati intelligamus diuinam providentiam omnia quæ fiunt in mundo præordinantem & prædeterminantem. Subdit tamen, hoc nomen *fatum*, non debere à Catholicis usurpari, quia nec nomina cum Gentilibus conuenit habere communia: At quis dicat decreta purè indifferentia, aut supponentia præuisionem nostri consensus per scientiam mediam, fati nomine appellari posse, & quis asserere audeat, per talia decreta omnia esse a diuina providentia prædeterminata, vt loquitur S. Doctor? nemo igitur negare potest, illum agnoscere in Deo decreta ab intrinseco efficacia, quibus prædeterminat nostram voluntatem, vt liberè simul & infallibiliter operetur, seu quoad substantiam actus, & modum libertatis, vt declarabitur infra. Vnde in hac parte quæst. 23. art. 1. ad 1. soluens argumentum ex auctoritate Damasceni dicentis; *Omnia quidem præcognoscit Deus, sed non omnia prædeterminat*. Respondet quod Damascenus nominat prædeterminationem, impositionem necessitatis, sicut in rebus naturalibus, quæ sunt prædeterminatæ ad vnum. Eodem modo respondet ad istam auctoritatem, & ad aliam Gregorij Nysseni 3. contra Gent. c. 90. Sicut ergo decretum prædeterminans voluntatem, non ad vnum per modum naturæ, sed per modum libertatis, cum omni modo infallibilitate, esse necessariò admittendum;

dum; aliàs frustra sic explicitisset illas Patrum auctoritates, imò non debuisset illas interpretari, sed illas simpliciter & absolutè admittere.

Ex his patet, quam periti & versati sint in doctrina D. Thomæ, recentiores aliqui, qui dicunt nomen *prædeterminationis* esse novum, & à Bannesio excogitatum, cùm S. Doctor, non solùm locis citatis illud vsurpet, sed etiam in 1. ad Annib. dist. 47. q. vnic. art. 4. ad 4. ubi sic habet: *Voluntate Dei non solùm res in esse producuntur, sed etiam in rebus producendis modum quo producantur prædeterminavit. Unde cùm voluntas Dei efficaciter impleatur, oportet quod res fiant, & eodem modo, sicut voluntas divina disposuit.* Imò Dionysius, Pauli discipulus, & Theologorum antiquissimus, in ipso nascentis Ecclesiæ exordio, idem nomen vsurpauit cap. 5. de diuin. nomin. ubi hæc scribit: *Exemplaria dicimus in Deo rationes substantificas, quas Theologi prædefinitiones vocant, & diuinas ac bonas voluntates, existentiam prædeterminativas.*

Probatur quintò: Si decreta diuinæ voluntatis circa actus nostros liberos, non sint ex se efficacia, sed purè indifferentia, sequitur liberam determinationem nostræ voluntatis ad consentiendum gratiæ diuinæ voluntatis, non causari à diuina voluntate subindeque Deum non esse primam rerum omnium causam, nec per consequens Deum. Sequela probatur: Dei voluntas nequit talem determinationem causare, nisi mediante suo decreto, cùm teste Apostolo omnia operetur iuxta consilium voluntatis suæ: Atqui mediante decreto ex se in-

dis-



differenti ad consensum vel dissensum , nequit causari determinatio ad consensum potius quam ad dissensum ; cum etiam determinatum & indifferens æquè inter se opponantur , ac calidum & frigidum , album & nigrum , quemadmodum repugnat calidum produci à frigido , vel album à nigro , ita & determinatum ab indifferente : Ergo si decretum diuinæ voluntatis circa actus nostros liberos , non sit ex se efficax , & prædeterminans , determinatio voluntatis humanæ , non causatur à voluntate diuina .

Confirmatur & magis illustratur hæc ratio : Quæro ab Aduersarijs , à quo decretum indifferens ad consensum vel dissensum , determinetur ad vnam partem , potius quam ad aliam , an à Deo , vel à creatura ? Si à creatura ? Ergo concursus creaturæ præcedit naturam concursus Dei , cum determinans , in quantum tale , debeat præcedere id quod determinatur , quia prout sic ad illud comparatur vt forma , & per consequens concursus creaturæ , diuini decreti causalitatem , necessariò sub aliqua formalitate subterfugit . Si à Deo : Ergo decretum illius prius natura determinat causam secundam ; subindeque non est purè indifferens , sed prædeterminans , vt docent Thomistæ . Certè vel admittendus est processus in infinitum in determinatione diuini concursus & decreti , ex se indifferentium ; vel concedendum dari aliquam determinationem actualem voluntatis creatæ , quæ non sit causata à Deo , vel tandem dicendum , decretum diuinæ voluntatis quo causatur , esse ex se determinatum , atque adeo efficax ad consensum

potius quam dissensum nostræ voluntatis. Unde egregiè dicit Ioannes à S. Thoma, quod *hæc difficultas assertoribus scientiæ mediæ altæ profunditas est, & rapidissimis verticibus plena, quam nullus pertransit, quem non absorbeat, nisi ad litus efficaciam diuinæ efficiat.*

Probatur sextò: Si Deus circa actus nostros liberos habeat decreta purè indifferentia, & expectantia voluntatis nostræ determinationem & consensum, sequitur illum non habere tam perfectum & absolutum in nostros actus liberos dominium, quam voluntas creata: Sed hoc dici nequit, cum iuxta Augustinum de corrept. & gratia cap. 14. *Deus magis habeat in sua potestate voluntatis hominum, quam ipsi suas*: Ergo nec illud. Sequela Maioris probatur: Voluntas creata, ratione perfecti domini, quod habet in suos actus liberos, potest illa sua & incolumi sua libertate, se ipsam liberè determinare, & talem determinationem incipere, nec debet illam supponere vel expectare ab alia causa creata: Ergo si Deus non possit idem præstare, & facere sine læsione libertatis, ut à voluntate creata incipiat & exeat talis determinatio, sed eam debeat à libero arbitrio expectare, & veluti emendicare, non habebit tam perfectum & absolutum dominium in nostros actus liberos, quam ipsa voluntas creata, & magis habebit homo in manu sua voluntatem suam, quam ipse Deus, quæ est contradictoria propositionis S. Augustini, asserentis quod *Deus magis habet in sua potestate voluntates hominum, quam ipsi suas.*

Probatur septimò: sublatiis decretis & au-

xilijs ex se efficacibus, necessitas orationis, quæ præcipua est vitæ spiritualis & Christianæ basis, ac fundamentum, penitus corrumpitur, & vana prorsus ac irrisoria redditur omnis nostra oratio. Quid enim amabo petunt à Deo decretorum indifferentium, & scientiæ mediæ assertores, quando postulant gratiam Dei ad bene sanctæque viuendum? Nam vel petunt gratiam & auxilium; & hoc dici nequit, cum gratia iuxta illos in omni instanti præsto sit, & obduratissimis quibuscumque conferatur. Vel petant gratiæ usum & applicationem, aut determinationem? Et hoc non, cum velint illam non à gratia, & decreto Dei proficere, sed à voluntate humana expectari: *Irrisoria autem petitio est* (inquit Augustinus) *cum ab eo petitur quod scitur ipsum non dare, sed ipso non donante esse in hominis potestate*: Ergo si auxilium Dei fieri efficax sit in nostra potestate, eiusque efficacia non pendeat nisi ex determinatione & applicatione nostræ voluntatis, ut docent Aduersarij, frustra à Deo petitur: petenti enim respondebit Deus: Fac tu gratiam efficacem, & habebis quidquid optas.

Addo quod decretum indifferens concurrendi cum causis liberis, quod in Deo admittunt Aduersarij, plures habet difficultates, quæ illos acriter mordent & pungunt, & à quibus difficilè se expedire possunt. Nam vel illud decretum est generale & absolutum, concurrendi ad quodcumque homo voluerit, ut aliqui ex defensoribus scientiæ mediæ docent; vel speciale & conditionatum, nempe volo concurrere ad amorem, vel odium, si creatura

velit, & si ad amorem vel odium se determinet, ut alij asserunt? Si primum dicatur, modus ille concurrendi Dei, per concursum indifferentem, & sine intentione ac volitione alicuius actus & effectus particularis, cum sola intentione generali agendi quod volet creatura, erit cæcus, ignarus, imprudens, vagus, & confusus, facietque Deum similem piscatoribus, qui mittunt rete in mare, ignorantes quos pisces apprehendent, & suis retibus concludent. Si secundum asseratur, tale decretum faciet sensum ridiculum & nugatorium, cum enim iuxta Aduersarios, concursus Dei nihil aliud sit quam actio causæ secundæ, prout à Deo, Deum dicere volo concurrere ad amorem, si creatura se determinet ad amandum, idem est ac dicere, volo concurrere ad amorem, si concurram ad amorem: Vel si videam amorem productum, illum producam.

Confirmatur: Implicat contradictionem promitti, vel decerni conditionaliter id, sine quo talis conditio non potest impleri; si quis enim homini in tenebris constituto diceret, si videris hoc obiectum, præbebo tibi lucem, illum irrideret, cum sine luce illud videre non possit. Similiter si quis puero debili & impotenti ad leuandum aliquod pondus diceret, si illud tollas, ego te adiuvabo ad illud tollendum, ipsum pariter derideret, cum sit impotens ad illud tollendum, nisi adiuvetur ab alio: Sed voluntas creata in quacumque ordine rerum constituitur; non potest velle, nec se determinare, sine actuali Dei concursu, iuxta illud Augustini in solil. cap. 24. *Velle quod bonum est, non possum, nisi tu velis*: Ergo

con-

concurſus Dei non poteſt promitti vel ſaltem à Deo, ſub conditione quod voluntas humana veſit, aut ſe determinet.

Demum conſutari poſſunt decreta indiſſerentia argumento deſumpto ex nouo decreto Innocentij XI. tenoris ſequentis.

Feria 5. Die 23. Nouembris 1679.

*In Congregatione generali S. Romanæ & Vniuerſalis Inquiſitionis habita in Palatio Apoſtolico Montis Quirinalis, coram Sanctiſſimo Domino noſtro INNOCENTIO Papa XI. ac Eminentiffimis & Reuerendiſſimis D. D. S. R. E. Cardinalibus, in vniuerſa Republica Chriſtiana aduerſus hæreticam prauitatem Inquiſitoriis generalibus à Sancta Sede Apoſtolica deputatis.*

Cum ſupradictis Eminentiffimis & Reuerendiſſimis Dominis delatæ fuerint hæc duæ propoſitiones, Deus donat nobis omnipotentiam ſuam vt ea vtamur, ſicut aliquis donec alteri Villam vel librum. Et Deus ſubijcit nobis ſuam omnipotentiam. Eorundem iuſſu, per Theologos ad id ſpecialiter deputatos, diligenter examinatæ fuerunt: quorum votis auditis; & re Sanctiſſimo Domino noſtro relata, & coram ſua ſanctitate propoſita vna cum votis ipſorum Eminentiffimorum & Reuerendiſſimorum D. D. S. R. E. Cardinalium: Sanctitas ſua decreuit & mandauit vt ambæ propoſitiones omnino prohiberentur, ſicuti eos præſenti decreto damnat & prohibet, vti temerarias ad minimum & nouas; mandatque ne quiſquam deinceps cuiuſcunque ſit gradus, ordinis, vel

con.

conditionis, illas, vel illarum alterutram, audeat asserere, sub poenis & censuris in indice librorum prohibitorum contentis, aliisque Sanctitatis suæ arbitrio infligendis.

Loco † sigilli.

Franciscus Ricardus S. R. & yniuersalis Inquisitionis Notarius.

Die 2. Decembris 1679. supradictum decretum, affixum, & publicatum fuit ad Valuas Basilicæ Principis Apostolorum, Palatij S. Officij & in locis solitis & consuetis Urbis per me Franciscum Perinum SS. D. N. Papæ & Sanctissimæ Inquisitionis Cursorem.

Hoc decreto attingi videntur decreta indifferentia Recentiorum, plures enim ex illis passim docent & asserunt homines habere in sua potestate Dei Omnipotentiam & concursum, eoque vti ad libitum, ac determinare siue ad bonum, siue ad malum prout ipsis libuerit, & in hoc sensu intelligunt & explicant illud Isaia 43. *Sequere me fecisti in iniquitatibus tuis*. Addunt Dei concursum à diuina omnipotentia promanantem esse in nobis per modum habitus quo utimur quando volumus, & sicut volumus; & qui subditur libertati & arbitrio voluntatis nostræ. Vnde prædictum decretum contra talem doctrinam & sententiam militare videtur eamque vti temerariam & nouam damnare, ac reprobare. Secundum est igitur antiquæ, ac veræ & solidæ Thomistarum doctrinæ, asserentium Dei omnipotentiam, eiusque decreta, auxilia; &

con-

concursum non esse in nostra potestate, nec subdi arbitrio voluntatis nostræ sed potius eam potenter ac suauiter sibi subiicere, neque esse ex se & ab intrinseco efficacia, ac proinde non determinari à voluntate creata ad agendum vel non agendum, sed eam determinare & applicare ad quodcumque Deus voluerit, ob supremum & absolutum Dominium quod habet in illam, vt suprâ ex Augustino fusè declarauimus.

## §. II.

*Soluntur obiectiones.*

**O**bjicies primò: Concursum causarum vniuersalium & superiorum, est indifferens, & determinatur à causis particularibus & inferioribus ad speciem actus: v. g. concursus solis determinatur à ficulnea ad producendas ficus, ab olea ad producendas oliuas, à vite ad producendos ratemos, ab homine ad generandum hominem, ab equo ad producendum equum: Ergo similiter decretum seu concursus causæ primæ & vniuersalissimæ, indifferens est, & à causis liberis determinatur ad speciem actus. Vnde S. Thomas qu. 1. de potentia art. 4. ad 3. docet quod influentia causæ primæ modificatur, determinatur, & specificatur à causis secundis.

Respondeo, concessio Antecedente, negando consequentiam, & paritatem: Ratio discriminis est, quia concursus causarum secundarum vniuersalium, non debet causare determinationem causarum inferiorum, quantum

ad speciem suorum actuum vel effectum: v. g. Sol non causat determinationem plantæ, vel arboris, ad producendos fructus talis speciei, sed illam supponit à natura inditam. Concursum autem causæ primæ, cum sit vniuersalissimus, & ad omnia se extendat, causat determinationem liberi arbitrij, non verò eam supponit vel expectat à voluntate creata, vnde non potest esse indifferens, sicut concursui causarum secundarum vniuersalium. Quando verò S. Thomas docet quod influentia causæ primæ modificatur & determinatur à causis secundis, solùm intendit quod Deus attemperat & accommodat suum concursum, suamque motionem, naturis illarum; ita vt causas necessarias & naturales moueat ad vnum per modum naturæ, non relinquendo potentiam ad oppositum, liberas verò ad vnum per modum liberi, & relinquendo potentiam ad oppositum; quod est concursum & motionem Dei determinari à causis secundis materialiter tantum & obiectiuè, vel vt alij loquuntur, exigituè.

Obijcies secundò: D. Thomas q. 6. de verit. art. 3. docet Deum ad salutem prædestinati præparare media ex se quidem defectu ibilia, quorum tamen aliqua, alijs deficientibus, effectum sint habitura: sicut ( inquit ) perpetuitas speciei saluatur per successionem plurium individuorum, quorum quodlibet est corruptibile: At si daretur decretum ab intrinseco efficax, & prædeterminans voluntatem, quodlibet auxilium gratiæ in prædestinato, efficaciam & effectum haberet: Ergo tale decretum menti & doctrinæ D. Tho. repugnat.

Re-



Respondeo S. Doctorem ibi loqui de libero arbitrio , comparato cum fine prædeterminationis , ad quem assequendum verissimum est , non esse efficaciam in quolibet particulari auxilio , sed in tota collectione quam præparat ex efficaci gloriæ intentione ; non autem negat quodlibet diuinæ gratiæ auxilium , efficaciam intrinsecam habere ad actum in particulari ad quem datur , sed potius oppositum docet , vt ex exemplo quod adducit colligitur , si enim in quolibet indiuiduo naturæ corruptibilis , non esset efficacia ad conseruationem aliquam naturæ , non posset etiam in omnibus indiuiduis perpetuitas saluari : Ergo pariter , nisi in aliquibus auxilijs esset efficacia gratiæ ad particulares actus , quibus peruenitur ad beatitudinem , non posset finis assecutio per illa haberi .

Obijciunt tertio Aduersarij : Ex decretis ab intrinseco efficacibus , & prædeterminantibus voluntatem creatam , fatum in res humanas inducitur , cum talia decreta non minùs sint firma , inflexibilia , & immutabilia , quàm constellationes syderum , & cursus planetarum , in quibus Ethnici olim fatum constituebant . Vnde Lessius decreta illa *ferrea & adamantina* appellat : Ergo illa non sunt admittenda .

Respondeo primò , idem fuisse olim obiectum Augustino à Semipelagianis , vt constat ex D. Prospero in epistola ad Augustinum , vbi referens præcipuas contra eius doctrinam Massiliensium querimonias ait quod illi conquerebantur ex eius doctrina fatalem quandam necessitatem induci . Vnde Faustus Semipelagianorum coripheus lib. 10. de liberq

arbit. cap. 4. doctrinam Augustini, suppresso tamen eius nomine, impugnans, sic ait: *Sed pietatis fronte, gentilitatis malum & inter gratiæ vocabulum, absconditur erit fatale decretum.* Et cap. 12. *Recedat hinc. originalis definitio, vel fatalis.*

Respondeo secundò, quod si nomine fati intelligatur diuina prouidentia, suo æterno & immutabili decreto prædefiniens & prædeterminans cuncta quæ sunt in mundo, fieri iuxta naturam & conditionem causarum à quibus proueniunt, id est libera liberè, & necessaria. necessariò, nullum est inconueniens admittere fatum, quamuis non debeamus hoc nomine uti, quia non conuenit Catholicos habere nomina communia cum Gentilibus. Ita enim expresse docet D. Thomas. quodlib. 12. supra citato, & probat ex Augustino dicente: *Si quis hoc modo intelligat fatum, sententiam æneat, linguam corrigat, & non dicat fatum, sed prouidentiam Dei.* Similia habet Augustinus li. 2. contra duas Epif. Pelagianus ubi hæc scribit: *Nec sub nomine gratiæ fatum asserimus, quia nullis hominum meritis Dei gratiam disimulans antecedit: si autem quib. scdm omnipotentissimam Dei voluntatem placeat fati nomine nuncupare, prophanas quidem verborum nouitates deuotamus, sed verbis contendere non amamus.*

Magnum porro ac notabile reperitur discrimen inter decretum prædeterminans, & fatum rigo osè sumptum, quod Gentiles olim admittebant: istud enim erat à causis omnino extrinsecis voluntati, nimirum à syderibus & corporibus cœlestibus; illud verò procedit à  
Deo,

Deo , qui cū sit auctor & principium ipsius voluntatis , magisque habeat in sua potestate voluntates hominum , quam ipsi suas , non se habet vt agens extrinsecum respectu voluntatis nostræ , sed inter causas illius internas reputatur , vt latius infra declarabitur . Vnde licet fatum Gentilium necessitatem inferret voluntati , & ab ea tolleretur potentiam ad oppositum , non tamen decretum prædeterminans , quod potius talem potentiam fouet , conseruat , & firmat , vt ex infra dicendis constabat . Vnde immeritò decreta prædeterminantia , *ferrea & adamantina* à Lessio appellantur , cū siuissima sint , & naturæ ac conditioni causarum secundarum quas mouent , proportionata & accomodata . Verius sanè decreta indifferentia quæ Deo affingunt defensores scientiæ mediæ , *vitrea & plumbea* nuncupari possent : vitrea quidem , quia , vt verbis Augustini vtatur , *lucent vanitate , sed franguntur veritate* : plumbea verò , quia sigillationem & determinationem à voluntate humana expectant .

## §. III.

*Deus physicè prædeterminat voluntatem ad suos actus liberos eliciendos .*

**P**robatur primò ratione fundamentali : Concurfus simultaneus non saluat in Deo rationem primæ causæ , respectu nostrorum actuum liberorum : Ergo necessariò admittendus est concursus præuius , qui physica prædeterminatio à Thomistis appellatur . Consequen-

quentia patet, Antecedens probatur : Concur-  
sus indifferens , prout à Deo , & à voluntate  
determinandus , non sufficit ad rationem cau-  
sæ primæ : Sed concursus simultaneus est in-  
differens , prout à Deo , & à voluntate deter-  
minandus , vt docent Aduersarij : Ergo non  
sufficit ad rationem causæ primæ . Maior pro-  
batur : Concursum in quo Deus magis subor-  
dinatur creaturæ , quam creatura Deo , non  
sufficit ad rationem primæ causæ : Sed in  
concursum indifferenti , prout à Deo , & deter-  
minato , prout à voluntate , magis subordina-  
tur Deus creaturæ quam creatura Deo : Ergo  
talis concursus ad rationem primæ causæ non  
sufficit . Maior constat , est enim contra pri-  
mæ causæ perfectionem subordinari secundæ,  
Minor verò sic ostenditur . Quia voluntas  
creata non potest actum liberum elicere sine  
concursum diuino , subordinatur Deo in produ-  
ctione actus liberi, vt Aduersarij docent : Sed  
Deus non potest actum liberum causare sine  
concursum voluntatis , & aliàs voluntas creata  
determinat concursum diuinum , si ille sit in-  
differens prout à Deo , seu indifferenti modo  
voluntati oblati : Ergo in hoc modo concur-  
rendi , magis subordinatur Deus voluntati ,  
quam voluntas Deo .

Ex hoc intelliges, quod vt in Deo ratio pri-  
mæ causæ saluetur in ordine ad actus liberos ,  
debet ad illos concurrere concursu præuio de-  
terminante concursum voluntatis creatæ. Tum  
quia omnis causa debet esse prior , saltem na-  
tura & causalitate , suo effectui . Tum etiam ,  
quia concursus indifferens non potest causare  
determinationem nostræ voluntatis , sicut cali-  
dum

dum non potest produci à frigido , nec album à nigro . Tum denique , quia vt Deus tanquam prima causa influat in consensum liberum voluntatis creatæ , debet voluntas creata subordinari Deo in illius productione : Sed nisi ab ipso vt determinante dependeat , illi non subordinatur : Ergo nec ab illo vt prima causa dependet . Minor probatur : Quod voluntas creata non possit actum liberum efficere sine concursu diuino , non sufficit vt subordinetur in Deo in illius productione : Ergo vt hæc subordinatio saluetur , debet dependere à Deo , vt illius concursum determinante . Consequentia patet , probatur Antecedens . Deus non potest efficere actum liberum voluntatis creatæ , sine concursu illius , & tamen Deus non subordinatur voluntati creatæ in productione actus liberi , est enim contra rationem primæ causæ subordinari secundæ : Ergo quod voluntas creata non posse actum liberum efficere sine concursu diuino , non sufficit ad hoc vt illum eliciat , vt subordinata Deo , nec consequenter ad hoc vt Deus tanquam prima causa ad illum concurrat .

Probatum secundò necessitas physicæ prædeterminationis respectu voluntatis creatæ , ratione desumpta ex D. Thoma 2. physic. lect. 8. vbi sic discutrit : *Sicut potentia motiva quæ est ad vtrumlibet , non exit in actum nisi per potentiam appetitivam determinetur ad vnum , ita nihil quod est ad vtrumlibet exit in actum , nisi per aliquid determinetur ad vnum , quia id quod est ad vtrumlibet , est sicut ens in potentia , potentia autem non est principium agendi , sed solum actus ; unde ex eo quod est ad vtrumlibet*

*libet nihil sequitur, nisi per aliquid aliud quod determinat ad unum.* Similia habet 5. contra Gent. cap. 2. ubi hæc scribit: *Quod indifferenter se habet ad multa, non magis unum operatur quam aliud, unde à contingente ad utrumque, non sequitur aliquis effectus, nisi per aliquid per quod ad unum determinatur.* Atqui voluntas creata ex se est principium indeterminatum & indifferens ad utrumlibet, & ad multa indifferenter se habet: Ergo nusquam exhibit in actum determinatum, nisi prius saltem natura determinetur ab aliquo agente extrinseco, scilicet Deo.

Respondet Suarez lib. 3. de auxilijs c. 42. & 43. quod voluntas nostra, quamvis sit indifferens & in potentia ad suos actus, tamen propter eminentiam suæ virtutis, & propter suam libertatem ac perfectum dominium quod habet in suos actus, est virtualiter in actu, ac proinde non indiget determinari & reduci in actum ab aliquo agente extrinseco, sed potest seipsam determinare & in actum reducere.

Sed contra: Quamvis voluntas ratione suæ libertatis habeat dominium in suos actus, illud tamen non est supremum, & absolutum, sed dependens à Dei dominio, eique subordinatum: Ergo licet possit in suo ordine, & ut secundum liberum, ac secundum mouens, se determinare, & in actum reducere, id tamen præstare nequit, nisi cum subordinatione ad primum liberum, & primum mouens, subindeque nisi dependenter ab eius motione & determinatione. Vnde præclare D. Thomas 1. 2. q. 109. art. 2. ad 1. *Homo est dominus suorum actuum volendi & non volendi, propter*

pter deliberationem rationis, quæ potest flecti ad unam partem vel ad aliam : Sed quod deliberet vel non deliberet, etsi eiusmodi etiam sic dominus, oportet quod hoc sit per deliberationem præcedentem, & cum hoc non procedat in infinitum, oportet quod finaliter deueniatur ad hoc quod liberum hominis arbitrium moueatur ab aliquo exteriori principio, quod est supra mentem humanam scilicet Deo.

Dices, hoc solum probare, voluntatem humanam debere præmoueri & prædeterminari à Deo, ad volitionem boni in communi, & primam intentionem finis, ex qua postea se mouere & determinare potest ad electionem mediorum, & volitionem honorum particularium. Vnde idem S. Doctor 1. 2. q. 9. art. 6. ad 3. sic ait : *Deus mouet voluntatem hominis vt vniuersalis motor ad vniuersalis obiectum voluntatis, quod est bonum, sed homo per rationem se determinat ad volendum hoc vel illud, quod est verè bonum, vel apparens bonum.*

Sed contra : A principio indifferenti, vt indifferens est, non potest exire actus determinatus nisi prius determinetur ab alio, vt ait D. Thomas locis supra relatis : Sed posita prima intentione finis, & amore boni in communi, voluntas adhuc manet indifferens ad electionem huius vel alterius medijs, & ad volitionem huius vel illius boni particularis : Ergo adhuc eget à Deo determinari. Vnde S. Doctor loco citato solum intendit constituere discrimen inter motionem Dei in ordine ad bonum vt sic, & in ordine ad bona particularia, consistens in eo quod ad primam adæquatè applicat

cat & determinat voluntatem , ipsa solùm elicitivè concurrente , sed non se applicante & determinante : in ordine autem ad bona particularia , voluntas creata non solùm elicitivè , sed etiam applicativè concurrit , applicando & determinando seipsam , non quidem vt primum applicans & determinans , sed vt secundum , & consequenter sub motione , applicatione , & prædeterminatione Dei , vt primi mouentis , applicantis , & determinantis . Ex quo non sequitur quod à Deo non prædeterminetur ad volitionem bonorum particularium , sed potius oppositum .

Probatur tertio ratione ostendente necessitatem physicæ prædeterminationis in ordine ad actus supernaturales : Deus per gratiam præuenientem verè & propriè efficit in nobis determinationem voluntatis ad bonum : v. g. ad credendum mysterijs reuelatis , vel ad diligendum Deum super omnia : Sed id præstare nequit , nisi per gratiam physicè prædeterminantem : Ergo illa admittenda est . Maior est certa de fide , & constat ex Tridentino sess. 6. cap. 7. definiente exordium iustificationis in adultis , à præueniente Dei gratia sumendum esse : tale verò exordium incipit à determinatione liberi arbitrij , quia infidelis se determinat ad credendum mysterijs sibi reuelatis , vel fidelis ad consentiendum suæ vocationi , & ad diligendum Deum super omnia . Minor verò , in qua est difficultas , sic ostenditur . Motio moralis non est vera & propria efficientia , sed impropria tantùm & metaphorica , magisque pertinet ad genus causæ finalis , quam efficientis ; mouet enim solùm obiectivè , & exhiben-



bendo voluntati bonitatem, quæ conuenientia sua eam alliciat ; vt constat exemplo pueri , qui ostensione pomi moraliter mouetur & excitatur ad currendum ; quis enim dicat , hanc moralem excitationem esse verè & propriè causam efficientem cursus illius ? Ergo Deus per gratiam moraliter tantum excitantem , non potest verè & propriè in nobis efficere determinationem voluntatis ad bonum , sed duntaxat per gratiam physicè præuenientem & prædeterminantem .

Dices, Deum talem determinationem verè & propriè in nobis causare , per gratiam cooperationis & coefficientiæ , seu per concursum simultaneum ordinis supernaturalis, quo vna cum voluntate in eius consensum & determinationem influit.

Sed contra primò : Tridentinum citatum docet exordium nostræ iustificationis ( subindeque determinationem voluntatis ad credendum vel diligendum Deum super omnia , à qua exordium iustificationis incipit ) à Dei gratia præueniente procedere : Sed gratia cooperationis & coefficientiæ , non est præueniens , sed concomitans : Ergo ab illa non procedit primum nostræ iustificationis exordium .

Contra secundò : Concursus simultaneus , iuxta principia Aduersariorum , est indifferens, seu indifferenti modo voluntati oblati : Ergo tantum abest quod voluntatis nostræ determinationem , verè & propriè causet , quin potius eam à voluntate supponat vel expectet, vt Deus determinatè in nostros actus liberos influat, seu vt decreti diuini indifferentia , su-

spensio, & indeterminatio tollatur & resol-  
uatur, vt constat ex dictis §. sequenti.

#### §. IV.

*Prædeterminatio physica est de mente  
D. Thomæ.*

**P**robatur primò: Admisso decreto præde-  
terminante, non potest negari prædeter-  
minatio physica, cum illa sit executio & cau-  
salitas tali decreto, & ab illo, vt radius à So-  
le, riuulus à fonte, & effectus à causa, pro-  
fluat; Sed D. Thomas admittit decretum præ-  
determinans, cum asserat quodlib. 12. art. 4.  
omnia à diuina prouidentia esse prædetermi-  
nata, vt constat ex dictis §. 1. Ergo & præ-  
determinationem physicam.

Probatur secundò: Concursum præuius, &  
physica prædeterminatio, idem sonant: Sed  
D. Thomas admittit concursum præuium: Er-  
go & physicam prædeterminationem. Maior  
constat, minor probatur ex D. Thomæ quæst.  
3. de potentia art. 7. ad 3. vbi sic ait: *In ope-  
ratione qua Deus operatur mouendo naturam,  
non operatur natura, sed ipsa natura operatio,  
est etiam operatio virtutis diuinæ.* Quibus ver-  
bis S. Doctor expressè distinguit in Deo du-  
plicem concursum, vnum qui est à solo Deo,  
ipsa natura non operante, qui proinde præ-  
uius est, & operationem causæ secundæ, prio-  
ritate saltem naturæ antecedit; alterum qui  
identificatur cum prædicta operatione, & hic  
est concursus simultaneus, qui est ipsamet ope-  
ratio causæ secundæ, prout à Deo simul in-  
fluen-

fluente dependet. Vnde subdit ibidem in resp. ad 4. quod tam Deus quam natura immediate operantur, licet ordinentur secundum prins & postrius.

Probatur tertiò : Nomine prædeterminationis physicæ : nihil aliud intelligunt Thomistæ, quam virtutem quandam fluentem & transeuntem, per quam Deus mouet & applicat causas secundas ad operandum : Sed talem virtutem admisit D. Thomas : Ergo & physicam prædeterminationem. Maior constat, minor probatur ex loco citato de potentia in resp. ad 7. vbi S. Doctor hæc scribit : *Virtus naturalis quæ est in rebus naturalibus in sua institutione collata, inest eis vt quædam forma habens esseratum, sed quod à Deo fit in re naturali quo actualiter agat, est vt intentio sola, habens esse quoddam incompletum, per modum quo colores sunt in aere ( nimirum in esse intentionali, ratione specierum quæ illas repræsentant ) & virtus artis in instrumento artificis.* Hoc testimonium adeò manifestum est, vt Conimbricenses 2. physic. cap. 7. quæst. 14. artic. 1. ingenuè fateantur, D. Thomam ibi admisisse concursum præuium, mouentem & applicantem causas secundas ad operandum, quæ est ipsa physica præmotio, seu prædeterminationis, quam admittunt Thomistæ. Illorum verba sunt : *Circa modum quo Deus cum causis secundis ad earum operationes & effectus concurrat, se offert celebris opinio D. Thomæ quæst. 7. de potentia art. 7. eiusque sectatorum, Capreoli, Ferrariensis, & aliorum, existimantium omnes causas secundas, antequam operentur, accipere à Deo influxum quendam & motum, qui*

sit quasi esse intentionale diuinæ virtutis, quo  
 ad promendum actiones excitentur, eo modo quo  
 artium instrumenta, v. dolabra, & securis, præ-  
 uiam motionem à fabro accipiunt, cum ad opus  
 conficiendum applicantur. Similia habet Azo-  
 rius lib. 1. inst. moral. cap. 21. quæst. 8. ubi  
 hæc scribit: Octauò quæritur, an Deus, quan-  
 docum natura vel voluntate operatur, ipsam  
 moueat & applicet ad agendum? S. Thomas  
 apertè sic ait: Deus non solum dat formas, re-  
 bus, sed etiam conseruat eas, & applicat &c.  
 Cæterum mihi videtur verissima D. Thomæ sen-  
 tentia, eam enim planè videtur Augustinus  
 tradere &c. Item Pererius lib. 8. de causis cap.  
 8. in eo (inquit) quod adiungit D. Thomas,  
 causas secundas, & in his voluntatem nostram,  
 à Deo moueri, applicari, & determinari ad  
 agendum, licet nonnulli dissentiant Theologi,  
 ego tamen manibus, pedibusque, in eam senten-  
 tiam perquam libenter eo. Similia scribit Bel-  
 larminus lib. 4. de lib. arbitr. cap. 16. Altera  
 ratio (inquit) conciliandi libertatem huma-  
 nam cum cooperatione diuina, & fortasse etiam  
 probabilior, est iuxta sententiam S. Thomæ, qui  
 dicit cooperationem diuinam ita concurrere cum  
 causis secundis, etiam liberis, vt non solum eis  
 dederit & conseruet virtutes operatrices, sed  
 etiam eas moueat & applicet ad opus, vt cogno-  
 sci potest ex 1. parte quæst. 105. art. 5. & lib.  
 3. contra Gen. c. 70. & quæst. 3. de potentia  
 art. 7. Quæ sententia valde consentanea est,  
 tum Scriptura, quæ dicit nos in Deo esse, v. ue-  
 re, & moueri; tum etiam rationi & ordini  
 quem habet causa prima cum secundis: De-  
 mum libellus de ratione studiorum compositus  
 à fex

à sex Patribus Societatis, & impressus Romæ in Collegio Societatis iussu Præpositi Generalis, anno 1586. qui pro regula Lectoribus omnibus Societatis traditur, S. *De opinionum delectu in Theologica facultate*, sic dicitur: *In Theologia doctrinam S. Thomæ, ut caueatur 4. parte constitutionum cap. 14. nostri sequantur, exceptis paucis*. Et postea explicans quæ sint illa pauca quæ sequi non tenentur, num. 6. inter alia, istam D. Thomæ sententiam recenset: *Causas secundas esse propriè & uniuocè instrumenta Dei, & cum operantur, in eas primùm influere, aut eas mouere*. Hæc de verbo ad verbum ex exemplari huius libri editionis anni 1586. quod in Consensu nostro Tolosano asseruatur transcripsi. Vnde mirum est quod aliqui Patres Societatis, hæc in tali libro haberi, negare ausi fuerint. Hæc testimonia apertè demonstrant, concursum præuium quo Deus mouet & applicat causas secundas ad agendum, esse de mente D. Thomæ cum firmum (ut ait Nouatianus c. 18. de Trin.) genus probationis sit, quod ab Aduersarijs sumitur, ut veritas etiam ab ipsis inimicis veritatis probetur.

Probetur quartò. Iuxta D. Thomam Deus physicè mouet omnes causas secundas: Ergo & illas physicè præmouet & prædeterminat. Antecedens constat ex 1. parte quæst. 109. artic. 5. ex prima secundæ quæst. 109. artic. 1. ex libro 3. contra Gent. cap. 70. & ex quæst. 3. de potentia artic. 7. ubi docet Deum omnes causas secundas ad suas operationes mouere, quod non potest intelligi de motionem morali (cùm causæ naturales, ut patet rationis

expertes, illius capaces non sint) sed solum de physica. Consequentia verò probatur ex eodem S. Doctore 3. contra Gent. cap. 149. vbi sic habet: *Motio mouentis præcedit motum mobilis ratione & causa*, id est prioritate rationis & causalitatis. Quam doctrinam desumpsit ex Aristotele 4. metaphys. textu 23. dicente: *Mouens natura prius est moto*: Ergo si Deus physicè mouet omnes causas secundas ad operandum, physicè illas præmouet.

Probatur quintò: Motio ab intrinseco efficax, cum qua non potest componi dissensus, est physicè prædeterminans. Sed D. Thomàs talem motionem admittit: Ergo & motionem physicè prædeterminationem. Maior constat, minor probatur ex eodem S. Doctore 2. 2. quæst. 24. art. 11. vbi sic ait: *Virtus Spiritus Sancti infallibiliter operatur quodcumque voluerit: unde impossibile est hæc duo simul esse vera, quod Spiritus Sanctus velit aliquem mouere ad actum charitatis, & quod ipse charitatem amittat peccando*: Et 1. 2. quæst. 10. artic. 4. ad 3. *Si Deus mouet voluntatem ad aliquid, impossibile est poni quod ad illud voluntas non moueatur*.

## §. V.

### *Soluuntur obiectiones.*

**O**bjiciunt primò Aduersarij: D. Th. in 2. dist. 39. q. 1. a. 1. in corp. sic habet: *Ipsa potentia voluntatis, quantum in se est, indifferens est ad plura, sed quod determinatè exeat in hunc actum vel illum, non est ab alio*  
de-

determinatè (vel vt quidam codices manu-  
scripti habent , non est ab alio determinante )  
sed ab ipsa voluntate: Ergo iuxta D. Thomam,  
voluntas non prædeterminatur à Deo .

Respondeo cum erudito Patre Nicolai , in  
nota marginali ad hunc locum , S. Doctorem  
ibi solùm negare , quod vt voluntas determi-  
natè in hunc vel illum actum exeat , non est  
ab alio determinante creato , naturali , ad idem  
genus vel eundem ordinem pertinente ; sed  
non excludere , esse à Deo vt primo agente ,  
determinante voluntatem creatam , sibi subor-  
dinatam , determinatione conformi eius con-  
naturali exigentiæ , hoc est non necessitante ,  
sed efficiente vt infallibiliter agat liberè .

Ex hoc facilè intelliges aliud D. Thomæ te-  
stimonium , desumptum ex quæst. 3. de malo  
artic. 3. ad 5. vbi sic ait : *Voluntas cum sit ad  
vtrumlibet , per aliquid determinatur ad v-  
num , scilicet per consilium rationis , neque  
oportet hoc esse per aliquod agens extrinsecum .*  
Nam S. Doctör his verbis solùm intendit ex-  
cludere agens extrinsecum creatum , non verò  
agens increatum , quod est auctor & causa ip-  
sius voluntatis & motus eius . Istud enim sem-  
per excipit , vt constat ex 3. libro contra Gent.  
cap. 88. ex 1. p. quæst. 83. art. 1. ad 3. &  
quæst. 105. art. 4. ad 1. & 2. & ex quæst. 22.  
de verit. art. 9. vbi sic ait : *Ex parte volunta-  
tis mutare actum voluntatis non potest , nisi quod  
operatur intra voluntatem , & hoc est ipsa vo-  
luntas , & id quod est causa esse voluntatis ,  
quod secundum fidem solus est Deus .* Idem do-  
cet Scot. in 4. dist. 49. q. 6. §. dico ergo , vbi  
sic ait : *Contra naturam voluntatis est determi-*



nari à causa inferiori, quia hoc ipso non esset superior, non est autem contra naturam eius determinari a causa superiori, scilicet Deo.

Obijciunt secundo Aduersarij duo S. Thomæ testimonia desumpta ex lib. 2. sent. Primum habetur dist. 25. quæst. 1. art. 1. ad 3. ubi sic ait: *Determinatio actionis & finis in potestate liberi arbitrij constituitur, unde remanet sibi dominium sui actus, licet non ita sicut primo agenti.* Alterum dist. 28. quæst. 1. art. 1. ubi hæc scribit: *Non esset homo liberi arbitrij, nisi ad eum determinatio sui operis pertineret, ut ex proprio iudicio eligeret hoc vel illud.*

Verùm hæc ne leuiter quidem attingunt physicam prædeterminationem. Nam in primo loco S. Doctor solum intendit; quod electio & determinatio actionis est in potestate liberi arbitrij, tanquam secundi liberi, & secundi determinantis, ac proinde non excludit subordinationem & dependentiam à motione & determinatione primi liberi, sed potius illam iuccludit. Quare subdit: *licet non ita sicut primo agenti.* Quæ vltima verba apertè declarant, determinationem nostræ voluntatis non ita esse in eius potestate, quod non etiam descendat à suprema Dei potestate, illam causante; quia dominium quod habet voluntas in suos actus, non est supremum, sicut illud quod comperit primo agenti. Vnde idem S. Doctor q. 3. de potentia art. 7. ad 13. *Voluntas dicitur habere dominium sui actus, non per exclusionem causæ primæ, sed quia causa prima non ita agit in voluntatem, ut eam de necessitate ad unum determinet, sicut determinat naturam, & ideo determinatio actus relinquitur in potestate*



*rationis & voluntatis*. Ex quo patet ad secundum testimonium, nam S. Thomas solum intendit quod homo non esset liberi arbitrij, nisi ad eum, ut ad secundum liberum, & secundum determinans, determinatio sui operis pertineret, & nisi haberet dominium in suis actus, subditum tamen ac subordinatum supremo Dei dominio, qui ut ait Augustinus, *magis habet in sua potestate voluntates hominum, quam ipsi suas*.

Obijciunt tertio: D. Thomas quodlib. 1. art. 7. ad 2. ait: *Sic Deus movet mentem humanam ad bonum, quod tamen potest huic motioni resistere*: At si motio divina prædeterminaret physicè voluntatem humanam ad opus bonum, non posset voluntas illi resistere: Ergo D. Thomas censet, Deum non prædeterminare physicè voluntatem humanam.

Respondeo negando sequelam Minoris, voluntas enim cuicumque motioni divinæ potest resistere, seu dissentire, cum hoc tamen discrimine, quod motioni purè excitanti, & præbenti auxilium tantum sufficiens, potest resistere seu dissentire, tam in sensu composito, quam diuiso; seu potentia antecedenti, & consequenti; imò de facto voluntas huic motioni resistit, eamque abiicit & priuat effectu ad quem principaliter & ultimò ordinatur: motioni verò physicè prædeterminanti, & præbenti auxilium efficax, voluntas nunquam de facto resistit: illa enim ( ut ait Augustinus ) *à nullo duro corde respuitur, ideo quippe tribuitur, ut cordis duritia primitus auferatur*: potest tamen illi resistere, in sensu diuiso, & potentia antecedenti, non tamen in sensu com-

posito, & potentia consequenti. Vnde D. Thomas 1. 2. q. 10. art. 4. ad 3. *Si Deus mouet voluntatem ad aliquid, impossibile est poni, quod voluntas ad illud non moueatur, non tamen est impossibile simpliciter.* Nec valet si dicat, quod si voluntas possit resistere diuinæ motioni in sensu diuiso, seu potentia antecedenti, poterit illam frustrare suo effectui, & irritam ac inefficacem reddere. Nam in hoc consistit efficacia talis motionis, quod relinquat in homine potentiam sibi resistendi, & inuictam non resistendi voluntatem conferat. Vnde S. Thomas hic q. 19. art. 8. ad 2. *Ex hoc ipso quod nihil voluntati diuinæ resistit, sequitur quod non solum fiant ea quæ Deus vult fieri, sed quod fiant contingenter vel necessario, quia si fieri vult.*

Alia D. Thomæ testimonia, quæ nobis obijcit Petrus à S. Ioseph Fulienfis, in opusculo, quod D. Thomæ defensionem appellat, omni prorsus difficultate carent, & à nobis exposita sunt in Clypeo Theologiæ Thomisticæ, tract. de actibus humanis disp. 8. art. 2. §. 19. & sequentibus, vnde illa hic permittimus, ne Lectori tedium ingeramus.

## §. VI.

*Concordia libertatis creatæ cum decreto prædeterminante, & physica prædeterminatione.*

**T**Res sunt concordia difficillimæ, & obscurissimæ, quæ tria veluti sacratissima ænigmata appellari meritò possunt; nimirum con-

cordia libertatis Dei , cum eius immutabilitate ; & concordia libertatis hominis , cum efficacia gratiæ & diuinæ voluntatis . Vnde Augustinus lib. de gratia Christi cap. 47. *Ista questio ubi de libero arbitrio voluntatis, & Dei gratia disputatur, ita est ad discernendum difficilis, ut quando defenditur liberum arbitrium, negari Dei gratia videatur; quando autem asseritur Dei gratia, liberum arbitrium putetur inferri. Et lib. 2. contra litteras Periliani: Si tibi proponam questionem, quomodo Deus Pater attrahit ad Filium homines quos in libero dimisit arbitrio? fortassis cum difficile soluturus es: quomodo enim attrahit, si dimittit ut quis quod voluerit eligat? & tamen utrumque verum est, sed intellectui hoc penetrare pauci valent. Ut tamen quo vinculo siue glutino connectantur ista & copulentur inter se, aliquantuliter explicetur, dabit ille, qui ut ait Iob, facit concordiam in sublimibus.*

Observandum est igitur cum D. Thoma 1. perhierm. lect. 14. duplicem esse libertatis nostræ radicem. Prima est extrinseca, & in Deo existens, nempe infinita voluntatis diuinæ efficacia, attingens substantiam & modum in nostris operationibus; ut fusè declarat idem S. Doctor hic q. 19. art. 8. his verbis: *Cum voluntas diuina sit efficacissima non solum sequitur quod fiant ea quæ Deus vult fieri, sed quod eo modo fiant, quo Deus ea fieri vult &c.* Item 1. ad Annibal. dist. 47. qu. vnica art. 4. sic ait: *Cum voluntas Dei efficaciter impleatur, oportet ut res fiant, & eodem modo fiant, quo voluntas diuina disposuit.*

Eodem libertatis conciliandæ modo, longè

prius usus fuerit S. Petrus, qui Simoni Maggo, libertatis arbitrium inficienti, quia, in-  
 quiebat, quod Deus vult esse, est, & quod vult  
 non esse, non est, respondit, ut refert Clemens  
 Romanus lib. 3. recognit. sub initium: Ignoras  
 Simon, & valde ignoras, quomodo in singu-  
 lis quibusque voluntas Dei sit. Quadam enim  
 voluit ita esse: ut aliud esse non possent, quam  
 id quod ab ipso instituta sunt, & his neque prae-  
 mia neque supplicia statuit. Ea vero quae ita  
 esse voluit, ut id sua potestate habeant agere  
 quod velut, his pro actibus & voluntatibus suis  
 statuit, ut aut remunerationes mereantur aut  
 penas. Quibus verbis Apostolus necessita-  
 tem & contingentiam ac libertatem creatam,  
 in efficaciam divinae refundit voluntatis, ut  
 in primum principium, & primam veluti ra-  
 dicem illius.

Secunda radix libertatis creatae, est homi-  
 ni intrinseca, & in ipso residens, nimirum in-  
 differentia obiectiva iudicii, ut declarat S.  
 Thomas varijs in locis, nam 1. p. q. 82. art.  
 1. sic ait: Quia iudicium rationis ad diversa  
 se habet, & non est determinatum ad unum, ne-  
 cesse est quod homo sit liberi arbitrii. Et 1. 2.  
 q. 17 art. 1. ad 2. Ex hoc voluntas potest ad  
 diversa ferri, quia ratio potest habere diversas  
 cognitiones boni. Item q. 24. de verit. art. 2.  
 ait expresse quod totius libertatis radix est in  
 ratione constituta. Ratio etiam id suadet, cum  
 enim voluntas sit appetitus rationalis, sequens  
 cognitionem intellectus, & directionem ra-  
 tionis, impossibile est quod necessariò feratur  
 in obiectum, quod sibi ut indifferens ab intel-  
 lectu proponitur,

Ex his intelliges primò, qua ratione, nec decretum prædeterminans, nec physica prædeterminatio, tollant aut lædant libertatem voluntatis nostræ: quia nimirum utrumque procedit à prima libertatis & contingentia radice, nempe infinita voluntatis diuinæ efficacia, & utrumque causat proximam & intrinsecam libertatis humanæ radicem, scilicet indifferentiam obiectiuam iudicij; quia prius natura quam voluntatem applicent ad eligendum vel respuendum aliquod obiectum, intellectum applicant ad formandum iudicium rationis indifferens, quo repræsentet voluntati tale obiectum, ut indifferens, & ut bonum aliquod particulare, quod potest eligere vel respuere.

Intelliges secundò, quomodo decretum prædeterminans, & physica prædeterminatio perficiant libertatem potentialem voluntatis nostræ, & causent actualem. Omnis enim motio, quæ accommodatur naturæ subiecti quod mouet, illud perficit: motio autem decreti prædeterminantis, & physica prædeterminationis, accommodatur naturæ & conditioni voluntatis creatæ; quæ cum sit appetitus rationalis, petit moueri ad actus liberos, sub indifferentia obiectiua iudicij, quæ est proxima radix libertatis. Addo quod, talis motio reducit libertatem potentialem voluntatis nostræ, de actu primo ad secundum, subindeque ab ea tollit aliquam imperfectionem & defectum, nempe potentialitatem & suspensionem, seu carentiam actus: Ergo illam perficit.

Quod verò eius libertatem actualem causet, constat ex supra dictis; nam libertas actualis

his voluntatis nostræ, nihil aliud est, quam libera eius determinatio: Sed hæc causatur à decreto prædeterminante, & physica prædeterminatione; non verò à decreto indifferenti, aut concursu simultaneo, vt supra ostensum est: Ergo & libertas actualis voluntatis nostræ, quæ proinde, sublato tali decreto, & prædeterminatione, penitus tollitur, cum, sublata causa, effectus stare non possit.

Obijcies primò: De ratione causæ liberæ est seipsam determinare ad quodcumque voluerit: Ergo si voluntas creata à Deo prædeterminetur, non erit libera.

Respondeo quod sicut de ratione causæ efficientis non est quod sit prima, sed quod efficiat, licet moueatur ab alia priori, vt patet in igne & cœlo; ita non est de ratione causæ liberæ, vt se primò determinet, sed vt se determinet iuxta suam naturam; ita quod si fuerit primum liberum, seipsum primò determinet, & independenter à quocumque alio prius mouente & determinante, si verò fuerit secundum, quale est voluntas creata, seipsum determinet secundariò, & dependenter à ratione primi liberi, & primi determinantis.

Instabis primo: Hæc duo inter se pugnant, & contradictionem inuoluunt, nempe quod voluntas seipsam moueat & determinet, & nihilominus prius natura à Deo moueatur & determinetur; aliàs idem simul esset à se & ab alio.

Respondeo hanc instantiam fuisse à D. Thoma præuisam & solutam, nam i. p. q. 105, art. 4. sibi hoc argumentum obijcit: *Deus non potest facere quod contradietoria sint simul:*  
hæc

hoc autem sequeretur, si voluntatem moueret; nam voluntatem moueri ex se, est non moueri ab alio; Ergo Deus non potest voluntatem mouere. Cui sic respondet: Ad secundum docendum quod moueri voluntariè est moueri ex se, id est à principio intrinseco, sed istud principium intrinsecum potest esse ab alio principio extrinseco, & sic moueri ex se, non repugnat ei quod mouetur ab alio. Idem docet q. 3. de malo art. 2. ad 4. his verbis: Cum liberum arbitrium mouet seipsum, non excluditur quia ab alio moueatur, à quo habet hoc ipsum quod seipsum moueat. Item qu. 24. de verit. art. 1. ad 5. sic habet: Aliquid potest ita esse ab alio motum, quod tamen seipsum moueat, & ita est de mente humana. Non ergo repugnat, iuxta D. Thomam voluntatem creatam seipsum mouere & determinare ad agendum, & nihilominus prius natura moueri & determinari à Deo; subindeque ab illo præmoueri & prædeterminari. Ratio etiam id suadet: non repugnat enim quod aliqua actio procedat à duobus agentibus diuersi ordinis, inter se subordinatis; nam eadem generatio plantæ vel hominis, est à Sole, vt primo generante, & à planta vel homine, vt secundo generante: Ergo similiter eadem determinatio voluntatis creatæ, potest simul esse à Deo vt primo libero & determinante, & à voluntate, vt secundo libero & determinante. Imò oppositum implicat contradictionem, cum enim determinatio voluntatis creatæ, sit quid creatum, in rerum natura, & existens; & gradum aliquem existentie in se imbibat, non potest subterfugere diuinam causalitatem; vnde cum Deus illam cau-

causare non posse per decretum indifferens, aut per concursum simultaneum, ut supra ostensum est, necessario causari debet per decretum prædeterminans, & per concursum prauum & prædeterminantem: Ergo implicat quod voluntas creata seipsam determinet, nisi a Deo prædeterminetur.

Instabis secundo: Quod non potest causare formam determinantem, non potest determinationem causare: Sed voluntas non potest causare formam, ipsam determinantem: Ergo nec potest seipsam determinare. Maior patet, Minor probatur. Forma voluntatem determinans est decretum efficax Dei: Sed hoc non potest à voluntate causari: Ergo voluntas non potest causare formam, ipsam determinantem.

Respondeo, concessa Maiori, negando Minorem, & ad illius probationem, distinguo Maiorem: Forma voluntatem determinans, est decretum efficax solum, nego Maiorem. Est decretum efficax, & etiam actus, quem voluntas elicit, concedo Maiorem, & concessa Minori, nego consequentiam. Ut enim voluntas sit potens ad se determinandum, non requiritur quod possit omnem formam, ipsam determinantem causare, sed sufficit quod aliquam possit: est autem in nostra sententia duplex forma voluntatem creatam determinans, una ex parte Dei, nempe decretum efficax & prædeterminans; alia ex parte ipsius voluntatis, nempe actus ab ea elicited, qui cum sit liber, & libertatem voluntatis exerceat, est etiam determinatio illius; & consequenter ut in voluntate creata sit potentia ad se deter-

mi-



minandum , non requiritur quod possit cauſare decretum efficax Dei , ſed ſufficit quod poſſit actum proprium ipſam determinantem efficere .

Obijcies ſecundò : De ratione agentis liberi eſt , vt poſitis omnibus prærequiſitis ad agendum , poſſit non agere : Sed poſita prædeterminatione phyſica , voluntas non poteſt non agere : Ergo illa libertatem deſtruit .

Reſpondeo quod ſi maior intelligatur de prærequiſitis ad agendum , prioritate temporis , vel iſtantis in quo , illis poſitis agens liberum poteſt agere & non agere , tam in ſenſu composito , quam diuiſo ; ſi verò intelligatur de prærequiſitis prioritate duntaxat naturæ , ſeu iſtantis à quo , illis poſitis , agens liberum poteſt quidem non agere in ſenſu diuiſo , non tamen in ſenſu composito ; ea enim quæ ſecundum ordinem tantum naturæ prærequiruntur ad agendum , ſunt ſimul cum actu ( prioritas enim naturæ non eſt prioritas exiſtentia & durationis , ſed dependentia & cauſalitatis ) implicat autem negationem actus cum illo componi , ſeu coniungi . Cum ergo prædeterminatio phyſica vt de prærequiſitis ad agendum , prioritate duntaxat naturæ & cauſalitatis , & actuale principium operationis conſtituat , ad libertatem voluntatis non requiritur , quod poſita prædeterminatione poſſit non agere in ſenſu composito , ſeu negationem actus cum illa componere , ſed ſatis eſt , quod illa poſita poſſit non agere in ſenſu diuiſo , id eſt quod ſub illa retineat potentiam ad non agendum , ſeu ad non continuandum actionem quam elicit . De quo ſu-

fusus in 2. parte, tractat. 2. cap. 4. §. 4.

Obijciens tertio: Omnis suppositio antecedens, seu ex libera nostræ voluntatis electione non descendens, destruit arbitrij libertatem: Atqui decretum prædeterminans, & physica prædeterminatio, sunt aliqua suppositio antecedens, & ex voluntatis nostræ electione non descendens? Ergo destruunt arbitrij libertatem.

Huic argumento, quod apud Aduersarios palmarium est, & veluti Achylleum, triplex potest adhiberi responsio. In primis enim maior potest absolutè negari, nam suppositio liberum nostræ voluntatis consensum, sola prioritate naturæ antecedens, libertatem non tollit, sed causat, nec eam destruit, sed ædificat. Ratio est, quia prioritas naturæ est prioritas causalitatis & originis, vnde solum conuenit causæ, respectu effectus; vel principio actuali respectu operationis. Sicut ergo causa non destruit aut tollit effectum, sed illum causat & perficit; ita suppositio, sola prioritate naturæ liberum nostræ voluntatis consensum antecedens (qualis est suppositio decreti prædeterminantis, & physica prædeterminationis) libertatem non tollit, sed causat, nec eam lædit, sed fouet, perficit, & conseruat.

Respondeo secundo, quod licet omnis suppositio antecedens, quæ oritur ab agente creato, libertatem destruat, non tamen omnis illa quæ prouenit ab agente increato; triplex enim inter agens creatum & increatum reperitur disparitas. Prima est, quia agens creatum non est infinitæ efficaciam, sicut increatum, subindeque non potest attingere substantiam & modum.

dum libertatis in nostris operationibus. Secunda, quia Deus, cum sit primum liberum, & tale per essentiam, magisque habeat in sua potestate voluntates hominum, quam ipsi suas, ut Augustinus ait, omnem libertatem creatam & participatam, eminentissimo & perfectissimo modo continet, non verò agens creatum. Tercio, quia agentia creata sunt omnino voluntati extrinseca, Deus verò; cum sit auctor & principium animæ, ac intime illi coniungatur, veluti anima ipsius animæ, & sicut principium quo vivimus, mouemur; & sumus, non reputatur propriè ut agens extrinsecum respectu nostræ voluntatis, ut docet D. Thomas 3. contra Gent. cap. 88.

Respondeo tertio distinguendo Maiorem: Omnis suppositio antecedens, quæ non oritur à prima radice libertatis, tollit libertatem, transeat Maior. Quæ oritur à prima radice libertatis, nego Maiorem, & sub eadem distinctione Minoris, nego consequentiam. Decretum enim prædeterminans, & physica prædeterminatio, oriuntur à prima radice totius libertatis & contingentiæ, nimirum ab infinita efficacia diuinæ voluntatis, ut antea declarauimus; vnde sicut suppositio orta ab indifferenti iudicio rationis, non tollit libertatem, quia illud est proxima radix libertatis, ita nec suppositio orta ex decreto prædeterminante, & physica prædeterminatione. Ex quo intelliges, quod quamuis talis suppositio sit formaliter antecedens, est tamen virtualiter seu æquiualeuter consequens, quoad effectum conseruandæ libertatis, quia licet non descendat ab ipsa voluntate, descendit tamen ab illo quæ  
ma-

magis habet in sua potestate voluntates hominum, quam ipsi suas, & ab infinita efficacia diuinæ voluntatis, quæ est prima libertatis radix. Vnde reducitur ad secundum membrum distinctionis traditæ ab Anselmo lib. 2. *cur Deus homo* cap. 18. nimirum ad necessitatem consequentem, quæ libertati non nocet, ut ipse ibidem docet.

Nec valet instantia cuiusdam Recentioris; dicentis absurdum videri negare antecedentem, esse necessitatem, cuius causa est antecedens, cum constet apud omnes quamcumque necessitatem sequi conditionem suæ causæ, atque ab ea denominari. Nam, ut docent Dialectici, aliud est id à quo significatio nominis imponitur, & aliud id ad quod significandum imponitur: unde sicut licet lapis dicatur à lædendo pedem, omne tamen quod lædit pedem non est lapis: ita licet necessitas antecedens hanc denominationem à causa præcedente desumat, omnis tamen causa quæ liberum præcedit arbitrium, nec debet nec potest dici necessitas antecedens, sed illa duntaxat quæ præcedit, determinando voluntatem ad vnum, per modum naturæ, & tollendo ab intellectu indifferentiam obiectiuam iudicii, ut contingit in amore beatifico, & volitione boni in communi.

Ex his facile potest argumentum propositum, cui potissimum confidunt Aduersarij, in ipsos retorqueri, in hunc modum: Necessitas consequens libertatem nostram æquiuallenter, illam auferre non potest: Sed necessitas orta ex efficacia decreti prædeterminantis, & physicæ prædeterminationis, consequitur ad nostram

stram libertatem & consensum, æquiuvalenter, cum consequatur ad illum, ut contentum eminenter in voluntate & omnipotentia diuina, quæ, ut ait Augustinus, magis habet in sua potestate voluntates hominum, quam ipsi suas: Ergo non potest tollere libertatem.

Intelliges etiam ex dictis, quod quamuis præmotio physica non sit in nostra potestate quasi effectiue, & originatiue, cum à nobis non deriuetur, esse tamen in nostra potestate, quasi terminatiue; & quoad usum; quia ad hoc terminatur illa motio, ut voluntas habeat usum & exercitium libertatis actualis, & actuale dominium supra suos actus. Vnde sicut illa potest dici virtualiter seu æquiuvalenter consequens, ita & esse æquiuvalenter in nostra potestate, eo ipso quod facit actum ad quem mouet & applicat voluntatem, in eius potestate existere, eiusque dominio subijci.

Obijcies quartò: si gratia de se efficax & physicè prædeterminans, necessaria sit ad conuersionem, sequitur quod peccator qui talem gratiam non recipit, non possit conuerti; subindeque ad illam non sit liber, cum de ratione agentis liberi sit quod possit agere vel non agere.

Sed respondeo primò, eandem esse difficultatem de gratia congrua, cum illa, in sententia Suarez, & Vasquez, aliorumque Societatis Theologorum, adeò necessaria sit ad conuersionem, ut repugnet peccatorem, nisi tali gratia præueniatur, de facto conuerti, ut demonstrat P. Martinonius in Antijansenio, cuius verba §. sequenti referemus.

Respondeo secundò distinguendo sequelam,  
se-

sequitur quod peccator qui talem gratiam non recipit, non possit conuertere, potentia consequenti, & cum actu coniuncta, concedo sequelam. Potentia antecedenti, & ab actu separata, nego sequelam. Ilicet enim prima potentia sit à gratia efficaci & physicè prædeterminante, quæ infallibiliter coniungit potentiam cum actu, & causam cum effectu, iuxta illud Augustini de natura & gratia cap. 42. *Sanata & adiuta voluntate, possibilitas simul cum effectu in sanctis prouenit*, non tamen secunda. Vnde sicut D. Thomas qu. 3. de potentia art. 5. ad 1. docet quod quando dicitur, Deum non posse agere, nisi quod præsciuit & decreuit, distinguere solet de potentia antecedente & consequente: vel si *ly non potest* referatur ad actum, conceditur: si verò referatur ad potentiam, negatur. Ita similiter quando dicitur, quod ille qui caret auxilio efficaci, non potest operari, non potest conuertere, non potest adimplere præcepta, distinguendum est: potentia antecedenti, negandum. Potentia consequenti concedendum. Vel si *ly non potest* referatur ad actum, verum est. Si referatur ad potentiam, falsum. Quæ fusiùs explicari solent in tractatu de auxilijs.

## §. VII.

*Aliud difficile argumentum soluitur.*

**O**bjiciunt insuper Aduersarij aliud difficile argumentum, quod Molina *lydium lapidem* appellat, & est vnum ex præcipuis scientiæ mediæ fundamentis, vnde illud bre-

interattigimus in tractatu de scientia Dei capite ultimo §. 4. sed plenam & completam eius solutionem, ad hunc locum remisimus. Illud potest sic breuiter proponi: Si decretum prædeterminans, & physica prædeterminationo, ex illo, sicut riuulus à fonte promanans, sint omnino necessaria ad operandum, & aliqua applicatio liberi arbitrij, prærequisita ad agendum, iniuste Christus Matth. 11. reprehenderet Iudæos præ Tyrijs, quod non conuerterentur, & pœnitentiam agerent: Iudæi enim haberent legitimam excusationem, possentque respondere Christi Domini expostulationi & obiurgationi, cur nos increpas exemplo Tyrriorum, si enim haberes circa nos decretum prædeterminans, nobisque dares gratiam efficacem & prædeterminantem, quam illis conferre decreueras, utique sicut illi conuerteremur, & pœnitentiam ageremus? Unde Aduersarij dicunt, ex nostra sententia tolli necessitatem correctionis, & vanas reddi exprobrationes, quibus Deus in sacris litteris exprobrat vineæ suæ (id est populo Israelitico, vel animæ fidei) quod uvas non ferat, sed spinas aut labruscas, hoc est quod non faciat fructus bonorum operum, sed opera mala & peruersa, ut habetur Isaia 5.

Respondeo primò, Apostolum ad Roman. 9. eandem sibi obiecisse difficultatem, nam cum statuisset hanc veritatem, Deus cuius vult miseretur, & quem vult indurat, statim sibi objicit: *Vicis itaque mihi, quid adhuc quæritur & voluntati eius qui resistit?* Quasi diceret,quare conqueritur Deus, vel obiurgat peccatores? nam si vellet misereri, & non indurare (quod  
fa-



facit, non impertiendo malitiam : sed non tribuendo gratiam ) non resisteremus . En tota ratio iniustæ quærimoniæ peccatorum : quasi reprehendi nequeat peccator in malo pertinax, cui denegata sit gr̃atia natura sua efficax, & tunc tantum iusta sit reprehensio, cum omnibus confertur gratia communis sufficiens, quam quisque ex innata libertate reddat efficacem & inefficacem ? Quasi verò huic acutissimum sensum Apostolus non viderit, nec Augustinus, nec Prosper, qui ( vt supra vidimus ) profitentur, huius quæstionis profunditatem non posse solui per humani arbitrij velle vel nolle .

Respondeo secundò, idem argumentum fuisse olim D. Augustino à Pelagianis propositum, nam Monachi Adrumetini, sub Valentino Abbate, contendebant quod si gratia efficax esset necessaria ad agendum, tolleretur correctionis necessitas : vnde dicebant, neminem esse corripiendum, si Dei præcepta non facit, sed pro illo vt faciat tantummodo orandum, vt refert Augustinus lib. 1. retract. cap. 67. Sed audiamus illos apud eundem S. Doctorem de corrept. & gr̃atia cap. 4. obmurmurantes, ac dicentes : *Rectè corripier, si eam ( scilicet gratiam ) mea culpa non haberem: hoc est si eam possem mihi dare, vel sumere ipse, nec facerem, vel si dante illo accipere noluissem .* Et cap. 5. *Cum ergo & ipsa voluntas præparetur à Domino, cur me corripis, quia vides me eius præcepta facere nolle, & non potius ipsum rogas, vt in me operetur & velle ?* Ex quibus constat, hoc Aduersariorum Argumentum, non esse nouum, sed perantiquum, & ex veteri Pelagia-



gianorum officina desumptum. Vnde non immerito exclamat quidam Recentior : *Quam grandis consolatio scholæ Thomistarum , nullis se argumentis pulsari , quibus impetita non fuerit Augustini sententia ! Quam deploranda desolatio , & quam parum tuta eorum fors , qui non alia in Thomisticam sententiam tela vibrant , quam quæ in Augustinum aduersarij olim sui iaculati sunt ! Nonne eadem est Augustini & Thomistarum Thesis , si talem contra utramque militent argumenta ?*

Respondeo tertio , difficultatem propositam esse nobis & Aduersarijs communem , cum Suárez , Vasquez , & alij celebriores ex Societate Theologi , admittant gratiam congruam ; imò omnes eiusdem Societatis Theologiæ Professores , eam docere teneantur , ex præscripto , seu decreto Claudij Aquavivæ , dato Romæ anno 1613. die 14. Decembris , ut restantur Tannetius , & Paulus Leonardus , qui & tale decretum referunt : admissa autem tali gratia congrua , sequantur duo inconuenientia nobis obiecta , nempe Deum iniuste conqueri de peccatoribus qui non conuertuntur , illisque denegari gratiam sufficientem ad conuersionem , ut ostendit P. Martinonius , nouissimus Societatis scriptor , in Antijansenio disput. 27. sect. 3. num. 25. ubi loquens de gratia congrua , hæc scribit : *Si tanta motio & excitatio necessaria est moraliter ad conuersionem , ergo qui minorem recipiunt , non habent auxilium moraliter sufficiens , atque ita quot quot non conuertuntur , carent auxilio sufficienti moraliter ad conuersionem , estque illis moraliter impossibile ut conuertantur .* Vnde

huiusmodi queremonia & exprobratio metaphysica esset, non moralis & rationabilis, quod absit, quid est quod debui ultra facere vineæ meæ, & non feci? Isaia 5. Possint enim Iudæi merito respondere: debebas nobis dare auxilium moraliter sufficiens, non autem tale, cum quo fuit moraliter impossibile conuerti, & quo praeventus nemo conuerteretur. Quomodo expectasti vvas à quibus impossibile moraliter fuit non ferri labrascas? Similia habet n. 28.

Respondeo quartò directè ad difficultatem propositam, negando sequelam maioris, ut enim iustè Christus increparet Iudæos, exemplo Tyrriorum, sufficiebat quod eis essent æquales in auxilijs sufficientibus, & quod plura quam Tyrij, auxilijs efficacibus ponerent impedimenta, ratione maioris ingratitudinis, & obdurationis in peccato, nam ut ait Augustinus de bono per seuer. cap. 14. Non erant sic exæcati oculi, nec sic induratum cor Tyrriorum & Sydeniorum, quoniam credidissent, si qualia viderant isti (scilicet Iudæi) signa vidissent. Ratio primi est, quia ut aliquis possit iustè corripì & increpari exemplo alterius, sufficit quod æqualiter possit ac ille, & tamen æqualia non præstet: ille autem qui est æqualis alteri in auxilijs sufficientibus, quamuis sit inæqualis in efficacibus, æqualiter potest, quia auxilia efficaciam non dant posse agere, neque præbent virtutem aut complementum potentia, sed tantum actualitatem & applicationem, ut suppono ex tractatu de auxilijs. Ratio verò secundi sumitur ex eo quod ille culpabilis est, & reprehensione dignus, qui per propriam malitiam, vel negligentiam, di-

uinæ gratiæ ponit obicem & impedimentum, subindeque qui maiora ponit illi impedimenta, quam alius, iustè potest per comparationem ad illura obiurgari & increpari. Vnde S. Thomas 3. contra Gent. cap. 159. *Licet aliquis per motum liberi arbitrij diuinam gratiam nec promereri nec aduocare possit, potest tamen seipsum impedire ne eam recipias: dicitur enim Iob 21. Recede a nobis scientiam viarum tuarum nolumus. Et Iob 24. Ipsi fuerunt rebelles lumini. Et cum hoc sit in potestate liberi arbitrij impedire diuinæ gratiæ receptionem, non immerito imputatur ei qui impedimentum præstat gratiæ receptioni: Deus enim quantum est ex se paratus est omnibus gratiam dare, vult enim omnes homines saluos fieri, sed illi soli gratia priuantur, qui in seipsis gratiæ impedimentum præstant: Sicut Sole mundum illuminante, in culpam imputaretur ei qui oculos claudit, licet videre non possit, nisi lumine Solis præueniatur.*

Ex his patet, Deum meritò exprobrare vineæ suæ quod non ferat viuas, sed spinas, vel labruscas, seu animæ fideli, quod non faciat fructus bonorum operum, quia licet vineæ desit aliqua cultura necessaria, vt fructus de facto producat, & animæ aliquod auxilium, quo applicetur ad agendum; ille tamen defectus & carentia prouenit ex culpa ipsius hominis, qui per propriam malitiam, vel negligentiam, diuinæ gratiæ præbuit impedimentum. Sicut iure exprobraretur homini constituto in tenebris, quod non videret, si quis ipsi lumen offerret, & vellet aperire fenestram, ille tamen impediret. Vel ( vt in

eodem stemus exemplo) sicut si agricola dedisset vineæ omnes primas culturas, & esset paratus dare illi ultimam, & vineam illam recusaret, aut illi impedimentum poneret, meritò posset illi exprobrare, si postea non produceret vuas, sed spinas, vel labruscas.

Ex his intelliges, quod cum nemo, quantumvis iustus, sit immunis à peccato originali, & actuali, saltem veniali, ut definit Tridentinum sess. 6. cap. 23. nemo est qui non humiliter agnoscere debeat, pro merito peccatorum suorum, se posse iuste à Deo derelinqui, & gratia efficaci priuari, subindeque qui non debeat, ut monet Apostolus, cum timore & tremore salutem operari. Vnde Leo Papa serm. 8. de Epiphania: *Hæc sanctis causa est tremendi atque metuendi, ne ipsi in operibus pietatis elati, deserantur ope gratiæ, & remaneant in infirmitate naturæ.* Omnibus etiam veraciter humilibus, habenda semper est præ oculis egregia Richardi Victorini hac de re sententia: de statu interiori hominis parte 1. cap. 22. *Grazia (inquit) quam semel homo accepit ante peccatum iuste subtrahi non potuit, quam etsi præter meritum acceperat, sine culpa tamen amittere non debebat: nunc autem omni hora potest iuste subtrahi, quia nunquam potest homo sine culpa inueniri.*

Dices primò, si homo per propriam culpam, vel negligentiam, possit ponere impedimentum gratiæ efficaci & prædeterminanti, poterit etiam illi resistere, cum resistere gratiæ, & ponere illi impedimentum, synonyma sint, & idem omnino significant. Poterit etiam homo ex viribus liberi arbitrij se præ-

pa-

parare ad eius receptionem, vel saltem eius receptioni impedimentum non ponere, & sic aliqua caro gloriari poterit coram Deo, Tyrius scilicet præ Iudæo, quod se pro innata libertate reddiderit aptiorem ad auxilia gratiæ recipienda.

Sed nego utramque sequelam, primam quidem, quia sicut, licet aliquis impedire possit ingressum radij solaris in aulam, claudendo fenestram, & eius receptioni ponere impedimentum, illum tamen iam receptum priuare non potest suo effectu, nec impedire quin illuminet aere. Ita similiter, quamuis homo per suam culpam vel negligentiam impedire possit receptionem gratiæ efficacis & prædeterminantis, & sua indignitate Deum mouere ad illam denegandam; illi tamen iam receptæ, & in anima esistenti, non potest resistere (potentia consequenti, & in sensu composito, ut §. præcedenti exposuimus) vel eam frustrare effectu quem Deus efficaciter intendit per illam producere. *Impossibile enim est* (inquit S. Doctor supra citatus) *hæc duo simul esse vera, quod Spiritus Sanctus velit aliquem mouere ad actum charitatis, & quod ipse charitatem amittat peccando.*

Negatur etiam alia sequela, nempe quod homo poterit ex viribus liberi arbitrij se præparare ad gratiam, vel saltem illi impedimentum non ponere. Nam ut ait D. Thomas super caput 12. Epist. ad Hebræos lect. 3. *Hoc ipsum quod aliquis non ponit obstaculum gratiæ, ex ipsa gratia procedit: unde si aliquis ponat, & tamen moueatur cor eius ad remouendum illud, hoc est ex dono gratia Dei.* Et

postea subdit : *Quod ergo à quibusdam remouetur istud obstaculum , hoc est ex misericordia Dei ; quod autem non remouetur , hoc est ex iustitia .* Sicut ergo , licet homo claudendo fenestram impedire possit illuminationem Solis , non potest tamen illum ad se trahere & aduocare . Ita pariter , licet aliquis possit seipsum impedire , ne gratiam recipiat , illam tamen nec promereri nec aduocare potest , nec ad illam recipiendam se disponere , ex solis viribus liberi arbitrij , sed solum ex virtute ipsius gratiæ , cor eius mouentis .

Dices secundo , licet solutio & doctrina tradita , de impedimento quod ponitur gratiæ efficaci & prædeterminanti , per culpam antecedentem , possit habere locum respectu denegationis talis gratiæ , in statu naturæ lapsæ , non tamen respectu denegationis illius , in Angelis , & in Adamo , ad perseverandum ; cum denegatio talis auxilij , nullam in eis supponat culpam antecedentem , actua-lem , vel originalem .

Respondent aliqui ex nostris Thomistis , Angelos & Adamum caruisse auxilio efficaci ad perseverandum , ex propria culpa , non quidem antecedente , sed concomitante , quæ fuit prior priuatione auxilij efficaciis , in genere causæ materialis & dispositiue . Non enim repugnat , quod aliqua sint simul tempore & duratione , & tamen se mutuò præcedant , natura , & causalitate ; vt patet exemplo venti aperientis fenestram , & per eam intrantis in aulam : ingressus enim venti præcedit apertionem fenestæ , in genere causæ efficientis , cum ad eam actiue concurrat ,

& ipsa apertio fenestræ est prior ingressu venti in genere causæ materialis dispositivæ, quia disponit ad prædictum aeris & venti ingressum. Vnde Philosophi communiter docent, quod causæ sunt sibi inuicem causæ, & quod licet in eodem instanti temporis suas exerceant causalitates, nihilominus vna est prior altera in vno genere, & posterior in alio, prioritate & posterioritate causalitatis & naturæ. Verùm quia hæc solutio videtur magis subtilis, quam solida, maiusque habere fundamentum in doctrina Philosophorum, quam Sanctorum Patrum.

Respondeo secundò, concedendo doctrinam supra traditam de impedimento gratiæ efficaci, per culpam antecedentem, non habere locum in Angelis, nec in Adamo, sed in eis denegationem gratiæ efficaciæ ad perseverandum, in simplicem Dei voluntatem, & iudicia eius inscrutabilia reducendam esse. Ita enim docent SS. Patres, præsertim Augustinus lib. 11. de Genesi ad litt. cap. 10. ubi loquens de Angelis malis, sic ait: *Sed potuisset Deus ipsorum voluntatem in bonum convertere, quia omnipotens est: potuisset planè, cur ergo non fecit? quia noluit; cur noluerit, penes ipsum est.* Et tract. de cantico nouo cap. 8. docet, Deum casum Adami permisisse, vt appareret quid posset liberum arbitrium sine adiutorio Dei. *Quid (inquit) valeat liberum arbitrium non adiutum, in ipso Adam demonstratum est: ad malum sufficit sibi, ad bonum non nisi adiuuetur à Deo.* Ex quo intelliges, non posse reddi rationem casus Adami & Angelorum, ex eo quod prima

gratia actualis eis collata, fuerit purè sufficiens, & subdita libero illorum arbitrio, quātum ad efficaciam & vsum, sed eos eguisse gratia efficaci ad perseverandum, quam tamen Adamo & Angelis non perseverantibus denegavit, quia voluit, & quia penes ipsum est non conferre vel denegare cuicumque voluerit. Nec aliam Suarez, Vasquez, & alij gratiæ congruæ defensores, assignare possunt rationem, cur Deus gratiam congruam ad perseverandum Angelis, perseverantibus dederit, & non perseverantibus denegauerit.

### §. VIII.

*Concordia sanctitatis diuinæ cum decreto prædeterminante, & physica prædeterminatione ad materiale peccati.*

**S**equitur ex principijs supra statutis, agendo de diuinorum decretorum efficacia, & de physica prædeterminatione, Deum ab æterno prædefinire materiale peccati, & in tempore physicè prædeterminare voluntatem ad illud: cū enim tale materiale sit aliquod ens creatum, & includat in se aliquam actualitatem, & aliquem gradum existentiae, non potest subterfugere diuinam causalitatem, subindeque Deo vt primæ causæ subordinari debet: Atqui talis subordinatio non potest saluari per decretum indifferens, nec per concursum simultaneum ab ipso exhibitum, vt ibidem ostendimus: Ergo iuxta principia à nobis statuta, necessariò admitti debet



bet decretum prædeterminans , & physica prædeterminatio ad materiale peccati . Solum ergo nobis restat hic explicandum , quomodo diuina sanctitas possit cum tali decreto, talique prædeterminatione cohærere , & sociari . Ut hæc concordia explicetur .

Dico primò : Deus , absque vllò suæ infinitæ sanctitatis præiudicio, potest prædefinire , & de facto prædefinit materiale peccati , materialiter sumptum , id est quatenus est ens , & actus physicus & vitalis .

Probatur conclusio ratione fundamentali : Deus absque præiudicio suæ infinitæ sanctitatis prædefinit omnes actus bonos , vt tales , siue sint boni bonitate morali simul & naturali , siue tantum bonitate naturali seu physica : Atqui materiale peccati, materialiter sumptum est actus bonus , bonitate non quidem morali , sed naturali , siue physica ; cum sub hac ratione & secundum suum esse physicum , non pertineat ad lineam moralem , nec proinde ad lineam mali moralis , sed ad lineam esse naturalis & physici , quæ bona est bonitate physica & naturali : Ergo materiale peccati , materialiter sumptum , potest prædefiniri à Deo , absque vlla læsione seu præiudicio suæ infinitæ sanctitatis .

Respondent Aduersarij , quod licet materiale peccati , materialiter & specificatiuè sumptum sit ex suo genere, siue ex sua linea , bonum ; tamen ob indispensabilem nexum quem habet cum malitia morali, in odio Dei , v. g. non posse Deum suo decreto illud efficaciter velle ac prædefinire , nisi etiam indirectè & secundariò velit efficaciter ac præde-

finiat ipsum formale ; vnde cum illud repugnet diuinæ sanctitati , illud pariter ei aduersari censendum est .

Sed contra primò : Licet aliqua sint inter se inseparabiliter connexa , non sequitur , nec oportet , quod causa vel potentia quæ vnum attingit , debeat necessariò attingere aliud , vt patet in bono , quod licet identificetur cum verò , imò & in eo transcendentaliter includatur , ita tamen attingitur à voluntate , quod verum nullo modo ab ea attingatur ; quia nimirum verum non est obiectum voluntatis , sed bonum : Ergo similiter , licet in actibus intrinsecè malis , v. g. in odio Dei , materiale peccati non possit realiter separari à formali , siue à malitia morali ; eo ipso tamen quod malitia illa non contineatur intra obiectum adæquatum diuinæ voluntatis , bene tamen eius materiale , siue fundamentum specificatiuè spectatum , potest Deus decreto suo efficaci & prædefinitiuo attingere materiale illius peccati , absque eo quod attingat vllò modo , etiam indirectè , eius formale . Quæ ratio magis vrgetur conclusione sequenti .

Confirmatur : Materiale peccati , licet sit connexum cum formali , terminat complacentiam diuinam , absque eo quod illam terminet malitia formalis : Ergo pariter terminare poterit volitionem Dei efficacem , & decretum prædeterminans , absque eo quod malitia formalis illud terminet . Consequentia patet , nam si complacentia diuina terminata ad materiale peccati , non transit necessariò ad formale , hoc idè est , quia materiale continetur intra obiectum diuinæ voluntatis , non verò  
for.

formale: Sed hac ratione admissa, nulla potest ratio assignari, cur idem non dicatur de volitione Dei efficaci: Ergo ista poterit terminari ad materiale peccati, absque eo quod se extendat ad formale. Antecedens verò probatur: Materiale peccati non terminat actum displicentiæ voluntatis diuinæ: Ergo terminat complacentiam diuinam, cumque in malitia formali non possit complacere diuina voluntas, verum est dicere, quod materiale peccati terminat complacentiam diuinam, absque eo quod illam terminet malitia formalis. Consequentia patet, Antecedens probatur. Omnipotentia Dei verè & propriè causat materiale peccati, quod cum sit ens creatum & participatum, non potest subterfugere diuinam causalitatem: Ergo illud non terminat odium & displicentiam diuinam. Consequentia manifesta est, tum ex illo Sapient. 11. *Nihil odisti eorum quæ fecisti.* Tum etiam, quia si materiale peccati, ut causatur ab omnipotentia Dei, displiceret Deo, & terminaret odium eius, sequeretur ipsamque omnipotentiam, ut in illud influentem, displicere Deo, & odium ipsius terminare, cui enim opus displicet, etiam displicet influens in illud, unde quia peccatum displicet Deo, etiam homo peccans ei displicet, iuxta illud Sapient. 14. *Odio sunt Leo impius, & impietas eius:* Sed absurdissimum est dicere, omnipotentiam Dei influentem in materiale peccati, ipsi displicere: Ergo & asserere, materiale peccati terminare actum displicentiæ voluntatis diuinæ.

Confirmatur ampliùs: Quia materiale

peccati continetur intra obiectum omnipotentiae diuinæ, non verò formale; Deus sua omnipotentia causat per concursum præuium materiale peccati, absque eo quod causet formale, ut ostendemus conclusione sequenti: Sed hæc ratio pari efficacia militat in voluntate Dei, cum illa non minus sancta, nec minus præcisiua sit, quam eius omnipotentia; Ergo poterit voluntas diuina prædefinire materiale peccati, absque eo quod prædefiniat formale ei annexum, & cum eo inseparabiliter coniunctum, subindeque absque ulla læsione & præiudicio diuinæ sanctitatis.

Dico secundo, Deus prædeterminat physicè voluntatem ad materiale peccati, seu in illud influat per concursum præuium, absque villo præiudicio sanctitatis diuinæ.

Probatur primò: Cum anima mouet & applicat tibiam curuam ad gressum, ita causat illum motum, quatenus est physicus & vitalis, ut tamen illum non efficiat, quatenus est obliquus & defectuosus; sed defectus claudicationis in tibiam curuam totaliter reducitur, quia nimirum ille defectus non continetur intra obiectum adæquatum potentiae locomotivæ: Atqui similiter formale peccati, seu malitia eius moralis, non continetur intra obiectum adæquatum omnipotentiae Dei: Ergo Deus ita potest applicare & prædeterminare voluntatem hominis ad materiale peccati, ut ipsa tamen non applicet nec prædeterminet ad formale, ei annexum & ab eo inseparabile, subindeque sine præiudicio diuinæ sanctitatis. Maior patet. Minor verò sic ostenditur, Obiectum adæquatum diuinæ

omnipotentia est illud quod est reducibile & ordinabile in Deum & ultimum finem, cum ratio primi principij & ultimi finis inter se conuertantur; unde dicitur Proverb. 16. *Omnia propter semetipsum operatus est Dominus*: Sed formale peccati, seu malitia eius moralis, non est ordinabilis in Deum tanquam in ultimum finem, cum potius sit recessus & deuiatio ab illo ut fine ultimo: Ergo non continetur intra obiectum adæquatum omnipotentia Dei.

Probatur secundò argumento ad hominem: Deus de facto concurrit concursu simultaneo cum voluntate creata ad materiale peccati, & tamen non concurrit cum illo ad malitiam formalem; aliàs Deo attribueretur talis malitia, sicut ei tribuitur entitas materialis peccati: Ergo etiam præmovere & prædeterminare potest ad entitatem materiale peccati, absque eo quod præmoueat & prædeterminet ad malitiam formalem; subindeque absque læsione diuinæ sanctitatis. Consequencia probatur primò, quia multò magis connectitur malitia & deformitas peccati cum concursu simultaneo, quam cum concursu præuio; cum primo enim coniungitur proximè & immediate; cum secundo verò mediatè tantum & remotè; quia concursus simultaneus est ipsemet actus voluntatis, prout est à Deo simul operante, cum quo actu immediate coniungitur ipsa malitia peccati; concursus verò præuius non identificatur cum actione voluntatis, sed est quid præuium ad illam, unde non coniungitur cum malitia & deformitate peccati, nisi mediante actu voluntatis: Ergo si Deus

Deus possit concursu simultaneo concurrere cum voluntate creata ad materiale peccati; absque eo quod concurrat ad formale, à fortiori id poterit per concursum prauum. Secundò, non minùs præcisiua est omnipotentia diuina, vt prædeterminans, quam vt simultaneè cum voluntate concurrens: Ergo si vt concurrens simultaneè, attingit entitatem & actualitatem actus peccaminosi, & præscindit à malitia formali, poterit etiam prædeterminando ab ea præscindere. Tertiò, ideo Deus simultaneè concurrendo ad materiale peccati, præscindit à formali, quia istud non continetur intra sphaeram seu obiectum adæquatum diuinæ omnipotentia: Sed hæc ratio pari efficacia militat pro concursu prauo & prædeterminante: Ergo idem quod prius.

Respondent Aduersarij, hoc inter concursum prauum & simultaneum interesse discrimen, quod iste est indifferens, nec per ipsum Deus determinat voluntatem creatam, sed potius ab illa determinatur; concursus autem prauus & prædeterminans, non determinatur à voluntate creata, sed illam determinat, vnde iste non potest esse præcisiuus, bene tamen ille.

Sed contra primò: Iuxta hanc solutionem & doctrinam, voluntas creata determinat concursum diuinum ad entitatem actus peccaminosi, & tamen non determinat illum ad formalem malitiam: Ergo pariter Deus per suum concursum poterit determinare voluntatem creatam ad entitatem eiusdem actus illam non determinando ad malitiam. Consequentiā videtur manifesta, non enim assigna-

ri potest ratio, cur voluntas creata sit magis præcisiva in determinando concursum diuinum, quam omnipotentia & voluntas diuina in determinando concursum voluntatis creatæ; Ergo si hæc potest determinare concursum diuinum ad entitatem actus peccaminosi, præscindendo à malitia, id est non determinando concursum Dei ad illam, poterit etiam Deus determinare concursum voluntatis creatæ ad entitatem actus, non determinando illum ad malitiam, sed præscindendo ab illa.

Contra secundò: Esto quod concursus Dei in actu primo consideratus, id est decretum concurrenti cum causis liberis, sit indifferens, seu quod indifferenti modo voluntati Deus offerat suum concursum; concursus tamen actualis & exercitus, quo de facto simul influit cum voluntate creata ad actum odij Dei v. g. non potest esse indifferens, cum intinè in illo actu imbibatur, & cum eo identifice-  
tur. Quæro igitur, an talis concursus actualis & exercitus, attingat solam entitatem & substantiam illius actus intrinsece mali, vel etiam ad eius malitiam & deformitatem se extendat? Si primum dicatur, sequitur quod concursus præuius à fortiori præscindere poterit à malitia & deformitate eiusdem actus, & solam eius substantiam & entitatem attingere; quia, vt supra dicebamus, concursus præuius magis distat à malitia & deformitate tali actui annexa, quam concursus simultaneus. Si verò alterum afferatur, sequitur Deum per concursum simultaneum causare malitiam & deformitatem peccati, quod di-



diuinæ sanctitati repugnat.

Vt ab his argumentis sese expediant Adversarij, in varia incidunt absurda, & plurimorare ac deglutire coguntur inconuenientia. Aliqui enim Recentiores, non valentes, aut non volentes concipere, quomodo Deus possit causare materiale peccati, & à malitia formali præscindere, ausi sunt sententiam Durandi & Aureoli, iam diu extinctam, & sepultam, è cineribus & tumulo reuocare, atque asserere Deum non causare immediatè entitatem peccati, eiusque materiale, sed mediatè tantum & remotè, quatenus nimirum dedit voluntati potestatem operandi, subindeque producendi entitatem & actualitatem actuum malorum quos elicit.

Sed hæc sententia à D. Anselmo lib. de præscientia & libero arbitrio, audacia seu temeritas appellatur: *Audacia* (inquit) *est dicere, aliquod esse ens quod non sit ab ente primo*, & D. Thomas in 2: dist. 37. q. 2. a. 2. dicit illam esse *propinquissimam duplici errori*. Et in 2. ad Annib. dist. 37. q. vnica a. 1. illam esse hæreticam, & rationi contrariam: *Hæreticum* (inquit) *est dicere, aliquod ens, inquantum ens, non esse à Deo, nec solum fidei contrarium est, sed etiam rationi*. Similiter Albertus Magn. in 2. sent. dist. 35. art. 7. ait quod *hæc opinio quæ obtinuerat plures antiquorum, ferè cessit ab aula, & à multis modernorum reputatur hæretica*. Demum Dominicus Soto lib. 1. de natura & gratia cap. 18. dicit vnam nimem esse Theologorum consensum, quod Deus causet entitatem peccati, quæ malitiæ eius ac deformitati subternitur.



*Haec equidem ( inquit ) dissentitur Theologi  
entitatis ( ita vocant ) quæ est peccatum Deum  
esse causam , eo efficientiæ genere , quo cuncta  
animantia & inanimata , ad suas naturales  
actiones permonet .*

Ratio etiam id suadet , nam ut discirrit D.  
Thomæ locis citatis : Quod non habet esse à  
se , non potest habere operationem à se : Sed  
entitas hominis peccantis non conuenit illi à  
se : Ergo nec entitas actualis peccati potest  
illi à se conuenire .

Præterea , ut idem S. Doctor arguit in 2.  
dist. 37. qu. 2. art. 2. in argum. Sed contra .  
*Quidquid non est causa operationis per quam  
aliqua substantia in esse producitur , non est  
causa illius substantiæ : Sed per aliquam  
actionem peccati , substantiæ quædam in esse  
producuntur , sicut per adulteria & fornicatio-  
nes homines generantur : Si ergo harum actio-  
num Deus causa non est , inquantum actiones  
sunt , nec hominum qui per has actiones gene-  
rantur est causa , quod est absurdum .*

Alij Recentiores in alio extremo positi, vi-  
dentes quod si admittatur , concursus Dei  
simultaneum esse præcisium , & attingere  
entitatem peccati , præscindendo ab eius ma-  
litiæ & deformitate, idem dici poterit de con-  
cursu præuio , & prædeterminante , dicunt  
Deum per concursus simultaneum , non so-  
lum causare entitatem & substantiam actuum  
maiorum , sed etiam eorum malitiam & de-  
formitatem . Addunt tamen , Deum id præ-  
stare veluti inuitum , & coactum , atque à vo-  
luntate humana veluti tractum & determi-  
natum , ne videlicet desit muneri causæ  
pri-

primæ , aut violet iura libertatis creatæ ?

Verùm hæc responsio & doctrina multipliciter confutari potest . In primis enim impium videtur asserere , Deum , vt determinatum à voluntate humana , lapsum eius sequi , & causare malitiam & deformitatem sui peccati , atque ab ea veluti trahi in societatem flagitij sui : hoc enim diuinæ sanctitati manifestè repugnare videtur . Vnde sicut Auctores prioris solutionis iam impugnata , tollunt à Deo rationem primæ causæ , vt tueantur iura sanctitatis diuinæ , ita isti è contra , vt rationem primæ causæ in Deo saluent , deterunt famam sanctitatis diuinæ .

Secundò , repugnat Deum , etiam vt tractum & determinatum à voluntate humana , causare id quod non continetur sub obiecto adæquato suæ omnipotentia : Sed malitia & deformitas peccati , cùm sit recessus à Deo vt ultimo fine , non continetur sub obiecto adæquato diuinæ omnipotentia : cùm illud sit id tantùm quod est ordinabile in Deum vt ultimum finem ; vt supra ostensum est : Ergo non potest causari à Deo , etiam vt tracto & determinato à voluntate humana .

Tertiò , quod est ab aliquo solùm permissiue , non propriè dicitur ab illo causari , vt docet Anselmus lib. de casu diaboli cap. 1. & constat ex eo quod permissio est sola negatio impedimenti , pura autem negatio non potest verè causare , & tribuere esse reale : Sed malitia formalis peccati est à Deo solùm permissiue , vt constat ex Tridentino sess. 6. can. 6. Ergo non causatur à Deo , etiam vt tracto & determinato à voluntate creatæ .

Quar-

Quartò, Deus non causat illud quod odio habet, iuxta illud Sapient. 11. *Nihil odisti eorum quæ fecisti*: Sed odio habet malitiam & deformitatem peccati, vt constat ex illo Sapient. 14. *Odio sunt Deo impius & impietas eius*: Ergo illam non causat.

Confirmatur: Si omnipotentia Dei causaret peccatum pro formali malitiæ, ipsa vt efficiens & influens in illud, Deo displiceret, & terminaret odium eius: Sed hoc dici nequit, alias Deus seipsum odio haberet, & sibi ipsi displiceret: Ergo nec illud. Sequela maioris est euidens, cui enim opus displicet, etiam displicet influens in illud: Ergo si omnipotentia Dei causaret peccatum; formaliter quatale, & inderet in eius malitiam & deformitatem, quæ displicet Deo, ea pariter illi displiceret, & odium eius terminaret.

Quintò, si malitia peccati à Deo vt prima causa efficienter procederet, magis reduceretur in Deum, quam in hominem peccantem: effectus enim à causa prima & à secunda procedens, magis à causa prima quam à secunda dependet, subindeque magis in illam, quam in istam reducitur: Consequens est absurdum, & diuinæ sanctitati prorsus iniuriosum: Ergo & Antecedens.

Demum, si Deus non solum influeret in entitatem materiale peccati, sed etiam in eius malitiam formalem, posset dici causa & author peccati, quod est incidere in errorem Caluini à Tridentino damnatum. Sequela probatur: Deus est prima causa & primus author entitatis & actualitatis actus peccaminosi, quamuis, iuxta doctrinam Adversariorum,

rum, in eam non influat, nisi ut tractus & determinatus à voluntate humana, diuini decreti indifferentiam determinante: Ergo similiter, licet non influat in malitiam & deformitatem illius, nisi ut tractus, & determinatus à voluntate creata, poterit nihilominus dici causa, & auctor peccati.

Ex his intelliges, Thomistas melius & facilius conciliare infinitam Dei sanctitatem, cum ratione & dignitate primæ causæ, primique principij, quam Aduersarios. Isti enim admittentes in Deo decreta indifferentia, ab eo tollere rationem primæ causæ, respectu determinationis voluntatis creatæ, ut supra ostendimus, & nihilominus non saluant iura diuinæ sanctitatis, cum ut sese ab argumentis Thomistarum expediant, tandem cogantur asserere, Deum, ut tractum ac determinatum à voluntate creata, non solum in entitatem peccati, sed etiam in eius malitiam & deformitatem influere per cōcursum simultaneum. Thomistæ verò, ab utroque abhorrentes, ut dignitatem causæ primæ, cum Dei sanctitate concilient, recurrunt cum S. Thoma ad infinitam efficaciam diuinæ voluntatis & omnipotentiae, ratione cuius Deus ita causat entitatem materiale peccati, ut ab eius malitia formali præscindat, ut expresse docet S. Doctor quæst. 3. de potentia art. 7. ad 15. his verbis: *Quia causa prima magis influet in effectum, quam secunda, ideo quidquid perfectionis est in effectu, principaliter reducitur in primam: quod autem est de defectu, reducendum est in causam secundam, quæ non ita efficaciter operatur sicut prima:* Ergo iuxta do-

Strinam S. Thomæ , tantum abest quod ex efficacia decreti diuini erga materiale peccati , sequatur malitiam formalem in actu nostræ voluntatis repertam , in diuinam voluntatem , eiusque causalitatem reduci ; quin potius talis efficacia , facit , vt malitia & deformitas peccati , non in causam primam , sed in secundam refundatur .

### §. IX.

#### *Soluantur obiectiones .*

**O**bjicies primò : Si Deus voluntate absoluta & efficaci predefinit materiale peccati , & voluntatem ad illud prædeterminat , licitum & laudabile erit homini illud velle , Sed hoc absurdum est : Ergo & illud . Sequela maioris videtur manifesta , licitum enim & laudabile est velle id omne quod Deus vult , cum laudabile sit in omnibus se conformari voluntati diuinæ .

Respondeo negando sequelam maioris , & ad eius probationem dico , quod licet licitum & laudabile sit velle id omne quod Deus vult , vt specialis motor ac prouisor , non tamen id omne quod vult , voluntate generali primi motoris , & vniuersalis prouisoris ; hac enim voluntate generali vult permittere peccata , & simul nobiscum concurrere ad materiale illorum , vt fatentur Aduersarij , & tamen nec laudabile nec licitum est illa velle , nec semper est actus virtutis se conformare tali voluntati .

**O**bjicies secundò : Homo non potest ponere

re materiale peccati, nisi consequenter ponat malitiam & deformitatem ei annexam: Ergo si Deus voluntate absoluta & efficaci velit quod homo ponat & producat tale materiale, consequenter etiam vult quod ponat malitiam illi adiunctam, ac proinde quod peccet.

Respondeo, concesso Antecedente, negando consequentiam. Nam ille discipulus eodem vitio laborat quo isti. Anima absolute & efficaciter vult tibiā curuā motu progressiuo moueri: Sed tibiā curua non potest motu progressiuo moueri, nisi claudicando; Ergo anima absolute & efficaciter vult quod tibiā curua claudicet: Item Deus efficaciter vult quod Petrus à Paulo generetur: Sed Petrus non potest à Paulo generari, nisi contrahat peccatum originale: Ergo Deus efficaciter vult Petrum contrahere tale peccatum. Potest etiam formari simile argumentum ex principijs Aduersariorum: Deus enim, iuxta illorum principia, absoluto & efficaci decreto vult ponere hominem in illis occasionibus & circumstantijs, in quibus præuidit per scientiam mediam illum peccaturum: Sed impossibile est quod homo positus in illis occasionibus & circumstantijs non peccet, alioquin diuina præscientia falleretur, & id quod Deus præsciuit non eueniret: Ergo Deus absoluto & efficaci decreto vult quod homo incidat in peccatum. Sicut ergo illæ consequentiæ non valent, ita nec illa quæ sit in argumento proposito. Ratio est, quia (vt supra ostendimus) identificata, vel inter se connexa, possunt præscindi, non solum intentionaliter & per cognitionem, sed etiam realiter, per volitionem,

neque , & causalitatem ; idque semper contingit, quando ex duabus rationibus vel formativitatibus inter se connexis, una continetur intra obiectum formale alicuius potentiae , vel intra sphaeram aetivitatis alicuius causae , non verò altera : unde cum malitia moralis non contineatur intra obiectum formale voluntatis Dei, nec intra sphaeram diuinæ causalitatis & omnipotentiae , bene tamen entitas & actualitas illius , Deus potest voluntate absoluta & efficaci velle & prædefinire materiale peccati, sub ratione entis & actus , & prædeterminare voluntatem ad illud , absque eo quod talis prædefinitio vel prædeterminatio se extendat ad malitiam & deformitatem ei adiunctam ex defectibilitate voluntatis creatæ . Unde D. Thomas 3. contra Gent. cap. 162. *Pecatum omne ex aliquo defectu provenit proximi agentis non autem ex influentia primi agentis ; sicut peccatum claudicationis provenit ex dispositione tibie , non autem ex virtute motiva , cum tamen ex ea sit quidquid de perfectione motus in claudicatione apparet ; proximum autem agens peccati humani est voluntas . est igitur defectus peccati ex voluntate hominis, non autem ex Deo qui est primum agens, a quo tamen est quidquid ad perfectionem actionis pertinet in actu peccati .*

Dices, ponere materiale peccati cum defectu & malitia morali , idem est ac illud ponere , cum libertate & advertentia rationis : Sed Deus per suam prædefinitionem vult , & efficit per physicam prædeterminationem quod homo ponat materiale peccati , cum libertate & advertentia rationis : Ergo vult & facit  
per



per talem prædefinitionem & prædeterminationem, quod homo ponat materiale peccati cum defectu & malitia morali.

Respondeo negando maiorem, licet enim libertas & aduertentia rationis, sint conditiones necessariò requisitæ, ut actus humani sint moraliter mali, in illis tamen non consistit malitia moralis, sed vel in priuatione rectitudinis & conformitatis cum lege, ut quidam volunt, vel ut alij probabilius censent, in ordine transcendentali ad obiectum ut difforme regulis morum. Vnde cum Deus sua prædestinatione non velit; nec sua prædeterminatione efficiat, ut homo ponat materiale peccati, ut fundans, vel connotans talem priuationem, vel ut dicas ordinem illum transcendentalem, hinc fit quod nec velit per suam prædefinitionem, nec efficiat per suam prædeterminationem, quod homo ponat materiale peccati, cum defectu & malitia morali, sed solum quod in eo producat entitatem, actualitatem, utilitatem, & alias rationes ad ordinem physicum spectantes, & in Deum ut primum principium ac ultimum finem reducibiles.

Instabit: Omne positivum à Deo prædefiniri & prædeterminari debet: Ergo si formale peccati consistat in positivo, ut asserit communior ac probabilior Theologorum sententia, debebat à Deo prædefiniri & prædeterminari, subindeque causari.

Respondeo primò, idem argumentum posse fieri de concursu simultaneo, cum omne positivum & reale debeat produci à Deo per concursum simultaneum.

Re-



Respondeo secundò, distinguendo Antecedens : Omne positium debet prædefiniri & prædeterminari à Deo, sub ratione positivæ entitatis, concedo. Sub ratione defectus ac deformitatis, nego. De quo in Tractatù de peccatis cap. 8. §. 2.

Obijcies tertio : Deus non potest moraliter mouere ac prædeterminare hominem ad materiale peccati, aliàs illum tentaret, seduceret, ac implanaret : Ergo nec physicè. Consequentia videtur manifesta ; cum enim motio physica sit ab intrinseco efficax, & se teneat ex parte, potentix, est multò maior ac vehementior, quam motio moralis, quæ de se efficax non est, & extrinsecè solum ac obiectivè allicit & inuitat agens ad operandum.

Respondeo, concesso Antecedente, negando consequentiam & paritatem. Multiplex enim inter motionem physicam & moralem intercedit discrimen. Prima enim præcisiva est, & fit it iuxta ordinem physicum, non autem secunda, quæ se extendit ad ordinem moralem, & attendit potissimum ad ea quæ sunt illius ordinis. Prima solum respicit entitatem & actualitatem actus ad quem movet, secunda attendit, vel attendere debet ad conformitatem vel deformitatem à lege. Prima convenit Deo, ut habet rationem causæ primæ, & uniuersalis prouisoris, secunda illi competi. ut speciali prouisorio ac motori. Unde quamuis si Deus moraliter moueret hominem ad materiale peccati, illum tentaret, & implanaret, ex eo tamen quod illum physicè moueat & prædeterminet ad tale materiale, non sequitur quod ipsum tentet, vel seducat,

sed solum quod illum applicet ad producendam entitatem & actualitatem quæ in illo reperitur, & quæ per se primò in diuinam causalitatem & omnipotentiam reducitur. Ad probationem in contrarium dicendum est, quod licet motio physica sit maior morali intensiue, id est potentior & efficacior, est tamen minor extensiue, quia sistit intra ordinem physicum, nec se extendit ad lineam moris, sicut motio moralis.

Addo quod, si hoc argumentum valeret, facile posset in Aduersarios retorqueri. Illi enim docent, quod cum Deus per scientiam mediam videat infinitas occasiones & circumstantias, in quibus homines non peccarent, sed bene agerent, & conuerterentur, eos tamen interdum ponit in alijs in quibus per eandem scientiam præscitit infallibiliter peccaturos. Vnde sic arguo: Ille qui ponit hominem in occasionibus peccandi, ipsum moraliter præmouet ac prædeterminat ad peccandum: sicut enim occasiones peccandi moraliter & obiectiue mouent ad peccatum, ita & ille qui in illis hominem ponit, censetur præmouere ac prædeterminare moraliter ad peccandum, unde communiter dicitur: *l'occasion fait le larron*: Ergo si Deus interdum ponat homines in illis circumstantijs & occasionibus, in quibus per scientiam mediam præiudicet eos infallibiliter lapsuros in peccatum, eos tentat, seducit, & implanat, atque moraliter præmouet ac prædeterminat ad peccatum, quod cum sit effectus, vel potius defectus moralis, in causam moraliter mouentem, non verò in physicè prædeterminantem, reduci debet,

Dices cum quodam Recentiore : Deus , in sententia Thomistarum , prædeterminat suasiones quibus Dæmon moraliter mouet nos ad peccandum : Ergo non solum physicè , sed etiam moraliter prædeterminat ad actus malos .

Respondeo distinguendo Antecedens : prædeterminat suasiones, &c. quatenus sunt actus physici & vitales, concedo Antecedens. Quatenus sunt malæ moraliter , & ad peccatum inducentes, nego Antecedens , & consequentiam . Sicut enim in sententia Aduersariorum , Deus tales suasiones , vt sunt actus quidam physici & vitales , in Dæmonibus causat per concursum simultaneum , & tamen non censetur cooperari malitiæ illorum ; ita nec in nostra censetur mouere ad peccandum , quamuis per concursum prauum easdem suasiones , vt sunt operationes vitales , & physicæ , in eis producat .

Obijcies quartò : Tridentinum sess. 6. can. 6. damnat eos qui dicunt , Deum non se habere solum permissiue ad peccata & mala opera : Sed hoc videtur sequi ex nostra sententia : Ergo illa non videtur consona Tridentino . Minor probatur qui causat aliquid ad quod aliud infallibiliter sequitur , non censetur nec dici potest se habere permissiue solum in ordine ad illud : v. g. quia mors sequitur infallibiliter ad inflictionem vulneris lethalis, & cæcitas ad confixionem oculorum, ille qui alteri infligit lethale vulnus , vel ei oculos configit , ineptè & abusiue dicitur eius mortem vel cæcitatem permittere : Sed ex prædefinitione & prædeterminatione mate-

rialis peccati, infallibiliter sequitur peccatum, cum impossibile sit quod homo liberè & aduertenter actum malum & prohibitum eliciat, & non peccet: Ergo illa supposita, Deus dici non potest (nisi abusiue, & nugatorie) se habere permissiue solùm in ordine ad peccata.

Confirmatur: Deum se habere permissiue ad aliquid, est illud non impedire, cum possit, ut docet D. Thomas in 1. dist. 47. q. 1. art. 2. in corp. & ad 3. posito autem quod Deus prædeterminet voluntatem ad materiale peccati, verbi gratia odij Dei, nequit impedire malitiam eius, utpote cum entitas eius liberè producta, non possit à malitia separari: Ergo neque dici eam permittere.

Ad obiectionem respondeo negando Minorem, & ad illius probationem, distinguo Maiorem: Qui causat aliquid ad quod aliud infallibiliter sequitur, non censetur, neque dici potest, se habere permissiue solùm ad illud. Si sequatur consecutione physica & causalitatis, concedo Maiorem. Si sequatur consecutione tantùm logica & illationis, nego Maiorem. Nam ad motum vitalem tibie curæ, sequitur infallibiliter claudicatio, & tamen anima causans illam motum, non censetur esse causa positiua, sed tantùm permissiua talis defectus: quia cum ille non contineatur intra sphaeram actiuitatis potentiæ loco motiue, non sequitur ad motum eius progressum, consecutione physica & causalitatis, sed tantùm consecutione logica & illationis. Vnde exempla in obiectione adducta non sunt ad rem, quia mors & cœcitas, cum sint intra spha-

sphæram actiuitatis causarum secundarum, sequuntur per se, & ex natura rei, ac consecutione physica, ad inflictionem vulneris lethalis, & confixionem oculorum; è contra verò, cum malitia & deformitas peccati, non sit intra obiectum adæquatum voluntatis diuinæ, nec intra sphæram causalitatis eius, non resultat nec sequitur ex prædeterminatione voluntatis ad materiale peccati, consecutione physica & causalitatis, sed duntaxat consecutione logica & illationis, vt tract. præcedenti cap. 4. ad finem paragraphi 2. declarauimus.

Ad confirmationem dicendum, quod licet Deus, posito decreto prædeterminante voluntatem ad materiale peccati, non possit in sensu composito impedire malitiam eius, coniungendo scilicet impedimentum, atque adeo negationem malitiæ actus odij Dei, cum prædefinitione, subindeque cum positione talis materialis; attamen sicut voluntas, etiam elicendo actum illum, potest in sensu diuiso ipsum non elicere, ita & Deus eam impedire in sensu diuiso, ne ipsum eliciat. Ad hoc autem vt aliqua causa censeatur permissiue tantum se habere ad aliquem defectum, non semper requiritur quod possit ipsum impedire in sensu composito, siue potentia consequenti, vt constat exemplo sæpe adducto animæ mouentis tibiam curuam ad ambulandum, quæ defectum claudicationis censeatur permittere, quamuis supposita motione tibie curuæ, non possit negationem huiusmodi defectus claudicationis cum tali motu componere.

## §. X.

*Calvinismi depulsio .*

**E**X dictis toto hoc capite, manifestum relinquitur, sententiam Thomistarum longè differre à Calvinæ doctrinæ, nullamque cum erroribus eius habere affinitatem. Imprimis enim, quantum ad id quod attinet ad diuinorum decretorum, & auxiliorum ex eis promanantium, causalitatem & efficaciam, duo sunt principia Thomisticæ & Calvinianæ doctrinæ discrimina. Primum ac præcipuum est, quod Calvinus, & rigidi quos vocant Calvinistæ docent diuina decreta & auxilia, ita esse efficacia, vt indifferentiam omnem humanæ voluntatis absorbeant, solaque spontaneitate, seu immunitate à coactione, relicta, proximam dissentiendi potentiam ab ea tollant. Nam in Antidoto ac canon. 5. sess. 6. hæc scribit: *Quid ergo sibi vult Augustinus, cum de libertate voluntatis loquitur? nempe quod toties repetit, non cogi homines inuicta Dei gratia, sed voluntarios regi, vt sponte pareant, ac sequantur.* Thomistæ verò diuina decreta & auxilia quantumuis de se efficacia, & prædeterminantia, cum actuali indifferentia voluntatis, & dissentiendi potentia, ita componunt, vt hæc duo semper inter se coniungantur, gratia in voluntate, & in eadem voluntate sub gratia constituta, sufficiens non consentiendi potestate, iuxta illud D. Prosperi 2. de vocat. Gentium c. 27. *Deus ad obediendum sibi ipsum velle sic donat, vt etiam*  
*à per-*

*à perseneraturis illam mutabilitatem quæ potest nolle non auferat .*

Secundum discrimen huic affine , & veluti eius consecrarium , petitur ex diuersa sensus compositi & diuisi intelligentia ? cùm enim Caluinus, & rigidi Calvinistæ, diuina decreta & auxilia , omnem voluntatis indifferen-  
tiam , omnemque dissentendi potentiam absumere, & absorbere affirmant , necessaria ex huius erroris consecutione deducunt , distinctionem sensus compositi & diuisi ita esse accipiendam, vt voluntatem non posse Deo mouenti dissentire in sensu composito , sed tantùm in sensu diuiso ; significet voluntatem carere dissentendi potentia , quandiu adest & perseverat diuina motio in anima , hanc dissentendi potentiam excludens , sed solum quando illa abierit vel abscesserit . Thomistæ verò, cum velint , diuina decreta & auxilia , ita regere voluntatem , vt potestatem resistendi seu dissentendi non adimant , consequenter asserunt , voluntatem non posse Deo mouenti dissentire in sensu composito , sed tantùm in sensu diuiso , denotare , quod quamuis actualis dissensus cùm diuina motione ( vtpote ab intrinseco efficaci , subindeque infallibiliter inferente assensum ) coniungi & componi nequeat : voluntas tamen, etiam vt gratiæ subest, ab eaque mouetur & applicatur ad agendum , retinet absolutam dissentendi potentiam . Vade Alvarez lib. 2. resp. cap. 1. n. 14. *Sensus compositus* ( inquit ) *non est ille qui in argumento insinuat , quod videlicet quando gratia efficax est in voluntate, non possit voluntas non agere actum illum ad quem determina-*

tur, ablata verò motione possit non agere, hic enim sensus confictus fuit à Caluino.

Hæc duo Thomisticæ doctrinæ à Calviniana discrimina, adeò manifesta sunt, ut Pater Annatus ea occultare aut dissimulare non potuerit: nam in libro quem edidit de libertate incoacta pag. 226. vtramque differentiam his verbis expressit. *Quem inuenient Ianseniani inter Thomistas, qui dixerit voluntatem, diuina gratia prædeterminatam, carere proxima ad dissentiendum potentia? Quem dabunt qui distinctionem sensus compositi & diuisi sic interpretes, ut sensus sit, voluntatem à Deo modo posse dissentire, quando illa motio abierit, & aduenerit alia?*

Ex his intelliges, quanta sint in hoc Auctore verborum & cogitationum inter se pugnantium dissidia. Imprimis enim in libro pro defensione scientiæ mediæ Tolosæ edito, disp. 4. cap. ultimo scribit, nullum Thomistas inter & Caluinum reperiri discrimen, nisi verbo tenus & quantum ad modum loquendi. Vnde ibidem num. 120. sic exclamat: *Nonne iusta est defensorum scientiæ mediæ petitio, qui post longam tot annorum altercationem, adhuc quærent quæ sit reipsa differentia inter Adversariorum & Caluini doctrinam, in ea præcisè dubitatione qua petitur, sit ne aut non sit in homine liberi arbitrii usus aliquis?* Et tamen loco citato libri de libertate incoacta, & alijs in locis infra referendis, assignat duo discrimina iam exposita.

Secundò, idem Author ibidem num. 95. ait, modum defendendi libertatem, quem Amesius accepit ab Aluare (quo scilicet dis-

sen-



sentientiendi potentia simul esse dicatur cum auxilio quo homo ad assentiendum mouetur) pertinere ad Calvinismum, & non esse ad mentem Tridentini. Et tamen lib. 4. contra Baianos cap. 8. §. 7. num. 4. hæc scribit: *Lutherus & Calvinus, & eorum sequaces, ideo sunt hæretici, quia non admittunt liberum arbitrium, quale postulat Tridentinum, nempe quod excitatum à Deo per gratiam efficacem, possit nihilominus dissentire. Et infra: Consequens ergo est, ut dicamus proximam dissentientiendi potentiam, & à Tridentino sancitam, & ab hæreticis hæreticè negatam. Item in responsione ad decimam septimam epistolam Ludouici Montaltij: Catholici (inquit) Doctores inter se consentiunt, gratiam per se efficacem ita regere voluntatem: ut vim & potestatem resistendi non adimat, ita ut hæc duo inter se componantur, gratia in voluntate, & in eadem voluntate sub gratia constituta, sufficiens non sentiendi potestas, nec dubitant quin hic sit verus Concilij Tridentini sensus in verbis istis, potest dissentire si velit.*

Tertiò in prædicto libro pro defensione scientiæ mediæ edito, Thomistica libertatis tabellam depingens, afferit Thomistas duos veram & perfectam libertatem postulare, nempe in intellectu indifferentiam obiectiuam iudicij, & in voluntate spontaneitatem, seu immunitatem à coactione: ex qua tabella ibidem ait, nihil prorsus deleuisse Calvinum: *Postquam (inquit num. 111.) excussimus omnia ex Aduersariorum sententia, nihil aliud inuenimus, quam esse Dei prædefinitionem, absolutam, efficacem, infallibilem, infrastabilem,*

lem, ex qua sequitur actio voluntatis, seclusa coactione omni ac violentia, & supposita cognitionum mediocritate. Nihilominus locis iam relatis, Thomistas, præter hæc duo, tertium insuper ad veram rationem libertatis exigere, nempe dissentiendi, seu non agendi potentiam, quæ Thomistas segregat à Calvinistis, manifestè declarat. Item in libro quem sub Eugenij Philadelphi nomine edidit pagina 654. editionis Parisiensis, ait Thomistas, *hæc una linea* (potentia scilicet dissentiendi) *suam cum hæreticis confinia inconfusa servasse.*

Quartò idem Auctor in prædicto libro de scientia media Thomistas Calvinistis implicat, & in libris contra Baianos & Iansenianos editis, eos à Iansenianis sejungit, & tamen eandem esse dicit Iansenij & Calvinii errorem. Quæ certè aliter conciliari non possunt, quam negando commune illud artis syllogisticæ, & luminis naturalis principium: *Quæ sunt eadem vni tertio, sunt eadem inter se.* Mitto plures alias antilogias, seu verborum & cogitationum inter se dissidentium pugnas, quæ in prædictis libris huius Auctoris (diversa & opposita scribentis, pro diversa ratione temporum, & prout causæ suæ, & utilitati propriæ, videbat expedire) reperiuntur. De hoc enim fusè egimus in Apologia Thomistarum, quæ habetur in Clypeo Theologiæ Thomisticæ, ad calcem Tractatus de scientia Dei.

Quod attinet ad alium Calvinii errorem; quo Deum facit causam & Auctorem peccati, duo sunt pariter præcipua doctrinæ Thomisticæ

sticæ & Calvinianæ discrimina, Duplici enim titulo Calvinus Deum fecit auctorem peccati: Primus ac præcipuus sumitur ex eo quod docuerit Deum mouere voluntatem hominis ad actus, siue bonos, siue malos, solum spontaneè & non liberè, & sicut equus mouetur à fessore, ut ex supra dictis constat: supposito enim quod Deus voluntatem moueat ad actus malos & peccaminosos, ea motione quæ indifferentiam voluntatis auferat, & quæ voluntatem necessitate, euidenter sequitur, malitiam, & deformitatem peccati, non posse in voluntatem creatam, sed solum in Dei motionem reduci; quia voluntas motu solum spontaneo mota & excitata, & carens indifferentia actuali, & potentia ad oppositum, non potest in suos actus influere malitiam moralem, quæ sine libertate indifferentiæ, & potentia ad oppositum, nequit subsistere, ut in motibus primò primis, & actibus indeliberatis manifestum est. Vnde si quæ malitia moralis in eius actibus reperiatur, debet in Deum ut in Auctorem necessariò refundi. Altera ratio est, qua non potest Calvinus non facere Deum auctorem peccati, nempe quod docuerit ipsum mouere voluntatem hominis ad actus malos, motione morali, præcipiendo diabolo ut homines tentet, seducat, & in peccatum inducat, ut constabit legenti caput quartum libri secundi institutionum: motio enim meralis, cum non sit præcisua, sicut motio physica, ut §. præcedenti declarauimus, non solum ad entitatem, & substantiam actus, sed etiam ad eius malitiam & deformitatem, secundariò saltem & indirectè, se ex-

tendit. Cùm ergo Thomistæ, nec solam spontaneitatem in voluntate à Deo mota & prædeterminata agnoscant, nec Deum dicant mouere ad actus malos, etiam vt sunt physici & vitales, motione morali, sed physica duntaxat, manifestum est, eos toto cœlo à Caluino discrepare, nihilque, quoniam ad prædictum errorem, quo Deum facit auctorem peccati, affinitati vel commercij cum illo habere.

Nec obest, quod Caluinus interdum inter entitatem peccati, & eius malitiam videntur distinguere, & primam Deo tribuere, non verò alteram, ac negare illum esse auctorem peccati; hoc enim solum negat quoad verborum sonum, & ad vitandam verborum inuidiam, & inconsequenter ad sua principia, cùm oppositum manifestè sequatur ex duplici illo principio quod admittit, nempe Deum mouere voluntatem ad actus malos solum spontaneè & non liberè, ac præcipere Diabolo vt homines tentet, & in peccatum inducat, quod est cor mouere ad actum peccati motione morali. Addo ex Andrea Dauallio, Doctore Sorbonico, tomo 1. in secundam secundæ pagina 53. quod innumera extabant loca in Caluini institutionibus, quibus expressè & in terminis dicebat, Deum esse auctorem peccatorum, etiam quantum ad malitiam & deformitatem quam de formali important, sed ea in posterioribus editionibus à Caluinistis erasa fuisse. Ostendit etiam Becanus tomo 1. summæ Theologiæ cap. 16. testimonio Dauidis Parei, famosi Caluinistæ, imò & Caluinisticæ factionis in Germania

Pri-

Primipili, Caluinum reuera fecisse Deus auctorem criminum, & in errore, quem vel ipsæ aures horrent, Caluinistarum plurimos à Caluino defecisse, Vt quid igitur Pater Annatus in suo libro de scientia media, absoluerè conatur ab eo crimine Caluinum, à quo nec ipsi rigidiores Caluinistæ eum absoluunt? Cur teneat Æthiopem illum lauare, & ait, illum distinguere inter materiale & formale peccati, seu inter eius entitatem & malitiam, & primam tantum Deo tribuere, non vero alteram, illumque, *si usum vocum respiciamus, satis religiosum esse, ut caueat ne Deum auctorem peccati esse dicat?* Certe sinceriores & cautiores sunt hac in parte alij Societatis Theologi, qui ingenuè fatentur, Caluinum vtrumque Deo vt auctori tribuere, & Deum facere auctorem peccatorum.

Ex dictis liquet, vere ac prudenter dixisse Magistrum à Lorea, Ordinis Cisterciensis, disp. 21. de gratia concl. 2. *Nimis excedunt illi, qui inseparabili contentione defendunt, physicam prædeterminationem, quam docent Thomistæ, auferre libertatem, & sententiam quæ illam asserit, nihil aut parum à Caluino differre.* Cum enim euident sit esse S. Thomæ doctrinam, & plurimum ex antiquis Scholasticis, nulla ratione timendum est, aliquid ei inesse periculi, sed potius credendum est, esse fidei Catholice consonam. Et his censuris uti, nec pie, nec prudenter fit: Quare non existimo, piissimum ac sapientissimum Cardinalem Bellarminum, scripsisse id quod legitur in eius controuersijs, nempe sententiam quæ docet gratiam efficacem esse qualitatem Dei physicam,

cam, quæ determinat voluntatem ad volendum & eligendum bonum, videri aut esse omnino eandem cum errore Caluini & Lutheri, aut parùm ab illis differre. Credibilius & verisimilius est, verba illa à quibusdam Iesuitis Germanis, qui impressioni libri Controuersiarum præerant, intrusa fuisse, ut in Apologia Thomistarum ostendimus. Sed quidquid sit de hoc, Bellarmino oppono Baronium, qui Molinæ doctrinam sua nouitate periculosam, Augustino contrariam, & affinem erroribus Pelagianorum, aut Semipelagianorum esse declarat in epistola missa Domino de Vilars, Archiepiscopo Viennensi, quam hic integrè; & de verbo ad verbum transcribam.

ILLVSTRISIME,  
AC REVERENDISIME  
DOMINE.

*Ignoscat si tardius quam par est, ad litteras Dominationis nostræ rescribo, quas ut sanctas, puras, & orthodoxas in omnibus, exosculatus sum, à quibus absit ut vel in minima apice vel puncto dissentiam. Tantummodo de libris Molinæ remanet controuersia. Legi eos, sed non sine stomacho, cum in illis nihil potentius agere præferat, quam Sancto Augustino aduersari (licet sanctum nunquam nomet) eumque oscitantie redarguere, seque in illis disputationibus vigilantiores acutioresque iactare. Quis possit eum talia loquentem absque nausea tolerare? Licet ut anguis effugiat, & à manibus facile elabatur: ut si temerarium quis*

quis inueniat , haud facillè possit hæresis convincere & sugillare Non huiusmodi commentatoribus indiget Ecclesia Dei , quæ puritate , candore , nitore delectari tantummodo consuevit ipsa non habens maculam neque rugam . Legi inquam eum , & ad quinquaginta & amplius notari positiones , verba , phrasas , quas vel saltem affines erroribus Pelagianorum , siue Semi-pelagianorum ( licet ipse cautius intra Catholicæ fidei limites , vel protestando saltem se contineat ) neque puto q̃ i absque priuato affectu illa perlegerit , negabit omnino . Quid Ecclesia Dei indiget huius Molinæ libris , vt discat quæ a tot SS. Patribus , Concilijs , atque decretis , iam ante tot sæcula didicit ac docuit ? Quod ad ipsum D. N. Clementem Papam pertinet , hoc ipsi in proposito est , hoc in voto ; hoc denique in decreto , vt nec latum vnguem a vestigijs prædecessorum recedat , sed vsdem insistat quam firmissimè . Scit planè Sanctos tot Pontifices Innocentium , Sixtum , Cælestinum , Hormisdam , ac denique Fælicem ( cuius sunt Canones Arausicani Concilij ) hoc professor suis scriptis esse , atque testatos , Romanam Ecclesiam , in ijs quæ spectant ad gratiam & liberum arbitrium , sequi semper consueuisse Sanctum Augustinum . Testatur equidem id tot verbis Hormisda suis litteris , adeò vt alio iudicio opus non sit , cum iam præiudicatum sit . Laborat tunc in discutiendi Molinæ volumine , de quo , vel abiiciendo , vel purganda , vt retinendo , adhuc sub iudice lis est . Mea quidem sententia , eo non indiget Ecclesia Catholica , in qua vel saltem quædam auditæ horridula essent corrigenda . Mon i RR. PP. meos Societatis

Iosu ,

Iesu, ne estimationem eorum in defensione librorum eius periclitari sinant, & in discrimen adduci. Colo ipsos omnes, Deus scit ut Patres, ut de ipsis illud usur em. Opprobria exprobrantium tibi ceciderunt super me. At nolo prolixius esse. Vale Pater amantissime, lucerna pedibus meis, cum per obscura contigeris ambulare. De Beatis viris in Sanctorum numerum collocandis, ad aliud tempus servauit hoc Deus. Roma idibus Martij anno Domini 1603.

*Vestra Illustrissima ac Reuerendissima  
Dominationis Frater & Seruus  
Cæsar Cardinalis Baronius.*

Huius Epistolæ mentionem facit Petrus Matthieu, Historiæ septem annorum pacis Tomo secundo, libro septimo, narratione quarta, quam dicit se vidisse, & refert fragmentum eiusdem, nempe hæc verba; *Monuē RR. PP. meos Societatis Iesu, &c.*

## S. XI.

*Decretum efficax, & concursus Dei præuius,  
- ac prædeterminans, pro utroque statu  
naturæ lapsæ & innocentis,  
admitti debet.*

**P**ROBATUR primò ex principiis supra statutis, nam pro utroque illo statu saluari debet in Deo ratio & dignitatis primæ & vniuersalissimæ causæ: Sed illa, sublato decreto prædeterminato, & concursu Dei præuius, stare



re nequit : Ergo pro utroque statu naturæ lapsæ & innocentis, decretum prædeterminans, & concursus præuius, seu physica prædeterminationio, admitti debent. Maior est certa de fide, minor verò constat ex supra dictis ; cum enim decretum indifferens expectet determinationem à libero arbitrio, non potest illam causare, unde si Deus pro statu innocentie habuit decretum purè indifferens, & concursus duntaxat simultaneum, non fuit causa liberæ determinationis voluntatis Adami & Angelorum, nec per consequens discretionis bonorum Angelorum à malis ; & talis discretio, non in Deum, sed in liberum arbitrium, nec in gratiam, sed in naturam, reduci debet.

Confirmatur : Causæ secundæ, in quocumque statu ponantur, debent subordinari Deo, ut primæ causæ, in operando : Sed subordinatio causarum secundarum ad primam in operando, sine concursu Dei præuius, & physica prædeterminatione saluari nequit, ut §. 3. ostensum est : Ergo talis concursus & prædeterminatio pro quocumque statu naturæ humanæ admittendus est. Unde S. Thomas ubique & constanter necessitatem diuinæ præmotionis, non solum ob vulneratæ naturæ nostræ debilitatem, sed etiam ob indispensabilem cuiusvis causæ secundæ à prima in agendo dependentiam & subordinationem exigit, ut constet ex prima secundæ quæst. 109. art. 1. ubi sic ait : *Manifestum est quod sicut motus omnes corporales reducuntur in motum celestis corporis, sicut in primum mouens corporale : ita omnes motus, tam corporales, quam spirituales, reducuntur in primum mouens simpliciter,*  
quod

*quod est Deus. Et ideò, quantumcumque natura aliqua corporalis vel spiritualis perfecta ponatur, non potest in suum actum prodire, nisi moveatur à Deo. Vnde articulo sequenti in resp. ad 1. asserit quod mens hominis, etiam sani, non ita habet dominium sui actus; quin indigeat moveri à Deo.*

Probatur secundò ex principijs in tractatu de scientia Dei statutis: ibi enim ostendimus, scientiam Dei esse causam rerum, Deumque omnia in seipso ut causa & medio priùs cognito contemplari, subindeq; futura absoluta & conditionata cognoscere in sua essentia, per decretum absolutum vel conditionatum determinata, & sic non dari in Deo scientiam mediam, quæ est cognitio futurorum conditionatorum, independens à decreto conditionato, eoque anterior: Sed hæc stare nequeunt: si pro statu innocentie admittatur decretum purè indifferens; illud enim non potest esse medium certò & infallibiliter cognoscendi futura siue absoluta siue conditionata, cum in causa indifferenti, ut indifferens est, non possit certò & infallibiliter cognosci determinatus effectus: unde, sublato decreto prædeterminante pro statu innocentie, Deus debet cognoscere futura omnia siue absoluta siue conditionata, ad illum statum pertinentia, immediatè in seipsis, & in eorum veritate obiectiva, subindeque pro tali statu admittenda erit in Deo scientia media, quæ dirigat Deum in suis decretis indifferentibus, & exploret futurum consensum voluntatis creatæ Adami & Angelorum. Item scientia Dei pro tali statu non erit causa futurationis

rerum, nec eorum regula & mensura, sed potius ab illis regulabitur & mensurabitur, quantum ad veritatem & certitudinem, quod penitus nimirum est à doctrina D. Augustini & S. Thomæ, vt in eodem tractatu ostensum est. Vnde rectè ait quidam Recentior, eos qui diuinorum decretorum efficaciam, ad statum naturæ lapsæ coarctant, *laeva manu dispergere lapides muri Augustiniani, quos dextera componunt.*

Porro quia Iansenius causam istam euocat ad Augustini tribunal, & solis Augustini testimonijs litem hanc dirimendam esse contendit, plura huius S. Doctoris testimonia, quibus apertè fauet nostræ sententiæ, breuiter hic expendenda sunt, vt ex illis constet, quam falsum sit id quod ait prædictus Author lib. 8. de gratia Christi Saluatoris, gratiam efficacem, & physicam prædeterminationem, ad omnes humanæ naturæ status dilatatam, ab Augustini sensibus esse remotissimam, & nullo eius testimonio probari posse.

Augustinus ergo necessitatem & efficaciam diuinæ motionis, pro omni statu, & pro omnibus causis tam necessarijs quam liberis, clarè expressit lib. 3. de Trinit. c. 3. his verbis : *Voluntas Dei est prima & summa causa omnium corporalium specierum, atque motionum.* Idem habet tract. 1. in Ioan. explicans illa verba, *Omnia per ipsum facta sunt.* Et apud Prosperum sent. 58. dicentem : *Diuina voluntas est causa omnium corporalium, spirituumque motionum.* Vbi constat S. Doctorem non loqui solum de causis corporalibus, sed etiam de motionibus spiritualibus. Vnde lib. 5. de

5. de Genesi ad litt. vniuersaliter ait : *Mouea: itaque Deus occulta potentia vniuersam creaturam.* Et lib. de gratia & libero arbitrio c. 20. loquens specialiter de libero voluntatis motu, hæc scribit : *Scriptura diuina, si diligenter inspiciatur, ostendit, non solum bonas hominum voluntates, quas ipse facit ex malis, & à se factas bonas, in actus bonos, & in æternam dirigit vitam, verum etiam illas quæ conseruant sæculi creaturam, ita esse in Dei potestate, ut eas quò voluerit, quando voluerit, faciat inclinare.* Et cap. 21. sic prosequitur : *Agit omnipotens in cordibus hominum etiam motum voluntatis eorum ut per eos agat quidquid agere voluerit, qui omnino aliquid inuisè velie non nouit.* Quod lib. de corrept. & gratia cap. 14. confirmat exemplo electionis Saulis, quam profectam fuisse ait, ab omnipotentissima Dei humanorum cordium quò voluerit inclinandorum potestate. Confirmat etiam exemplo eorum, qui Dauid in Regem elegerunt : *Quos, inquit, adduxit Deus ; ut Regem constituerent.* Et quomodo adduxit ? Nunquid corporalibus vinculis alligauit ? Inuas egit, corda tenuit, corda mouit, eosque voluntatibus eorum, quas ipse in illis operatus est, traxit. Quorum omnium rationem, non ex eorum cordis corruptione, sed ex supremo dominio in nostras voluntates deduxit, dicens : *Cum voluerit Deus Reges in terra constituere, magis habet in sua potestate voluntates hominum, quam ipsi suas.* Quæ omnia ad generalis motionis Dei necessitatem & efficaciam stabiliendam, adeò clara sunt & expressa, ut nihil illis clarius & expressius as-  
ferri

ferri possit, nisi fortè illud quod habet idem S. Doctor lib. 1. contra duas epist. Pelagian. cap. 20. ubi loquens de mutatione Regis Asfueri ab indignatione ad mansuetudinem (quæ fuit actus ordinis naturalis) ait quod *Deus occultissima & efficacissima potestate cor Regis conuertit & transtulit ab indignatione ad lenitatem*. Ergo ex Augustino motio Dei efficaci, præueniens nostras voluntates, non solum ad actus supernaturales, sed etiam ad operationes ordinis naturalis requiritur, subindeque admitti debet pro quocumque statu naturæ humanæ.

Quod ut fiat euidentius, & nulla possit tergiversatione eludi, proferenda sunt alia testimonia, quibus idem S. Doctor, ad statum integritatis Angelorum & Protoparentum descendens, in eis gratiam efficacem necessariam fuisse declarat. Nā tract. de Cantico. novo cap. 8. sic ait: *Quid valeat liberum arbitrium non adiutum, in ipso Adam demonstrat: in est*: Ergo censet illi denegatum fuisse auxiliū efficacem ad non peccandum: Vnde serm. 11. de verbis Apostoli, loquens de eodem Adam, subdit: *Cadens à manu figuli fractus est, regebat enim eum ipse qui fecerat: regimen autem denotat motionem quandam præuenientem, & applicantem liberum arbitrium, non verò auxilium purè sufficiens, & à libero arbitrio determinabile, & applicabile*. Item 11. de ciuit. cap. 19. docet discretionem bonorum & malorum Angelorum fuisse à Deo, non verò à libero arbitrio, *solus quippe Deus* (inquit) *illos discernere potuit*. Vnde ad eos refert illud Apostoli: *Quid habes quod in*

*accepisti ? Sed discretio bonorum & malorum Angelorum , non potuit procedere à gratia sufficienti utrisque communi , & ab illis determinabili , quantum ad consensum , vel dissentium ; Ergo debuit esse à gratia efficaci & prædeterminante liberum arbitrium ad consensum . Quo argumento sæpe utitur ipse Iansenius , contra eos qui negant gratiam efficacem & prædeterminantem in statu naturæ lapsæ . Addo quod lib. 12. cap. 9. loquens de bona voluntate , qua boni Angeli per amorem adhæserunt Deo , dicit illam processisse ab auxilio gratiæ , & per consequens illud fuisse de se efficacem : *Si non potuerunt (inquit) seipsos facere meliores , quam eos ille fecerat , perfectio & bonam voluntatem qua meliores essent , nisi operante adiutorio creatoris , habere non possent , &c.* Demum celebris est locus eiusdem Augustini eodem capite 9. eiusdem libri , quo asserit , Angelis malis , mala voluntate cadentibus , bonos amplius adiutos , ad eam beatitudinis plenitudinem , unde se nunquam casuros certissimi fierent , pervenisse . Vbi manifestè admittit Augustinus maius auxilium , & amplius adiutorium in bonis Angelis qui perstiterunt , quàm in illis qui in culpam prolapsi sunt quod amplius adiutorium non potest esse , nisi gratia efficax , cùm sufficientem omnes abundè recepissent .*

Nec valet responsio Iansenij , asserentis illud maius auxilium quod Augustinus dicit collatum fuisse bonis Angelis , & denegarum malis , non esse ipsi perseverantia donum , siue auxilium efficax ad perseverandum , sed solum maius auxilium quod in ipsa beatitudine

dine à Deo receperunt , nimirum certam scientiam , qua iam beati nouerunt se nunquam lapsuros . Hæc enim euasio apertè repugnat textui , cùm Augustinus dicat , quod boni Angeli *ampliùs adi ti ad beatitudinem peruenerunt* , non verò quod vbi peruenerunt ad beatitudinem fuerunt magis adiuti . Vnde Estius in 1. distinct. 41. §. 13. *Si hoc adiutorium quo beati Angeli dicuntur ampliùs adiuti , esset ipsa beatitudo , sensus redderetur ineptus : scilicet Angelis collatam fuisse beatitudinem , qua ad beatitudinem peruenerent .*

Plura tamen contra nostram sententiam obijcit Iansenius Augustini testimonia . Præcipuum & veluti palmarium est illud quod desumitur ex cap. 11. & 12. libri de correptione & gratia , vbi S. Doctor distinguit duplex adiutorium : alterum quod vocat *adiutorium sine quo* , alterum quod appellat *adiutorium quo* ( id est auxilium sufficiens & efficax ) docetque primum concessum fuisse Adamo in statu innocentiae , non verò secundum , quod sanctis & prædestinatis in statu naturæ lapsæ , & per gratiam reparatæ , confertur .

Communis responsio est , Augustinum ibi non loqui de quacunque gratia status innocentiae , sed de ea tantùm quæ Adamo concessa fuit ad perseverandum in eo statu , & in illa integritate quam à Deo in sua creatione acceperat , quæ gratia non fuit auxilium quo perseveratur , seu efficax , sed auxilium sine quo non possumus perseverare , siue sufficiens . Ita interpretatur Augustinum D. Thomas , fidelissimus eius discipulus 1. 2. quaest. 109. artic. 10. ad 3. *Dicendum ( inquit ) quod sicut*

Augustinus dicit in libro de correptione & gratia: homo in primo statu accepit donum per quod perseverare posset. non autem accepit ut perseveraret. Nunc autem per gratiam Christi multi accipiunt & donum gratiæ quo perseverare possunt, & ulterius eis datur quod perseverent & sic donum Christi est maius quam delictum Adæ. Et certè clarè seipsum explicat Augustinus ibidem cap. 12. ubi postquam duplex illud adiutorij genus exposuit, subdit: Primo itaque homini, qui in eo bono quo factus fuerat rectus, acceperat posse non peccare, posse ipsum bonum non deserere, datum est adiutorium perseverantiæ non quo fieret, ut perseveraret, sed sine quo liberum arbitriū perseverare non posset. Nunc verò Sanctis in regnum Dei per gratiam Dei prædestinatis, non tantum tale adiutorium perseverantiæ datur, sed tale ut eis perseverantiæ ipsa donetur: non solum ut sine isto dono perseverantes esse non possint, verum etiam ut per hoc donum non nisi perseverantes sint. Ex quibus liquet S. Doctorem ibi loqui de adiutorio sine quo, & de adiutorio quo ad perseverandum.

Verūm licet hæc interpretatio legitima sit, & ad mentem Augustini, non videtur tamen præsentem evacuare difficultatem; quia alia proferri possunt eiusdem Sancti Doctoris testimonio, ex duplici illo capite eiusdem libri de correptione & gratia desumpta, quibus manifestè videtur à statu innocentia omnem gratiam efficacem excludere, & admittere tantum sufficientem, subditam libero arbitrio Adami & Angelorum, quantum ad efficaciam & usum. Ibi enim docet, Adamum voluntate



te & libero arbitrio in veritate stetisse. Potuisse permanere in iustitia, si voluisset. Ut vellet perseverare, Deum in eius reliquisse arbitrio. Item ibidem ait quod *Angelis malis per liberum arbitrium cadentibus per idem liberum arbitrium boni steterunt, quod tunc ita liberum erat, ut bene velle posset & male.* Demum asserit Deum sic ordinasse Angelorum & hominum vitam, ut in ea prius ostenderet, quid posset liberum arbitrium, deinde quid posset gratiae beneficium, iustitiaeque iudicium.

Ad hæc & similia testimonia duplex potest adhiberi responsio. Prima est, S. Augustinum his locis noluisse absolute, & sub quacumque ratione, gratiam efficacem à statu innocentiae excludere, sed duntaxat gratiam efficacem, in quantum est sanativa & medicinalis, sub qua ratione & formalitate, in homine lapsa requiritur, ad sananda nempe vulnera, per peccatum originale illi inflicta. Vnde eatenus solum Augustinus docet; Adamum voluntate & libero arbitrio in veritate stetisse; potuisse permanere in iustitia, si voluisset; ut vellet perseverare, in eius reliquisse arbitrio, & similia, quatenus nullam infirmitatem voluntatis vel inferioris appetitus repugnantiam sentiebat, & nullam difficultatem in agendo patiebatur, quæ per gratiam Christi medicinalem vinci deberet, & idem cum proportionem de Angelis dicendum est. Ita interpretatur Augustinum Sanctus Thomas 2. 2. quæst. 137. art. 4. ad 2. ubi sic habet: *Licit Augustinus in libro de correptione & gratia quod primo homini datum est, non ut*

perseueraret, sed ut perseuerare posset, per liberum arbitrium, quia nulla corruptio tunc erat quæ perseuerandi difficultatem præberet. Eodem modo illum exponit Estius in 1. distinct. 41. §. 14. qui & addit, quod nisi hanc à S. Thoma insinuatam intelligentiam verborum Augustini recipiamus, difficillimum erit, ac ne possibile quidem, Augustinum sibi conciliare: id est ostendere quemadmodum ea quæ obiecta sunt non contrariantur ijs quæ prius ex eodem Augustino fuerunt allata. Nempe bonam voluntatem; per quam Angeli Creatori adhaferunt, fuisse opus Dei, eamque nisi operante adiutorio Creatoris habere potuisse. Bonos Angelos ut ad beatitudinem peruenirent, fuisse magis adiutos, quam malos, qui ab ea defecerunt. Discretionem bonorum & malorum Angelorum fuisse à Deo, non à libero arbitrio, subindeque non à natura, sed à gratia, & alia huiusmodi quæ efficaciam & operationem diuinæ gratiæ in Angelis & primis parentibus aperte declarant.

Secunda responsio cuiusdam recentioris Thomistæ, quæ ferè coincidit cum præcedenti, est, Augustinum comparare gratiam per se ad utrumque statum, sanitatis, vel corruptionis necessariam, ex proprijs, ut ita dicam, meritis utriusque status, & attenta conditione hominis sani & infirmi. Nam in hoc sensu verum est, quod licet homo lapsus & infirmus, ob perpetuam rebellis concupiscentiæ pugnam, indigeat inuictissimo adiutorio, ne inter tot & tantas tentationes, infirmitate sua voluntas ipsa succumbat; attamen in statu in-

nocentia sano & integro, tali adiutorio per se non indigebat, sed ex vi illius status, gratiam duntaxat sufficientem exigebat, quamvis aliunde (ex generali nimirum subordinatione causæ secundæ ad primam) motione efficaci, & prævio concursu egeret, ut docet Augustinus locis supra à nobis relatis, quibus admittit necessitatem diuinæ motionis, non solum ad actus supernaturales, sed etiam ad naturales, subindeque ex vi subordinationis causarum secundarum ad primam, ubi

~~XXXXXXXXXXXX~~

CA P V T V

De amore Dei, et aliis affectibus. ac

attributis voluntatis divinae. Non

Considerata libertate & efficacia voluntatis diuinæ, agendum est breuiter de aliquibus eius affectibus, & specialiter de amore, qui est primus voluntatis motus, à quo cæteri omnes oriuntur.

**§. I.**

In Deo est formaliter amor, tam suae boni-

salis, quam creaturarum existentium  
futurarum, sed non merè  
possibilem.

**P**rima pars est contra Valentinum Herice,

**P** qui existimat, in Deo non reperiri amo-  
rem propriè dictum, respectu suæ bonitatis,

R 2 sed

sed duntaxat gaudium, vel complacentiam; quia (inquit) amor propriè dictus, seu specialiter sumptus, prout à desiderio vel gaudio distinguitur, petit quod obiectum eius abstrahat à præsentia, & absentia, seu à possessione & non possessione: vnde cum diuina bonitas sit perfectissimo modo Deo præsens, & ab illo possessa, actus diuinæ voluntatis ad illam terminatus, nequit habere propriè & formaliter rationem amoris, sed solùm rationem gaudij, & complacentiæ. Verùm hoc fundamentum friuolum est, licet enim amor abstrahat à præsentia & absentia, abstractione negatiua, id est non petat essentialiter præsentiam vel absentiam, sed sit indifferens ad vtramque; & in hoc differat à gaudio, quod essentialiter respicit bonum, vt præsens & possessum; & à desiderio, quod eius carentiam & absentiam essentialiter exposcit; non abstrahit tamen ab illis abstractione positiua, ita quod sit contra rationem amoris terminari ad bonum, vt præsens & possessum. Nam tantùm abest quod vnio & præsentia obiecti, amoris repugnet, quin potius illum perficiat & augeat, vnde amor beatorum, licet terminetur ad diuinam bonitatem vt possessam, perfectior est amore viatorum, qui fertur in Deum, vt nondum possessum. Addo quod, si præsentia obiecti amoris repugnaret, sequeretur quod gaudium & amor nunquam possent esse simul, & quod nunquam aliquis gauderet de bono obtento, quia illud amat, sed quia illud amauit, dum nondum haberetur; quod tamen esse falsum, & absurdum, ex eo constat, quod bonum de quo gaudemus, incipit di-

displicere , dum incipit non amari , & cessat gaudium de eo , dum cessat amor illius ; ut experientia constat .

Secundæ pars , quæ asserit Deum amare creaturas existentes , & futuras , evidens est , quia diligere est velle bonum : Sed Deus creaturis existentibus & futuris vult aliquod bonum , nempe existentiam habitam , vel in aliqua differentia temporis habendam : Ergo illas diligit . Ex quo probata manet tertia pars , quæ negat Deum amare merè possibilem , nam Deus rebus merè possibilibus nullum vult bonum , cum nolit illis dare existentiam , quæ est basis & fundamentum omnium bonorum . Addo quod , si Deus creaturas merè posibles diligeret , non liberè , sed necessario eas amaret , quia bonitas quæ illis competere , antecederet omne liberum divinæ voluntatis decretum : At in divina voluntate non est ponendus amor creaturarum necessarius , cum D. Thomas , & alij Theologi , nullum amorem necessarium in Deo agnoscant , præter illum quo seipsum diligit ; & cum Spiritus Sanctus , qui ex amore Dei naturali & necessario procedit , ex amore creaturarum non producat , ut in tractatu de Trinitate ostendimus : Ergo in Deo non datur amor creaturarum possibilem .

Dices primò : Deus amat suam omnipotentiam : Ergo & creaturas posibles . Consequentia videtur manifesta , quisquis enim amat aliquod obiectum , amat etiam id omne quod cum eo connexum est , & sine quo non potest existere : Sed omnipotentia Dei cum possibilitate creaturarum connexa est , & sine illa

nequit existere. Ergo si Deus amat suam omnipotentiam, amat etiam creaturas possibiles.

Respondeo, concessio Antecedente, negando consequentiam, & ad eius probationem, distinguo minorem: Si illud quod coniungitur cum illo sit capax amoris, concedo maiorem: Sin minus, nego maiorem. Nam Deus, etsi diligat poenitentiam peccatoris, non tamen diligit peccatum, sine quo poenitentia stare non potest, quia illud non est capax amoris. Vel secundo distinguo eandem maiorem: quisquis amat aliquid obiectum, amat etiam illud omne quod cum eo connectitur a priori, & per modum causae aut conditionis conducentis ut obiectum illud sit, concedo maiorem. Si habeat solum cum illo connexionem consequentiae, & a posteriori, & per modum effectus aut termini illius, nego maiorem. Possibilitas autem creaturarum non est ratio a priori diuinæ omnipotentiae, sed potius e contra ista est causa & ratio a priori possibilitatis creaturarum: Vnde solum a posteriori, & per locum extrinsecum, ut aiunt, sequeretur auferri omnipotentiam, sublati creaturis possibili- bus; sicut sequeretur a posteriori auferri solem, ex ablatione illuminationis.

Dices secundo: Deus vult omnes homines saluos fieri, subiūdeque simplici affectu, & voluntate antecedenti, amat salutem reprob-orum: At illa salus non est futura, sed solum possibilis: Ergo Deus amat res merè possibiles,

Respondeo, concessa maiori, negando minorem, licet enim salus reprob-orum non sit

futura ; futuritione consummata , & absoluta , bene tamen futuritione conditionata , & inchoata per gratias & auxilia sufficientia omnibus oblata ; quæ sunt semina salutis , quibus si impij responderent , & auxilijs efficacibus impedimenta non ponerent , eam consequerentur .

## §. II.

*In Deo est formaliter gaudium seu delectatio , non tamen desiderium , nec odium , nec ira .*

**P**rima pars patet , quia gaudium , seu delectatio est quies voluntatis in obiecto volito ; Sed diuina voluntas in propria bonitate maximè quiescit , utpote omnem sufficientiam in ea inueniens : Ergo in se maximè gaudet , & suauissimè delectatur .

Secunda sic ostenditur : Desiderium fertur circa bonum non habitum , vel quod non est in nostra potestate , de bonis enim habitis solum gaudemus & delectamur , nec illud censemur desiderare quod cum sit in nostra potestate non habemus , si enim illud desideraremus , profectò & haberemus : Sed Deus , ratione suæ bonitatis increatae & infinitæ , continet omnia bona extrinseca & creata , saltem eminenter , & ratione suæ omnipotentiae , ac perfecti domini , quod habet in nostras voluntates , habet in sua potestate bona quæ à nostra libertate dependent ; cum iuxta Augustinum , ratione illius magis habeat in sua potestate voluntates hominum , quam ipsi suas :



Ergo in eo non potest esse desiderium, etiam in ordine ad bona ipsi extrinseca, & quæ dependent à nostra libertate.

Tertia est D. Thomæ 1. contra Gent. cap. 96. ubi sic discurret: *Sicut amor se habet ad bonum, ita odium se habet ad malum, nam his quos amamus, bonum volumus, his verò quos odimus, malum. Si igitur voluntas Dei ad malum inclinari non possit, ut ostensum est impossibile est quod ipse rem à quam odi habeat.* Quibus verbis rationem fundamentalem huius partis insinuat: Odium enim fertur ad malum quodammodo sub ratione mali, nam licet malum non possit esse motuum voluntatis, quæ semper tendit ad bonum, vel verum, vel apparens, potest tamen esse obiectum terminatum illius, quatenus voluntas sub ratione boni sibi convenientis, vult illud quod est noxium & disconueniens inimico; Atqui diuina voluntas non fertur nisi ad bonitatem Dei tanquam ad obiectum suum adæquatum, tam motuum, quam terminatum: vnde cum vult infligere poenam peccatori, non eam intendit, ut malum illius, sicut nos cum odio aliquem habemus, sed quatenus in ea resplendet decor suæ iustitiæ, & ordo seu pulchritudo vniuersi, quod sanè bonum est: Ergo in Deo non est odium propriè dictum.

Dices: Poena, ut manifestatiua iustitiæ Dei, & ad pulchritudinem vniuersi condu-cens, est quidem bona Deo, ut iusto, & ut auctori vniuersi, non tamen ipsi reprobo cui infligitur, cum non sit illi utilis, vel delectabilis: Ergo quamuis Deus velit illam, ut est ostensua suæ iustitiæ, & condu-cens ad pulchritudinem vniuersi.



chritudinem vniuersi, non sequitur quod non velit illam, vt est malum ipsius peccatoris cui infligitur.

Sed contra: cum Deus sit bonum vniuersale omnium, illud quod est bonum respectu Dei, censetur etiam esse bonum cuiusque creaturæ: Ergo poena æterna, vt diuina iustitiæ manifestatiua, non solum est bona respectu Dei illam intendentis, sed etiam respectu subiecti cui infligitur, non quidem secundum particularem inclinationem quam habet ad bonum proprium, sed secundum vniuersalem inclinationem, qua vt pars vniuersi inclinatur ad bonum auctoris illius.

Quarta denique pars quæ asserit iram non esse propriè in Deo, sed metaphoricè tantum: est D. Thomæ hic quæst. 20. art. 1. ad 2. & 1. contra Gentes cap. 89. probaturque ratione, quam ibidem insinuat: Ira est appetitus vindictæ, cum spe vlciscendi, ex tristitia procedens: Sed tristitia repugnat Deo: Ergo & ira. Vnde idem S. Doctor loco citato contra Gentes: *Ira igitur longè à Deo est, secundum rationem suæ speciei, non solum, quia effectus tristitiæ est, sed etiam, quia est appetitus vindictæ, propter tristitiam ex iniuria illata conceptam.*

Nec valet quod ait Suarez, oppositum sentiens, nempe non esse de conceptu essentiali iræ, quod ex tristitia oriatur, sed solum quod sit appetitus nocendi alteri, sub ratione iustæ vindictæ. Sequeretur enim ex hoc, omnem actum iustitiæ vindicatiuæ ad iram pertinere, sicque iudicem, qui tranquillo, sedatoque animo punit homicidam, ex motu iustitiæ

vindicatiua, ipsum ex ira punire, quod absurdum est.

## §. III.

In Deo est summa & perfecta iustitia, non commutativa, sed distributiva.

**P**Rima pars patet, tum ex Scriptura, quæ passim Deo concedit attributum iustitiæ, tum etiam ratione. Iustitia enim est virtus unicuique quod suum est tribuens. Deus autem unicuique creature tribuit quod suum est, iuxta illud Dionysij cap. 8. de diuin. nomin. Omnibus tribuit propria secundum vius cuiusque existentium dignitatem. Ergo est in Deo perfecta iustitia. Addo quod iustitia legalis est in Principe architectonicè, quasi imperante & dirigente, in subditis autem secundario & administratiue, tanquam in subiectis & obedientibus legi, vt docet Sanctus Thomas 2. 2. q. 57. art. 6. Sed Deus est Rex Regum & dominus dominantium, ac supremus moderator totius vniuersi per quem Reges regnant & legum conditores iusta dicunt, vt dicitur Prou. 8. Ergo in illo est iustitia legalis, superiori modo quam in omni Principe.

Quod verò non sit in eo iustitia commutativa, docet expressè D. Thomas in 4. dist. 46. q. 1. art. 1. vbi sic ait. Iustitia exprimitur in a, per quam æqualitas constituitur inter Deum dantem, & creaturam recipientem, Deo competere non potest, secundum propriam acceptionem. Et hic quæst. 21. art. 1. Iustitia

*commutativa* (inquit) *vel directiva commutationis*, non competit Deo. Ratio etiam id suadet. Iustitia enim commutativa versatur circa datum & acceptum, tanquam circa propriam materiam, unde in eo non potest esse iustitia commutativa, qui nihil potest recipere ab alio. Sed Deus nihil potest recipere à creatura, nec creatura aliquid Deo donare. Ergo in Deo non potest esse iustitia commutativa. Maior constat, commutare enim est accipere non suum, siue alienum, pro suo. Minor verò sic ostenditur. Dare aliquid alteri est transferre in ipsum eius dominium. Sed creatura non potest transferre in Deum dominium quod habet in res quas possidet, tum quia Deus est incapax imperfecti & inferioris domini, quale est illud quod reperitur in creatura; tum etiam, quia omnia sunt sub dominio Dei, antequam illi offerantur, multò meliùs quam sub dominio creaturæ; imò ipsum dare & offerre est in nobis ex auxilio & influxu Dei. Ergo creatura nihil unquam propriè dare potest Deo. Unde dicitur ad Roman. 11. *Quis prior dedit illi, & retribuitur ei?* Et 1. Paralip. 29. *Tu es, sunt omnia, & que de manu tua accepimus, dedimus tibi.* Et Augustinus 1 lib. 1. Confess. cap. 4. *Quis habet quidquam non tuum? reddis debita, nulli debens; donas debita, nihil perdens.*

Confirmatur; Cum obiectum formale iustitiæ commutativæ, quo ab omnibus alijs virtutibus differt, sit æqualitas dati & accepti, in eo solum potest formaliter & propriè reperiri, inter quem & alium potest esse æqualitas dati & accepti. Sed inter Deum & crea-

turam nequit esse æqualitas dati & accepti ; cum quidquid à creatura Deo offertur, illi pluribus titulis debitum sit ; scilicet titulo creatoris , conseruatoris , adiutoris , supremi domini , & vltimi finis : Ergo in Deo formaliter & propriè reperiri non potest iustitia commutatiua . Hanc rationem insinuat D. Bernardus lib. de diligendo Deo cap. 3. his verbis : *Si totum me debeo primo facto , quid reddam iam & pro refecto ? nec enim tam facillè refectus , quam factus . In primo opere me mihi dedit , in secundo se ; & vbi se dedit , me mihi reddidit . Datus ergo , & redditus , me pro me debeo , & bis de eo , quid Deo tribuam pro se ? Nam si me millies rependere possem , quid sum ego apud Deum , qui prior dilexit nos , tantus , & tantum ; tantillos , & tales ?*

Confirmatur amplius : In eo qui ex iustitia commutatiua aliquid tribuit , oportet esse strictum debitum illud tribuendi : nam qui absque debito & obligatione aliquid tribuit , non ex iustitia commutatiua , sed ex liberalitate , vel fidelitate , illud dat : Sed in Deo non est nec esse potest strictum debitum & obligatio respectu creaturæ , cum strictum debitum importet inferioritatem aliquam & dependentiam debentis ab eo cui debetur ; unde D. Thom. hic qu. 21. art. 1. ad 3. *Deus non est debitor , quia ipse ad alia non ordinatur , sed potius alia ad ipsum : Ergo in Deo nec est , esse potest iustitia commutatiua in ordine ad creaturam .*

Quod verò in illo sit iustitia distributiua , idem S. Doctor apertè tradit 1. contra Gent. cap. 46. vbi loquens de Deo , & eius iustitia ,  
 sic

sic concludit : *Non igitur ei competit commutativa iustitia , sed solum distributiva .* Et super cap. 8. libri de diuin. nomin. lect. 4. *Communitiva iustitia in Deo locum non habet , quia ut dicitur ad Roman. 11. Quis prior dedit illi , & retribuetur ei ? Sed attribuitur ei distributiva iustitia , quæ non obseruat equalitatem quantitatis , ut equalia omnibus det ; sed equalitatem proportionis , ut det unicuique secundum quod dignum est .* Ratio etiam suffragatur : Iustitia enim distributiva maximè dicitur perfectionem & excellentiam , cum non sit æqualis ad æqualem , sicut iustitia commutativa , sed superioris erga inferiores ; pertinet enim ad superiorem distribuere inferioribus de communibus bonis ; unicuique iuxta proportionem suam , ut si Paterfamilias daret vestes toti familiæ , non tamen easdem , sed paruulis paruas , grandævis grandiores , prudenter largitur : vnde talis iustitia decet supremum mundi gubernatorem & principem , qui ut ait Dionysius supra citatus , *omnibus tribuit propria secundum uniuscuiusque existentium dignitatem .*

Hanc distributionem accommodam & proportionatam , egregiè explicat Terullianus libro secundo , contra Marcionem cap. 12. his verbis : *Bonitas eius operata est mundum , iustitia modulata est .* Vbi verbum modulari significare videtur , quod sicut musica diuersos tonos & cætus ordinat , & ad debitum numerum ac proportionem reducit . Ita & iustitia distributiva Dei in creatione Mundi , omnes creaturas ad debitum ordinem & consonantiam redegit , dando unicuique quod suum est ,

est, & faciendo omnia in pondere, numero, & mensura. Vnde ibidem subdit: *Omnia, ut bonitas concepit, ita iustitia distinxit.*

Addo quod, iustitia distributiva non habet annexas imperfectiones & defectus, qui reperiuntur in commutativa. In primis enim iustitia distributiva non inducit, sicut commutativa, debitum ortum ex eo quod ab eis quibus bona reipublice distribuit, prius aliquid receperit, aut ob factam distributionem, sibi conferendum expectet. Secundò non requiritur ut distribuens se priuet dominio rei, quam distribuit, satis enim est, ut retento suo supremo dominio, inferius dominium conferat his quibus illa distribuit, ut constat in Principe, qui potest servare iustitiam distributivam, largiendo bona communia in feudum, aut emphyteusim, vel etiam solùm donando usufructum. Tertiò debitum iustitiæ distributivæ non nascitur ex iure alterius erga distribuentem, sed ex naturali rectitudine, & ipsa lege æquitatis, qua tenetur distributor commensurare præmium perfectioni meritorum. Quod debitum in Principe humano obligat ex ordinatione legis naturalis quæ est à Deo; in ipso vero Deo, qui non habet legem sibi impositam ab alio, nascitur ex eo quod ipse est lex & prima regula totius rectitudinis. Vnde Anselmus in prosol. cap. 10. *Iustus es Domine, non quia nobis reddis debitum, sed quia facis, quod decet te summum bonum.* Iustitia distributiva non est æqualis ad æqualem sicut commutativa, sed superioris ad inferiores, quibus bona communia reipublice distribuit.

**Obijcies** primò contra primam partem: Esse debitorem sibi, tollit propriam rationem iustitiæ, quæ necessariò debet esse ad alterum: Sed Deus est tantum debitor sibi, non verò creaturæ, ut constat ex iam dictis: Ergo in illo non est vera & perfecta iustitia.

**Respondeo** distinguendo maiorem: Esse debitorem sibi ut terminor seu personæ cui aliquid reddendum est, tollit propriam rationem iustitiæ, concedo maiorem: Esse debitorem sibi, ut principio & fundamento debiti & obligationis, reddenda tamen & exercenda in ordine ad alterum, nego maiorem, & sub eadem distinctione minoris, nego consequentiam: Itaque debitum quod Deus habet ad creaturam, debitum quidem est ad illam, sed non oritur ex iure & actione illius, sed ex ordinatione Dei, & ex summa rectitudine & æquitate diuinæ voluntatis: quæ est suprema lex, & primordialis regula totius æquitatis: unde creatura non est creditor talis debiti, licet illi ut extremo reddatur.

**Obijcies** secundò contra secundam partem: Quod datur ex conuentione & pacto, datur ex vera & stricta iustitia commutativa: At Deus dat iustis regnum cœlorum, ex conuentione & pacto oneroso laborandi in vinea sua, ut constat ex parabola quæ habetur Matth. 21. Ergo dat illis regnum cœlorum ex vera & stricta iustitia commutativa: Vnde Scriptura & Patres sæpe dicunt Deum fore iniustum, nisi daret præmium sanctè viuentibus: Ad Hebræos 6. Non enim iniustus est Deus, ut obliuiscatur operis vestri. Et Augustinus lib. 4, contra Iulian, cap. 3. Deus ipse,



*se, quod absit, eris iniustus, si ad eius regnum  
verus non admittitur iustus.*

Respondeo distinguendo maiorem. Quod datur ex conuentione & pacto, onerante & obligante vnum alteri, datur ex vera & stricta iustitia commutativa, concedo maiorem. Quod datur ex conuentione & pacto obligante & onerante vnum, non alteri, sed sibi, nego maiorem. Cum verò Deus dat aliquid hominibus ex conuentione & pacto, non sit pactum & conuentio Dei cum homine, vt ex actione hominis Deus oneretur, & illi obligetur ex vera & stricta iustitia; quia cum talis actio sit sub dominio Dei, & ex eius influxu proueniens, eique infinitis titulis debita, non potest Deus ex ipsa onerari, neque in eo nasci stricta & rigorosa obligatio eam remunerandi, quantumcumque pactum & promissionem illi adiungat. Vnde si Deus priuaret iustum mercede sua, esset iniustus, non lésione iuris, sed volatiõe suæ veritatis, & æquæ distributionis, & iniustitia opposita non commutativæ iustitiæ quæ in eo esse non potest, sed distributivæ, vel legali architectonicæ, quæ in Deo tanquam in supremo principe & iudice reperitur.

Obijcies tertio: Datur iustitia commutativa in Christo in ordine ad Deum: Ergo & in Deo per ordinem ad Christum. Antecedens constat ex doctrina quam tradunt communiter nostri Thomistæ in tractatu de incarnatione, vbi docent satisfactionem Christi fuisse actum iustitiæ commutativæ. Consequentia verò ex eo probatur, quod iustitia commutativa debeat esse mutua, sive ex parte vtriusque extremi.



Respondeo negando consequentiam, & ad eius probationem dico, iustitiam commutativam debere esse mutuam, siue ex parte vtriusque extremi, quando vtrumque extremum est capax illius, secus verò quando vnum ex duobus extremis est incapax talis iustitiæ, vt contingit in propositis. Deus enim, ob rationes iam expositas, est incapax iustitiæ commutativæ. Sicut licet relatio inter matrem & filium ex natura sua sit mutua, & se teneat ex parte vtriusque extremi, non datur tamen in Christo relatio realis ad matrem; quia cum suppositum Verbi Divini sit ordinis superioris & increati, non potest realiter referri ad creaturam, nec recipere in tempore novam aliquam relationem realem.

Obijcies quartò contra tertiam partem: Iustitia distributiva respicit proportionem geometricam & comparativam vnius ad alterum; non verò debitum quod unicuique proprium est, vt constat ex supra dictis. At Deus in largitione bonorum naturalium, & in distributione præmiorum, vel poenarum, non attendit ad proportionem geometricam & comparativam, sed ad connaturalem cuiuslibet exigentiam, & ad debitam commensurationem meriti cum præmio, & demeriti cum poena: Ergo non exercet actum iustitiæ distributivæ, subindeque non datur in Deo talis iustitia.

Respondeo, concessa maiori, negando minorem: licet enim Deus distribuendo sua bona naturalia creaturis, & præmia iustis, poenasque peccatoribus, attendit ad connaturalem cuiuslibet exigentiam, & ad debitam commensurationem meriti cum præmio, &

demeriti cum poena (in quo relucet quidam modus & quædam similitudo iustitiæ commutatiuæ, vt notat S. Thomas in 4. dist. 46. q. 1. art. 1. quaestione 1.) simul tamen magis principaliter attendit ad æqualitatem geometricam, siue ad comparatiuam proportionem; quia quod præcipuè intendit, singulis rebus perfectiones connaturales largiendo, præmia iustis distribuendo, & poenas exigendo à peccatoribus; est pulchritudo vniuersi, eiusque perfectio, quæ non tam in perfectione absoluta rerum, quam in ordine & proportionem earum ad inuicem consistit; sicut perfectio musicæ in diuersitate & proportionem tonorum.

## S. IV.

*In Deo est misericordia, quantum ad effectum, subueniendi alienæ miseriæ, non verò quantum ad compassionem & tristitiam de malo alterius.*

**P**rima pars patet, Deo enim maxime conuenit repellere miseriæ ab alijs, & diffundere omnibus bonitatem, qua excluditur defectus & miseriæ eorum: Ergo effectiua misericordia in Deo inuenitur. Vnde D. Thomas hic q. 21. art. 3. egregiè obseruat, quod *elargiri perfectiones rebus, pertinet & ad bonitatem diuinam, & ad iustitiam, & ad liberalitatem & ad misericordiam, tamen secundum aliam & aliam rationem. Communicatio enim perfectionum absolute considerata, pertinet ad bonitatem. Sed in quantum perfectiones rebus à Deo*

à Deo dantur , secundum earum proportionem ,  
pertinet ad iustitiam . In quantum vero non  
tribuit rebus perfectiones propter utilitatem  
suam , sed solum propter suam bonitatem , per-  
tinet ad liberalitatem . In quantum vero perfe-  
ctiones datæ rebus à Deo , omnem defectum ex-  
pellunt , pertinet ad misericordiam .


Ex hoc infert Caietanus 2. 2. q. 30. art. 4.  
misericordiam in Deo omnem perfectionem  
simpliciter simplicem , & rationem actus pu-  
rissimi & perfectissimi importare : Ex actu  
eius ( inquit ) apparet quod misericordia in se-  
ipsa exigit immunitatem ab omni miseria .  
Nam si distingamus misericordiam , in mise-  
ricordiam simpliciter , & in misericordiam re-  
spectu talis miserie , inuenimus quod q. a ra-  
tione misericordia respectu talis miserie , puta  
paupertatis , immunis est ut sic à paupertate ;  
eadem ratione misericordia simpliciter , libera  
est ab omni miseria . Et quoniam omnis poten-  
tialitas , miseria quadam est , propter quod om-  
nem creaturam miserie alicui subiectæ in esse  
aliquo modo oportet ; consequens est ut miseri-  
cordia secundum se exigit in seipsa superiori-  
tatem talem ac tantam , ut actus purus sit , ut  
summa natura sit , ut Deus sit ; & propterea  
Deo proprium ponitur misereri , & omnipoten-  
tiam , quæ super eius actualitate fundatur ,  
manifestare .

Secunda etiam pars euidens est , tristitia  
enim & compassio sunt actus seu affectus ap-  
petitus sensitivi , qui non possunt reperiri in  
Deo , quia quod est sensibile , ab illo prorsus  
alienum est . Vnde Augustinus lib. 2. ad Sim-  
plic. qu. 2. De misericordia si auferas compas-  
sio.

sonem, ita, ut remaneat tranquilla bonitas sub-  
ueniendi, & a miseria liberandi insinuat, di-  
uina misericordia qualiscumque cognitio.

Ex hoc intelliges, mysterium incarnatio-  
nis fuisse necessarium ad aliquod diuinæ mi-  
sericordiæ complementum. Cum enim du-  
plex sit misericordiæ actus, nempe repellere  
miseriam alterius, & aliena affici miseria, si-  
ue alterius compati ærumnis; primus quidam  
Deo competit ratione suæ bonitatis & omni-  
potentiæ, sed alter ei aduersatur, ratione suæ  
perfectæ felicitatis & tranquillitatis. Vnde  
ut ex utroque actu Dei compleretur miseri-  
cordia, & ut perfectè misericors fieret, opor-  
tuit ipsum incarnari, ut posset compati infir-  
mitatibus nostris, & ut loquitur Apostolus  
ad Hebr. 2. *Per omnia debuit fratribus affir-  
tari, ut misericors fieret*, id est, ne quid ad  
perfectæ misericordiæ complementum illi  
deesset.






## TRACTATUS V.

DE

# PROVIDENTIA, PRÆDESTINATIONE, ET REPROBATIONE.

**T**Ractatum hunc tribus solum capitibus concludemus. Primo agemus de providentia Dei in generali, secundò de prædestinatione, quæ est pars diuinæ providentiæ, & providentia aliqua specialis quam Deus habet de prædestinatis, & qua illis præparat media, quibus infallibiliter vitam æternam consequuntur. Tertiò de reprobatione, quæ prædestinationi opponitur, cum eadem sit scientia oppositorum.



## CAPVT I.

## De prouidentia Dei.

**P**riusquam agamus de prædestinatione, seu prouidentia speciali, quam Deus habet circa electos, de prouidentia eius in generali, & proit ad omnes creaturas, & ad omnia quæ fiunt in vniuerso se extendit, breuiter differendum est.

## PROVIDENTIA. I.

*Est in Deo perfectissima prouidentia, quæ ad omnia se extendit.*

**P**rima pars à nullo nisi Epicureo, vel Epicurizante, negari potest, vt bellè ait Saluianus lib. i. de prouidentia. In primis enim omnes rationes, quæ supremi numinis existentiam demonstrant, eius quoque prouidentiam probant; nam asserere Deum esse, & nullam in illo rerum quas condidit esse prouidentiam, apertissima insania est. Vnde Lactantius lib. de ira Dei deridet Epicurum, eò quod Deum esse dixerit, & tamen prouidentiam omnem negauerit: Epicurus (inquit) Deum quidem esse dixit, quia necesse est aliquid esse in mundo præstans, & eximium, & beatum; prouidentiam tamen omnem negauit quæ mundus regeretur, quo quid repugnantius dici posset, non video. Etenim si est Deus, vique prouidens est vt Deus, nec aliter ei potest diuinitas tribui, nisi & præterita teneat, & præsen-

ciat, & futura prospiciat. Cum igitur prouidentiam sustulit, & Deum negauit: Cum autem Deum esse professus est, & prouidentiam simul esse concessit; alterum enim sine altero, nec esse prorsus, nec intelligi potest. Quæ veritas intantum apud homines inualuit, vt ab intelligendo seu prouidendo nomen imposuerint Deo; nam hoc nomen θεός, quod apud Græcos Deum significat, dicitur ἀπὸ προνοίας, quod significat considero, seu prouideo, vt ait Damascenus lib. 11. de fide cap. 11.

Secundò, vt discurrit D. Thomas 3. contra Gent. cap. 75. Omnes causæ secundæ in hoc quod causæ existunt, diuinam similitudinem consequuntur: Inuenitur autem hoc communi-ter in causis producentibus aliquid; quod curam habeant eorum quæ producunt; sicut animalia naturaliter nutriunt fœtus suos; Deus igitur curam habet eorum quorum causa existit. Vnde Ambrosius lib. 1. de offic. cap. 13. Quis operator negligat operis sui curam? Quis deserat & destituat quod ipse condendum putauit? Si iniuria est non regere, nonne est maior iniuria fecisse? Cum aliquid non fecisse, nulla iniustitia sit, non curare quod feceris, summa inclementia. Et Theodoretus ser. 1. de prouid. Ex hoc quoque affectu quo amare nos fecit pignora nostra, intelligere nos voluit quantum ipse amet pignora sua, idest effectus à se productos.

Tertiò demonstrari potest diuina prouidentia ex mirabili pulchritudine, ordine, dispositione, ornatu, & regimine huius Vniuersi. Quam rationem eleganter explicat Philo Iudæus lib. 4. de monarchia, his verbis:


Si

Si quis in ciuitatem veniat legibus optimis constitutam, quid aliud suspicabitur, nisi regi ab optimis magistratibus? Quamobrem qui in magnam introierit ciuitatem, mundum videlicet, ibique contemplatus fuerit aeris temperiem, annuarum tempestatum conuersiones, deinde solem & lunam, diei noctisque moderatrices, & cæterorum errantium fixorumque siderum, & cæli totius in orbem agitationes, & choreas, nonne verissimiliter, aut potius necessario, de patre & conditore, nec non rectore cogitabit? Eodem argumento vtitur Nazianzenus orat. 34. & adducit exemplum citharæ, cuius concentum suauem cum audimus, non dubitamus eam pulsari à perito artifice. Ita similiter cum suauissimum partium mundi concentum in suis motibus contemplamur, dubitare non debemus, peritum artificem nempe Deum, hæc omnia componere & in concordiam adducere, illumque esse supremum mundi rectorem, & gubernatorem.

Simile argumentum desumi potest ex conflictu perpetuo elementorum, inter se, ob varias qualitates quibus constant, dissidentium. Non enim posset ordo vniuersi in tanta partium diuersitate, imò pugna continua, perpetuus esse, nisi aliqua suprema intelligentia, summo consilio & sapientia, illi perpetuitate consaleret. Quod explicat Athanasius in libro contra Gentiles, exemplo ciuitatis, vel exercitus, in quibus non posset diu pax & tranquillitas conseruari, nisi esset aliquis Princeps, vel Magistratus, qui omnes in officio contineret, & tali paci ac tranquillitati prospiceret.



Secunda pars, quæ est de extensione diuinæ prouidentia ad omnes creaturas in particulari, & ad omnia quæ in mundo contingunt, non minus est certa, quam præcedens. Nam ut discutit S. Thomas hic quæst. 22. artic. 2. Cum omne agens agat propter finem, tantum se extendit ordinatio effectuum in finem, quantum extendit se causalitas agentis: Sed causalitas primi agentis ad omnia se extendit, & pertingit usque ad ultimas differentias individuales: Ergo & eius prouidentia. Quæ ratio probat, non solum res naturales & necessarias, sed etiam humanas & liberas, subdi diuinæ prouidentia, cum diuina causalitas, non minus ad istas quam illas extendatur. Ad- do quod, cum gubernatio diuinæ prouidentia, ex amore quo Deus res à se factas amat, proueniat; quanto aliqua Deus maiori amore prosequitur, tanto magis sub eius prouidentia cadunt: Sed Deus magis amat homines, quam res naturales, ut patet ex effectu, quia potiora eis bona contulit: Ergo maiorem ac specialem habet de illis curam & prouidentiam. Vnde præclare Augustinus: *Non perit capillus, quem cum tondetur non sentis, & peribit anima per quam sentis? Si sic tua custodiuntur superflua, in quanta securitate est anima tua? Iacta te in Deum, optimè te habebis in optimo.*



## §. II.

*Soluantur obiectiones.*

**O**bjicies primò contra primam partem assertionis: Si mundus diuina prouidentia regatur, cur tot mala & tot defectus in mundo contingunt? Cur tot monstra accidunt quæ sunt præter intentionem naturæ? Vnde proueniunt tot creaturæ homini molestæ, & perniciosæ, vt culices, pulices, muscæ, serpentes, venena, & similia? Cur demum viri iusti & sancti sæpissimè miseris & ærumnis opprimuntur, dum mali & peruersi ducunt in bonis dies suos, & honoribus, voluptatibus, ac diuitijs affluunt? Vel vt loquar cum Ieremia Propheta: *Quare via impiorum prosperatur, bene est omnibus qui præuaricantur, & iniquè agunt.*

Ad illas interrogationes, quæ sunt veluti tot obiectiones contra diuinam prouidentiam, sigillatim respondendum est. Ad primum ergo dicendum cum D. Thomas hic qu. 22. art. 2. ad 2. & tertio contra Gent. cap. 71. quod licet prouisor particularis debeat, quantum potest, vitare & impedire mala & defectus rerum quæ ipsius regimini & prouidentia subiiciuntur; non tamen prouisor vniuersalis, qui debet permittere mala & defectus in aliquibus, propter bonum totius, ad cuius conseruationem principaliter tendit. Mala autem & defectus quos diuina prouidentia permittit in rebus creatis contingere, ad perfectionem, decorem, & pulchritu-

tudinem vniuersi conducunt. Sicut picturæ venustas, ex vmbra, & lucis, diuersorumque colorum grata commixtione & temperamento consurgit. Aut sicut musicæ harmonia, ex diuersarum vocum consonantia dulciss concinit. Vel ( vt exemplo Augustini lib. 1. de ciuit. c. 18. vtar ) sicut antitheta, seu antitheses, sunt ornamenta locutionis, & sermonis pulchritudinem faciunt. Vel denique, sicut in medicina, præstantissima pharmaca, ex rebus venenatis, inter se congrua commixtione contemperatis, conficiuntur.

Ex hoc patet responsio ad secundam interrogationem, monstra enim suo modo conducunt ad decorem & pulchritudinem vniuersi, & deseruiunt ad manifestandam perfectionem & integritatem aliarum rerum, quæ magis relucet ex ipsorum deformitate, opposita enim iuxta se posita magis elucescunt. Idem dicendum de muscis, culicibus, serpentibus, & alijs animalibus imperfectis illa enim participant aliquem gradum bonitatis & perfectionis, qui si deesset vniuerso, non esset omnibus modis perfectum. *Si radas supercilium hominis* ( inquit Isidorus lib. 1. de summo bono cap. 11. ) *paruam rem demis, sed totius corporis ingeris sæditatem*. Ita & in vniuersitate creaturæ est, si exuenum vermiculum naturæ malum dixeris, vniuersæ creaturæ iniuriā facis.

Quantum ad venena, illa pariter conducunt ad bonum vniuersi, & aliquibus creaturis vtilia & necessaria sunt. Nam vt Ambrosius libro 3. exameron. capite 9. *Sapè eadem quæ tibi noxia sunt, auibz aut feris innoxia*

*ministrant pabulum. Storni vescuntur centio, nec fraudi est eis, quoniam qualitate f i corporis, venenum succi lethalis euadunt. Helleborum autem periti loquuntur etiam esse alimentum conturnicum, eo quod naturali quodam temperamento sui corporis, vim pabuli nocentis emittit.*

Demum ad ultimam interrogationem, quæ est de aduersitate bonorum, & prosperitate malorum, breuiter dico, in illis etiam mirum in modum diuinam relucere præsidentiam, vt passim docent SS. Patres: *Electorum enim desideria (inquit Gregorius) dum fremuntur aduersitate, proficiunt; sicut ignis flatu premittur vt crescat, & vnde quasi extingui cernitur, inde magis roboratur. Prosperitas è contra, vt dicit Chrysostomus, non circa virtutis est, & animum hominis emollit, frangit, & in segnitiam ac torporem resoluit. Omnia enim quæ superfluum, nocent (addit Seneca) segetes nimia sternit vbertas, rami onere franguntur, ad maturitatem non peruenit nimia fecunditas. Idem quoque animis euenit, quos immoderata prosperitas rumpit, qua non solum in aliorum iniuriam, sed etiam in suam vituntur. De quo plura in Clypeo Theologiæ Thomisticæ.*

Obijcies secundò contra secundam partem assertionis. Prouidentia & cura tam vilium & imperfectorum animalium, qualia sunt culices, muscæ, vermiculi, & similia, videtur dedecere diuinam maiestatem: Ergo non est in Deo ponenda.

Respondeo negando Antecedens, nam tantum abest, quod infinita Dei maiestas, ex tam

vilium & imperfectorum animalium cum uileſcat, quin potiùs in illis magis eius infinita ſapientia & potentia reluceant, quam in alijs animalibus ingentis molis & magnitudinis. Vnde Plinius lib. 11. cap. 2. *Rerum natura nuſquam magis quam in minimis tota eſt.* Et Hieronymus ad Heliodor. epistol. 3. *Creatorem non in cælo tantùm miramur, & terra, & ſole, & oceano, elephantis, camelis: ſed & in minimis, quoque animalibus, formicis, culice, muſcis, vermiculis, & iſtiusmodi genere, quorum ſcimus magis corpora, quam nomina, eandemque in cunctis admiramur ſolertiam.*

## §. III.

*Prouidentia non conſiſtit formaliter in actu uoluntatis, ſed intellectus, nimirum in actu imperij ſupponente electionem mediorum.*

**P**rima pars eſt D. Thomæ hic quæſt. 22. artic. 1. ad 3. ubi ſic ait: *Prouidentia eſt in intellectu, præſupponit tamen uoluntatem finis.*

Ratio etiam id ſuadet: Tum quia prouidentia eſt pars prudentiæ, ut docet idem S. Doctor hic artic. 1. & 2. 2. quæſt. 49. artic. 6. Sed prudentia eſt in intellectu, cum ſit uirtus intellectualis: Ergo & prouidentia. Tum etiam, quia Boetius definit prouidentiam ordinationem rerum in finem: ordinare autem unum ad alterum, pertinet ad intellectum, ut cap. ſequenti §. 1. oſtendemus: Ergo prouidentia non conſiſtit formaliter in actu uolun-

tatis, sed intellectus. Quod ipsa nominis ethymologia satis indicat, providere enim idem est ac procul videre quæ sunt faciendæ: videre autem non est actus voluntatis, quæ est potentia cæca, sed intellectus.

Quod verò talis actus sit imperium, supponens intentionem finis, & electionem mediorum, docetur etiam à D. Thoma hic art. 1. ad 1. his verbis: *Præcipere de ordinandis in finem quorum rectam rationem habet, competit Deo, secundum illud Psalmi, Præceptum posuit, & non præteribit, & secundum hoc competit Deo ratio providentiæ.* Ratio etiam suffragatur, nam, ut supra dicebamus, providentia est pars prudentiæ: Sed actus principalis prudentiæ est imperium, ut docet Aristoteles 9. Ethic. cap. 9. dicens: *Prudentia præceptiva est, finis enim ipsius est, quoddam sit agendum vel non agendum præcipere.* Ergo providentia in actu imperij essentialiter consistit. Id magis constabit capite sequenti, ubi ostendemus prædestinationem, quæ est pars diuinæ providentiæ, in actu imperij, subsequente electionem prædestinatorum ad gloriam, formaliter & essentialiter consistere.

Obijcies primò contra primam partem: Damascenus lib. 2. fidei cap. 29. sic ait: *Providentia est voluntas Dei per quam omnia quæ sunt, convenientem deductionem habent.* Ergo censet providentiam in actu voluntatis consistere.

Respondeo ex D. Thoma quæst. 5. de verit. artic. 1. ad 1. providentiam dici à Damasceno voluntatem Dei, qui actum voluntatis supponit, aut illum virtualiter includit. Actus enim

enim imperij, in quo prouidentia formaliter consistit, supponit electionem voluntatis, & illam virtualiter includit, vt docet idem S. Doctor 1. 2. qu. 17. artic. 3. ad 1. his verbis: *Post determinationem consilij, qui est iudicium rationis voluntas elegit, & post electionem ratio imperat ei per quod agendum est quod eligitur.*

Obijcies secundò contra secundam partem: D. Thomas 2. 2. quaest. 49. artic. 6 ad 3. sic ait: *In recta ordinatione ad finem, quae includitur in ratione prouidentiae, importatur rectitudo consilij, iudicij, & praecepti:* Ergo prouidentia non consistit adaequatè in imperio, sed etiam in consilio, & iudicio regulante electionem.

Respondeo rectitudinem consilij & iudicij importari in ordinatione in qua prouidentia consistit, non constitutiue & formaliter, sed virtualiter & praesuppositiue; tum quia sine illis rectitudo imperij subsistere nequit; tum etiam, quia in actibus animae ordinatis, praecedens clauditur virtualiter in sequenti. Vnde D. Thomas qu. 5. de verit. art. 1. ad finem corporis, sic habet: *In prudentia quodammodo includitur & voluntas quae est de fine, & cognitio finis,* quia nimirum uterque actus ad illam supponitur.

Obijcies tertio: Actus imperij in nobis admittitur ad mouendam voluntatem, & alias potentias, quoad executionem suorum actuum: Sed propter hoc non debet in Deo admitti, quia in illo, nec voluntas, nec alia potentia mobilis est, cum sit actus purus: Ergo non datur in Deo talis actus imperij.

Respondeo actum imperij non poni in Deo, sicut in nobis, ad mouendam & applicandam potentiam executiuam ad operandum ad extra ( quia vt ostendimus in tractatu de scientia Dei, non datur in Deo aliqua potentia executiua, virtualiter ab intellectu & voluntate distincta ) sed talem actum immediate dirigi ad ipsas creaturas, & earum productionem imperare, iuxta illud Genes. 1. *Fiat lux*, & illud Io. 11. *Lazare veni foras*. Quare mobilitas & subiectio, non se tenet ex parte Dei, sed creaturarum quæ sunt.

Nec valet si dicas, respectu Dei omnipotentis nihil esse difficile, subindeque posito efficaci decreto futuritionis rerum, illas produci in tēpore, nec ad hoc requiri actum imperij. Licet enim respectu Dei nihil sit difficile ex parte obiecti operabilis, multa sunt in executione vincenda; quæ quidem Deus non vincit cœco & naturali impetu, sed imperio & prouidentia.

#### §. IV.

*Corollaria autem digna.*

**E**X dictis colligitur primò, prouidentiam Dei ab eius scientia practica distingui, nam scientia Dei practica est de fine & de medijs; prouidentia autem solum de medijs, quatenus ordinantur in finem, vt expressè docet S. Thomas quæst. 5. de verit. artic. 1. Ex quo intelliges, prouidentiam distingui etiam à potentia Dei executiua, quia talis potentia est scientia eius practica, seu approba-  
tio.



tionis, produciens res ad extra per actum imperij, ut cap. 3. tractatus de scientia Dei ostensum est.

Colligitur secundò, Dei providentiã ab eius arte distingui, quia ut docet idem S. Doctor loco citato in resp. ad 9. ars respicit res productas, secundùm quod egrediuntur à principio, & inter se invicem collocantur; providentia autem illas respicit, secundùm quod ordinantur in finem. Addo quod ars est restitatio factibilium, id est eorum quæ ab agente procedunt in extraneam materiam; prudentia autem, cuius providentia est actus, est certa ratio agibilium, quæ sunt actus non progredientes ad extraneam materiam, sed perhientes ipsam agens.

Colligitur tertio, legem æternam distingui à providentia Dei, se habet enim sicut principium illius, cùm tradat generales regulas & principia operabilium; providentia verò, iuxta illas regulas, de motibus creaturarum disponat, & illas suos fines ordinet. Ita S. Thomas quaest. 5. de verit. artic. 1. ad 6.

Colligitur quartò, Dei providentiã distingui ab idea diuinã. Nam ut docet S. Thomas loco citato de verit. in resp. ad 1. Idea est forma exemplaris rei absolute & secundum speciem consideratæ; providentia verò est forma rei, secundum quod ordinatur in finem.

## §. V.

*Licet de ratione prouidentiae generalis sit ordinatio creaturae in finem, non tamen assecutio finis ad quem illa ordinatur, sed duntaxat finis ultimi, qui ab ipso prouisorie intenditur.*

**P**rima pars, quam negant aliqui ex nostris Thomistis, probatur primò ex D. Thomae qu. 6. de verit. art. 1. ubi hanc statuit differentiam inter prouidentiam & praedestinationem, quod prouidentia ordinem in finem respicit tantum, unde per Dei prouidentiam omnes homines ad beatitudinem ordinantur; sed praedestinatio etiam exitum vel euentum ordinis, unde non est nisi eorum qui gloriam consequuntur. Idem docet in 1. dist. 40. quaest. 1. art. 2. & ibidem ad Anni. quaest. unica art. 1. Ergo iuxta doctrinam D. Thomae non est de ratione prouidentiae generalis assequi finem ad quem homo ordinatur, sed id tantum competit praedestinationi.

Probatur secundò ratione quam idem S. Doctor praedictis locis insinuat: Reprobi per generalem prouidentiam ordinis supernaturalis, ordinantur ad gloriam, eisque conferuntur auxilia sufficientia, quibus illam adipisci possunt, ut in tract. de voluntate Dei cap. 3. ostensum est: At reprobi gloriam nunquam consequentur: Ergo de ratione prouidentiae generalis non est infallibilis assecutio finis ad quem creatura ordinatur.

Confirmatur Prouidentia efficaciam accipit  
ex

ex voluntate finis quam supponit : Ergo sicut absque imperfectione constituitur in Deo duplex voluntas respectu finis ad quem homines ordinantur : Vna antecedens & inefficax , quæ vult omnes homines saluos fieri ; altera consequens & efficax , quæ solum vult prædestinatos saluari , vt loco citato demonstrauius ; ita etiam absque imperfectione duplex prouidentia in Deo admitti potest , quarum vna sit efficax ad finis consecutionem ; & consequenter de ratione omnis prouidentia non est assecutio finis particularis , ad quem Deus ordinat creaturam .

Quod autem diuina prouidentia semper assequatur finem vltimum à prouisore intentum ; vt asserit secunda pars , sic ostenditur . Finis vltimus à Deo vt vniuersali prouisore intentus est , manifestatio suorum attributorum : At quamuis homo peccando deficiat à consecutione finis ad quem per prouidentiam Dei generalem ordinatur , manifestantur diuina attributa , præcipuè verò iustitia eius vindicatiua , seu punitiua : Ergo prouidentia Dei generalis semper assequitur finem vltimum ab ipso prouisore intentum . Vnde S. Thomas supra qu. 19. artic. 6. *Cum voluntas Dei sit vniuersalis causa omnium rerum , impossibile est quod diuina voluntas suum effectum non consequatur . Vnde quod recedere videtur à diuina voluntate peccando , incidit in ordinem diuinæ voluntatis , dum per eius iustitiam punitur .* Idem docet D. Augustinus in Ps. 100. his verbis : *Non sic constituta sunt opera Domini , vt creatura in libero arbitrio constituta , superet Creatoris voluntatem . Non vultis*

Deus ut peccet nam prohibet; tamen si peccaveris, non iutes hominem fecisse quod voluit, Deo accidisse quod noluit: Sicut enim vult ut homo non peccet ita vult peccanti parcere ut reuertatur & vivat; ita vult pessremo in peccato perseverantem punire, ut iustitiæ potentiam contumax non evadat. Ita quidquid elegeris, omnipotenti non deerit unde suam de te compleat voluntatem. Item epistol. 110. Non efficit (inquit) anima perversè utens creaturis, ut ordinationem effugiat Creatoris; quoniam si illa malè utitur bonis, ille benè utitur etiam malis; ac per hoc illa perversè bonis utendo fit mala, ille ordinatè etiam malis utendo permanet bonus: Qui etiam iniuste se ordinat in peccatis, iuste ordinatur in penis.

Obijcies contra primam partem assertionis: Ad perfectissimam providentiam spectat non solum ordinatio mediorum, sed etiam finis affectio: Atqui providentia Dei in summo gradu perfectionis existit: Ergo de ratione illius non solum est ordinatio mediorum, sed etiam finis affectio. Unde D. Thomas hic art. 4. ad 2. sic ait: In hoc est immobilis & certus divinæ providentiæ ordo, quod ea quæ ab ipso providentur, cuncta eveniunt, eo modo quo ipse providet, sine necessario, siue contingente. Et in resp. ad 3. asserit quod divina providentia non deficit à suo effectu, nec à modo eveniendi quam providit. Item 3. contra Gent. cap. 94. expressè tradit quod ordo divinæ providentiæ immutari omnino non potest, nec frustrari à suo effectu. Demum in hac parte qu. 23. art. 6. probat prædestinationem esse certam, quia est pars providentiæ, & præ-

ui-

*prouidentia ordinis est infallibilis* : Ergo discrimen quod statuimus inter prouidentiam & prædestinationem, est manifestè contra S. Thomam. Fauent etiam SS. Patres passim asserentes, prouidentiam semper scopum suum assequi, etiam quando videtur ipsi resisti : ipsaque Ecclesia, quæ in quadam collecta canit : *Dens cuius prouidentia in sui dispositione non fallitur.*

Respondeo distinguendo maiorem: Ad perfectissimam prouidentiam, supponentem voluntatem finis consequentem, pertinet non solum ordinatio mediorum, sed etiam affectio finis, concedo maiorem. Supponentem voluntatem finis inefficacem & antecedentem, nego maiorem. Vnde cum prouidentia Dei generalis, non supponat voluntatem consequentem, sed solum antecedentem de salute omnium hominum, quamuis sit perfectissima, non debet tamen habere infallibiliter annexam ipsius finis consecutionem; sicut prædestinatio, quæ supponit voluntatem consequentem & efficacem circa salutem electorum.

Ad testimonia D. Thomæ, non videntur militare in contrarium dicendum est cum Ferrariensi loco citato ex summa contra Gentes, S. Doctorem loqui in sensu permissiuo, quatenus prouidentia in aliqua sui parte, nempe in prædestinatione, habet annexam vtramque infallibilitatem ordinis & euentus, non autem quod de conceptu prouidentia vtriusque sit infallibilitas. Vel secundò tam eodem responderi potest, quæ à Deo prouidetur non esse finem, sed media; nam licet finis in executione sit effectus prouidentia,

tia, non tamen est immediatè proutisus ab illa, sed effectus mediorum quæ ordinantur ad finem: circa media autem immutabilis est diuina prouidentia: & quoad hoc verum est, illam nunquam frustrari, nam eo ipso quod prouideat de medijs, infallibiliter illa ponentur in esse: quia tamen aliquando confert media tantùm sufficientia, aliquando verò efficacia, consequens fit quod non semper annexam habeat finis affecutionem; & sic intelligendum est id quod de prouidentia Dei canit Ecclesia: *Deus cuius prouidentia in sui dispositione non fallitur*. Ad testimonium verò desumptum ex quæstione 23. huius partis, dicendum est D. Thomam probare prædestinationem esse certam, quia est pars prouidentia, supponentis voluntatem consequentem & efficacem finis, quæ ad naturalia & supernaturalia se extendit, non verò ex eo præcisè quod sit pars prouidentia generalis ordinis supernaturalis, quæ supponit voluntatem solam antecedentem & inefficacem de salute hominum. Quantum ad SS. Patres asserentes prouidentiam diuinam semper scopum suum affequi, etiam cùm videtur ei resisti, facillè respondetur, eos loqui de fine ultimo ab ipso prouisore generali intento, qui est manifestatio suorum attributorum; ille enim semper obtinetur, vt in secunda assertionis parte declarauimus.



## CAPVT II.

## De prædestinatione.

**A**ttissimum & obscurissimum prædesti-  
nationis mysterium, egregia cantico-  
rum metaphora commendatur, vbi sponsi co-  
mæ, quæ supremi Indicis supra filios homi-  
num consilia non obscure exprimunt, sicut  
*elata palmarum* dicuntur, quod vim omnem  
ingeniorum superent, & *nigra quasi corus*,  
quod obscuritate sua mentes nostras tenebris  
inuoluant. De illo tamen hic agendum est,  
eiusque existentia, essentia, causæ, & ef-  
fectus breuiter sunt explicanda.

## §. I.

Præter generalem Dei providentiam, quæ om-  
nes homines sufficienter ordinat ad salu-  
tem, datur prædestinatio, seu prouiden-  
tia aliqua specialis, quæ aliquos ef-  
ficaciter ordinat & transmittit ad  
eternam beatitudinem.

**H**æc veritas est certa de fide, colligitur  
enim ex varijs Scripturæ & Sanctorum  
Patrum testimonijs, quæ illam aperte decla-  
rant. Ad Roman. 8. Quos prædestinauit,  
hos & vocauit. Ad Ephes. 1. Prædestinauit  
nos in adoptionem filiorum Dei per Iesum Chri-  
stum. Actuum 13. Crediderunt quorquor e-  
rant præordinati ad vitam æternam: Et alibi  
passim sub electionis nomine hæc veritas tra-  
di-

ditur. Vnde Prosper resp. 1. ad obiectiones Gallorum : *Prædestinationem Dei* (inquit) *nellus Catholicus negat*. Et Epistol. ad Rufin. *Prædestinationem tam impium est negare, quam ipsi gratia contraire*. Item Fulgentius de fide ad Patrum cap. 35. *Firmissimè tene, & nullatenus dubites, omnes quos vasa misericordie, gratuita bonitate Deus fecit, ante constitutionem mundi, in adoptionem filiorum Dei prædestinatos à Deo; nec perire posso aliquem eorum quos Deus prædestinavit ad regnum celorum, nec quempiam eorum quos non prædestinavit ad vitam, vlla posse ratione saluari*.

Ratio etiam suffragatur : Si enim ad salutem consequendam, sufficeret sola voluntas, antecedens saluandi omnes homines, & sola generalis providentia, qua confert omnibus auxilia ad salutem sufficientia, nulla esset differentia ex parte voluntatis diuinæ inter prædestinatum & reprobum, & tota illorum discretio proveniret ex libero arbitrio, & sic prædestinatio non esset beneficium Dei speciale : Sed hoc dici nequit : Ergo nec illud. Sequela maioris est evidens, nam voluntas antecedens, & generalis providentia, æquales sunt respectu omnium. Minor verò constat ex Apostolo 1. ad Corinth. 4. dicente, *Quis epim te discernit?* Et ex Augustino 11. de ciuit. cap. 19. ubi docet discretionem bonorum & malorum Angelorum fuisse à Deo, & ait : *Inter sanctos Angelor. & immundos fuisse discretum, ubi dictum est : Dixit Deus inter lucem & tenebras, solus quippe ista discernere potuit*. Quod à fortiori de hominibus feruendum est, nam ut lepidè ait Bernardus

serm.



ferm. 27 de verbis Isaïæ: *Quid putas non discernet inter glebas, qui discreuit inter stellas.*

Confirmatur: Si aliquis salutem consequeretur sine prædestinatione, seu decreto efficaci & absoluto illum transmittente in vitam æternam, affecutio talis finis esset à casu, & præter intentionem Dei, quod repugnauit infinitæ eius sapientiæ & prouidentia; & Deus non ageret tunc *secundum consilium voluntatis sue*, vt ait Apostolus, sed secundum determinationem & propositum voluntatis humanæ; nec ipse eligeret homines, sed potius ab illis eligeretur, contra illud Christi Ioan. 15. *Non vos me elegisti, sed ego eleghi vos.*

Confirmatur ampliùs ratione D. Thomæ hic quæst. 23. art. 1. Ad illud ad quod non potest aliquid virtute suæ naturæ peruenire, oportet quod ab alio transmittatur; sicut sagitta à sagittante mittitur in signum: Sed vita æterna, quæ in clara Dei visione consistit, est supra naturam cuiuslibet creaturæ: Ergo creatura rationalis debet in illam transmitti à Deo; subindeque ratio talis transmissionis, quæ prædestinatio appellatur, existere ab æterno in mente diuina.

Dices primò, si detur prædestinatio de salute definiens, si prædestinatus sum, quidquid agam saluabor; si verò non sum prædestinatus, damnabor infallibiliter, & omnia bona opera quæ faciam, inutilia mihi erunt ad salutem. Melius ergo mihi est, vt diuinorum consiliorum euentum expectem, & sine vlla de mea salute, sollicitudine, lætam & tranquillam vitam ducam.

Respondéo primò, hoc argumentum, quod  
sa.

sepe versant impij, vt liberius peccent, & quo vexantur scrupulosi, vt superstiosè se torqueant, æquè militare contra infallibilitatem diuinæ præscientiæ, ac contra certitudinem diuinæ prædestinationis. Vnde Augustinus de bono perseu. cap. 15. *Ista cum dicuntur, à confitenda prædestinatione Sanctorum detertere non debent; sicut non deterremur à confitenda præscientia Dei, si quis de illa populo sic loquatur, vt dicat: siue nunc rectè viuatis, siue non rectè, tales vos eritis postea, quales vos Deus futuros esse præsciuit, vel boni, si bonos; vel mali, si malos, &c.*

Respondeo secundò, quod sicut in humana vitæ negotijs, nullus nisi stolidus, media ad fines vtilia relinquit, quantumuis Deus omnia prouidentia sua prædefinierit; & nemò, nisi bardus ac stupidus, sic ratiocinatur: Nouit Deus hunc agrum, verbi gratia, hoc anno feracem fore, aut sterilem: Si feracem nouit, siue à me cultus fuerit siue non, vberes mihi fructus feret. Si sterilem, ergo talis erit, etiam si ipsum assidue coluerim. Ita & stulta est ratiocinatio argumenti propositi: Nam vt rectè ait Angelicus Doctor hic art. 8. *Sicut sic prouidentur naturales effectus, vt etiam causæ naturales ad illos naturales effectus ordinentur, sine quibus illi effectus non prouenirent: ita prædestinatur à Deo salus alicuius, vt etiam sub ordine prædestinationis cadat quidquid hominem promouet in salutem, vel orationes propriæ, vel aliorum, vel aliæ bona, vel quidquid huiusmodi, sine quibus aliquis salutem non consequitur. Vnde prædestinatis conandum est ad bene operandum*

dum & orandum, quia per huiusmodi, prædestinationis effectus certitudinaliter impletur. Propter quod dicitur 2. Petri 1. satagite, ut per bona opera certam vestram vocationem & electionem faciatis. Similia habet D. Prosper 2. de vocat. Gentium cap. 36. ubi sic discurret: Quamuis quod Deus statuit nulla possit ratione non fieri, studia tamen non sollentur orandi, nec per electionis propositum, liberè arbitriū deuotio relaxatur, cum implendæ voluntatis Dei, ita sit prædestinatus effectus, ut per laborem operum per instantiam supplicationum per exercitia virtutum, sint incrementa meritorum; & qui bona egerint non solum secundum propositum Dei, sed etiam secundum sua merita coronentur. Item Gregorius magnus libro 3. Dialogi cap. 13. hæc scribit: Obtineri nequaquam possunt, quæ prædestinata non fuerint, sed ea quæ sancti viri efficiunt, ita prædestinata sunt, ut ea precibus obtineant. Nam ipsa quoque rami prædestinatio, ita est ab omnipotente disposita, ut ad hoc electi ex labore perueniant, quatenus postulando mereantur accipere quod eis omnipotens Deus disposuit donare.

Dices secundò: homo per auxilia sufficientia, quæ per voluntatem antecedentem, & prouidentiam generalem ordinis supernaturalis ei subministrantur, potest saluari: Ergo non requiritur prædestinatio, sed sufficit talis prouidentia & voluntas antecedens. Sed nego consequentiam, prædestinatio enim non requiritur ad hoc ut homo possit saluari, sed ut de facto saluetur; sicut donum perseverantiæ non est necessarium ad hoc ut homo

possit perseverare, sed ut de facto perseveret. Unde Augustinus de bono persever. cap. 1. Hanc eorum de qua nunc agimus perseverantiam, quæ in Christo perseveratur usque in finem, nullo modo habuisse dicendus est, qui non perseveraverit usque in finem. Et capit. 6. De illa perseverantia loquitur, quæ perseveratur usque in finem, quæ si data est, perseveratum est usque in finem; si autem non est perseveratum usque in finem, non est data.

## §. II.

*Prædestinatio non consistit formaliter in actibus voluntatis, sed intellectus, nimirum in iudicio practico subsequente electionem, quod imperium appellatur.*

**P**robatur prima pars, primo quia prædestinatio idem est quod perfectissima providentia, quia rationalis creatura ordinatur ad finem beatitudinis: At providentia in actu intellectus consistit, ut cap. præcedenti §. 2. ostensum est: Ergo & prædestinatio. Secundò, quia prædestinatio essentialiter est ordinatio creature rationalis ad gloriam, per certam & determinatam viam obtinendam, quare D. Thomas illam definiens ait esse transmissionem creature rationalis ad gloriam, & prædestinati in Scriptura præordinati dicuntur: At ordinare ad intellectum pertinet, non ad voluntatem: Ergo prædestinatio non in actu voluntatis sed intellectus consistit. Minor probatur: Tum quia ordinare unum ad aliud est

est vnum cum alio conferre: At collatio vnius cum altero, ad intellectum practicum spectat, sicut ad speculativum pertinet illatio vnius ex altero: Ergo ordinare pertinet ad intellectum. Tum etiam, quia ordinare aliquid in finem idem est quod dirigere: At directio ad intellectum spectat, non ad voluntatem; quæ cum sit potentia cæca, ab alio dirigi debet, nec ipsa dirigere potest: Ergo nec ordinare. Tum denique quia ordinare ad superiorem pertinet in humanis, quare dux in exercitu ordinat quid milites facere debeant, & Princeps in republica quid facere debeant sibi inferiores: Ergo ordinate agendis à seipso, in homine pertinebit solum ad supremam potentiam qualem esse intellectum docet D. Thomas pluribus in locis. Unde Aristoteles 2. metaph. capit. 2. dicit quod *sapientis est ordinare.*

Probatur etiam secunda pars: Prædestinatio, cum sit efficacissima & omnino infallibilis, si in aliquo actu diuini intellectus formaliter consistat, debet consistere in illo qui est omnium efficacissimus: Atqui actus iudicii antecedens electionem non est talis, sed solum actus imperij ad subsequens, & regulans usum & executionem: Ergo prædestinatio consistit formaliter in actu imperij. Maior constat, minor verò simul declaratur & probatur. Intellectus per iudicium præcedens electionem iudicat tantum de conuenientia mediorum in ordine ad opus, vnde ille actus explicatur per modum indicatiui, vt si dicatur, *bonum est hoc facere, vel hoc est conueniens facere*, & pertinet ad illam habitudinem  
quam

quam dicit voluntas ad finem per modum intentionis & affectus, non verò ad eam qua tendit in finem per modum executionis & causalitatis; unde in se non habet efficaciam ad executionem operis, nisi tantùm radicaliter: posito enim iudicio de conuenientia mediorum, potest non sequi effectus, ob difficultatem executionis. Imperium autem superaddit quandam intimationem rei exequendæ, mouendo ad hoc quod fiat, & explicatur per modum imperatiui, *fac hoc*, pertinetque ad habitudinem qua voluntas tendit in finem per modum executionis & causalitatis; quapropter stante imperio efficaci, non stat non sequi operationem & executionem mediorum: Ergo imperium est actus intellectus practici omnium efficacissimus: unde in illo inueniuntur omnia ad constituendam essentiam prædestinationis necessaria. Est enim ex se ratio ordinis mediorum in finem, cum ad intellectum practicum ordinatio pertineat; & est efficax in virtute electionis præcedentis; actus enim voluntatis præcedens, virtualiter clauditur in actu subsequuto: quod iudicio electionem præcedenti competere requirit. Licet enim illud sit ordinatio mediorum in finem, caret tamen efficacia, quam non potest habere ab electione subsequente; quia vnus actus non dat efficaciam alteri, nisi vel inflat in ipsum, vel in eo virtualiter permaneat; ad quod requiritur quædam antecessio, seu prioritas, saltem virtualis, quam non habet electio respectu iudicij à quo regulatur, sed solùm respectu imperij ad illam subsequentis, quo regulatur vsus seu executio.

## §. III.

*Soluntur obiectiones.*

**O**bjicies primò contra primam partem assertionis : Prædestinati in Scriptura *electi* appellantur : Sed electio est actus voluntatis : Ergo prædestinatio ad voluntatem pertinet . Vnde D. Thomas in opusculo de prædestinatione cap. 1. sic ait : *Quamvis prædestinatio præsupponat actum cognitionis , nominat tamen actum voluntatis eligentis &c.*

Respondeo ex eodem S. Doctore quæst. 6. de verit. art. 1. ad 2. quod licet prædestinatio non sit idem quod electio , quia tamen præsupponit eam, inde est, quod prædestinati electi dicuntur . Ad locum verò desumptum ex opusculo de prædestinatione , negandum est opusculum illud esse D. Thomæ, non enim habetur inter alia opuscula , nec in editione Romana , quæ cæteris præferenda est , inter opera D. Th. recensetur sed reperitur solum in fine primæ partis , Lugdunensis impressionis factæ 1552. ubi ab aliquo studioso fuit insertum . Vel verba illa , *Prædestinatio nominat actum voluntatis* , interpretari possumus de nominatione præsuppositiva & de connotato , si de actu voluntatis in seipso intelligantur . Vel de actu voluntatis non in seipso & formaliter sed virtualiter , quatenus virtute continetur in actu imperij intellectus, ab illo participante efficaciam . Eodem modo explicanda sunt aliqua SS. Patrum testimonia , quibus videntur prædestinationem in actu

actu voluntatis constituere. Et illud Apostoli ad Roman. 9. *Iacob dilexi, Esau autem odio habui*, prædestinatio enim & reprobatio, dilectio & odium appellantur, ad significandum, quod utraque actum voluntatis supponit, ut docet D. Thomas ubi supra.

Obijcies secundo: De conceptu prædestinationis non solum est ordinatio, sed etiam motio quoad exercitium: Sed mouere pertinet ad voluntatem, cum illa sit primum mouens quoad exercitium: Ergo & prædestinare.

Respondeo quod mouere absolute pertinet ad voluntatem, non autem mouere motione ordinatiua, quæ prædestinationis essentiam ingreditur; talis enim motio est ab intellectu, in virtute præcedentis actus voluntatis.

Instabis: Esse volitium ita est proprium voluntatis, ut nullo modo intellectui communicari possit: Ergo & esse motium quoad exercitium.

Sed nego consequentiam & paritatem: Ratio discriminis est, quia ratio volitiui est substantia actus voluntatis, efficacia autem motiua, non est substantia, sed modus eius unde sicut libertas, tametsi voluntati tribuitur ut primo principio, actui tamen intellectus, ex subordinatione ad voluntatem communicatur, quia illa est quidam modus illius; ita ob eandem rationem intellectui efficacia motiua communicatur licet ratio volitiui illi communicari nequeat.

Obijcies tertio contra secundam partem: Prædestinatio est causa suorum effectuum: Sed imperium subsequens electionem, non est



est causa effectuum prædestinationis; nam illi ex vi decreti seu obiectionis efficacis Dei, constituuntur futuri; Ergo prædestinatio non consistit in imperio electionem subsequente, sed potius in ipsa electione prædestinatorum ad gloriam. Vnde si per impossibile; posita electione efficaci, non sequeretur imperium, homines essent prædestinari.

Respondeo, concessa maiori, negando minorem, & ad eius probationem, distinguo Antecedens: Ex vi decreti seu electionis efficacis constituuntur futuri, inchoatiuè, & in ordine intentionis, concedo Antecedens. Completè, & in ordine tam intentionis quam executionis, nego Antecedens & consequentiam. Sicut enim in sententia illorum qui admittunt in Deo potentiam executiuam, ab intellectu & voluntate virtualiter distinctam, ex hoc quod electio diuinæ voluntatis sit efficax, non sequitur ex vi illius rem electam constitui completè futuram, ita ut necessarius non sit concursus potentiae exequentis, quæ est posterior ipsa, eò quod solum in suo ordine illam futuram constituat; ita nec in nostra sententia sequitur necessarium esse concursum imperij diuini, sed solum colligitur illum cum efficaci electione esse infallibiliter conexum. Vnde si per impossibile posita electione non sequeretur imperium, homines essent prædestinati solum inchoatiuè, non tamen formaliter & completè, nec in tali casu gloriam consequerentur, sed solum esset gloria inchoatiuè futura, cum ad executionem & productionem rerum, non sufficiat electio, seu decretum intentiuum, sed præterea re-

quiratur vsus actiuus, seu decretum executiuum, & consequenter imperium illud dirigens.

Alia obiectiones tangunt existentiam actus imperij, non prout in Deo, sed prout in nobis, subindeque commodius proponentur & soluentur in tractatu de actibus humanis, vbi agemus de actu imperij.

#### §. IV.

*Prædestinatio non est pars subiectiua, sed  
obiectione diuinæ providentiæ.*

**S**ensus huius assertionis est, providentiam diuinam non comparari ad prædestinationem, sicut superius ad suum inferius, ita vt diuidatur in quatuor vel quinque attributa, nempe in providentiam naturalem, supernaturalem generalem, prædestinationem, reprobationem, & providentiam ordinis hypostatici; sed sicut ad partem sui obiecti adæquati, ita vt vna & eadem providentia, virtualiter indistincta, attingat illos tres ordines naturæ, gratiæ, & vnionis hypostaticæ, & solum ratione diuersorum obiectorum materialium ad quæ se extendit, diuersa nomina sortiatur; sicut scientia diuina, licet sit vnicum attributum virtualiter indistinctum, per ordinem tamen ad diuersa connotata, & obiecta materialia, diuiditur in scientiam simplicis intelligentiæ, visionis, & approbationis, & diuersis nominibus insignitur.

Assertio sic explicata probatur hac ratione fundamentali; Vnitas aut diuersitas prouidentie.

dentia sumitur ex fine ultimo intento à prouifore, & non ex finibus particularibus rerum prouifarum; alioquin tot essent prouidentia specie distincta, quot sunt fines particulares rerum distincti secundum speciem, & alia esset prouidentia secundum speciem pro animalibus, alia pro hominibus, alia pro Angelis; quod nullus vnquam dixit: Sed vnica tantum est finis intentus à Deo in prouidentia omnium rerum, nempe sua gloria, & manifestatio suorum attributorum: Ergo & vnica prouidentia se extendens ad omnia quæ sunt ordinis naturæ, gratiæ, & vnionis hypostatice. Sicut vnica potentia in Deo virtualiter indistincta, se extendit ad omnes effectus producibiles, vnica scientia ad omnia scibilia, vnica ars ad omnia factibilia, vnica lex æterna ad omnia quæ Deus iubet vel prohibet.

Dices, dantur in Deo plures ideæ specie diuersæ: Ergo & plures prouidentia virtualiter inter se distinctæ.

Sed nego consequentiam & paritatem, nam vt colligitur ex D. Thoma supra q. 15. art. 2. ad 2. inter ideam & prouidentiam notabile intercedit discrimen, consistens in eo quod prouidentia se tenet ex parte Dei prouidentis & intelligentis, & significatur vt id quo Deus practice intelligit & ordinat de agendis, vnde quoad vnitatem in modo attingendi proprium obiectum, cum intellectu diuino commensurari debet; subindeque sicut ille est vnicus, absque virtuali discrimine, ita & prouidentia. Idea verò se tenet ex parte obiecti intellecti, & significatur vt id quod à Deo intelligitur; vnde non cum intellectu, sed cum

obiecte proportionatur quoad vnitatem vel diuersitatem, atque adeò cum obiecta à Deo intellecta plura sint, plures etiam dantur idex in intellectu diuino.

Ex dictis colligitur primò, optimam esse prædestinationis definitionem, traditam ab Augustino in libro de bono perseu. cap. 14. his verbis: *Prædestinatio sanctorum nihil aliud est quam præscientia & præparatio beneficiorum quibus certissimè liberantur quicumque liberantur.* Vbi nomine præscientiæ intellexit Augustinus scientiam Dei practicam seu approbationis, diuinæ voluntatis decreto innixam, quæ non supponit, sed facit rerum existentiam & futuritionem, & ad quam pertinet actus imperij, in quo essentialiter consistit prædestinatio: Aliæ verò particulæ declarant certitudinem & infallibilitatem mediorum & auxiliorum, quibus prædestinati in æternam perducuntur beatitudinem.

Colligitur secundò, bonam pariter esse definitionem prædestinationis desumptam ex D. Thoma hic att. 1. his verbis: *Prædestinatio est ratio transmissionis creature rationalis in finem vitæ æternæ.* Vbi prima particula, nempe *ratio*, tenet locum generis, & denotat prædestinationem, sicut & alias partes obiectiuas prouidentiae Dei esse actum diuini intellectus. Reliquæ verò tenent locum differentiae, nam in primis *ly transmissionis* denotat ordinem specialem prædestinati, videlicet per specialia auxilia quibus infallibiliter perducitur in vitam æternam; & per hoc differt à generali prouidentia etiam supernaturali, per quam etiam reprobi ordinantur ad gloriam.

at non specialiter, siue efficaciter, per auxilia specialia, sicut prædestinati; sed generaliter tantum siue sufficienter, per collationem vel oblationem auxiliorum sufficientium. Secundo ly *creatura rationalis* significat differentiam prædestinationis ex parte subiecti à providentia naturali, nam subiectum prædestinationis est sola creatura rationalis, providentiæ autem subiectum est omnis creatura. Tertiò ly *in vitam æternam* assignat aliam differentiam, qua prædestinatio hominum & Angelorum, siue puræ creaturæ intellectualis, distinguitur à prædestinatione Christi, siue hominis Dei, hæc enim fuit ad esse naturale filij Dei, cum tamen prædestinatio hominum & Angelorum sit tantum ad vitam æternam & claram Dei visionem, per quam fit perfecta adoptio in filium Dei, iuxta illud Apostoli ad Roman. 8. *Nos ipsi primitias spiritus habentes, intra nos gemimus, adoptionem filiorum Dei expectantes.*

## §. V.

*Electio prædestinatorum ad gloriam, non habet aliam causam motiuam, quam diuinam bonitatem; non verò merita præuisa, quæ sunt potius effectus quam motiuum prædestinationis.*

**H**Æc assertio (quæ ut ait Bellarminus lib. 2. de gratia & libero arbit. c. 11. *Non quorumvis Doctorum opinio, sed fides Ecclesiæ Catholicæ, dici debet*) probatur primò duplici argumento ex Scriptura & SS. Patribus desum-

sumpto. Primum est: Iuxta Scripturam & SS. Patres nulla potest reddi ratio, cur vnus eligatur ad gloriam, non verò alter, sed hoc simplicem Dei voluntatem, & ad iudicia eius inscrutabilia, atque infinitam diuinæ sapientiæ altitudinem, referendum est: At hoc esset falsum, si electio prædestinatorum ad gloriam, fieret ex præiudiciis meritis, tanquam à causa: Ergo illa non habet pro causa motiua præiudiciem meritorum, sed dūtaxat diuinam bonitatem. Maior constat primò ex Apostolo ad Roman. 9. vbi de causa nostræ prædestinationis ex instituto differens, eam refert in solam Dei misereantis voluntatem, eligentis hos, & relinquentis illos; & ad hoc probandum inducit exemplum duorum geminorum, Iacob & Esau, qui cū nondum nati essent, nec aliquid boni egissent aut mali, non ex operibus, sed ex vocante dictum est, Iacob dilexi, Esau autem odio habui. Et paulò, post: Miserebor cuius misereor, & misericordiam præstabo cuius miserebor. Id est (vt clariùs dicitur Exod. 33.) miserebor cui voluero, & clemens ero in quem mihi placuerit. Et iterum: Non est volentis, neque currentis, sed misereantis Dei. Et statim præuidens & præfocans querelam quam facturi erant gratuita prædestinationis impatientes, dum dicunt: Quid adhuc quæritur? Voluntati enim eius quis resistit? Subiungit increpando: O homo in quis es qui respondeas Deo! Nunquid potest dicere figulus luti ei qui se finxit, quare me fecisti sic? Vbi totam difficultatis decisionem ad simplicem Dei voluntatem reuocat. Et cap. xi, sequenti postquam satis diu locutus est de præ-

prædestinatione secundum propositum, totum discursum hac exclamatione concludit: *O altitudo divitiarum sapientiæ & scientiæ Dei, quam incomprehensibilia sunt iudicia eius, & inuestigabiles viæ eius?*

Eadem maior constat secundò ex Augustino de prædestin. sanct. cap. 7. ubi sic ait: *Ex duobus ætate grandævus impijs, cur hic assumatur, & alter relinquatur: O iudicia Dei incomprehensibilia!* Et epist. 112. explicans significationem ligni crucis, ad profundum reducit occultam rationem cur unus eligatur, non verò alter. Item in lib. soliloquiorum animæ ad Deum cap. 28. quod est de profunda prædestinatione & præscientia Dei, alloquens Deum sic ait: *Mundas autem de nobis filijs hominum, eos in quibus tibi placuit habitare, quos ab inaccessibilibus profundis secretis iudiciorum incomprehensibilium sapientiæ tuæ, semper iustorum, licet occultorum, sine eorum meritis prædestinasti ante mundum, vocasti de mundo, iustificasti in mundo, & magnificas eos post mundum. Non omnibus autem hoc facis, quod admirantur tabescentes omnes sapientes terra.* Demum lib. de bono perseu. cap. 12. docet in paruulis sine baptismo decedentibus perperam recurri ad casum, cum nec passer cadat in terram sine voluntate patris cœlestis; vel ad incuriam parentum, quibus plerumque festinantibus, & paratis ministris, puer moritur; sed id tribuendum esse occultæ Dei voluntati, qui noluit ut illis applicaretur baptismus. Vnde Prosper ad cap. 4. Gall. *Respiciantur etiam inter Christianos tot millia parvulorum, qui ab hac vita sine baptismo*

transierunt, quibus nec plantator prædicare, nec rigator potuit subuenire.

Constat tertio eadem maior ex D. Thoma hic q. 23. art. 5. ad 3. ubi hæc scribit: *Quare hos elegit ad gloriam, & alios reprobavit, non habet rationem nisi diuinam voluntatem: Vnde Augustinus dicit super Ioannem, quare hunc trahat & alium non trahat, noli velle diiudicare, si non vis errare. Sicut etiam in rebus naturalibus, quod hæc pars materia sit sub ista forma, & illa sub alia, dependet ex simplici diuina voluntate: Sicut ex simplici voluntate artificis dependet, quod ille lapis est in ista parte parietis, & ille in alia, quamuis ratio artis habeat quod aliqui sint in hac, & aliqui sint in illa. Similia habet 3. contra Gent. cap. 161.*

Minor etiam videtur manifesta, si enim electio prædestinatorum fieret ex præiudiciis, meritis tanquam à causa motiua, facile posset reddi ratio, cur vnus eligatur ad gloriam, non vero alter, nempe quia Deus præiudicat merita vnus, & mala opera alterius, subindeque non oporteret recurrere ad simplicem Dei voluntatem, & ad iudicia eius inscrutabilia. Vnde Augustinus in Enchirid. cap. 98. explicans prædictum locum Apostoli: *Iacob dilexi, Esau autem odio habui*, sic ait: *Qua iure si futura opera, vel bona huius, vel mala illius, quæ Deus utique præsciebat, vellet intelligi, nequaquam diceret non ex operibus, sed diceret ex futuris operibus, eoque modo istam solueret questionem, imò nullam quam soluere opus esset, faceret questionem. Et epist. 105. ad Sixtum: Quis (inquit) istum acutissimum sen-*



sensum defuisse Apostolo: non miretur! Hoc quippe ille non vidit; quando sibi velut obuersantis obiecta questione, non id potius tam breue, tam apertum, tam sicut isti (scilicet Pelagiani) putant verum absolutumque respondit. Hic erat locus dicendi quod isti sentiunt, Non autem hoc dicit Apostolus.

Alterum argumentum ex scriptura desumptum, petitur ex eo quod prædestinatio frequenter sortis nomine in scriptura designatur: ad Ephes. 1. Sorte vocati sumus secundum propositum eius qui operatur omnia secundum consilium voluntatis sue. Ad Coloss. 1. Dignos nos fecit in partem sortis Sanctorum in lumine. Huius autem appellationis nulla alia ratio esse potest, nisi quia sicut aliquid dicitur forte alicui contingere, quod ei accidit absque præuia causa & studio eius; ita prædestinationis nulla reperitur causa ex parte nostri; sed illa in solam gratuitam Dei electionem reducenda est. Hoc argumento ex sortis appellatione desumpto utitur S. Augustinus concione 2. super Psalm. 30. ad gratuitam prædestinationem electorum suadendam. Illam etiam probat lib. de gratia & libero arbitrio cap. 9. ex eo quod ad Roman. 6. vita æterna gratia Dei appellatur: Cum posset (inquit) dicere Apostolus, & rectè dicere, stipendium iustitiæ vita æterna, maluit tamen dicere, gratia Dei vita æterna ut hinc intelligeremus, non pro meritis nostris Deum nos ad æternam vitam, sed pro sua misericordia perducere. Quod verificari non potest de perductione ad vitam æternam in executione, quia hæc stipendium iustitiæ est, unde dicere quod datur sine

meritis, esset error : Ergo loquitur de illa in intentione , & de ipsa electione prædestinatorum ad gloriam, quæ est purè gratuita, quamuis ipsa gloria in executione per merita sit acquirenda .

Probatur secundò nostra sententia ex eodem Augustino , qui non solum locis iam relatis gratuitam Dei prædestinationem manifestè docet, sed etiam in libro de corrept. & gratia cap. 7. ubi sic ait : *Electi sunt* ( undecim Apostoli ) *ad regnandum cum Christo , non quomodo electus est Iudas ad opus cui congruebat . Cum itaque audimus , nonne duodecime vos elegi , & unus ex vobis diabolus est ? Illos debemus intelligere electos per misericordiam , illum per iudicium : Illos ergo elegit ad obtinendum regnum suum , illum ad effundendum sanguinem suum .* Insigne est hoc testimonium pro nostra sententia , in eo enim est sermo de electione ad regnandum, atque adeò ad gloriam ; item de electione ante præuisa merita, utpote quam dicit factam per misericordiam, & non per iudicium , id est per discussionem meritorum .

Potest insuper nostra assertio suaderi argumento morali , desumpto ex effectibus quos Augustini de prædestinatione doctrina apud Massilienses produxit . Constat enim ex epistolis D. Prosperi & D. Hilarij ad Augustinum scriptis, Massilienses propterea fuisse turbatos, quod existimarent ex doctrina Augustini de prædestinatione, fatum induci, tolli libertatem arbitrij, in desperationem homines adduci, & alia similia, quæ nobis etiam obijciunt Aduersarij . Quoniam autem etiam ficto

colore, viri illi acutissimi; Augustino obijcere talia potuissent, si existimassent prædestinationem quam docebat, præscientiam operum seu humanæ cooperationis supponere. Delirium certè est, aliquid huiusmodi de tali prædestinatione somniare, cuius decretum omni ex parte in hominis potestate constituitur. Insanum verò credere est, illas ab eis profundi potuisse querimonias, qui ultro plena voce & professione protestabantur in eisdem epistolis Prosperi & Hilarij, se prædestinationem secundum præscientiam operum recipere, se illos ponere prædestinari atque eligi, quos Deus præscierit credituros; denique quid isertis verbis dicebant apud Faustum illorum corippeum. *Nisi præscientia exploraverit, prædestinatio nihil decernit*: Ergo existimabant prædestinationem saluandorum, quam docebat Augustinus, omnem meritum præuisionem antecedere: Ergo cum Augustinus in libris quos rescripsit non negauerit hanc fuisse suam doctrinam, nec de Massiliensibus conquestus sit, quod sententiam alienam sibi imponerent, signum manifestum est, eam fuisse eius sententiam, quæ docet prædestinatos ad gloriam, fuisse ad eam electos ex mera Dei voluntate, ante præuisionem meritum. Vnde cum sententia Augustini in materia de prædestinatione sit doctrina totius Ecclesiæ, & à pluribus Summis Pontificibus fuerit approbata: *Videant* (inquit Baronius tomo 6. num. 32.) *quanto peniculo quidam ex Recentioribus, dum in Nouatores insurgunt, ut eos confutent, à Sancti Augustini sententia de prædestinatione recedant; cum aliquam*

arma non desint quibus hæreticis profligentur.

## §. VI.

*Triplici ratione Theologica eadem veritas  
suadetur.*

**P**Rima est : Merita nostra sunt effectus prædestinationis : Ergo prædestinatio non est ex præiis meritis . Consequentia est manifesta , si enim merita sunt effectus prædestinationis & electionis , non potuerant præiideri certò futura , ante prædestinationem & electionem , cum effectus non possit præiideri ut futurus , ante suam causam ; si autem ante prædestinationem non sunt præiisa ut futura , non potuerunt mouere Deum ad prædestinandum ; neque enim Deus prædestinat ex præiisione meritorum possibilium , aliàs omnes essent prædestinati . Antecedens verò , in quo est difficultas , probatur multipliciter : Primò ex Apostolo ad Ephes. 1. dicente Deum nos sorte elegisse , *ut essemus sancti* : Ergo ipsa electio influit & causat sanctitatem & merita . Secundò ex Augustino de prædest. sanctorum cap. 18. ubi ponderans & vrgens præfata Apostoli verba , sic ait : *Inueniamur ergo verba Apostoli : Sicut elegit nos in ipso ut essemus sancti immaculati . Non ergo quia futuri eramus , sed ut essemus . Nempe certum est , nempe manifestum est : Ideo quippe tales eramus futuri , quia elegit ipse prædestinans , ut tales per gratiam eius essemus . Item libr. 5. contra Iulian. cap. 2. Nul- lum ( inquit ) elegit dignum , sed eligendo fecit*

dignum. Similiter epist. 105. ad Sixtum ait quod eligendos fecit, non inuenit. Tertiò ex D. Prospero 2. de vocat. Gentium cap. 35. dicente: *Deus his quos elegit sine meritis dat unde ornantur ex meritis.* Quibus verbis apertè docet, merita esse effectus prædestinationis, non verò causam illius motiuam. Quartò ex D. Thoma in cap. 9. Epist. ad Roman. vbi sic ait: *Manifestum est quod omne beneficium quod homini confert Deus ad salutem, est prædestinationis effectus: Diuinum autem beneficium non solum se extendit ad infusionem gratiæ, sed etiam ad gratiæ usum:* Vnde cùm merita, seu bona opera, procedant ex bono usu gratiæ, manifestum est, iuxta doctrinam D. Thomæ, illa esse prædestinationis effectus. Quintò ratione: Non possunt enim intelligi merita vt ad gloriam conducentia, sine dono perseverantiæ: Sed donum perseverantiæ est effectus prædestinationis, & subsequitur intentionem dandi gloriam: Ergo similiter & merita. Minor probatur, si donum perseverantiæ non subsequeretur, sed præcederet prædestinationem, daretur per prouidentiam generalem, subindeque omnibus conferretur, quod est apertè falsum, & contra Augustinum locis supra §. 1. relatis, vbi asserit, nullum dicendum esse habuisse donum perseverantiæ, nisi qui perseverauerit vsque in finem, subindeque nisi fuerit prædestinatus.

Secunda ratio est: Licet intendens efficaciter dare aliquid alteri, per modum præmij, si non habeat in sua potestate eius merita necessariò priùs debeat illa præuidere, secus tamen si habeat illa in sua potestate: Atqui Deus

obiecto proportionatur quoad unitatem vel diuersitatem, atque adeò cum obiecta à Deo intellecta plura sunt, plures etiam dantur idex in intellectu diuino.

Ex dictis colligitur primò, optimam esse prædestinationis definitionem, traditam ab Augustino in libro de bono perseu. cap. 14. his verbis: *Prædestinatio sanctorum nihil aliud est quam præscientia & præparatio beneficiorum quibus certissimè liberantur quicumque liberantur.* Vbi nomine præscientiæ intellexit Augustinus scientiam Dei practicam seu approbationis, diuinæ voluntatis decreto innixam, quæ non supponit, sed facit rerum existentiam & futuritionem, & ad quam pertinet actus imperij; in quo essentialiter consistit prædestinatio: Aliæ verò particule declarant certitudinem & infallibilitatem mediorum & auxiliorum, quibus prædestinati in æternam perducuntur beatitudinem.

Colligitur secundò, bonam pariter esse definitionem prædestinationis desumptam ex D. Thoma hic att. 1. his verbis: *Prædestinatio est ratio transmissionis creature rationalis in finem vitæ æternæ.* Vbi prima particula, nempe ratio, tenet locum generis, & denotat prædestinationem, sicut & alias partes obiectinas prouidentiae Dei esse actum diuini intellectus. Reliquæ verò tenent locum differentiae, nam in primis *ly transmissionis* denotat ordinem specialem prædestinati, videlicet per specialia auxilia quibus infallibiliter perducitur in vitam æternam; & per hoc differt à generali prouidentia etiam supernaturali, per quam etiam reprobi ordinantur ad gloriam,

at non specialiter, siue efficaciter, per auxilia specialia, sicut prædestinati; sed generaliter tantum siue sufficienter, per collationem vel oblationem auxiliorum sufficientium. Secundò ly *creaturæ rationalis* significat differentiam prædestinationis ex parte subiecti à prouidentia naturali, nam subiectum prædestinationis est sola creatura rationalis, prouidentia autem subiectum est omnis creatura. Tertiò ly *in vitam æternam* assignat aliam differentiam, qua prædestinatio hominum & Angelorum, siue puræ creaturæ intellectualis, distinguitur à prædestinatione Christi, siue hominis Dei, hæc enim fuit ad esse naturale filij Dei, cum tamen prædestinatio hominum & Angelorum sit tantum ad vitam æternam & claram Dei visionem, per quam fit perfecta adoptio in filium Dei, iuxta illud Apostoli ad Roman. 8. *Nos ipsi primitias spiritus habentes, intra nos gemimus, adoptionem filiorum Dei expectantes.*

## §. V.

*Electio prædestinatorum ad gloriam, non habet aliam causam motiuam, quam diuinam bonitatem; non verò merita præuisa, quæ sunt potius effectus quam motiuum prædestinationis.*

**H**Æc assertio (quæ ut ait Bellarminus lib. 2. de gratia & libero arbit. c. 11. Non quorumuis Doctorem opinio, sed fides Ecclesiæ Catholicæ dici debet) probatur primò duplici argumento ex Scriptura & SS. Patribus de-

sumpto. Primum est: Iuxta Scripturam & SS. Patres nulla potest reddi ratio, cur vnus eligatur ad gloriam, non verò alter, sed hoc simplicem Dei voluntatem, & ad iudicia eius inscrutabilia, atque infinitam diuinæ sapientiæ altitudinem, referendum est: At hoc esset falsum, si electio prædestinatorum ad gloriam, fieret ex præiudiciis meritis, tanquam à causa: Ergo illa non habet pro causa motiua præiudiciem meritorum, sed dñtaxat diuinam bonitatem. Maior constat primò ex Apostolo ad Roman. 9. vbi de causa nostræ prædestinationis ex instituto differens, eam refert in solam Dei miserentis voluntatem, eligentis hos, & relinquentis illos; & ad hoc probandum inducit exemplum duorum geminorum, Iacob & Esau, qui *cum nondum nati essent, nec aliquid boni egissent aut mali, non ex operibus, sed ex vocante dictum est, Iacob dilexi, Esau autem odio habui.* Et paulò, post: *Miserebor cuius misereor, & misericordiam præstabo cuius miserebor.* Id est (vt clariùs dicitur Exod. 33.) *miserebor cui voluero, & clemens ero in quem mihi placuerit.* Et iterum: *Non est volentis, neque currentis, sed miserentis Dei.* Et statim præuidens & præfocans querelam quam facturi erant gratuita prædestinationis impatientes, dum dicunt: *Quid adhuc quæritur? Voluntati enim eius quis resistit?* Subiungit increpando: *O homo in quis es qui respondeas Deo! Nunquid potest dicere figulus luti ei qui se finxit, quare me fecisti sic?* Vbi totam difficultatis decisionem ad simplicem Dei voluntatem reuocat. Et cap. xi, sequenti postquam satis diu locutus est de præ-



prædestinatione secundum propositum, totum discursum hac exclamatione concludit: *O altitudo divitiarum sapientiæ & scientiæ Dei, quam incomprehensibilia sunt iudicia eius, & inuestigabiles viæ eius?*

Eadem maior constat secundò ex Augustino de prædestin. sanct. cap. 7. ubi sic ait: *Ex duobus atate grandævis impijs, cur hic assumatur, & alter relinquatur: O iudicia Dei incomprehensibilia!* Et epist. 112. explicans significationem ligni crucis, ad profundum reducit occultam rationem cur unus eligatur, non verò alter. Item in lib. soliloquiorum animæ ad Deum cap. 28. quod est de profunda prædestinatione & præscientia Dei, alloquens Deum sic ait: *Mundas autem de nobis filijs hominum, eos in quibus tibi placuit habitare, quos ab inaccessibilibus profundis secretis iudiciorum incomprehensibilium sapientiæ tuæ, semper iustorum, licet occultorum, sine eorum meritis prædestinasti ante mundum, vocasti de mundo, iustificasti in mundo, & magnificas eos post mundum. Non omnibus autem hoc facis, quod admirantur tabescentes omnes sapientes terræ. Demum lib. de bono perseu. cap. 12. docet in paruulis sine baptismo decedentibus perperam recurri ad casum, cum nec passer cadat in terram sine voluntate patris cœlestis; vel ad incuriam parentum, quibus plerumque festinantibus, & paratis ministris, puer moritur; sed id tribuendum esse occultæ Dei voluntati, qui noluit ut illis applicaretur baptismus. Vnde Prosper ad cap. 4. Gall. Respiciantur etiam inter Christianos tot millia paruulorum, qui ab hac vita sine baptismo*

transferunt, quibus nec plantator prædicare, nec rigator potuit subuenire.

Constat tertio eadem maior ex D. Thoma hic q. 23. art. 5. ad 3. ubi hæc scribit: *Quare hos elegit ad gloriam, & alios reprobavit, non habet rationem nisi diuinam voluntatem: Vnde Augustinus dicit super Ioannem, quare hunc trahat & alium non trahat, noli velle diiudicare, si non vis errare. Sicut etiam in rebus naturalibus, quod hæc pars materia sit sub ista forma, & illa sub alia, dependet ex simplici diuina voluntate: Sicut ex simplici voluntate artificis dependet, quod ille lapis est in ista parte parietis, & ille in alia, quamuis ratio artis habeat quod aliqui sint in hac, & aliqui sint in illa. Similia habet 3. contra Gent. cap. 161.*

Minor etiam videtur manifesta, si enim electio prædestinatorum fieret ex præiudiciis, meritis tanquam à causa motiua, facile posset reddi ratio, cur vnus eligatur ad gloriam, non vero alter, nempe quia Deus præiudicat merita vnus, & mala opera alterius, subindeque non oporteret recurrere ad simplicem Dei voluntatem, & ad iudicia eius inscrutabilia. Vnde Augustinus in Enchirid. cap. 98. explicans prædictum locum Apostoli: *Iacob dilexi, Esau autem odio habui*, sic ait: *Qua iure si futura opera, vel bona huius, vel mala illius, quæ Deus utique præsciebat, vellet intelligi, nequaquam diceret non ex operibus, sed diceret ex futuris operibus, eoque modo istam solueret questionem, imò nullam quam soluere opus esset, faceret questionem. Et epist. 105. ad Sixtum: Quis (inquit) istum acutissimum sen-*

sensum defuisse Apostolo: non miretur! Hoc quippe ille non vidit; quando sibi velut obversantis obiecta questione, non id potius tam breue, tam apertum, tam sicut isti (scilicet Pelagiani) putant verum absolutumque respondit. Hic erat locus dicendi quod isti sentiunt & Non autem hoc dicit Apostolus.

Alterum argumentum ex scriptura desumptum, petitur ex eo quod prædestinatio frequenter sortis nomine in scriptura designatur: ad Ephes. 1. Sorte vocati sumus secundum propositum eius qui operatur omnia secundum consilium voluntatis sue. Ad Coloss. 1. Dignos nos fecit in partem sortis Sanctorum in lumine. Huius autem appellationis nulla alia ratio esse potest, nisi quia sicut aliquid dicitur sorte alicui contingere, quod ei accidit absque prævia causa & studio eius; ita prædestinationis nulla reperitur causa ex parte nostri; sed illa in solam gratuitam Dei electionem reducenda est. Hoc argumento ex sortis appellatione desumpto utitur S. Augustinus concione 2. super Psalm. 30. ad gratuitam prædestinationem electorum suadendam. Illam etiam probat lib. de gratia & libero arbitrio cap. 9. ex eo quod ad Roman. 6. vita æterna gratia Dei appellatur: Cum posset (inquit) dicere Apostolus, & rectè dicere, stipendium iustitiæ vita æterna, maluit tamen dicere, gratia Dei vita æterna ut hinc intelligeremus, non pro meritis nostris Deum nos ad æternam vitam, sed pro sua misericordia perducere. Quod verificari non potest de perductione ad vitam æternam in executione, quia hæc stipendium iustitiæ est, unde dicere quod datur sine

meritis, esset error : Ergo loquitur de illa in intentione , & de ipsa electione prædestinatorum ad gloriam, quæ est purè gratuita, quamuis ipsa gloria in executione per merita sit acquirenda .

Probatur secundò nostra sententia ex eodem Augustino , qui non solum locis iam relatis gratuitam Dei prædestinationem manifestè docet, sed etiam in libro de corrept. & gratia cap. 7. ubi sic ait : *Electi sunt* ( undecim Apostoli ) *ad regnandum cum Christo*, non quomodo electus est Iudas ad opus cui congruebat. Cum itaque audimus, nonne duodecim nos elegi, & unus ex vobis diabolus est ? Illos debemus intelligere electos per misericordiam ; illum per iudicium : Illos ergo elegit ad obtinendum regnum suum, illum ad effundendum sanguinem suum. Insigne est hoc testimonium pro nostra sententia, in eo enim est sermo de electione ad regnandum, atque adeò ad gloriam ; item de electione ante præuisa merita, utpote quam dicit factam per misericordiam, & non per iudicium, id est per discussionem meritorum .

Potest insuper nostra assertio suaderi argumento morali, desumpto ex effectibus quos Augustini de prædestinatione doctrina apud Massilienses produxit. Constat enim ex epistolis D. Prosperi & D. Hilarij ad Augustinum scriptis, Massilienses propterea fuisse turbatos, quod existimarent ex doctrina Augustini de prædestinatione, fatum induci, tolli libertatem arbitrij, in desperationem homines adduci, & alia similia, quæ nobis etiam obijciunt Aduersarij. Quoniam autem etiam ficto

colore, viri illi acutissimi; Augustino objiceret alia potuissent, si existimassent prædestinationem quam docebat, præscientiam operum seu humanæ cooperationis supponere. Delirium certè est, aliquid huiusmodi de tali prædestinatione somniare, cuius decretum omni ex parte in hominis potestate constituitur. Insanum verò credere est, illas ab eis profundi potuisse querimonias, qui ultro plena voce & professione protestabantur in eisdem epistolis Prosperi & Hilarij, se prædestinationem secundum præscientiam operum recipere, se illos ponere prædestinari atque eligi, quos Deus præscierit credituros; denique quid isertis verbis dicebant apud Faustum illorum corippeum. *Nisi præscientia exploraverit, prædestinatio nihil decernit: Ergo existimabant prædestinationem saluandorum, quam docebat Augustinus, omnem meritum præuisionem antecedere: Ergo cum Augustinus in libris quos rescripsit non negauerit hanc fuisse suam doctrinam, nec de Massiliensibus conquestus sit, quod sententiam alienam sibi imponerent, signum manifestum est, eam fuisse eius sententiam, quæ docet prædestinatos ad gloriam, fuisse ad eam electos ex mera Dei voluntate, ante præuisionem meritum.* Vnde cum sententia Augustini in materia de prædestinatione sit doctrina totius Ecclesiæ, & à pluribus Summis Pontificibus fuerit approbata: *Videant (inquit Baronius tomo 6. num. 32.) quanto peniculo quidam ex Recentioribus, dum in Nouatores insurgunt, ut eos confutent, à Sancti Augustini sententia de prædestinatione recedant; cum aliocum*

*dignum*. Similiter epist. 105. ad Sixtum ait quod eligendos fecit, non inuenit. Tertiò ex D. Prospero 2. de vocat. Gentium cap. 35. dicente: *Deus his quos elegit sine meritis dat unde ornantur ex meritis*. Quibus verbis apertè docet, merita esse effectus prædestinationis, non verò causam illius motiuam. Quartò ex D. Thoma in cap. 9. Epist. ad Roman. vbi sic ait: *Manifestum est quod omne beneficium quod homini conferit Deus ad salutem, est prædestinationis effectus: Diuinum autem beneficium non solum se extendit ad infusionem gratiæ, sed etiam ad gratiæ vsum*: Vnde cùm merita, seu bona opera, procedant ex bono vñ gratiæ, manifestum est, iuxta doctrinam D. Thomæ, illa esse prædestinationis effectus. Quintò ratione: Non possunt enim intelligi merita vt ad gloriam conducentia, sine dono perseverantiæ: Sed donum perseverantiæ est effectus prædestinationis, & subsequitur intentionem dandi gloriam: Ergo similiter & merita. Minor probatur, si donum perseverantiæ non subsequeretur, sed præcederet prædestinationem, daretur per prouidentiam generalem, subindeque omnibus conferretur, quòd est apertè falsum, & contra Augustinum locis supra §. 1. relatis, vbi asserit, nullum dicendum esse habuisse donum perseverantiæ, nisi qui perseverauerit vsque in finem, subindeque nisi fuerit prædestinatus..

Secunda ratio est: Licet intendens efficaciter dare aliquid alteri, per modum præmij, si non habeat in sua potestate eius merita necessariò priùs debeat illa præuidere, secùs tamen si habeat illa in sua potestate: Atqui Deus

habet in sua potestate merita hominum, quia hæc non de nostræ voluntatis potestate, sed de sua prædestinatione promittit & donat, ut docet Augustinus de prædest. Sanct. cap. 10. Ergo potest intendere efficaciter dare gloriam hominibus, per modum præmij & coronæ, antecedenter ad prævisionem meritum, obligando se, ex vi talis intentionis & voluntatis, ad dandum illis ipsa merita & bona opera, & quidquid ad merendum requiritur, iuxta illud quod ex D. Prospero iam retulimus: *Deus his quos elegit sine meritis dat unde ornantur ex meritis.*

Ex quo intelliges notabile discrimen quod intercedit quantum ad hoc inter Deum & Reges ac Principes terræ: nam Princeps non potest intendere efficaciter dare militi arma vel equum in præmium, nisi prius eius merita prævideri, quia in sua potestate non habet merita militum, nec illorum industriam, seu bonum usum equi & armorum: Deus verò in sua potestate habet merita hominum, & bonum usum liberi arbitrij, ut docet Augustinus lib. 1. retract. cap. 2. his verbis: *Quia omnia bona, & magna, & media, & infima à Deo sunt, sequitur ut à Deo sit & bonus usus liberæ voluntatis, qui in magnis numeratur bonis.* Quare potest ante merita prævisa intendere efficaciter dare hominibus gloriam, per modum præmij & coronæ, per merita danda conferendæ.

Tertia ratio, quæ præcipua & fundamentalis est, traditur à D. Thoma art. 4. huius quæst. 23. potestque sic breviter & clarè proponi. Qui ordinatè vult, prius vult suam, quam  
me-

media ad finem : Sed Deus ordinate vult : Ergo prius vult finem, quam media ad illum : Sed gloria est finis , & merita sunt media ad illum conducentia : Ergo prius vult gloriam, quam merita, & consequenter electio ad gloriam non est ex prauisione meritorum .

Nec valet quod respondent aliqui , maiorem non esse veram , quando quis vult finem alteri , vel quando finis intenditur vt præmium & vt corona, vt contingit in proposito . Nam siue finis intendatur sibi , siue alteri , siue habeat rationem præmij & coronæ , siue non , debet semper esse ratio volendi media , cum tota bonitas mediorum sumatur à bonitate finis : Ergo ille semper est prius volitus & intentus .

Non obest etiam quod alij dicunt , nimirum non esse necesse intentionem efficacem finis præcedere in Deo electionem efficacem mediorum , sed sufficere volitionem & intentionem finis inefficacem . Sicut enim ( inquiunt ) patet v. g. ex simplici & inefficaci voluntate , qua vult filium suum Doctorem vel Episcopum fieri , mouetur vt ei præbeat studiorum subsidia : ita etiam Deus ex inefficaci intentione & voluntate antecedente , qua vult omnibus dare gloriam, moueri potest ad electionem mediorum efficaciter ad illam conducentium . Non obest inquam hæc responsio , potest enim efficaciter confutari . Primò , quia electio mediorum debet proportionari intentioni finis : Ergo efficax electio medijs efficacis ad finem , efficacem finis intentionem supponere debet , vt debita proportio saluetur . Ille enim esset planè imprudens & stul-



stultius, qui non intenderet efficaciter aliquem finem, & tamen eligeret media efficaciter ad illum conducentia. Secundò, non minùs electio supponit intentionem, quam executio electionem: At realis & efficax finis executio per media, necessariò supponit efficacem electionem: Ergo pariter efficax electio, necessariò supponit efficacem intentionem. Nec valet exemplum adductum: Pater enim filio Episcopatum desiderans, non habet illum in sua potestate, neque exhibet media efficacia ad eius assecutionem, & sic non mirum quod illa mediorum dispositio, ex efficaci intentione finis non oriatur: Deus autem prædestinans homines ad gloriam, & finem acquirendum, & media ad illum efficaciter conducentia, nempe merita hominum, habet in sua potestate, ut supra ostensum est: unde repugnat ut ex inefficaci voluntate saluandi homines, moneatur ad electionem efficacem mediorum.

Ex his confutata manet aliorum responsio, qui dicunt ante merita præmissa volitam esse à Deo beatitudinem in communi, non tamen in particulari, & ut applicatum alicui determinatæ personæ, v. g. Petro. Nam volitio gloriæ solùm in communi, & nulli in particulari applicata, non potest esse efficax, sed tantùm simplex complacentia & amor illius; cùm beatitudo in communi, & ut abstrahit à circumstantiis & à personis in particulari, non possit in actu, nec sub hac ratione ab aliquo assequibilis sit: Ergo si electio efficax mediorum supponat intentionem efficacem finis, & non solùm simplicem complacentiam & amo-

rem

rem illius, vt iam ostendimus, ante volita & præuisa merita, debet supponi in Deo intentio beatitudinis in particulari, & vt applicata determinatis personis, & non solum volitatio Beatitudinis in communi, & vt abstrahit à circumstantijs & personis in particulari: Præterquam quod velle aliquid in communi, & postea in particulari, dicit imperfectionem, vtpote processum ab imperfecto ad perfectum: Ergo repugnat quod Deus prius velit gloriam hominibus in communi, & postea in particulari. Maximè quia voluntas consequens & efficax, qualis est electio ad gloriam, non fertur in res in communi, sed in particulari, & cum omnibus circumstantijs.

Demum facillè confutari potest solutio aliorum, qui dicunt intentionem efficacem finis præsupponi ad electionem mediorum, si media non solum sint efficacia, sed etiam formaliter vt talia eligantur: secus autem, si quamuis media efficacia sint, non tamen vt efficacia formaliter amentur, qualiter in præsentì contingere docent. In primis enim hæc responsio destruit decretum prædestinationis, de cuius intrinseca ratione est, quod sit præparatio mediorum efficacium, vt formaliter talia sunt & beneficiorum Dei quibus certissimè liberantur quicumque liberantur, vt ex definitione Augustini supra tradita constat. Deinde quæro, an quando Deus intendit efficaciter dare gloriam electis, in illo priori intentionis cognoscat efficaciam mediorum quæ ad illam producunt, vel non? Si non cognoscit, caret scientia, si verò eam cognoscit, & tamen illa vt efficacia non eligit, caret prudentia.

Quo-

Quomodo enim prudenter procedit qui intendens affecutionem alicuius finis, qui vnicè dependet ab efficacia mediorum, eligit media quæ quidem cognoscit esse efficacia, & tamen non vult ea ut efficacia? Sic enim manifestè exponitur casui & fortunæ, ac frustrationi finis quem intendit. Addo quod electio solùm efficax auxiliorum gratiæ quoad physicam entitatem, communis est prædestinatis & reprobis, cùm istis conferantur auxilia sufficientia, quæ iuxta Molinam, Lessium, & alios recentiores, non distinguuntur entitatiuè ab auxilijs efficacibus: At electio discernens prædestinatos à reprobis, nequit illis esse communis: Ergo debet esse efficax non solum respectu entitatis auxiliorum, sed etiam respectu efficaciz, & connexionis quam habent cum gloria.

## §. VII.

*Præcipuæ obiectiones solvuntur:*

**O**bjiciunt in primis Aduersarij illud Apostoli ad Roman. 8. *Quos præsciuit, hos & prædestinauit conformes fieri imagini filij sui*: Quibus verbis præscientia boni vltus liberi arbitrij videtur supponi ad prædestinationem. Vnde Ambrosius lib. 9. de fide: *Non ante prædestinauit quam præscierit, sed quorum merita præsciuit, eorum præmia prædestinauit*. Et Fulgentius lib. 5. ad Monim. *Prædestinauit ad regnum quos ad se præsciuit misericordiæ præuenientis auxilio redituros*:

Respondeo in prædicto Apostoli testimonio, verbum *prædestinauit*, significare comple-

pletam prædestinationem, siue actum imperij, in quo formaliter consistit: verbum autem præsciuit sibi pro præscientia antecedente quidem illum actum imperij, sed tamen consequente & fundata in ipsa electione efficaci ad gloriam, quæ est quasi radicalis & initiatiua prædestinatio. Vnde sensus Apostoli est, quos Deus consequenter ad eorum electionem efficacem ad gloriam, præsciuit esse futuros intuituè & radicaliter conformes imagini filij sui, hos per actum imperij completè prædestinauit, ad hoc vt sint completè & formaliter conformes eidem imagini filij sui: Quare ex illo loco solùm concluditur, præscientiam boni vsus liberi arbitrij, haberi initiatiuè à Deo, ante actum imperij, in quo formaliter consistit prædestinatio; sed non ante electionem efficacem ad gloriam, quæ actum illum præcedit, & dicitur prædestinatio radicaliter: In quo etiam sensu explicari possunt verba Ambrosij & Fulgentij, præsertim cum Augustinus de bono perseuer. cap. 18. dicat: *Quid nos prohibet quando apud aliquos verbi Dei tractatores legimus præscientiam Dei, & agitur de voluntate electorum, eandem intelligere prædestinationem.* Id est scientiam fundatam in decreto & prædefinitione voluntatis diuinæ.

Obijciunt secundò difficile Augustini testimonium, delumptum ex libro 1. ad Simplicianum quæst. 2. vbi sic ait: *Electio non præcedit iustificationem, sed electionem iustificatio, nemo enim eligitur, nisi iam distans ab illo qui reijcitur: vnde quod dictum est, quia elegit nos in ipso ante mundi constitutionem, non video*

*quomodo sit dictum, nisi præscentia.*

Relicta Bellarmini responsione, dicertis Augustinum libros ad Simplicianum iuvenem scripsisse, & senem effectum, sententiam de electione ad gloriam, quam loco citato docuerat, retractasse: Respondent plures ex nostris Thomistis, loqui Augustinum, non de electione æterna, sed de creatione electionis temporali, de qua verum est, eligendorum distantiam supponere, nec liberalem esse, sed ex iustitia. Verum hæc responsio efficaciter potest confutari, nam Augustinus, postquam de electione ad gloriam, de qua ibi loquebatur, asseruit distantiam eligendorum à reiiciendis supponere; de eadem electione explicans verba Apostoli ad Ephes. i. *Elegit nos in ipso ante mundi constitutionem*, asseruit non posse aliter intelligi, nisi præscentia; quia scilicet, quamvis ab æterno merita in re non supponat, supponit tamen illa ab æterno in mente diuina præuisa: At si loqueretur de electione temporali, sumpta pro executione, hæc explicatio verbis Apostoli adaptari non posset: cum executio electionis temporalis sit, & merita electorum tempore præexistentia supponat: Ergo illa interpretatio Augustini textui non congruit.

Melius ergo respondetur, præter decretum intentuum gloriæ, meritorum præuisionem antecedens, dari aliud executium circa gloriam, merita præuisa supponens. Nam sicut in nobis intentio & usus sunt duo actus voluntatis distincti, quorum primus electionem mediorum præcedit, secundus verò eam subsequitur, & circa executionem mediorum

& finis versatur: Ita de Deo nostro modo intelligendi asserendum est, & in voluntate diuina, præter electionem mediorum ad ordinem intentionis spectantem, admittendum est decretum executiuum, ab electione aliqua ratione distinctum, quod decretum est ipsa volitio qua Deus vult efficaciter exequi media quibus prædestinati suo tempore gloriam consequantur. Et de isto decreto intelligendum est id quod docet Augustinus loco citato, nempe illud supponere iustificationem à Deo præuisam in suo decreto, & præscientiam meritorum. In quo etiam sensu explicari possunt alij Patres, qui dicunt præscientiam meritorum antecedere prædestinationem; hoc enim verum est de prædestinatione sumpta pro decreto executiuo illius, non verò de prædestinatione sumpta pro decreto intentiuo gloriæ; quod merè gratuitum est, & præscientiam meritorum antecedens. Eodem modo intelligi & explicari debet D. Thomas dum super cap. 8. epistol. ad Romanos lect. 6. exponens hæc verba Apostoli, *quor præsciuit, hos & prædestinauit*, ait quod rationabiliter diceretur, quod præscientia meritorum est causa prædestinationis, si hoc intelligeretur de prædestinatione ad gloriam; non verò de prædestinatione ad gratiam, quia hoc esset ponere gratiam dari ex meritis nostris. Ibi enim S. Doctor sumit prædestinationem, non pro decreto intentiuo gloriæ, quod in eius sententia meritorum præuisionem antecedit, sed pro decreto executiuo illius, quod merita præuisa supponit; solumque intendit docere, hoc intercedere

discrimen inter prædestinationem ad gloriam, & prædestinationem ad gratiam, in ordine executionis consideratas ; quod prima non est purè gratuita, sed dependet à præscientia meritorum ; secunda verò est purè gratuita, & independens à meritis.

Duplex hoc decretum intentionum & executionum complexus est Augustinus serm 7. de verbis Apostoli, ubi ait : *Eligit autem Deus, sicut dicit Apostolus, secundum suam gratiam* ( ecce decretum intentionum liberale & gratuitum ) & *secundum illorum iustitiam*. En decretum executionum, merita præiusta supponens.

Ratio etiam suadet, duo illa decreta in Deo admittenda esse : Nam, actus exterior habere nequit honestatem alicuius virtutis specialis, nisi actus aliquis interior voluntatis, eadem honestate formaliter gaudeat ; sicut enim actui exteriori non competit formaliter libertas, ita nec honestas, seu bonitas moralis, quæ in libertate fundatur, eamque supponit : Sed exterior gloriæ collatio gaudet formaliter honestate iustitiæ, ut docent Theologi in tractatu de merito : Ergo datur aliquis actus voluntatis diuinæ, huiusmodi honestate formaliter gaudens, cumque electio ad gloriam spectans ad ordinem intentionis, tali honestate non gaudeat, sed sit purè gratuita & liberalis, admittendum est in Deo decretum executionum induens talem honestatem.

Confirmatur : Merita, cum sint media moralia, non aliter causant finis executionem, nisi mouendo voluntatem præmiantis, ut velit præmiū conferre : Ergo si merita iustorum

causent temporalem gloriæ executionem, mouent voluntatem diuinam, illamque inclinant ad gloriæ exhibitionem : Sed diuina voluntas temporaliter moueri non potest, nec motuum aliquod de nouo in tempore habere, sicut nec in tempore aliquid velle de nouo : Ergo ab æterno mouetur à meritis, cumque de voluntate gloria in æterna hoc nequeat verificari, necessariò admittendum est in Deo Decretum aliquod executiuum, ab intentiuo distinctum, quod merita præuisa supponat, & ab illis tanquam à causa motiua dependeat. Per hanc doctrinam, & huius duplicis decreti distinctionem, non solum explicantur plura SS. Patrum testimonia, quæ videntur militare contra nostram sententiam, sed etiam præcipua Aduersariorum fundamenta soluuntur, vt constabit ex modo dicendis.

Obijcitur ergo tertio : Gloria in executione non confertur adultis, nisi vt præmium meritorum : Ergo ab æterno Deus non aliter eam conferre decreuit, nisi ex præuisis meritis. Probatur consequentia : Non enim ab æterno alio modo gloria fuit volita & decreta, nisi eo quo in tempore executioni mandatur : Ergo si in tempore non conferatur nisi dependenter à meritis, etiam ab æterno non fuit volita & decreta, nisi ex illis vt præuisis.

Respondeo, concessio Antecedente ; distinguendo consequens : Deus ab æterno non aliter gloriam conferre decreuit, quam ex præuisis meritis, decreto intentiuo, nego. Decreto executiuo, concedo. Ad probationem similiter dicendum est, decretum intentiuum



habet in sua potestate merita hominum, quia hæc non de nostræ voluntatis potestate, sed de sua prædestinatione promittit & donat, ut docet Augustinus de prædest. Sanct. cap. 10. Ergo potest intendere efficaciter dare gloriam hominibus, per modum præmij & coronæ, antecedenter ad prævisionem meritorum, obligando se, ex vi talis intentionis & voluntatis, ad dandum illis ipsa merita & bona opera, & quidquid ad merendum requiritur, iuxta illud quod ex D. Prospero iam retulimus: *Deus his quos elegit sine merito dat unde ornantur ex meritis.*

Ex quo intelliges notabile discrimen quod intercedit quantum ad hoc inter Deum & Reges ac Principes terræ: nam Princeps non potest intendere efficaciter dare militi arma vel equum in præmium, nisi prius eius merita prævideri, quia in sua potestate non habet merita militum, nec illorum industriam, seu bonum usum equi & armorum: Deus verò in sua potestate habet merita hominum, & bonum usum liberi arbitrij, ut docet Augustinus lib. 1. retract. cap. 3. his verbis: *Quia omnia bona, & magna, & media, & infima à Deo sunt, sequitur ut à Deo sit & bonus usus liberæ voluntatis, qui in magnis numeratur bonis.* Quare potest ante merita prævisa intendere efficaciter dare hominibus gloriam, per modum præmij & coronæ, per merita danda conferendæ.

Tertia ratio, quæ præcipua & fundamentalis est, traditur à D. Thoma art. 4. huius quæst. 23. potestque sic breviter & clarè proponi. Qui ordinatè vult, prius vult suam, quam me-

media ad finem : Sed Deus ordinatè vult : Ergo priùs vult finem, quam media ad illum : Sed gloria est finis , & merita sunt media ad illum conducentia : Ergo priùs vult gloriam, quam merita, & consequenter electio ad gloriam non est ex præuisione meritorum .

Nec valet quod respondent aliqui , maiorem non esse veram , quando quis vult finem alteri , vel quando finis intenditur vt præmium & vt corona, vt contingit in proposito . Nam siue finis intendatur sibi, siue alteri, siue habeat rationem præmij & coronæ, siue non , debet semper esse ratio volendi media , cum tota bonitas mediorum sumatur à bonitate finis : Ergo ille semper est priùs volitus & intentus .

Non obest etiam quod alij dicunt , nimirum non esse necesse intentionem efficacem finis præcedere in Deo electionem efficacem mediorum , sed sufficere volitionem & intentionem finis inefficacem . Sicut enim ( inquirunt ) patet v. g. ex simplici & inefficaci voluntate , qua vult filium suum Doctorem vel Episcopum fieri , mouetur vt ei præbeat studiorum subsidia : ita etiam Deus ex inefficaci intentione & voluntate antecedente, qua vult omnibus dare gloriam, moueri potest ad electionem mediorum efficaciter ad illam conducentium . Non obest inquam hæc responsio , potest enim efficaciter confutari . Primò , quia electio mediorum debet proportionari intentioni finis : Ergo efficax electio mediij efficacis ad finem , efficacem finis intentionem supponere debet , vt debita proportio saluetur . Ille enim esset planè imprudens & stul-

stultus, qui non intenderet efficaciter aliquem finem, & tamen eligeret media efficaciter ad illum conducentia. Secundò, non minùs electio supponit intentionem, quam executio electionem: At realis & efficax finis executio per media, necessariò supponit efficacem electionem: Ergo pariter efficax electio, necessariò supponit efficacem intentionem. Nec valet exemplum adductum: Pater enim filio Episcopatum desiderans, non habet illum in sua potestate, neque exhibet media efficacia ad eius assentionem, & sic non mirum quod illa mediorum dispositio, ex efficaci intentione finis non oriatur: Deus autem prædestinans homines ad gloriam, & finem acquirendum, & media ad illum efficaciter conducentia, nempe merita hominum, habet in sua potestate, vt supra ostensum est: vnde repugnat vt ex inefficaci voluntate saluandi homines, moneatur ad electionem efficacem mediorum.

Ex his confutata manet aliorum responsio, qui dicunt ante merita præuisa volitam esse à Deo beatitudinem in communi, non tamen in particulari, & vt applicatum alicui determinatæ personæ, v. g. Petro. Nam volitio gloriæ solùm in communi, & nulli in particulari applicata, non potest esse efficax, sed tantùm simplex complacentia & amor illius; cùm beatitudo in communi, & vt abstrahit à circumstantijs & à personis in particulari, non possit in actu, nec sub hac ratione ab aliquo assequibilis sit: Ergo si electio efficax mediorum supponat intentionem efficacem finis, & non solùm simplicem complacentiam & amorem

rem illius, vt iam ostendimus, ante volita & præuisa merita, debet supponi in Deo intentio beatitudinis in particulari, & vt applicatæ determinatis personis, & non solum volitatio Beatitudinis in communi, & vt abstrahit à circumstantijs & personis in particulari. Præterquam quod velle aliquid in communi, & postea in particulari, dicit imperfectiorem, vtpote processum ab imperfecto ad perfectum: Ergo repugnat quod Deus prius velit gloriam hominibus in communi, & postea in particulari. Maxime quia voluntas consequens & efficax, qualis est electio ad gloriam, non fertur in res in communi, sed in particulari, & cum omnibus circumstantijs.

Denum facile confutari potest solutio aliorum, qui dicunt intentionem efficacem finis præsupponi ad electionem mediorum, si media non solum sint efficacia, sed etiam formaliter vt talia eligantur: secus autem, si quamuis media efficacia sint, non tamen vt efficacia formaliter amentur, qualiter in præsentì contingere docent. In primis enim hæc responsio destruit decretum prædestinationis, de cuius intrinseca ratione est, quod sit præparatio mediorum efficacium, vt formaliter talia sunt & beneficiorum Dei quibus certissime liberantur quicumque liberantur, vt ex definitione Augustini supra tradita constat. Deinde quæro, an quando Deus intendit efficaciter dare gloriam electis, in illo priori intentionis cognoscat efficaciam mediorum quæ ad illam producant, vel non? Si non cognoscit, caret scientia, si verò eam cognoscit, & tamen illa vt efficacia non eligit, caret prudentia.

Quo-

Quomodo enim prudenter procedit qui intendens affecutionem alicuius finis, qui vnicè dependet ab efficacia mediorum, eligit media quæ quidem cognoscit esse efficacia, & tamen non vult ea vt efficacia? Sic enim manifestè exponitur casui & fortunæ, ac frustrationi finis quem intendit. Addo quod electio solùm efficax auxiliorum gratiæ quoad physicam entitatem, communis est prædestinatis & reprobis, cum istis conferantur auxilia sufficientia, quæ iuxta Molinam, Lessium, & alios recentiores, non distinguuntur entitatiuè ab auxilijs efficacibus: At electio discernens prædestinatos à reprobis, nequit illis esse communis: Ergo debet esse efficax non solum respectu entitatis auxiliorum, sed etiam respectu efficacix, & connexionis quam habent cum gloria.

## §. VII.

### *Præcipuæ obiectiones solvuntur.*

**O**bjiciunt in primis Aduersarij illud Apostoli ad Roman. 8. *Quos præsciuit, hos & prædestinavit conformes fieri imagini filij sui*: Quibus verbis præscientia boni vultus liberi arbitrij videtur supponi ad prædestinationem. Vnde Ambrosius lib. 9. de fide: *Non ante prædestinavit quam præscierit, sed quorum merita præsciuit, eorum præmia prædestinavit*. Et Fulgentius lib. 5. ad Monim. *Prædestinavit ad regnum quos ad se præsciuit misericordiæ præuenientis auxilio redituros*:

Respondeo in prædicto Apostoli testimonio, verbum *prædestinavit*, significare comple-

pletam prædestinationem, siue actum imperij, in quo formaliter consistit: verbum autem præsciuit sumi pro præscientia antecedente quidem illum actum imperij, sed tamen consequente & fundata in ipsa electione efficaci ad gloriam, quæ est quasi radicalis & initiatiua prædestinatio. Vnde sensus Apostoli est, quos Deus consequenter ad eorum electionem efficacem ad gloriam, præsciuit esse futuros intuitiue & radicaliter conformes imagini filij sui, hos per actum imperij completè prædestinauit, ad hoc vt sint completè & formaliter conformes eidem imagini filij sui: Quare ex illo loco solùm concluditur, præscientiam boni vsus liberi arbitrij, haberi initiatiue à Deo, ante actum imperij, in quo formaliter consistit prædestinatio; sed non ante electionem efficacem ad gloriam, quæ actum illum præcedit, & dicitur prædestinatio radicaliter. In quo etiam sensu explicari possunt verba Ambrosij & Fulgentij, præsertim cum Augustinus de bono perseuer. cap. 18. dicat: *Quid nos prohibet quando apud aliquos verbi Dei tractatores legimus præscientiam Dei, & agitur de voluntate electorum, eandem intelligere prædestinationem.* Id est scientiam fundatam in decreto & prædefinitione voluntatis diuinæ.

Obijciunt secundo difficile Augustini testimonium, delumptum ex libro 1. ad Simplicianum quæst. 2. vbi sic ait: *Electio non præcedit iustificationem, sed electionem iustificatio, nemo enim eligitur, nisi iam distans ab illo qui reijcitur: unde quod dictum est, quia elegit nos in ipso ante mundi constitutionem, non video*

*quomodo sit dictum, nisi præscientia.*

Relicta Bellarmini responsione, dicentis Augustinum libros ad Simplicianum iuvenem scripsisse, & senem effectum, sententiam de electione ad gloriam, quam loco citato docuerat, retractasse: Respondent plures ex nostris Thomistis, loqui Augustinum, non de electione æterna, sed de creatione electionis temporali, de qua verum est, eligendorum distantiam supponere, nec liberalem esse, sed ex iustitia. Verùm hæc responsio efficaciter potest confutari, nam Augustinus, postquam de electione ad gloriam, de qua ibi loquebatur, asseruit distantiam eligendorum à rejiciendis supponere; de eadem electione explicans verba Apostoli ad Ephes. i. *Elegit nos in ipso ante mundi constitutionem*, asseruit non posse aliter intelligi, nisi præscientia; quia scilicet, quamvis ab æterno merita in re non supponat, supponit tamen illa ab æterno in mente diuina præuisa: At si loqueretur de electione temporali, sumpta pro executione, hæc explicatio verbis Apostoli adaptari non posset: cum executio electionis temporalis sit, & merita electorum tempore præexistentia supponat: Ergo illa interpretatio Augustini textui non congruit.

Melius ergo respondetur, præter decretum intentionum gloriæ, meritum præuisionem antecedens, dari aliud executium circa gloriam, merita præuisa supponens. Nam sicut in nobis intentio & usus sunt duo actus voluntatis distincti, quorum primus electionem mediorum præcedit, secundus verò eam subsequitur, & circa executionem mediorum

& finis versatur: Ita de Deo nostro modo intelligendi asserendum est, & in voluntate diuina, præter electionem mediorum ad ordinem intentionis spectantem, admittendum est decretum executiuum, ab electione aliqua ratione distinctum, quod decretum est ipsa volitio qua Deus vult efficaciter exequi media quibus prædestinati suo tempore gloriam consequantur. Et de isto decreto intelligendum est id quod docet Augustinus loco citato, nempe illud supponere iustificationem à Deo præuisam in suo decreto, & præscientiam meritorum. In quo etiam sensu explicari possunt alij Patres, qui dicunt præscientiam meritorum antecedere prædestinationem; hoc enim verum est de prædestinatione sumpta pro decreto executiuo illius, non verò de prædestinatione sumpta pro decreto intentiuo gloriæ, quod merè gratuitum est, & præscientiam meritorum antecedens. Eodem modo intelligi & explicari debet D. Thomas dum super cap. 8. epistol. ad Romanos lect. 6. exponens hac verba Apostoli, *quos præsciuit, hos & prædestinauit*, ait quod rationabiliter diceretur, quod præscientia meritorum est causa prædestinationis, si hoc intelligeretur de prædestinatione ad gloriam, non verò de prædestinatione ad gratiam, quia hoc esset ponere gratiam dari ex meritis nostris. Ibi enim S. Doctor sumit prædestinationem, non pro decreto intentiuo gloriæ, quod in eius sententia meritorum præuisionem anteuertit, sed pro decreto executiuo illius, quod merita præuisa supponit; solumque intendit docere, hoc intercedere



discrimen inter prædestinationem ad gloriam, & prædestinationem ad gratiam, in ordine executionis consideratas; quod prima non est purè gratuita, sed dependet à præscientia meritorum; secunda verò est purè gratuita, & independens à meritis.

Duplex hoc decretum intentionum & executionum complexus est Augustinus serm. 7. de verbis Apostoli, ubi ait: *Eligit autem Deus, sicut dicit Apostolus, secundum suam gratiam* (ecce decretum intentionum liberale & gratuitum) & *secundum illorum iustitiam*. En decretum executionum, merita præiusta supponens.

Ratio etiam suadet, duo illa decreta in Deo admittenda esse: Nam actus exterior habere nequit honestatem alicuius virtutis specialis, nisi actus aliquis interior voluntatis, eadem honestate formaliter gaudeat; sicut enim actui exteriori non competit formaliter libertas, ita nec honestas, seu bonitas moralis, quæ in libertate fundatur, eamque supponit: Sed exterior gloriæ collatio gaudet formaliter honestate iustitiæ, ut docent Theologi in tractatu de merito: Ergo datur aliquis actus voluntatis diuinæ, huiusmodi honestate formaliter gaudens, cumque electio ad gloriam spectans ad ordinem intentionis, tali honestate non gaudeat, sed sit purè gratuita & liberalis, admittendum est in Deo decretum executionum induens talem honestatem.

Confirmatur: Merita, cum sint media moralia, non aliter causant finis executionem, nisi mouendo voluntatem præmiantis, ut velit præmiū conferre: Ergo si merita iustorum cau-

causent temporalem gloriæ executionem, movent voluntatem diuinam, illamque inclinant ad gloriæ exhibitionem : Sed diuina voluntas temporaliter moueri non potest, nec motum aliquod de nouo in tempore habere, sicut nec in tempore aliquid velle de nouo : Ergo ab æterno mouetur à meritis, cumque de voluntate gloria in ætæna hoc nequeat verificari, necessariò admittendum est in Deo Decretum aliquod executiuum, ab intentiuo distinctum, quod merita præuisa supponat, & ab illis tanquam à causa motiua dependeat. Per hanc doctrinam, & huius duplicis decreti distinctionem, non solum explicantur plura SS. Patrum testimonia, quæ videntur militare contra nostram sententiam, sed etiam præcipua Aduersariorum fundamenta soluantur, vt constabit ex modo dicendis.

Obijcitur ergo tertiò : Gloria in executione non confertur adultis, nisi vt præmium meritorum : Ergo ab æterno Deus non aliter eam conferre decreuit, nisi ex præuisis meritis. Probatur consequentia : Non enim ab æterno alio modo gloria fuit volita & decreta, nisi eo quo in tempore executioni mandatur : Ergo si in tempore non conferatur nisi dependenter à meritis, etiam ab æterno non fuit volita & decreta, nisi ex illis vt præuisis.

Respondeo, concessio Antecedente ; distinguendo consequens : Deus ab æterno non aliter gloriam conferre decreuit, quam ex præuisis meritis, decreto intentiuo, nego. Decreto executiuo, concedo. Ad probationem similiter dicendum est, decretum intentiuum

cum executione in modo attingendi obiectum non adæquari, imò potius opposito modo procedere, vnde enim incipit intentio, desinit & terminatur executio; bene tamen decretum executivum: Vnde de isto quidem verum est, ab æterno per illud gloriam esse volitam, eo modo quo confertur in tempore, non tamen de alio.

Dices primò: Omni decreto Dei efficaci debet ex parte effectus aliquid respondere: At in gloria, prout in re confertur, nihil relucet quod correspondeat decreto intentivo, liberali & gratuito: Ergo tale decretum repugnat, supposito quod in tempore gloria conferatur ex meritis.

Respondeo, concessa maiori, negando minorem, vt enim decreto efficaci intentivo, liberali, & gratuito, aliquid correspondeat in re, sufficit quod licet exterior gloriæ collatio sit formaliter ex iustitia, & non liberalis formaliter, sit tamen liberalis in radice, nempe in collatione primæ gratiæ iniciantis merita gloriæ, quæ ex illius intentione gratuita traxit originem; ex quo provenit quod ipsa gloriæ collatio, virtualiter, & in radice, gratuita sit.

Dices secundò: Isti duo actus, gratis volo dare gloriam, & volo dare gloriam ex meritis, & vt coronam, videntur inter se pugnantes & impossibiles: Ergo & duo producta decreta quæ in Deo admittimus, cum per primum Deus gratis velit dare gloriam, & per secundum eam velit dare ex meritis, & vt coronam.

Respondeo negando Antecedens, nam in  
pri-

primo actu ly *gratis* cadit supra actum, & excludit merita, non à gloria vt danda, sed à motiua voluntatis intendentis dare gloriam: In secundo verò ly *ex meritis* cadit supra obiectum, siue rem dandam, scilicet gloriam, quam Deus non vult dare sine meritis, vnde inter diuina prædicta decreta nulla est repugnantia vel impossibilitas.

## §. VIII.

*Præcipui prædestinationis effectus.*

**D**ico primò: Glorificatio, iustificatio, & vocatio efficax, sunt effectus prædestinationis. Constat ex illo Apostoli ad Roman. 8. *Quos prædestinauit, hos & vocauit, quos autem vocauit, hos & iustificauit; quos autem iustificauit, hos & glorificauit.* Ratio est, quia ad hoc vt aliquid sit prædestinationis effectus, tria requiruntur, primò quod sit à Deo gloriam dare volente, secundò quod detur ex sola intentione dandi gloriam, tertiò quod de facto conducat ad gloriæ affecutionem: Sed Deus confert de facto beatitudinem, iustificat, & efficaciter vocat electum, ex intentione illi dandi gloriam, ad quam de facto peruenit: Ergo prædicta sunt prædestinationis effectus.

Dices primò, prædestinatio non est de fide, sed de medijs, vnde ab Augustino definitur, *præscientia & preparatio mediorum, quibus certissimè liberantur, quicumque liberantur.* Sed glorificatio finis est, & non medium: Ergo non est prædestinationis effectus.

Respondedo prædestinationem immediatè esse de medijs, quia tamen hæc in executione efficaciter inferunt finem, mediatè esse de fine.

Dices secundò: Effectus prædestinationis nequeunt esse reprobis & prædestinatis communes: Sed iustificatio & vocatio sunt communes electis & reprobis, cum multoties istis concedantur; Ergo non sunt prædestinationis effectus.

Respondedo, concessa maiori negando minorem; licet enim vocatio & iustificatio possint in reprobis inueniri, non tamen eodem modo quo in prædestinatis; quia in his inueniuntur cum ordinatione efficaci, & perseverantia usque ad consecutionem gloriæ, in reprobis sine illa, unde non eodem modo se habent.

Dico secundò, gratia interrupta per peccatum, non solum ut recuperata per poenitentiam, sed etiam in primò collata, est effectus prædestinationis: Illa enim cum effectu conducit ad finem prædestinationis, & influit in beatitudinem, cum propter illam detur prædestinatio novus gradus gloriæ, ultra gradum correspondentem gratiæ in qua resurgit, vel saltem detur idem gradus gloriæ novo titulo: De quo Theologi in tractatu de poenitentia, cum agunt de reuiuiscencia meritorum. Neque obest si dicas, quod talis gratia non valet ad gloriæ consecutionem, nisi ut per poenitentiam restituta. Hoc enim verum est, si particula *ut* denotet conditionem requisitam, sine qua talis gratia non influit in gloriam; secus autem si exprimat & significet

cet rationem formalem talis influxus ; sic enim non est à pœnitentia, quæ se habet tantum vt remouens prohibens , sed à iure & proportionem quam habet gratia sanctificans respectu gloriæ .

Dices : Etsi gratiæ quam Adamus habuit in statu innocentia , aliquis gradus gloriæ correspondeat, & consequenter ad finem prædestinationis conducatur , ea tamen , vt primò collata , non fuit effectus prædestinationis illius , sed solum vt per pœnitentiam reparata : Ergo idem dicendum est de gratia primò nobis collata , interrupta per peccatum , & per pœnitentiam restituta .

Sed nego consequentiam & paritatem. Ratio discriminis est , quia cum gratia status innocentia non præsupposuerit præscientiam & prædestinationem Christi, nec ex eius meritis data fuerit , vt in tractatu de incarnatione ostendemus , non fuit imperata ab intentione efficaci glorificandi Adamum , quæ fuit posterior Christi prædestinatione ; vnde ex vi primæ infusionis non dicebat ordinem ad finalem perseuerantiam , sed solum ex vi reparationis factæ per Christum . In nostra autem gratia , quatenus primò collata , oppositum contingit ; cum enim prima illius collatio sit ex meritis Christi , eiusque prædestinatione a supponat , ex intentione gloriæ in electis præparatur ex vi primæ infusionis dicit ordinem ad gloriam , & ad perseuerantiam finalem .

Dico tertio , licet vocationes inefficaces non sint effectus à prædestinatione immediate elicitæ , ab ea tamen imperantur & ordi-

nantur in proprium finem, nempe salutem electorum.

Prima pars patet, tum quia vocationes inefficaces, & auxilia insufficientia, cum sint communia electis & reprobis, sunt à providentiâ generali ordinis supernaturalis. Tum etiam, quia cum prædestinatio ex Augustino sit præparatio beneficiorum quibus electi certissimè liberantur, illæ solùm vocationes inter effectus à prædestinatione elicitos computari debent, quæ efficaciter & certissimè ad finem illius conducunt. Et in hoc sensu intelligenda sunt aliqua SS. Patrum testimonia, quibus asserere videntur, solas vocationes efficaces, & congruas, aut secundum propositum, esse prædestinationis effectus; loquuntur enim de effectibus prædestinationis; elicitis, & immediatè ab illa procedentibus: unde hanc partem nostræ conclusionis probant, sed non militant contra secundam, quæ hac ratione suadetur. Quidquid ad finem prædestinationis aliquo modo conducit, potest ab ea imperari, & mediatè saltem procedere, & de factò ab ea imperatur; cum ad potentiam seu virtutem quæ respicit finem, pertineat imperare ea quæ aliquo modo ad illum conducunt: Atqui licet vocationes inefficaces in prædestinatis, non conducant ad gloriam immediatè, mediatè tamen & dispositivè ad illam conducunt, quatenus paulatim emolliunt cor hominis, ut tandem Deo vocanti respondeat. vel obiectivè, quatenus in memoriam redactæ excitant ad gratiarum actionem & humilitatem, propter resistentiâ præteritam: Ergo à prædestinatione,

me-

mediatè saltem, & imperatiuè: procedunt.

Dices: Ille imprudenter agit, qui ex intentione efficaci finis imperat media quæ scit esse inefficacia ad illum obtinendum: Ergo videtur incongruum quod Deus ex efficaci intentione beatitudinis, imperet vocationes aliquas inefficaces, quæ debent frustrari suo effectû.

Respondeo imprudenter quidem agere illum, qui ex intentione efficaci finis imperat media omnimodè inefficacia; secus verò si ex illa imperet media secundùm quid efficacia, quamvis simpliciter inefficacia ad obtinendum finem. Quin potius aliquando id veram prudentiam exigere, sicut in nostro casu; nimirum ut per vocationes inefficaces ad actum perfectum, sed efficaces ad alios actus minùs perfectos, paulatim emolliatur cor hominis, & disponatur ad perfectam conuersionem, ipsique ostendatur infirmitas sua, inconstantia, ingratitude, & alia, ob quæ deinde magis humilietur.

Dico quartò, permissionem peccati in electis, esse effectum prædestinationis illorum.

Probatur ratione fundamentali: Quod fit à Deo propter salutem & fructum spiritua-lem, est prædestinationis effectus: Sed præmissio peccati (id est denegatio auxilij efficaci ad illud vitandum) in electis fit ex intentione salutis, & propter fructum spiritua-lem illorum: Ergo est prædestinationis effectus. Maior constat, minor verò probatur primò ex illo Apostoli ad Roman. 8. *Diligentibus Deum omnia cooperantur in bonum*. Vbi glossa addit, *etiam ipsa peccata*, & D. Thomas



ibidem lect. 8. docet peccata prædestinatorum cooperari ipsis in bonum. Idem passim asserunt SS. Patres : Augustinus enim de correptione & gratia cap. 9. hæc scribit : *Diligentibus Deum omnia cooperantur in bonum, usque adeo prorsus omnia; ut etiam si qui eorum deviant & exorbitant, etiam hoc ipsum eis faciat proficere in bonum, quia meliores redeunt atque cautiores.* Ambrosius Apolog. 1. pro Davide cap. 2. *Sancti sicuti fortè ut homines corruerint, natura magis fragilitate quam peccandi libidine, acriores ad currendum resurgunt, pudoris stimula maiora reparantes certamina, ut non solum nullum attulisse aestimetur lapsus impedimentum, sed etiam velocitatis incentiva cumulasse.* Gregorius 2. moral. cap. 26. *Fit ut aliquando se hæc gratia utiliter subtrahat, & præsumenti, quantum in se infirmetur, ostendat, tunc enim verè cognoscimus bona nostra unde sint, quando hæc quasi amittendo, sentimus quia à nobis servari non possunt.* Denique S. Thomas 1. 2. quæst. 79. art. 4. ait quod ex divina misericordia excacatio ad tempus ordinatur medicinaliter ad salutem eorum qui excacantur, sed hæc misericordia non omnibus impenditur excacatis, sed prædestinatis solum, quibus omnia cooperantur in bonum.

Probatur secundò eadem minor ratione : Permissio peccati est volita à Deo propter aliquem bonum finem : Deus enim (inquit Augustinus in Enchiridio cap. 11.) *cùm sit summè bonus, nullo modo fineret aliquid mali esse in operibus suis, nisi esset adeò omnipotens & bonus, ut benefaceret etiam de malo :* Sed non

potest cogitari finis permissionis peccati, qui sit melior, & ordini diuinæ sapientiæ & providentiæ convenientior, quam salus & profectus spiritualis ipsorum electorum: Ergo ex eius intentione & amore est volita à Deo in electis, seu à prædestinatione imperata permissio peccatorum.

Obijcies primò: Permissio peccati est à providentia Dei generali, cuius est permittere defectus siue morales siue phÿsicos in vniuerso, vt inde eius ordo & pulchritudo magis reluceat: Ergo non est effectus prædestinationis.

Sed nego consequentiam, non sicut conclusionem præcedenti dicebamus, licet vocationes inefficaces sint elicitivè à providentia Dei generali, prout tamen ad finem prædestinationis conducunt, ab ista imperantur. Ita similiter, licet permissio peccati secundùm se considerata, vel vt conduçens ad pulchritudinem vniuersi, & manifestationem diuinorum attributorum, sit elicitivè à providentia Dei generali; vt tamen conducit ad bonum electorum, modo iam explicato, mediatè & imperativè à prædestinatione procedit, subindeque est eius effectus, non quidem elicitus, sed imperatus.

Obijcies secundò: Omnis effectus prædestinationis debet esse gratia, imò & gratia per Christum: Sed permissio peccati non est gratia, sed gratiæ denegatio, nec est ex meritis Christi, cùm Christus non meruerit quod gratia prædestinatis subtraheretur, sed è contra quod illis daretur ad vitanda peccata: Ergo permissio peccati non est prædestinationis effectus.

Respondeo distinguendo maiorem: Omnis effectus prædestinationis debet esse gratia, vel intrinsecè & ratione sui, vel extrinsecè & ratione illius ad quod ordinatur, concedo maiorem. Ratione sui, & intrinsecè semper, nego maiorem, & sub eadem distinctione minoris, nego consequentiam. Nam licet peccati permissio, ratione sui, & intrinsecè gratia non sit, sed gratiæ carentia, nec prout sit possit esse effectus meritorum Christi, prout tamen extrinsecè ordinatur, ut prædestinatus humilior resurgens, perselleret in gratia, est extrinsecè gratia, & ex meritis Christi. Vnde sub hac ratione potest à nobis in oratione postulari, sicut fuit postulata à Christo, qui omne præmium meritorum suorum, omnesque nostræ prædestinationis effectus, à Patre postulauit. Quamuis aliqui ex nostris Thomistis non improbabiler dicant, illud inter Christum & nos intercedere discrimen, quod voluntas Christi non erat ipsa quæ peccatum erat commissura, & ideo potuit postulare permissionem peccati, absque eo quod possit inferri quod in peccato permissio sibi complacuerit: voluntas autem nostra peccatum est commissura, vnde si illius permissionem peteret, in peccato, virtualiter saltem & indirectè, sibi complaceret.

Ex dictis colligitur, permissionem peccatorum in reprobis, esse effectum prædestinationis electorum, cum ad illorum bonum & fructum spirituales conducat. Nam ut discurret S. Thomas super caput 8. epist. ad Roman. lect. 6. Sicut mala naturalia quæ accidunt in vniuerso, non semper ordinantur ad

bonum illorum quibus accidunt, bene tamen ad bonum vniuersi: ita malum culpæ, seu permissio illius, non semper eligitur in bonum eius cui permittitur peccatum, bene tamen in bonum nobilissimarum partium vniuersi, scilicet electorum, iuxta illud Proverb. 11. *Qui stultus est seruiet sapienti, quia nimirum (inquit S. Doctor) etiam mala peccatorum, in bonum iustorum cedunt.*

Dico vltimò, substantiam prædestinati esse effectum prædestinationis illius.

Probatur: Quidquid aliquo modo ad prædestinationem conducit, si fiat ex intentione gloriæ, est effectus prædestinationis, saltem imperatus: At substantia prædestinati conducit ad prædestinationem, & aliàs fit ex intentione gloriæ, quæ est finis prædestinationis: Ergo est effectus illius, saltem imperatus. Maior constat, licet enim vt aliquid sit effectus prædestinationis elicitus & immediatus, requiratur quod ad illam ordinatur vt medium ad finem; vt tamen sit effectus illius imperatus & remotus, sufficit quod ad prædestinationem aliquo modo conducatur, si fiat ex intentione gloriæ, quæ est finis prædestinationis. Minor etiam quantum ad primam partem euidens est, nam substantia prædestinati est causa efficiens actuum quibus homo iustificatur & promeretur gloriam; est etiam causa efficiens ipsius gloriæ, & visionis beatificæ, quam producit mediante intellectu, per lumen gloriæ eleuato; illa etiam potest esse motiuum per modum obiecti, gratiarum actionis pro creationis & conseruationis beneficio: Ergo substantia prædestinati ad

prædestinationem conducit.

Quod verò fiat ex intentione gloriæ, vt asserit secunda pars minoris, sic ostenditur. Non repugnat ab intrinseco quod substantia prædestinati fiat ex intentione gloriæ, & aliàs sic fieri congruit extensioni prædestinationis in prouidendo, & ostendit maximum amorem Dei erga electos, & curam specialem quam de illis habet: Ergo de facto substantia prædestinati fit ex intentione gloriæ. Consequentia patet, Antecedens etiam, quoad secundam partem, manifestum est, probatur verò quantum ad primum. Primò, quia ex vi decreti quo electus fuit Christus, vt sit filius Dei naturalis, fuit factus Christus vt homo, qui est prædestinationis subiectum, vt docent Theologi in tractatu de Incarnatione, dum agunt de prædestinatione Christi. Item ex vi decreti ordinantis hominem ad beatitudinem naturalem posset fieri homo, si conderebatur in natura pura: Ergo ex vi decreti efficaciter ordinantis ad gloriam, potest fieri, saltem imperatiuè, substantia subiecti ad gloriam ordinati. Secundò, si aliqua repugnantia in hoc esset, maximè quia substantia prædestinati, cum sit gloriæ subiectum, debet ad illius intentionem supponi, & consequenter ex vi illius non potest fieri: At hæc ratio nulla est: Ergo hoc non repugnat. Maior continet præcipuum fundamentum aduersæ sententiæ. Minor verò sic ostenditur. Id quod est prius in genere causæ materialis, potest esse posterius in genere causæ finalis: Ergo etsi substantia prædestinati sit subiectum gloriæ, & consequenter prior illa, in genere cau-

sã materialis, potest ab alia in genere causã finalis causari, subindeque ex intentione ad gloriam imperatiuè procedere. Consequentia patet, Antecedens varijs exemplis declaratur, & probatur. Potentia vitalis, licet sit principium effectuum & receptiuum sui actus, potest nihilominus fieri ex intentione illius, & ab eo in genere causã finalis dependere. Sanitas quam medicus appetit ægroto, est prior illo in genere causã finalis, ipse verò æger cui desideratur, præcedit in genere causã materialis & subiectiuæ. Christus in genere causã finalis est prior genere humano, & toto ordine naturæ, & gratiæ, vnde ad Coloss. 1. appellatur *primogenitus omnis creaturæ*; & tamen genus humanum, vt redimendum, subindeque ordo naturalis, Christum præcedit in genere causã materialis, in ratione finis *cui*, vt communiter docent nostri Thomistæ in tractatu de Incarnatione: Ergo pariter, licet substantia prædestinati sit subiectum gloriæ, quam prædestinatio respicit vt finem, poterit ex illius intentione procedere, seu imperari. Quorum omnium ratio est, quia non repugnat mutua inter duo causalitas, in diuerso genere causæ, nam, vt communiter docent Philosophi, *causæ sunt sibi inuicem causæ*, & mutuam inter se causalitatem ac dependentiam exercent. Ex quo solvuntur præcipua Aduersariorum fundamenta, vt constabit ex mox dicendis.

Obijciunt ergo primò: Prædestinatio hominum, eorum substantiam productam, vel saltem præuisum supponit: Ergo eam non causat. Consequentia patet, Antecedens pro-

batur. Substantia prædestinati per prouidentiam naturalem producitur: Sed prouidentia naturalis antecedit supernaturalem, sicut natura præcedit gratiam: Ergo prædestinatio substantiam prædestinati supponit. Simile argumentum potest fieri de voluntate antecedente saluandi omnes homines, hæc enim antecedit prædestinationem, seu voluntatem illam specialem, qua Deus discernit prædestinatos à reprobis: Sed voluntas illa generalis saluandi omnes homines, supponit eorum substantiam & esse, cum supponat voluntatem eos creandi: Ergo prædestinatio substantiam prædestinati productam, vel saltem præuisam supponit.

Verùm ad hæc ex principijs iam statutis facilè respondetur, voluntatem antecedentem saluandi omnes homines, & prouidentiam naturalem, antecedere prædestinationem, in genere causæ materialis, & esse posteriores illa, in genere causæ finalis, quod sufficit vt substantia prædestinati sit prædestinationis effectus, vt iam ostensum est, & constat in sententia communi Thomistarum, & aliorum, qui docent auxilia sufficientia esse in prædestinatis effectus prædestinationis, non obstante quod illa sint effectus prouidentiae communis supernaturalis, quæ prior est prouidentia prædestinatiua: Ergo similiter substantia prædestinati, quamuis sit effectus prouidentiae naturalis, & hæc prædestinatione sit prior, poterit nihilominus esse prædestinationis effectus.

Eadem solutio adhiberi debet simili argumento quod proponunt Aduersarij, nempe quod

quod prædestinatio nostra, cum sit posterior prædestinatione Christi, quæ dependet à præuisione culpæ originalis, illam supponit, peccatum verò originale supponit substantiam omnium prædestinatorum. Respondetur enim, prædestinationem nostram supponere peccatum originale, in vno genere causæ, scilicet materialis, non tamen in omni genere causæ, quia præcedit tale peccatum, seu permissionem illius, in genere causæ finalis.

Obijciunt secundò: Vt aliquid sit prædestinationis effectus, requiritur vt sit medium respectu gloriæ, vt constat in vocatione & iustificatione, quæ idcirco dicuntur prædestinationis effectus, quia ad gloriam, vt media ad finem ordinantur: Atqui substantia prædestinati non est medium ad gloriam, sed duntaxat illius subiectum; Ergo non est prædestinationis effectus.

Respondeo distinguendo maiorem: Vt aliquid sit prædestinationis effectus, elicitus, requiritur vt sit medium respectu gloriæ, concedo maiorem. Vt sit effectus duntaxat ab ea imperatus, nego maiorem. Ad hoc enim sufficit quod ad gloriam aliquo modo conducat, & fiat ex intentione illius, vt ex supra dictis patet.

Obijciunt tertio: Effectus prædestinationis debent esse ex meritis Christi, ille enim omnes effectus nostræ prædestinationis promeruit, vt docent Theologi in tractatu de incarnatione: Sed substantia prædestinati non est ex meritis Christi, nam iuxta Augustinum epist. 105. *Christus, non pro iustis, vt homines conderentur, sed pro impijs mortuus est, vt iu-*  
*nifi-*



*ificarentur* : Ergo non est prædestinationis effectus.

Respondeo, concessa maiori, distinguendo minorem : substantia prædestinati nudè sumpta, & iuxta limites puræ naturæ considerata, non est ex meritis Christi, concedo. Ut ordinatur ad gratiam & gloriam, & ad illam efficaciter transmittitur, nego. Vnde ad locum Augustini dicendum est, illum solùm intendere, hominis generationem, intra limites puræ naturæ consideratam, non esse ex meritis mortis & passionis Christi; non negare tamen illam, ut ordinatam, & transmissam ad gratiam & gloriam, cadere sub meritis. Addo multa deputari meritis Christi, propter quæ tamen non dicitur mortuus; meruit enim sibi Christus gloriam corporis, & sui nominis exaltationem; meruit etiam illuminationes & gaudia accidentalia Angelorum, ut ostendamus in tractatu de incarnatione, & tamen non dicitur mortuus propter gloriam corporis, & sui nominis exaltationem, nec propter illuminationes & gaudia Angelorum; quia particula *propter* denotat finem præcipuum mortis & passionis Christi; illa verò non sunt fines præcipui mortis eius, sed solùm iustificatio, & gloria electorum.

Ex dictis colligitur, bona omnia naturalia esse effectus prædestinationis imperatos, nam quamvis sunt ex providentia naturali, per prædestinationem tamen ordinantur ad salutem & bonam electionem: iuxta illud Apostoli, *omnia vestra sunt, vos autem Christi, Christus autem Dei*.

## CAPUT III.

## De reprobatione.

**D**ari in Deo reprobationem, seu decretum aliquod efficax & immutabile, quo ab æterno aliquos homines & Angelos voluit à gloria excludere, de fide certum est, cum hoc expressis Scripturæ testimonijs constet, præsertim ex capite 9. epistolæ ad Roman. Unde in Concilio Valentino cap. 3. dicitur: *Fidenter fatemur prædestinationem electorum ad vitam, & prædestinationem impiorum ad mortem.* Id etiam probat D. Thomas hic q. 23. art. 3. hoc discursu: *Prædestinatio est pars providentiæ: Ad providentiam autem pertinet permittere aliquem defectum in rebus quæ providentiæ subduntur; unde cum per divinam providentiam homines in vitam æternam ordinentur, pertinet etiam ad divinam providentiam, ut permittat aliquos ab isto fine deficere, & hoc dicitur reprobare.*


Addit S. Doctor in 1. ad Annib. dist. 40. art. 3. reprobationem necessariam esse, ut perfectè ostendatur humani arbitrij defectibilitas, & gratiæ necessitas. Non enim perfectè ostenderetur libertas arbitrij creati, si non posset homo finaliter peccare, & in impenitentia finali mori. Similiter gratiæ necessitas non perfectè manifestatur, nisi ostendatur necessitas doni perseverantiæ finalis, quæ non potest ostendi, nisi permittendo quod aliqui homines peccent, & in peccato moriantur, & consequenter à consecutione vitæ æter-

nae deficiant. Fuit etiam necessarium, Deum aliquos reprobare, ut inde attr. butorium suorum gloria magis resplendeat & coruscet, praesertim iustitia eius vindicativa, in eorum punitione; patientia, ac longanimitas, in illis tandiu sufferendis, eiusque bonitas & misericordia erga electos, quae eos à reprobis discrevit, & ad gloriam destinavit. Quam rationem tangit Apostolus ad Roman. 9. his verbis: *Volens Deus ostendere iram* (id est iustitiam vindicativam) *& notam facere potentiam suam sustinuit in multa patientia vasa irae apta in interitum, ut ostenderet divitias gloriae suae in vasa misericordiae quae preparavit in gloriam.* Demum id exigit pulchritudo universi, quae ex diversitate creaturarum, & bonorum ac malorum admixtione confurgit. Quam etiam rationem idem Paulus insinuat, dum 2. Timoth. 2. scribit: *In magna domo non solum sunt vasa aurea & argentea, sed etiam lignea & silex, quaedam quidem in honorem, quaedam vero in contumeliam.*

Quantum ad essentiam & quidditatem reprobationis, docent communiter Theologi, eam non dicere in Deo solam negationem praedestinationis, sed positivum actum, tum quia Apostolus nominibus importatibus actum positivum, eam explicat ad Roman. 9. *Deus cuius vult miseretur, & quem vult indurat* Iacob dilexi, Esau vero odio habui. Tum etiam, quia si reprobatio in sola negatione consisteret, Angeli & homines merè possibiles, & nunquam futuri, aequè dici possent reprobatum, ac illi qui ex existentibus damnantur; quandoquidem non solum isti, sed etiam illi,

illi, à Deo non sunt prædestinati. Addo quod Deo perfectior modus agendi tribuendus est : Sed perfectior modo agendi est per actum positium, quam per solam carentiam vel suspensionem actus : Ergo reprobatio in actu positio, & non in sola negatione prædestinationis consistit.

Quod si quæras, quinam sit ille actus positius, in quo reprobatio essentialiter consistit : Respondeo esse actum imperij, quo Deus imperat permissionem peccati seu denegationem gratiæ efficacis ad illud vitandum, & alia media ad finem reprobationis, manifestationem scilicet diuinæ iustitiæ, efficaciter conducentia. Reprobatio enim est pars obiectiua prouidentiae, sicut prædestinatio : Prouidentia autem consistit essentialiter in actu imperij, ordinantis media ad consecutionem finis à prouidente intenti, vt cap. 1. §. 2. ostensum est : Ergo & reprobatio. Connotat tamen, & præsupponit actum voluntatis, qui dicitur odium reprobi, seu eius eiectio & exclusio à gloria ; sicut prædestinatio similiter connotat & supponit actum voluntatis, qui vocatur dilectio vel electio prædestinatorum ad gloriam. His præmissis, superest solum nobis hic agendum de causis & effectibus reprobationis, de quibus tres graues difficultates ac controuersiae, breuiter hic resoluedæ sunt.



## §. I.

Reprobatio, prout dicit exclusionem à gloria, tanquam beneficio indebito, non habet pro motiuo præuisa demerita, seu peccata ætualia; bene tamen, prout includit voluntatem puniendi & infligendi pœnam.

**I**ta D. Thomas in 1. ad Annib. dist. 41. q. unica art. 3. ubi hæc scribit: *Voluntas diuinæ de salute hominis, duplex voluntas videtur opponi: scilicet voluntas de contradictorio, secundum quam vult aliquem non saluari, & voluntas de contrario, secundum quam vult aliquem damnare. Prima quidem voluntas non requirit aliquam rationem ex parte voliti, cum salus hominis non sit debita nature humane; non enim requiritur ratio, quare non deum alicui dare non debeat. Sed voluntas damnationis respicit rationem voliti ex parte damnati, cum damnatio ex debito inferatur.*

Probatur prima pars huius assertionis, primò ex verbis illis Apostoli ad Roman. 9. *Cum nondum nati fuissent, aut aliquid boni vel mali fecissent, non ex operibus, sed ex vocante dilectum est, Iacob dilexi, Esau autem odio habui.* Vbi S. Thomas lectione 2. ait quod sicut dilectio de qua hic loquitur, pertinet ad æternam Dei prædestinationem, ita odium de quo hic loquitur, pertinet ad reprobationem: quia Deus reprobat peccatores, nec est dicendum quod ista reprobatio sit temporalis. Ter quod excluditur responsio per quorundam Recentiorum, dicent-

centium hæc verba non intelligi de dilectione pertinente ad æternam prædestinationem, nec de odio ad æternam reprobationem spectante ; quia existimant Esau non fuisse reprobatum à regno cœlorum , sed solùm à temporali hæreditate repulsum .

Verùm Authores illi ad temporalia solùm attendunt, nec aduertunt Apostolum hæc verba Prophetæ , ad mysticum & spirituales sensum eleuasse, eaque assumpsisse ad probandum Deum absque ullius iniuria quosdam secundùm propositum elegisse ad gloriam , & alijs tantum beneficium voluisse negare, ante præuisa illorum merita ; quem sensum suscipi sequitur Augustinus epist. 105. qu. 2. ad Simplic. & alibi sæpè . Vnde an Esau fuerit reprobatus à vita æterna, vel solùm à temporali hæreditate repulsus , nihil refert ad propositum ; cùm in hoc non consistat vis Apostolici discursus , sed Apostolus Iacob & Esau in typum & figuram omnium electorum & reprobatorum assumat .

Addo quod idem Apostolus ad Hebræos 12. Esau inter peccatores & impenitentes numerat, quod non leue argumentum est , ipsum non solùm à temporali hæreditate , sed etiam à cœlesti regno fuisse exclusum . Nec obest quod aliqui cum Theophylacto & Caietano hoc interpretentur de pœnitentia apud Isaac patrem suum, & de reprobatione ab eius benedictione : Nam D. Chrysostomus homil. 31. in epist. ad Hebræos , & D. Thomas super capit. 12. eiusdem epistolæ, aliique SS. Patres communiter , Esau non veram pœnitentiam erga Deum habuisse existimant .

Potest insuper eadem prima pars hac ratione suaderi : Deus est supremus gloriæ dominus, nullique hominum gloria debetur : Ergo absque ullius iniuria, potest efficaciter decernere, illam quibusdam conferre, & alijs denegare, absque eo quod ex parte hominum, meritum vel demeritum propriæ voluntatis supponatur. Consequentia patet, quia in hoc ratio supremi domini consistit, posse scilicet facere de re sua quidquid voluerit, absque ullius iniuria. Vnde quia prima gratia nulli hominum est debita, potest Deus, absque ullius iniuria, eam aliquibus dare, & alijs denegare, ut concedunt Aduersarij : quidni ergo idem dici poterit de gloria? Hanc rationem insinuat D. Thomas loco supra relato, & hic art. 5. ad 3. his verbis, *In his quæ ex gratia dantur, potest aliquis pro libito suo dare cui vult, plus vel minus, dummodo nulli subtrahat debitum, absque præiudicio iustitiæ. Et hoc est quod dicit Pater familias Matth. 20. Tolle quod tuum est, & vade, an non licet mihi quod volo facere?* Et q. 6. de verit. art. 2. ad 9. *Hoc ipsum (inquit) quod est non habere debitum, est sufficiens ratio non donandi.*

Respondent Aduersarij, quod licet Deus, ut supremus gloriæ dominus, absolutè potuerit ita se gerere, & gloriam reprobis, ante præiusta eorum demerita, ut beneficium indebitum denegare; non tamen, ex suppositione elevationis naturæ humanæ ad ordinem supernaturalem, & voluntatis antecedentis, qua vult omnes homines saluos fieri, quia hac elevatione & voluntate supposita, gloria fit debita homini, non debito iustitiæ, vel connatu-

rali-

ralitatis , sed debito congruentiæ .

Sed contra primò : Supposita hac ordinatione & voluntate , absque vlla incongruentia , potest Deus velle efficaciter aliquibus gratiam efficacem negare , nullis eorum præiis demeritis : Ergo pariter , adhuc illa voluntate & ordinatione supposita , potest sine vlla incongruentia , nullis hominum præiis demeritis , velle aliquos excludere à gloria , vt beneficio indebito . Consequentiā patet , Deus enim non est minùs dominus gloriæ , quam gratiæ efficacis ; nec gloria , ex vi huius voluntatis , & ordinationis , fit magis debita , quam gratia efficax : Ergo sicut istam potest absque vlla incongruentia , velle efficaciter quibusdam negare , nullis illorum præiis demeritis ; ita & illam , non obstante eleuatione naturæ humanæ ad ordinem supernaturalem , & voluntate antecedente saluandi omnes homines .

Contra secundò : Dato quod ex vi illius eleuationis , & voluntatis antecedentis , debita esset gloria aliquibus hominibus vagè & in communi , non esset tamen debita istis aut illis in particulari : Ergo dato quod illa eleuatione & voluntate supposita , Deus non potuerit velle efficaciter omnes homines à gloria excludere , vt à beneficio indebito , potuit tamen ante omne demeritum velle efficaciter his aut illis in particulari , gloriam vt beneficium indebitum denegare , etiam ante præiis demerita .

Secunda pars assertionis , quæ ait reprobationem , prout includit voluntatem puniendi & infligendi poenam , demerita & peccata præ-



præiudicia supponere, manifesta est; repugnat enim æquitati diuinæ, quod decernat punire & infligere ullam poenam, nisi propter culpam præiudicalem. Vnde Augustinus lib. 3. contra Iulian. cap. 8. *Bonus est Deus iustus est Deus, potest sine bonis meritis, liberare, quia bonus est; non potest sine malis damnare, quia iustus est.*

## §. II.

*Soluntur obiectiones.*

**O**bjicies primò contra primam assertionem: Voluntas excludendi aliquos efficaciter à gloria, ante præiudicia illorum demerita, videtur impossibilis cum voluntate antecedente saluandi omnes homines, quam Apostolus 1. Timoth. 2. asserit esse in Deo; quomodo enim eorum salutem sincerè vult Deus, quos ante præiudicia demerita à salute excludit?

Respondeo negando Antecedens, sicut enim pius & iustus iudex potest sincerè velle vitam hominis, quem tamen tradit de facto suspendendum; sicut mercator volens projicere merces in mare, tempestate suborta, ad vitam saluandam, verè & sincerè vult illas seruare; voluntate tamen inefficaci, & simplicis complacentiæ. Item sicut in opinione Aduersariorum, Deus homini dans auxilium sufficiens, & gratiam incongruam ad aliquem actum, simplici complacentia & voluntate antecedenti, illi desiderat gratiam congruam & efficacem, & tamen ante ullam culpam præ-

prævisam, vult efficaciter illam denegare, cum primæ gratiæ negatio, seu prima peccati permissio, in illorum sententia, præcedentis peccati poena non sit, sed ex simplici Dei voluntate procedat. Denum sicut Deus voluntate antecedenti vult omnes paruulos saluos fieri, & tamen, nullis suppositis vel prævisis demeritis, quæ in eis nulla sunt, vult aliquos excludere à gloria, eos nimirum quibus non vult sacramentum baptismi applicari. Ita pariter, licet velit aliquos efficaciter excludere à gloria, vt est beneficium indebitum naturæ Angelicæ & humanæ, vt ostendat se esse supremum gloriæ dominum, nullique hominum vel Angelorum gloriam deberi; desiderio tamen inefficaci & simplici complacentia, cadente super illorum salutem, secundum se consideratam, & vt præcisam à circumstantijs defectibilitatis liberi arbitrij, manifestationis suorum attributorum, pulchritudinis vniuersi, supra explicatis, verè & sincerè omnibus salutem exoptat.

Dices, saltem crudelitatem sapit, aliquem excludere à regno cœlesti, sine aliqua culpa præsupposito, cum talis exclusio sit maximum malum quod homini inferri potest: Ergo hoc non debet Deo attribui, cum scriptura præcipiat sentire de Deo in bonitate.

Respondeo primò, hoc argumentum facile solui, iuxta dicenda §. sequenti, vbi ostendemus reprobationem negatiuam, seu voluntatem excludendi reprobos à gloria; supponere culpam originalem prævisam, & ab illa vt à causa motiua pendere.

Respondeo secundò, abstrahendo pro nunc  
ab

ab hac sententia, negando absolutè Antecedens, non enim dedecet diuinam bonitatem, nec præ se fert aliquam crudelitatis notam, alicui non velle conferre beneficium indebitum, vt patet in Rege denegante, alicui Episcopatum, vel aliam dignitatem; ei non debitam, & in Deo denegante primam gratiam congruam, vel efficacem, quæ nulli debetur. Gloria autem est beneficium indebitum naturæ humanæ & Angelicæ, etiam ad ordinem supernaturalem eleuata, vt supra ostensum est.

Obijcies secundò: In prædestinandis & reprobandis hominibus & Angelis, debemus Deo concedere connaturaliorem modum operandi, nisi oppositum nobis ex reuelatione constet: Sed modus connaturalior operandi in reprobandis hominibus & Angelis, est vt Deus neminem velit à gloria excludere, ante præuisionem demeritorum, & aliunde oppositum ex scriptura reuelatum non est: Ergo dicendum est, Deum neminem velle à gloria excludere, ante præuisionem demeritorum.

Respondeo, concessio maiori, negando minorem, nam vt capite præcedenti agendo de gratuita electione prædestinatorum, arguebam: Sicut in consequendo fine connaturalius incipit agens ab intentione illius, quam ab electione mediorum: ita in deficiendo à fine, connaturalius incipitur à voluntate defectus ab illo, quam à voluntate defectus à medijs.

Obijcies tertio contra secundam partem: Corona, vt corona, non minùs dependet in executione à meritis, quam poena, vt poena,

na, à demeritis : At non obstante illa dependentia, corona potest prius intendi, quam merita præuideantur, vt constat ex dictis capite præcedenti : Ergo pariter exclusio hominum à gloria, vt habet rationem poenæ, poterit à Deo intendi, priusquam peccata seu demerita præuideantur.

Respondeo, concesso Antecedente, negando consequentiam & paritatem : Ratio discriminis est primò, quia quod electio ad gloriam, etiam vt coronam, fiat ante præuisa merita, nulli ex hoc infertur iniuria; bene tamen, si decretum infligendi poenam antecederet præscienciam peccati. Secundo, quia corona in ordine intentionis, non dependet à meritis, sed causat illa; cum enim sit bonum per se, & non occasionatum, potest intendi independenter ab alterius præuisione : Poena autem, quia bonum occasionatum est, nec exequi, nec intendi potest, nisi occasione culpæ præuisæ. Vnde Damascenus lib. 2. fidei cap. 26. *Deus ex seipso mouetur ad miserendum, ad puniendum, non nisi ex nostra præsupposita culpa.* Et Tertullianus lib. 2. contra Marcionem: *Deus ex seipso bonus est, ex nobis iniustus, iustitia nempe vindicatiua.*



## §. III.

*Peccatum originale, ut est infectio naturæ, est  
causa motiva reprobationis hominum, non  
verò ut est infectio personæ.*

**P**RO intelligentia & probatione huius asser-  
tionis, diligenter observandum est, di-  
stinguendum esse peccatum originale, ut est  
infectio naturæ, à culpa originali, ut est in-  
fectio personæ. Peccatum originale, ut est in-  
fectio naturæ, est peccatum quo omnes in  
Adam peccauimus, quod totam naturam hu-  
manam infecit, & reddidit Deo exosam. Pec-  
catum verò originale, ut est infectio personæ,  
est peccatum quo nascendo inficimur, & quod  
contrahitur per seminalem propagationem,  
ac deletur per sacramentum baptismi. Datur  
igitur in peccato originali & infectio naturæ  
& infectio personæ, & potest remanere infe-  
ctio naturæ, sublata infectione personæ; ut  
patet in concupiscentia quæ remanet in nobis  
post baptismum, quia illa est effectus peccati  
originalis, ut est infectio naturæ, quæ per  
baptismum non tollitur. Et ne quis existi-  
met hanc distinctionem gratis esse excogita-  
tam, referendum est expressum D. Thomæ te-  
stimonium 3. p. q. 8. art. 5. ad 1. ubi illam  
expressè tradit, his verbis: *Dicendum quod  
peccatum originale in Adam, quod est peccatum  
naturæ, derivatum est à peccato actuali ipsius,  
quod est peccatum personale: quia in eo perso-  
na corrumpit naturam, qua corruptione median-  
te peccatum primi hominis derivatur ad poste-  
ros, secundum quod natura corrupta corrup-*  
*pit*

pit personam . Hoc præmissio .

Prima pars assertionis probatur primò ex Augustino, qui varijs in locis apertè hanc veritatem tradit . Nam tota epist. 105. de reprobatione Esau , qui fuit typus & figura omnium reprobatorum , sic loquitur : *Quid enim diligebat in Iacob , antequam natus fecisses aliquid boni , nisi gratuitum misericordie sue donum ? Et quid oderat in Esau antequam fecisses aliquid mali , nisi originale peccatum ? Nam neque in illo diligeret iustitiam , quam nullam ille fecerat , neque in isto odisset naturam , quam bonam ipse perfecerat .* Quibus verba clarissimè docet , peccatum originale fuisse causam reprobationis Esau : At hoc intelligi nequit de peccato originali , vt est infectio personæ , seu de peccato originali quo nascendo inficimur , quia extra dubium est , Esau sicut & Iacob applicatum fuisse circumcisionis remedium , subindeque in utroque delictam ac admissam fuisse culpam originalem : Ergo necessariò hoc intelligendum est de peccato originali , vt est infectio naturæ , orta ex peccato quo Esau & nos omnes in Adam peccauimus . Vnde idem S. Doctor varijs locis docet , Deum reprobare homines , quia sunt ex massa corrupta & vitiata , siue ex massa perditionis . Nam epistola citata sic ait : *Si vasa sunt iræ , quæ perfecta sunt ad perditionem , quæ illis debita redditur , sibi hoc imputent , quia ex ea massa facta sunt , quam propter unius peccatum , in quo omnes peccauerunt , meritò Deus iusteque damnauit .* Et de bono perseuer. cap. 8. *Qui liberentur ( à massa perditionis ) gratiam diligant ; qui verò non libe-*

rantur debitum agnoscant . Item lib. 2. ad Bonifacium cap. 7. Vbi dicitur cuius vult miseretur, & quem vult obdurat; qui facit aliud vas in honorem, aliud in contumeliam: bonum quidem immerito & gratis datur, quia ex eadem massa est cui datur: malum verò merito & debitum redditur, quia in massa perditionis, malum malo non malè redditur. Et rursum. Redditur malum, quia omnes sunt rei, ex eo quod ex vnum hominem peccatum introiit in mundum. Demum de corrept. & grat. cap. 7. Qui Euangelium non audierunt, & qui eo audito in melius commutati, perseuerantiam non acceperunt; & qui Euangelio audito venire ad Christum, hoc est in eum credere noluerunt; & qui per etatem paruulam nec credere potuerunt, sed ab originali noxa solo possent lanacro regenerationis absolui, quo tamen non accepto morti perierunt, non sunt ab illa conspersione discreti, quam constat esse damnatā, euntibus omnibus ex vno in condemnationem. Vbi omnibus reprobis, tam paruulis, quam adultis, vnā communem causam reprobationis assignat, videlicet damnationem massæ, à qua non fuerunt discreti, euntibus omnibus ex vno in condemnationem, id est propter vnius delictam, in quo omnes peccauerunt.

Addo quod idem S. Doctor lib. 4. contra Julian. cap. 8. & lib. 5. cap. 4. & lib. 6. cap. 10. & alibi passim, asserit voluntatem reprobandi homines, fuisse iudicium Dei, & actum iustitiæ vindictariæ, subindeque censet illam fuisse in pœnam alicuius peccati, quod non potuit esse aliud quam originale, fit enim re-  
pro-

probatio eodem modo & in eodem instanti pro omnibus : in nullo autem consentiunt omnes homines , nisi in originali peccato : Ergo causa reprobationis hominum , secundum Augustinum , est originale peccatum , quo omnes in Adam peccavimus .

Probatur secundo eadem pars ex D. Thoma, fidelissimo Augustini Discipulo, qui eius vestigijs ubique inhærens, eandem varijs in locis tradit doctrinam . Tria solum hic eius testimonia proferam . Primum sumitur ex qu. 6. de verit. art. 2. ad 9. ubi sic ait : *Dilectio Dei, qua unum eligit & alium reprobat, rationalis est, nec tamen oportet quod ratio electionis sit meritum, sed in ipsa electione est divina bonitas : Ratio autem reprobationis est in omnibus peccatum originale* . Quæ verba adeò clara & expressa sunt, ut mirari subeat, quod plures ex nostris Thomistis sententiæ nostræ subscribere nolint, & negare, vel in dubium reuocare audeant, an illa utriusque S. Doctoris Augustini & Thomæ menti, & doctrinæ consona sit ?

Nec dici potest, illos SS. Doctores solum velle peccatum originale esse causam sufficientem reprobationis hominum, non tamen motivum quod Deum de facto impulerit ad homines reprobandos. Nam D. Augustinus locis citatis expressè docet Deum odio habuisse in Esau peccatum originale, & Deum reprobare homines, quia sunt ex massa corrupta & vitiosa, peccatum primi parentis : Ergo censet tale peccatum fuisse reipsa causam & motivum, cur Deus voluerit illos à gloria excludere . Similiter D. Thomas eodem prorsus



si modo asserit, peccatum originale esse causam prædestinationis, ait enim: *In ipsa electione ratio est diuina bonitas; ratio autem reprobationis est in hominibus peccatum originale*: Sed manifestum est, eum negare meritum esse causam actuale & influentem in hominum prædestinationem: Ergo & ipsum affirmare, peccatum originale esse causam actualiter influentem in eorum reprobationem.

Non obest etiam quod idem S. Doctor, post verba relata; subiungat: *Vel hoc ipsum quod est non habere debitum ad hoc quod eis gratia conferatur*. Quibus significat Deum velle etiam exclusionem reproborum à regno, titulo gratiæ seu beneficii indebiti. Non obest inquam, quia illi duo tituli, nempe indebitæ gratiæ, & iustitiæ debitæ, nullatenus inter se pugnant, sed inter se compassibiles sunt. Sicut enim quod aliqui non debeatur alteri, non tollit quominus possit ipsum de mereri; ita quod aliquid denegetur per modum beneficii indebiti, non impedit, quin simul denegari possit alio titulo, nempe pœnæ debitæ, & propter culpam personalem, vel originale; vt constat in Rege, qui Episcopatum vel aliam dignitatem alicui denegare potest, tum etiam, quia illa indignus est, ob culpam propriam vel parentum à quibus traxit originem. Vnde iuxta doctrinam D. Thomæ datur duplex motiuum reprobationis, seu intentionis efficacis excludendi reprobos à gloria, nempe titulus indebitæ gratiæ, de quo egimus §. præcedenti, & titulus debitæ iustitiæ propter originale peccatum, de quo

quo in præsentī. Primus tantum habet locum in reprobatione malorum Angelorum, vterque verò reperitur in reprobatione hominum.

Secundum testimonium habetur hic qu. 23. art. 5. ad 3. vbi S. Thomas considerat totum genus humanum, damnationi communis peccati obnoxium, sicut totam rerum vniuersitatem, quantum ad hoc quod sicut Deus volens multipliciter repræsentare suam bonitatem, constitui diuersos gradus rerum, quarum quædam altum, & quædam infimum locum teneant in vniuerso: ita volens in genere humano damnationi obnoxio, multipliciter repræsentare suam bonitatem, elegit ex massa damnata aliquos, quibus parcendo repræsentaret suam bonitatem per modum misericordiæ; alios verò designauit, vt eos propter peccatum massæ puniendo, repræsentaret suam bonitatem per modum iustitiæ. Verba eius sunt: *Sic igitur consideremus totum genus humanum sicut totam rerum vniuersitatem. Voluit igitur Deus in hominibus, quantum ad aliquos quos prædestinat, suam repræsentare bonitatem per modum misericordiæ, parcendo: & quantum ad aliquos quos reprobat per modum iustitiæ, puniendo. Et hæc est ratio quare Deus quosdam elegit, & quosdam reprobat.* Iuxta D. Thomam reprobatio est actus iustitiæ vindicatiuæ, & consequenter in reprobis Deus punit & vindicat aliquod peccatum: Non a cõtuali, quia hoc non est causa reprobationis, vt est in ordine intentionis, in aperta sententia S. Thomæ, vt constat ex dictis §. 1. Ergo originali. Fit ergo iuxta S. Thomam

reprobatio hominum propter originale peccatum, quo omnes in Adam peccauimus.

Tertium testimonium habetur 2. 2. q. 2. art. 5. ad 1. ubi S. Thomas docet, auxilium gratiæ ad diligendum Deum, & ad credendum articulis fidei, quibusdam denegari in poenam peccati originalis. Hoc (inquit) *auxilium quibuscumque diuinitus datur, misericorditer datur: Quibus autem non datur, ex iustitia non datur, in poenam præcedentis peccati, & saltem originalis peccati, ut Augustinus dicit in libro de correptione & gratia.* Ex quo loco hoc potest argumentum desumi: Illud est causa reprobationis, quod est causa primi effectus illius; prædestinatio enim & reprobatio, ex parte actuum diuini intellectus & voluntatis, nullam possunt habere causam, sed solum ex parte effectuum qui ad illos consequuntur, ut docet S. Thomas hic q. 23. art. 5. his verbis: *Non est assignare causam diuinæ voluntatis, ex parte actus volendi, sed potest assignari ratio ex parte volitorum in quantum scilicet Deus vult esse aliquid propter aliud.* Et subiungit: *Nullus ergo fuit ita insanæ mentis qui diceret merita esse causam diuinæ prædestinationis, ex parte actus prædestinantis.* Atqui peccatum originale, iuxta eundem Doctorem Angelicum, est causa primi effectus reprobationis, scilicet denegationis primæ gratiæ ad credendum mysterijs reuelatis, & ad diligendum Deum: Ergo cum ex S. Thoma peccatum originale, quo nascendo inficimur, dimittatur per baptismum oportet quod S. Doctor intelligatur de peccato originali quo omnes in Adam peccauimus, seu

de

de peccato originali, vt est infectio naturæ, non verò vt est infectio personæ. Vnde in 1. ad Annib. dist. 41. q. vnica art. 5. *Finis damnationis est Dei iustitia: Debitum autem damnationis ex parte nostra non solum sunt opera mala huius vetillius, sed etiam natura infectio.* Et paulo post subdit, quod reprobatio habet pro causa, non de necessitate præscientiam operationum, sed ad hoc sufficit præscientia infectionis naturæ. Quo nihil clarius dici potest, ad ostendendum quod ipsa infectio naturæ, non considerata infectione personæ, sit punibilis, & causa sufficiens reprobationis hominum. Item in cap. 9. epist. ad Roman. lect. 4. *Humana natura (inquit) vilitatem habet ex sua materia, quia vt dicitur Genes. 2. fecit Deus hominem de limo: Sed maiorem vilitatem habet ex corruptione peccati, quæ per vnum hominem in hunc mundum intrauit, & ideo homo luto meritò comparatur .... Similiter & Deus liberã habet potestatem ex eadem corrupta massa generis humani, sicut ex quodam luto, nulli faciendo iniuriam, quosdam homines facere preparamos in gloriam, quosdam autem in miseria derelictos, id est in debita ex peccato primi parentis damnatione permanentes.*

Potest etiam prima pars nostræ assertionis suaderi hoc discursu: Non repugnat, imò conueniens est, quod reprobatio hominum, seu voluntas eos excludendi à gloria, fiat propter peccatum originale: Ergo cum hæc sententia sit menti & doctrinæ vtriusque S. Doctoris Augustini & Thomæ omnino consona, vt iam ostensum est, alteri quæ hoc negat

præferenda est . Consequentia patet , doctrina enim D. Augustini in materia de gratia & de prædestinatione ac reprobatione, tantæ est authoritatis in Ecclesia , vt non possit sine temeritate negari . Vnde Baronius capite præcedenti relatus, prudenter admonet aliquos ex Recentioribus, quanto periculo se exponant , dum à S. Augustini sententia de prædestinatione recedunt . Addo quod si semel & in aliquo , ab Augustini sententia in materia de prædestinatione vel reprobatione recedatur , totaliter corruius eius authoritas, subindeq; omnia argumēta quæ in ea fundantur, ad probandum gratiam esse de se & ab intrinseco efficacem, ac prædestinationem electionem esse purè gratuitam & liberalem , penitus enervantur, ac in fumum & auram resoluuntur . Antecedens verò quoad vtramque partem ostenditur . In primis enim quod non repugnet reprobationem hominum fieri propter peccatum originale , vt est infectio totius naturæ humanæ , probatur ex eo quod præscientia & præuisio talis peccati , cum fuerit prior in mente diuina prædestinatione Christi, seu decreto incarnationis , vt docent S. Thomas, eiusque Discipuli 3. p. q. 1. art. 3. etiam hominum prædestinationem præcessit, & consequenter illorum reprobationem , quæ vel fuit prædestinatione posterior , vel simul cum illa : Vnde cum peccatum originale ponat in hominibus indignitatem , & positiuam Dei inimicitiam , reddatque totum genus humanum illi exosum, sufficiens motiuum Deo præbuit , vt veller propter illud aliquos homines à gloria excludere ,

Quod verò id conueniens sit, patet ex eo quod illud magis suauem ostendit Dei prædestinationem & reprobationem; magisque misericordiam Dei erga prædestinatos, & iustitiam ergo reprobos manifestat, dum illi à massa perditionis ex sola misericordia extrahuntur, & isti iustè in eadem massa relinquuntur. Vnde Augustinus de bono perseuer. cap. 8. *Qui liberantur ( à massa perditionis ) gratiam diligant, qui verò non liberantur, debitum agnoscant.* Splendet etiam in reprobatione comparatiua ratio supremi dominij, inquantum è duobus in æquali damnatione, seu peccati massa existentibus, Deus vni vult dare gloriam, & alterum ab ea excludere; & in absoluta, pulchritudo diuinæ iustitiæ, quatenus ex merito puniendi culpam originalem, vult exclusionem reproborum à regno.

Secunda verò pars assertionis, quæ dicit peccatum originale, vt est infectio personæ, non esse causam reprobationis, constat in multis quibus tale peccatum per baptismum remittitur; peccatum enim remissum per baptismum, non potest esse causa reprobationis, cum non possit causare primum illius effectum, nempe denegationem primæ gratiæ; alioquin in baptizatis remaneret aliquod debitum æternæ damnationis, quod apertè contrariatur Tridentino sess. 5. canone 5.

Ex hoc patet responsio ad præcipuum fundamentum, quo plures ex nostris Thomistis mouentur, ad negandum peccatum originale esse causam reprobationis. Si enim ( inquit ) peccatum originale esset prima causa,

ob quam Deus vellet efficaciter reprobos & gloria excludere, esset etiam prima causa propter quam vellet efficaciter permittere, ut illi inciderent in peccatum actuale propter quod damnantur, eisque denegare gratiam efficacem ad illud euitandum: Sed hanc permissionem & gratiæ denegationem peccatum originale causare non potest, saltem in reprobis baptizatis, quibus fuit remissum, cum ex Apostolo ad Roman. 5. & ex Tridentino sess. 5. can. 5. nihil damnationis remaneat in his qui per baptismum renouantur: Ergo peccatum originale non potest esse causa reprobationis hominum.

Verum hoc argumentum probat quidem secundam partem nostræ assertionis, sed primam nullatenus attingit. Vnde, concessa maiori, distingo minorem: hanc permissionem, & gratiæ denegationem, peccatum originale causare non potest, ut est infectio personæ, & quatenus illo nascendo inficimur, concedo minorem. Ut est infectio naturæ, & culpa qua omnes in Adam peccauimus, nego minorem. Similiter distingo consequens: Ergo peccatum originale non potest esse causa reprobationis hominum, ut est infectio personæ, concedo. Ut est infectio naturæ, nego. Licet enim sub prima ratione tollatur per baptismum, quo spiritualiter renouamur, non tamen sub altera; nam sublata per tale sacramentum infectio personæ, remanet tamen in illa infectio naturæ, ut patet in concupiscentia, quæ cum sit effectus infectionis naturæ, remanet in baptizatis, ut experientia constat.

## §. IV.

*Exponuntur, & conciliantur quædam testimonia D. Thomæ, quæ pugnare videntur contra nostram sententiam.*

**A**Liqua adduci solent testimonia D. Thomæ, quibus insinuare videtur, peccatum originale non esse causam reprobationis hominum, seu voluntatis quam habuit aliquos excludendi à regno cœlesti. In primis enim hic q. 23. art. 3. agens de reprobatione docet illam esse actum diuinæ providentiæ: At si illa facta ponatur, ob originale peccatum, non providentiæ, sed iustitiæ vindictivæ actus erit: Ergo iuxta S. Thomam reprobatio hominum non est ex peccato originali.

Secundò idem S. Doctor ibidem in resp. ad 1. hæc verba Malachiæ, *Esau odio habui* non explicat in proprietate sermonis, de verò odio strictè sumpto, sed Deum odio habere reprobos, exponit per hoc quod est indebitum beneficium illis non conferre: At si reprobatio fieret in pœnam peccati originalis, illa haberet rationem odij strictè sumpti; cum Deus peccatum & peccatores propriè odio habeat, iuxta illud Sapient. 14. *Odio sunt Deo impius & impietas eius*: Ergo ex D. Thoma reprobatio non fit in pœnam originalis peccati.

Tertiò, Idem Doctor Angelicus ibidem art. 5. ad 3. & tertio contra Gent. cap. 161. & alibi sæpe, hominum reprobationem, seu aliquo-



quorum à gloria exclusionem, soli Dei beneplacito, ac mera voluntati attribuit; Ergo censet illam non fieri propter peccatum originale.

Verùm ad hæc facilè respondetur. Ad primum enim dicendum, iuxta D. Thomam, reprobationem hominum esse actum providentiæ formaliter, sed includere ex parte subiecti, & quasi materialiter, actum iustitiæ excludentis illos à regno, propter originale peccatum; unde ibidem artic. 5. ad 3. ait Deum quosdam prædestinasse per modum misericordiæ parcendo, & quosdam reprobasse per modum iustitiæ puniendo; ut §. præcedenti declarauimus. Sicut ergo in isto actu qui est furari propter mœchiam, deformitas furti, & eius formalis malitia contra iustitiam exercita, se habet materialiter respectu mœchiæ, quæ est finis à quo formaliter specificatur actus ille; sic etiam permittere aliquos deficere à fine, ob originale peccatum; est formaliter actus providentiæ, sed iustitia quæ ibi interuenit, excludens eos à regno, propter originalem culpam, materialiter se habet ad specificationem actus providentiæ.

Ad secundum respondeo D. Thomam loco citato, hæc verba, *Esaui odio habui*, non explicasse de odio Dei strictè, sed latè sumpto, prout scilicet importat voluntatem denegandi beneficium indebitum: tum quia ad soluendum argumentum hoc satis erat, tum etiam quia ibi generalem doctrinam, quæ etiam ad reprobationem Angelorum extendi possit, trahere intendebat. Quando verò super caput 9. epistolæ ad Romanos agit specialiter

liter de reprobatione hominum, explicat hæc verba de odio propriè & strictè sumpto, vt constat ex eius verbis quæ initio §. 1. retulimus.

Ad tertium respondetur ex eodem S. Doctore ibidem lect. 4. reprobationem duplici modo spectari posse, absolutè scilicet, & comparatiuè. Absolutè, cùm quæritur simpliciter, siue, vt ipse loquitur, *in generali*, cur aliqui à Deo reprobentur, & quæ sit aliquorum reprobationis causa, nulla comparatione facta cum eis qui eliguntur. Comparatiuè verò, cùm quæritur *in speciali*, vt ait idem Sanctus, cur Deus hanc potius quam istam reprobet? Cur cùm omnes homines per peccatum primi parentis eidem damnationi nascantur obnoxij, aliquos ab hac massa & conspersione liberet, & ad vitam æternam eligat, alios verò in eadem massa derelinquat, & non eligat ad vitam æternam? Si ergo reprobatio hoc secundo modo spectetur, nullam aliam habet causam, quam beneplacitum diuinæ voluntatis: Si autem primo modo consideretur, aliquam habet causam ex parte hominis, nimirum culpam originalem. Verba S. Doctoris hæc sunt: *Circa electionem bonorum, & reprobationem malorum, duplex quæstio moueri potest: vna quidem in generali, quare Deus velit quosdam indurare & quorundam misereri: alia verò in speciali, quare velit huius misereri, & hunc vel illum indurare. Et potest quidem ratio huius primæ quæstionis assignari, secunda autem quæstionis non potest assignari ratio, nisi simplex Dei voluntas &c.*

## §. V.

*Præcipue reprobationis effectus.*

**C**Um oppositorum eadem sit scientia, sicut ut aliquid sit effectus prædestinationis, tres conditiones requiruntur, nempe quod causetur à Deo, quod sit ex voluntate efficaci dandi gloriam, & quod efficaciter ad finem illum conducat. Ita ut aliquid sit effectus reprobationis, oportet quod sit à Deo, quod cum effectu conducat ad finem reprobationis, & quod ex intentione talis finis sit à Deo volitum ac præparatum. Ex hoc principio à Theologis communiter recepto.

Colligitur primò, quod licet peccatum, quantum ad formale, ad finem reprobationis conducat, nempe exclusionem à gloria; quia tamen sub hac ratione non potest esse à Deo volitum, nec causatum; nequit esse effectus reprobationis, quantum ad formale. Pro materiali verò effectus reprobationis esse opposita ratione convincitur: nam prout sic causatur à Deo, & ad ipsum sequitur (non quidem sequela causalitatis, sed illationis) exclusio creaturæ à gloria, ac proinde ex voluntate efficaci talis exclusionis esse potest.

Colligitur secundò, permissionem peccati originalis, ut est infectio naturæ, & prout ab Adamo ut capite totius naturæ humanæ commissum est, non esse effectum reprobationis; bene tamen permissionem eiusdem peccati, ut est infectio personæ, & quatenus à nobis per generationem contrahitur, supposi-

to quod nunquam remittatur.

Prima pars patet ex dictis §. 3. ibi enim ostendimus, peccatum originale, ut est infectio totius naturæ humanæ, & prout ab Adamo commissum est, esse causam reprobationis hominum: Ergo sub hac ratione non potest esse illius effectus. Secunda verò constat ex eo quod peccatum originale, ut est infectio personæ, & prout à nobis per generationem contrahitur, si nunquam remittatur, conducit ad finem reprobationis hominum, nempe ad exclusionem eorum à gloria; & cum sub hac ratione non sit causa reprobationis hominum, eius permissio ab illa produci vel imperari potest: Ergo sub hac ratione potest esse, & de facto est, in illis cui tale peccatum nunquam remittitur, reprobationis effectus. Consequentia patet quidquid enim conducit ad finem reprobationis, est effectus illius, dummodo ab illa producat, vel impetretur.

Ex his facile soluitur argumentum istud quo aliquis recentior Thomista demonstrare se putat, peccatum originale non esse causam reprobationis hominum: Cum Deus (inquit) sit ordinatè appetens, prius intendit finem quam media ad illum ordinata: Sed permissio peccati originalis nunquam remittendi, est medium ad finem reprobationis ordinatum, nempe ad exclusionem hominum à gloria, & ad illam conducit, si nunquam remittatur: Ergo prius Deus intendit excludere homines à gloria, quàm permittere peccatum originale, subindeque tale peccatum non est causa reprobationis hominum.

Verbum ex principijs iam statutis huic argumento facile respondetur, distinguendo minorem : permissio peccati originalis, ut est infectio personæ, & prout à nobis per generationem & feminalem propagationem contrahitur, est medium ordinatum ad reprobationis finem, & ad illum conducit supposito quod nunquam remittatur, concedo minorem. Permissio peccati originalis, ut est infectio totius naturæ, & prout ab Adamo commissum est, nego minorem. Permissio enim peccati originalis, ut ab Adamo commisi, ordine rationis antecedit Christi prædestinationem, & à fortiori nostram, & per consequens est prior reprobatione, quæ vel fit simul cum prædestinatione, vel est illa posterior. Vnde talis permissio non potest esse reprobationis effectus, sed est effectus providentiæ communis ordinis supernaturalis, ad quam pertinent aliqui effectus supernaturales, cuiusmodi est gratia, & iustitia originalis collata Adamo in statu innocentiae, & consequenter permissio peccati originalis, ut ab Adamo commissum est.

Colligitur tertio, permissionem peccati actualis per poenitentiam non deleti, esse effectum reprobationis, secus verò permissionem illius quod per poenitentiam remittitur. Nam prima permissio conducit efficaciter ad finem reprobationis, scilicet exclusionem reprobatorum à gloria, non verò secunda, cum peccata semel dimissa, per subsequentem culpam non redeant, ut communiter docent Theologi cum S. Thoma 3. p. q. 88. art. 1.

Dices, Potest contingere quod homini re-

mit-

mittatur in Sacramento poenitentiae peccatum quoad culpam, non verò quoad poenam temporalem, & ante poenam solutam, in peccatum reincidat, & moriatur: Sed in tali casu, peccatum iam remissum conducit de facto ad finem reprobationis: Ergo permissio illius erit reprobationis effectus. Maior constat, minor probatur. Finis reprobationis est poena in inferno infligenda: At peccatum illud in inferno ponitur, cum in hac vita poena illi debita non sit soluta, nec in Purgatorio, ubi non purgantur nisi qui in gratia decedunt: Ergo in inferno punitur, & consequenter conducit ad poenam inferni, quæ est reprobationis effectus.

Respondeo finem reprobationis esse poenam æternam, peccatum verò illud remissum quoad culpam, sed non quoad temporalem poenam, in illo casu puniri quidem in inferno per accidens, sed non in æternum, ut docet S. Thomas in 4. dist. 22. qu. 1. art. 1. ad 5. & ideò illius permissionem, non esse reprobationis effectum.

Instabis: Si poena illius peccati in inferno finiretur, iam fieret aliqua remissio in inferno, subindeque in inferno esset aliqua redemptio, & sic falsum esset quod dicit Ecclesia, *In inferno nulla est redemptio*. Sed nego sequelam, quia ut ibidem ait S. Doctor, poena quæ remittitur, nec remittitur, nec redimitur.

Colligitur quartò, quod cum induratio & excœcatio reproborum, quatenus est denegatio gratiæ, sit à Deo, & aliunde de facto conducat ad æternam damnationem, diuinæque

iu-

iustitiæ manifestationem, habet quidquid requiritur, ut inter effectus reprobationis numeretur.

Colligitur quintò, æternam peccatoris damnationem, esse ultimum ac præcipuum reprobationis effectum. Prædestinatio enim & reprobatio inter se opponuntur, & habent terminos seu effectus inter se oppositos; unde sicut ultimus prædestinationis effectus est consecutio gloriæ, ita ultimus effectus reprobationis est exclusio à gloriâ, & æterna damnatio.

Colligitur sextò, substantiam reprobî non esse effectum suæ reprobationis, sicut substantia prædestinati est effectus suæ prædestinationis. Ratio disparitatis est, quia ut aliquid sit effectus prædestinationis, vel reprobationis, requiritur quod ex eius intentione prodicatur, vel saltem imperetur: Sed substantia reprobî non fit à Deo ex intentione reprobationis, sicut substantia prædestinati fit vel imperatur ex intentione prædestinationis: Ergo substantia reprobî non est effectus suæ reprobationis, sicut substantia prædestinati est effectus suæ prædestinationis. Maior constat, minor verò suadetur ex eo quod gloria electorum est finis superexcedens illorum substantiam, unde eam ex intentione talis finis imperari, valde congruum & conueniens est: exclusio autem à gloriâ, non est finis perfectius substantia reproborum, unde nullum argumentum seu congruentiam habemus, ut asseramus Deum, ex intentione excludendi à gloriâ reprobos, illorum substantiam produxisse.

## §. V I.

*Non conferuntur omnibus reprobis auxilia seu media ad salutem sufficientia, bene tamen omnibus iustis, quando in fiat obligatio alicuius præcepti.*

**P**Rima pars docetur expressè ab Augustino, & eius Discipulis, vt ingenuè fateatur Vasquez 1. p. disput. 97. cap. 2. his verbis. *Quo circa ego non dubitarem, Augustinum eiusque Discipulos Prosperum & Fulgentium, illius fuisse sententiæ. Et certè Augustinus epist. 167. ad Vitalem, inter duodecim præcipua fidei dogmata quæ recenset, hæc tria tanquam certa fide tenenda statuit contra Pelagianos: Scimus gratiam Dei non omnibus hominibus dari. Scimus his quibus datur, misericordia Dei gratuita dari. Scimus eis quibus non datur, iusto Dei iudicio non dari. Idem docet Fulgenius lib. 1. de verit. prædest. & gratiæ c. 15. vbi ait, gratiam Dei non omnibus hominibus generaliter dari, gratuitum quippe donum est gratia. Item Augustinus serm. 11. de verbis Apostoli hæc habet: Communis est omnibus natura, non gratia. Idem docet S. Thomas de verit. qu. 14. art. 15. his verbis: In nullo inueniuntur omnes homines conuenire, nisi in aliquo naturali. Hæc autem essent falsa, si in statu naturæ lapsæ daretur aliquod auxilium sufficiens, omnibus commune; nam omnes homines conuenirent non solum in aliquo naturali, sed etiam in aliquo gratuito & supernaturali, & omnibus*



bus communis esset talis gratia , sicut & natura . Vnde idem S. Doctor 2.<sup>o</sup> 2. qu. 2. art. 5. ad 1. loquens de auxilio gratiæ , sine qua homo non potest credere , sperare , & diligere , quod utique sufficiens est , ait illud aliquibus non dari in poenam præcedentis peccati , saltem originalis , ut Augustinus docet .

Ratio etiam suffragatur : In primis enim constat omnibus paruulis non conferri baptismum , qui in noua lege est vnicum medium seu remedium ad salutem paruulorum sufficiens , ut docent Theologi cum S. Thoma 3. p. q. 68 Nec valet si dicas , defectum & carentiam baptismi in illis paruulis qui sine illo decedunt , non oriri ex diuina prouidentia sic disponente , sed ex culpa vel negligentia parentum , aut ministrorum Ecclesiæ , qui huius remedij applicationem negligunt . Hoc enim expressè impugnat Augustinus de bono persec. cap. 12. his verbis : *Quid dicam quod paruulus aliquando , antequam illi per ministerium baptizantis succurri possit , expirat . Tlerumque enim festinantibus parentibus , & paratis ministris , ut baptismus paruulo deur , Deo tamen nolente , non datur , qui eum paruulum in hac vita non tenuit ut daretur .* Vnde Prosper in carmine de ingratis ait : *Multos sanctis genitoribus ortos , nullo saluari studio potuisse suorum .* Addo quod paruulis in utero matris morientibus , non est humana diligentia applicabilis baptismus : Tum quia tales pueri non possunt subijci operationi ministrorum Ecclesiæ : Tum etiam quia baptismi capaces non sunt infantes nondum nati , renasci enim non potest , nisi natus .

Dices, ex hoc probari quidem paruulos in illo statu morientes, carere quidem in se immediate & proximè, sed nō remotè & in suis causis, auxilio sufficienti ad salutem: quia possent matres sic se gubernare, quod non moreretur foetus in vteris earum, sed nasceretur, & capax remedij redderetur.

Sed contra: aliquando mors infantium in vteris matrum sic contingit, vt prorsus sit impossibile parentibus, humano modo, & secundum cursum causarum naturalium, illam impedire & vitare; vt patet primò, cum ex casu fortuito, & nullo modo præuiso, prægnans moritur, cadente v.g. super illam dormientem testò, vel fulmine ipsam percutiente. Secundò, cum ex debilitate virtutis seminalis, aut sanguinis corruptione, ita foetus generatur, quod parturiri non possit; aut cum ipsa foemina, ob debilissimam complexionem, caret virtute sufficienti ad pariendum. Quod si instes, & dicas, in illis casibus posse saltem modo diuino & per miraculum paruulis eiusmodi subueniri. Respondebo inde non posse inferri, quod etiam remotè & in suis causis habeat medium seu remedium sufficiens ad salutem; alioquin pari modo diceremur habere auxilium sufficiens ad volandum, siquidem per miraculum hoc fieri potest.

Hoc argumentum ex paruulorum exemplo desumptum, ita conuincens credidit Augustinus, vt Pelagianos alloquens dicat: *Vobis ora obstruunt & linguas premunt, qui loqui nondum valent.* Vnde lib. 4. contra Iulian. cap. 3. ex hoc infert non dari quoque omnibus

bus adultis auxilia ad salutem sufficientia: Deus enim (inquit) non est beneuolentior sanctissimis & impiissimis hominibus, propria voluntate repugnantibus, quam innocentissimis paruulis, qui propria voluntate non repugnant saluti, etsi originali culpa sint coinquinati. Et certè id constat primò in infidelibus quibus non proponuntur mysteria credenda: quomodo enim credere in eum possent de quo nihil audierunt? Quomodo autem audient sine prædicante? Accedit quod iuxta D. Thomam 2. 2. qu. 10. art. 2. dantur multi infideles negatiuè, id est tales in quibus infidelitas non sit peccatum: At nisi Deus illis deneget auxilia sufficientia ad credendum, infideles negatiuè non erunt, sed culpabiliter mysteria supernaturalia ignorabunt, quia poterunt credere, & ad id tenebuntur, & consequenter in non credendo peccabunt: Ergo illis negat Deus auxilia ad credendum sufficientia

Nec valet si dicas, quod licet infidelibus negatiuè non dentur auxilia proxima sufficientia ad credendum, & ideò in non credendo non peccent, dantur tamen illis auxilia remota, quibus si bene utantur, infallibiliter Deus alia vltiora ad credendum necessaria donabit. Non valet inquam: Tum quia habenti auxilium sufficiens remotum ad aliquem actum, etsi careat proximo, imputatur ad culpam omissio; quia habet in sua libera potestate proximum, & per consequens etiam ipsum actum: Ergo si hominibus ad quorum aures Euangelij prædicatio non peruenit, dentur auxilia sufficientia remota ad credendum, etsi

Et si negentur proxima, imputabitur eis ad culpam non credere, subindeque infideles negatiuè non erunt, sed priuatiuè & contrariè. Tum etiam, quia cum primus actus in ordine supernaturalis sit actus fidei, primum auxilium sufficiens ordinis supernaturalis, est auxilium sufficiens ad credendum, & consequenter carentes hoc auxilio, carent omni auxilio supernaturali, ac proinde etiam sufficienti remoto ad salutem.

Nec solum infidelibus, sed etiam fidelibus, interdum denegantur auxilia sufficientia, in pœnam præcedentium peccatorum, ut de pluribus peccatoribus excœcati existimant Caiétanus, & Bellarminus, & insinuant Augustinus & Isidorus: Ille enim lib. 3. de lib. arbit. cap. 18. sic habet: *Illa peccati pœna iustissima est, ut qui rectè facere cum posset, noluisset, amittat posse cum velit.* Iste verò lib. 2. de summo bono capit. 15. *Nonnulli (inquit) ita deserviuntur à Deo, ut deplorare mala sua non possint, etiam si velint.* Ratio etiam quam insinuat Bellarminus, id suadet: Gratia enim sufficiens consistit vel in quibusdam sanctis cogitationibus intellectus & pijs affectionibus voluntatis, ut docent Recentiores; vel potius, ut Thomistæ asserunt in motione, quadam, seu qualitate viali & supernaturali, ad actus illos potentias animæ applicante: manifestam est autem, & ipsa experientia constat, quod multi peccatores excœcati & obdurati, quando peccant, non semper sentiunt nec habent bonas illas cogitationes in mente, & illos pios affectus in corde; nec ullis conscientia moribus ac stimulis semper

excitantur ; imò potius in peccato sibi complacent , & delectantur in rebus pessimis , ac vulneribus suis, quæ intensissimè diligunt, sapissimè gloriantur : Ergo tunc gratia sufficienti carent .

Dicere autem cum aliquibus Recentioribus, dari interdum in homine cogitationes de quibus non cogitatur , & pijs affectus , qui non sentiuntur , inane commentum est , quod solide refutat Bellarminus lib. 2. de gratia & lib. 2. arbit. cap. 6. his verbis : *Dicunt aliqui Deum quidem perpetuò pulsare ad ostium cordis, & peccatores vocare, sed eos alijs rebus intentos non percipere vocationem Dei. Sed hæc responsio cum ipso experimento apertissimè pugnat, nam cum vocatio, pulsus, tractus, & excitatio illa Dei, sit actio nostra, quamvis non libera, nempe bona cogitatio, bonumque desiderium, repente ac dininitus immissum. Quomodo potest fieri, ut non sentiatur in nobis, si sit non solum in nobis, sed etiam à nobis.*

Ex hoc intelliges quod quando Concilium Senonense in decreto fidei dicit, Dei gratiam ita esse in promptu , ut ne momentum quidem prætereat, in quo Deus non stet ad ostium, & pulset, hoc debet intelligi moraliter, non mathematicè, id est non de omni instanti absolute & vniuersaliter ( non enim singulis instantibus Deus pias cogitationes immittit, ut experientia liquet ) sed de quolibet momento, in quo vrget grauis aliqua tentatio, vel instat alicuius præcepti supernaturalis obligatio, tunc enim non denegatur iustis auxilium sufficiens, sine quo tale præceptum impleri non potest, ut dicitur in secunda parte nostræ asser-

sertionis, quæ constat tum ex Tridentino sess. 6. capit. 11. damnante eos, qui dicunt, *Dei præcepta homini iustificato ad observandum esse impossibilia*: Tum etiam ex Constitutione Innocentij X. hæreseos damnantis eos qui dicunt: *Aliqua Dei præcepta iustis volentibus & conantibus esse impossibilia, & deesse illis gratiam qua impossibilia fiant*. Vnde quando Chrysostomus, Augustinus, & alij SS. Patres, asserunt gratiam defuisse Petro, cum Christum negauit, hoc non debet intelligi vniuersaliter de defectu omnis gratiæ tam sufficientis quam efficacis, sed de negatione gratiæ efficacis, quæ cum sit nobilissima & perfectissima species gratiæ, simpliciter & anatomastice gratia appellatur. Hanc enim docent SS. Patres, Deum nonnunquam iustis subtrahere, ut eorum superbiam & præsumptionem puniat, vel impediatur. Vnde egregie Bernardus serm. 54. in Cantica: *Argumentum superbia, priuatio est gratiæ*.

## §. II.

*Soluuntur obiectiones.*

**O**bjicies primò: Deus habet voluntatem antecedentem saluandi omnes homines, ut tract. præcedenti cap. 3. ostensum est: At ex vi huius voluntatis dantur auxilia ad salutem sufficientia: Ergo talia auxilia omnibus dantur. Vnde S. Thomas 3. contra Gent. cap. 159. *Deus quantum est in se, paratus est omnibus dare gratiam, vult enim omnes homines saluos fieri*. Et in cap. 12. epist. ad Hebr.

lect. 3. *Gratia nulli deest, sed omnibus, quantum in se est, se communicat.*

Confirmatur: Christus est caput omnium hominum, etiam infidelium, ut docet D. Thomas 3. p. qu. 8. art. 3. Sed de ratione capitis est in sua membra influere: Ergo Christus influit in omnes homines, etiam infideles, aliqua auxilia ad salutem sufficientia.

Ad obiectionem respondeo, Deum per voluntatem antecedentem saluandi omnes homines, dare omnibus auxilia ad salutem sufficientia, si ly *dare* accipiat prout significat idem quod præparare seu offerre in communi; nam pro omnibus instituit Sacramenta in Ecclesia & pro omnibus Christum misit, & illius merita decreuit, quæ sunt ex se sufficientia ad salutem: Secus autem prout ly *dare* idem sonat ac de facto conferre, seu prout significat ipsam intrinsecam receptionem auxiliorum. Nam sub illa voluntate comprehenduntur non solum adulti, sed etiam paruuli, ut docet Augustinus lib. 4. contra Iulian. cap. 8. & constat ex eo quod alias Christus paruulorum redemptor non esset, cum illius redemptio non excedat obiectiuè voluntatem generalem quam habet de salute hominum, utpote ex illa imperata: & tamen constat ex supra dictis, paruulos in utero matris morientes, carere omni auxilio seu medio ad salutem necessario; cum illis non possit applicari baptismus, qui in noua lege est vnicum remedium à Christo pro paruulis institutum. Vnde hoc argumentum, quod apud Aduersarios palmarium est, *omnes vires suas perdit in paruulis*, ut cum Augustino loquar, eo-

*rumque ora obstruunt, & linguas premunt, qui loqui nondum volent.*

Ad confirmationem dicendum, Christum non esse actu caput infidelium, sed solum in potentia, vt docet S. Thomas loco allegato in resp. ad 1. vnde non oportet quod Christus in eos actu influat aliquod auxilium supernaturale, sed sufficit quod post illud influere. Et isto tum in paruulis non baptizatis, tum in adultis reprobis, & vsu rationis carentibus, quorum Christus est caput, & tamen nullum auxilium supernaturale actu in eos influit. Vnde istud quoque argumentum vires suas perdit in paruulis.

Obijcies secundò: Nullus est peccator, quantumcumque obduratus, qui quandiu viuit non possit de peccatis agere pœnitentiam; nam vt ait S. Thomas 3. p. qu. 86. art. 1. *Dicere quod aliquod peccatum sit in hac vita, de quo quis pœnitere non possit, erroneum est:* Ergo nulli peccatori, quantumcumque obdurato, denegatur gratia sufficiens ad pœnitendum.

Respondeo duobus modis hominem posse dici potentem ad agendam pœnitentiam: Primò ab intrinseco, id est per principium sufficiens, intrinsecè in ipso receptum; & hoc modo regulariter loquendo peccatores sunt potentes ad agendam pœnitentiam, ratione auxilij sufficientis, quod, instante præcepto de agenda pœnitentia, à Deo recipiunt: Secundò ab extrinseco, potentia fundata in virtute gratiæ conferibilis à Deo, & in arbitrij libertate ad bonum & malum; & hoc se-



cūdo modo peccatores indurati , quibus Deus interdum in pœnam præcedentium peccatorum, auxilia sufficientia denegat , possunt dici potentes ad pœnitendum , non autem primo . Vnde verissimum est quod docet D. Thom. loco allegato , erroneum esse dicere quod aliquod peccatum sit in hac vita , de quo quis pœnitere non possit , potentia scilicet intrinseca , vel extrinseca , iam explicata .

Dices , Vt quis inexcusabiliter obligetur ad aliquem actum, debet intrinsecè potens ad illum eliciendum : Sed peccatores obdurati inexcusabiliter obligantur ad agendam pœnitentiam : Ergo debent esse ab intrinseco potentes ad pœnitendum , per auxilium sufficiens , intrinsecè in illis receptum .

Respondeo negando Maiorem, potest enim quis inexcusabiliter obligari ad aliquem actum , quamvis careat potentia intrinseca ad illum , si talis defectus & carentia ex eius culpa oriatur . Sicut ergo ebrius non excusatur ab homicidio vel adulterio , quod in ipsa ebrietate committit, quam sua culpa incurrit . Nec sacerdos qui breuiarium proiecit in mare , vt se redderet impotentem ad recitandum officium , ab eius obligatione eximitur , donec voluntariam illam projectionem , per pœnitentiam retractauerit . Ita similiter, quamvis obdurati careant potentia intrinseca, & auxilio sufficienti ad pœnitendum ; quia tamen in talem impotentiam ex voluntaria culpa inciderunt, & auxilio sufficienti in pœnam præcedentium peccatorum priuati sunt, nec à peccatis excusantur , nec ab obligatione pœnitendi eximuntur . Vnde Augustinus lib.

1. operis imperfecti in Julian. pag. 115. ait : *peccandi necessitatem , illius peccati esse pœnam , quod nulla necessitate commissum est .* Eandem doctrinam tradit D. Thomas 3. contra Gent. cap. 160. his verbis : *Quamuis illi qui in peccato sunt , vitare non possint per propriam potestatem , quin impedimentum gratiæ præstent vel ponant , nisi auxilio gratiæ præueniantur : nihilominus tamen hoc eis imputatur ad culpam , quia hic defectus ex culpa præcedente in eis relinquitur . Sicut ebrius ab homicidio non excusatur quod per ebrietatem committit quam sua culpa incurrit .*

Instabis : ex hac doctrina & solutione sequitur quod motus primò primi sensualitatis , ignorantia inuincibilis , & infidelitas negatiua , sint peccata , cùm proueniant ex culpa præcedenti , nempe peccato originali , quod est nobis voluntarium in capite .

Sed negatur sequela , vt enim idem S. Doctor rectè obseruat in 2. dist. 30. qu. 1. art. 2. hoc inter peccatum originale & actuale intercedit discrimen , quod cùm primum sit quædam culpa naturæ , ad illud sufficit voluntas in natura illa , seu in capite illius naturæ , istud verò , cùm sit culpa personalis , requirit voluntatem personæ . Quare cùm prædicta non sint nobis voluntaria voluntate personæ , sed duntaxat voluntate naturæ , vel capitis illius , non habent rationem culpæ , sed pœnæ . Vnde idem Doctor Angelicus 2. 2. qu. 10. art. 1. *Infidelitas , si accipiat secundum negationem puram , sicut in illis qui nihil audierunt de fide , non habet rationem peccati , sed magis pœnæ , quia talis*  
igno-

ignorantia diuinorum, ex peccato primi parentis consecuta est.

*Finis Tomi Primi Manualis  
Thomistarum.*









